

# სტუდენტ

გეორგიანული

ბიბლიოთეკა

(56)

1978 3







48657

მხატვრული თარგმანისა და ლიტერატურულ  
ურთიერთობათა მთავარი სარედაქციო  
კოლეგია



მთავარი რედაქტორი  
**შოთა ნიშნიანიძე**  
პ. მგ. მღვიანი  
**ნანა ღარიბა**

სარედაქციო კოლეგია

**მზია ბაქრაძე**  
**ბაჩანა ბრეგვაძე**  
**მაგალი თოდუა**  
**ნოდარ კაკაბაძე**  
**კარლო კალაძე**  
**მისეილ კვეციანი**  
**ზურაბ კვიციანი**  
**ვასუშტი კოტიშვილი**  
**კონსტანტინე ლორთქიფანიძე**  
**რომან მიმინოვილი**  
**ოთარ ნოდია**  
**ნიკო ყიასაშვილი**  
**თამაზ ჩხენკელი**

**«САУНДЖЕ»**

литературно-художественный альманах

на грузинском языке

№ 3  
1978

Главная редакционная коллегия художественного перевода и литературных взаимосвязей

Тбилиси  
улица Шалвы Дадмани, 2

გარეკანზე: გავრილა ვაუჩინაძე. სვეტლოვოროსკი. ჟიმიკოსთა სასახლე

მხატვრული რედაქტორი ლ. ცუცქერიძე. მხატვარი ა. ვართაგავა. ტექრედაქტორი რ. იმნაიშვილი

გადაეცა წარმოებას 20/IV-78 წ. ხელმოწერილია დასაბეჭდად 21/VI-78 წ. ქალაქის ზომა 70X108<sup>1</sup>/<sub>16</sub>. სააღრ.-საგამომ. თაბახი 17,1. ნაბეჭდი თაბახი 21. ტირაჟი 10.000. შეკვ. № 518.

ფასი 1 მან.

საქართველოს სსრ გამსახკომის საგამომცემლო-პოლიგრაფიული გაერთიანება „განათლების“ კომბინატი, მარჯანიშვილის ქ. № 5.

Комбинат издательско-полиграфического объединения «Ганатлеба» Госкомиздата Грузинской ССР, Тбилиси, ул. Марджанишвили, 5.



# მაქს ფრიში

## ვიქნები თუნდაც განტენბაინი

ეროვნული  
ბიბლიოთეკა

### რომანი

გერმანულიდან თარგმნა ღალი ზანჯიკიძე

შვეიცარიელი პროზაიკოსისა და დრამატურგის მაქს ფრიშის სახელი ქართველი მკითხველისათვის საკმაოდ კარგად არის ცნობილი. ქართულად თარგმნილია მისი რომანი „ჰომო ფაბერი“ და რამდენიმე მოთხრობა. მაქს ფრიში მსოფლიო სახელი მოიპოვა ჯერ როგორც დრამატურგმა, შემდეგ კი როგორც პროზაიკოსმა. მისი პიესები: „ბიდერმანი და ცეცხლის წამკიდებლები“, „ჩინური კედელი“, „ანდორა“, „გრაფი ოედერლანდი“, „დონ ჟუანი ანუ გეომეტრიის სიყვარული“ და მრავალი სხვა წარმატებით იდგმება მსოფლიო თეატრების სცენაზე. მრავალ ენაზეა თარგმნილი ფრიშის რომანები „შტილერი“, „ჰომო ფაბერი“, „ვიქნები თუნდაც განტენბაინი“, მის შემოქმედებაზე იწერება გამოკვლევები.

მაქს ფრიში პროფესიით არქიტექტორია, რაც უეჭველად შელავნდება გარესამყაროს მისეულ აღქმაში — თითქმის ყველა ნაწარმოებში ვხედავთ არქიტექტორის პროფესიული თვალით დანახულ ჩვეულებრივ შენობებსა თუ კულტურის ძეგლებს. მწერალი დღეს 67 წლისაა, ცხოვრობს ციურიხის მახლობლად, ბევრს მოგზაურობს და კარგა ხნითაც ცხოვრობს ხოლმე სხვადასხვა ქვეყანაში. ნანახი თუ განცდილი ხან უშუალო აღწერის სახით შემოდის მის ნაწარმოებებში (მაგალითად „ჰომო ფაბერში“ აღწერილია ჰავანა, ათენი, აცტეკებისა და მაიას პირამიდები, „განტენბაინში“ — აკროპოლი და სხვა), ხან კი მხოლოდ გაიხსენებს ხოლმე. მოგზაურობის შთაბეჭდილებების გარდა მწერალი ხშირად აქვეყნებს პუბლიცისტურ წერილებს, გამოდის სიტყვით ამა თუ იმ თარიღისა თუ მოვლენის გამო, ილაშქრებს ომის წინააღმდეგ, წერს სტატიებს საკუთარ ნაწარმოებებზეც და თავის თანამედროვე მწერალთა შემოქმედებაზეც.

მაქს ფრიში უაღრესად თანამედროვე მწერალია ამ სიტყვის მრავალმხრივი გაგებით. მისი გმირები ჩვენი თანამედროვენი არიან, მწერალი გვიხატავს მათ მძაფრ ვნებებს, თანამედროვე სამყაროში ადამიანის სულიერ სიმართლას. მაქს ფრიშის გმირები თითქმის ყოველთვის ფიქრობენ და ბჭობენ ზოგად-საკაცობრიო პრობლემებზე, მწერლის მხატვრული სამყარო, შეიძლება ითქვას, მოაზროვნე, ინტელექტუალური ადამიანებითაა დასახლებული. ასეა რომანშიც „ვიქნები თუნდაც განტენბაინი“. ეს რომანი 1964 წელს გამოქვეყნდა. მოქმედება ვითარდება ხან განტენბაინის, ხან ენდერლინის, ხან სვობოდას ირგვლივ. თხრობა პირველი პირით მიმდინარეობს. ეს ფორმა, როგორც ჩანს, თანამედროვე



ადამიანის სულიერი სამყაროს გამოვლენის საუკეთესო ფორმა გამოდგა, იმდენად ხშირად მიმართავენ მას XX საუკუნის მწერლები. თვითონ მაქს ფრიში წერს: „რა თქმა უნდა, პირველი პირით თხრობა მწერლის პირადი „მეს“ გამოვლენა არ არის, მაგრამ ალბათ მწერალი კი უნდა იყოს, რომ იცოდეს, ყოველი პიროვნება, რომელიც თავის თავს სიტყვაში გააცხადებს, უკვე როლს თამაშობს, ყოველთვის, ყველგან, ცხოვრებაშიც, ამ წუთშიაც როლს თამაშობს. ყოველი ადამიანი (ამ შემთხვევაში ვგულისხმობ არა მწერალს, არამედ მის გმირს) ადრე თუ გვიან თხზავს ისტორიას, რომელსაც ხშირად დიდი მსხვერპლის ფასადაც თავის საკუთარი ცხოვრების ისტორიად მიიჩნევს. იქნებ ერთი კი არა, რამდენიმე ისტორიაც კი შეთხზას, რომლებიც სახელებითა და თარიღებით ისე იქნება დახუნძლული, რომ მის ნამდვილობაში თითქოს ეჭვიც არ უნდა შეგვეპაროს. მაგრამ ყველა ისტორია, ჩემი აზრით, მაინც გამონათგონია და ამის გამო იოლად შესაცვლელიც“.

წინამდებარე რომანი ამ თვალსაზრისზეა აგებული. მწერალი ეძებს რომანის პერსონაჟებს და ცხოვრებისეულ მოვლენებს ხან ერთს აზომებს ტანსაცმელივით და ხან მეორეს. რომანის დედააზრი ასეთია: მსგავსი ამბავი შეიძლება ერთსაც შემთხვეოდეს და მეორესაც, თვით ესა თუ ის ამბავი კი ასეც შეიძლება ბოდა მომხდარიყო და ისეც, მწერლის ეს ჩანაფიქრი რომანის სათაურშიც მქლავნდება და ირონიით შეფერილ ენობრივ ქსოვილშიც.

მაქს ფრიში საერთოდ სადა ენით წერს. სადა ენობრივ ფონზე უფრო მკაფიოდ ჩანს ირონია. მისი პროზისათვის დამახასიათებელია ელიფსები, უზმნო წინადადებები, ლაკონური, ქვეტექსტით დატვირთული დიალოგები. ზოგან დიალოგი იმდენად ირეალურია, რომ მწერალი მის დიალოგის ფორმასაც კი არ აძლევს. ვარაუდებზე აგებული სიუჟეტი მწერალს ხშირად აიძულებს პერსონაჟები ნაცვალსახელებით მოიხსენიოს. ქართულში გრამატიკული სქესის უქონლობა აძნელებს ასეთი ადგილების თარგმნას. იქ, სადაც მწერალს მდებრობითი და მამრობითი სქესის ნაცვალსახელები აქვს, ქართულ თარგმანში „ქალი“ და „მამაკაცი“ უნდა ჩაისვას, რაც ასე თუ ისე უცვლის ეპიზოდს ელფერს.

თანამედროვე პროზა ვეღარ იტანს უხვი ფერებითა და ეპითეტებით შემკულ პეიზაჟს, ამას საუცხოოდ გრძნობს მაქს ფრიში. მისი ძუნწი შტრიხებით მოხაზული ურბანისტული თუ სოფლური პეიზაჟები, „თანამედროვე მასალით“ აგებული შედარებები, უჩვეულო რაკურსით დანახული საგნები, ბუნების ფერებისა და ხმების შერწყმა დასამახსოვრებელ სურათებს ჰქმნის. მაქს ფრიშის სტილის თუნდაც მოკლე დახასიათება სრული ვერ იქნება, თუ არ აღინიშნა მისი პროზის რიტმულობა, თვალშისაცემი კი არა, პროზას ცუდ ლექსს რომ ამსგავსებს ხოლმე, არამედ ფარული, ნერვიულად დამუხტული რიტმი, რომელიც ფრაზის სიგრძე-სიმოკლისა და ინტონაციის ცვალებადობას ემყარება და ფრიშის პროზას დინამიკასა და ექსპრესიას ანიჭებს.

მთარბმწელისაგან

ამ ამბის შემსწრე შემთხვევითი ნაცნობები, ვინც ბოლოს ელაპარაკნენ მას, ამბობენ, იმ საღამოს უჩვეულო არაფერი შეგვინიშნავს, ჩვეულებისამებრ მხიარული იყო და ქედმაღლობის ნიშანწყალი არ ემჩნეოდა. მშვენივრად ივახშმეს, თუმცა სუფრას მდიდრული არ ეთქმოდა. მეინახენი ენამჭევრობდნენ, უფრო სწორად, ეს გახლდათ ლაყბობა საკმაოდ მაღალ დონეზე. სხვებზე ნაკლებს, ყოველ შემთხვევაში თავიდან მაინც,

ბ. მარტსუხ სახ. ს.პ. სსრ  
სახმ-მედიკ. რესპუბლ.  
ბ ი ბ - 1 0 0 0 1 0 0 1



მგონი, არც ის ლაპარაკობდა. ვილაცამ თქვა, სხვას რომ უსმენდა, ისეთი დაღლილი მზერა ჰქონდა, გამიკვირდაო. შემდეგ, სხვებს რომ არ გამოთიშოდა, დროდადრო, საუბარში ჩაერეოდა ხოლმე, თურმე ენამახვილობდა კიდევ, ერთი სიტყვით, ჩვეულებრივ ეჭირა თავი. შემდეგ მთელ ჯგუფს ბარში გადაუნაცვლებია. იქ ჯერ პალტოგაუხდელნი მდგარან დახლთან, მერე კი მისთვის უცნობ ხალხს მიჰკედლებიან. ალბათ იმიტომაც აღარ ამოუღია ხმა. მხოლოდ ყავა მოუთხოვია. შემდეგ, ტუალეტიდან რომ მობრუნებულა, სახეზე ფერი აღარ ედოო, ამბობენ, ოღონდ მისი სიფითრე მხოლოდ მაშინ შეუმჩნევიათ, როცა სუფრასთან აღარ დამჯდარა, ბოდიში მოუხდია, შინ უნდა წავიდე, რაღაც კარგად ვერა ვარო. ყველას ნაუცბათევად დამშვიდობებია, ხელი არავისთვის ჩამოურთმევია, ალბათ არ უნდოდა მათთვის საუბარი გაეწყვეტინებინა. ვილაცას კი უთქვამს, მოგვიცადე, არც ჩვენ ვაპირებთ აქ დაბერებასო, მაგრამ ვერ დაუყოლიებიათ. მეგარდერობეს როგორც იქნა, მოუტანია პალტო, მაგრამ არ ჩაუცვამს, მკლავზე გადაუკიდია, თითქოს ძალიან ეჩქარებოდაო. ყველა ამბობს, ბევრი არ დაუღევია, არც კი დაუჭერეთ, შეუძლოდ ვარო, რომ თქვა. ისიც კი ვუთხარით, შეუძლოდ ყოფნას ხომ არ იმიზეზებ-თქო. ამაზე გაღიმებია. შეიძლება სხვაგანაც ჰქონდა დათქმული პაემანი. მანდილოსნები წაქლესავებიან, ვეჭვიანობთო. თითქოს შეუფერებია მათი ეჭვიანობა, მაგრამ სიტყვა აღარ დაუძრავს. იძულებულნი გავხდით მარტო გაგვეშვა, ჯერ ხომ შეუღამეც არ იყოო. როცა შევნიშნეთ, მაგიდაზე ჩიბუხი დარჩენოდა, დადევნება აღარ ღირდა, მაინც ველარ დავეწეოდითო... ეტყობა, სიკვდილმა მაშინ მოუხსწრო, როცა ის იყო ჩაჯდა თავის მანქანაში; ფარები ენთო, ძრავაც ჩართული იყო. უკანა ლიფლიფა ისე ახამხამებდა თვალს, თითქოს მანქანა სადაცაა შუა ქუჩაში უნდა გავიდესო. იგი წელში გამართული იჯდა, თავი უკან გადაეგდო, ორივე ხელით ჩამოგლეჯილ საყელოს ჩაფრენოდა. ასე დახვდა პოლიციელს, რომელიც მანქანასთან მისულა, მოტორი ამუშავებულია და მანქანა რატომ აღარ იძვრისო. სიკვდილმა, ეტყობა, უეცრად უწია: ვინც მის სიკვდილს არ შესწრებია, ამბობს, იოლი სიკვდილით მომკვდარაო, — ეს კი ველარ წარმომიდგენია, — პირდაპირ ნანატრი სიკვდილიაო...

წარმომიდგენია:

ასეთი შეიძლებოდა ყოფილიყო ენდერლინის აღსასრული.

ან იქნებ განტენბაინისა?

არა, უფრო ენდერლინისა.

დიახ, მეც ვამბობ, იმ კაცს ვიცნობდი-მეთქი. მერე, რას ნიშნავს ეს? მე იგი წარმოდგენილი მყავდა, ახლა კი ჩემს წარმოდგენებს ძველმანებივით მესვრის უკანვე; ამიერიდან მას აღარც ისტორია სჭირდება და აღარც ტანისამოსი არგია რაშიმე.

ბარში ვზივარ. ნაშუადღევია, ამიტომ ბარში ჩემს მეტი არავინაა და ბარმენი მე მიყვება თავისი ცხოვრების ამბავს. კაცმა რომ თქვას, რისთვის? მიყვება და მეც ვუსმენ, ხან ვსვამ, ხანაც ვაბოლებ; მე ვილაცას ველოდები და გაზეთს ვკითხულობ. დიახ, ასე იყო ეს ამბავი! — ამბობს ბარმენი და თან ჭიქებს რეცხავს. ნამდვილ ამბავს იციყვებითო. მჯერა-მეთქი, ვეუბნები. იგი გარეცხილ ჭიქებს ამწრალებს. დიახ, ასე იყო ეს ამბავი! — ერთხელ კიდევ გა-



იმეორა მან. ვსვამ და ვფიქრობ: ადამიანს რაღაც გამოცდილება შეუძენია და ახლა იმ გამოცდილებას შესატყვის ქარვას უძებნის...

იგი ჩემი ხნისა იყო. იმ წუთიდანვე ავედევნე, როგორც კი მანქანიდან გადმოვიდა, — მანქანა, თუ არ ვცდები, სიტროენი იყო, — მანქანის კარი მიკეტა და გასაღებების ასხმულა შარვლის ჯიბეში ჩაიღო. მე პერსონაჟის საერთო იერსახე მჭირდებოდა. ისე კი, იმ დღეს მუზეუმის მონახულებას ვაპირებდი, ჯერ ვისაუზმებდი, მერე მუზეუმში წავიდოდი, რადგან სხვა წვრილმანი საქმეები მოგვარებული მქონდა და ამ ქალაქშიაც არავის ვიცნობდი. ის რომ თვალში მომხვდა, ესეც შემთხვევითობას უნდა მიეწეროს, არც კი ვიცი, რით მიიპყრო ჩემი ყურადღება: სიგარეტს მოუკიდა და თავი ისე გაიქნია, თითქოს ტანი ეფხანებაო. ეს სწორედ იმ წუთში შევამჩნიე, როცა მე თვითონ დავაპირე სიგარეტის გაბოლება. სიგარეტს თავი გავანებე. უცნობს ისე ავედევნე, რომ ჯერ სახეზე არ შემეხედა მისთვის, გეზი მარჯვნივსაკენ ავიღე, სიგარეტი უყოყმანოდ, მაგრამ აუჩქარებლად გადავაგდე. ეს იყო დილით, სორბონის მიდამოებში. თითქოს ტანმა რაღაც უგრძნო, ისევ მანქანასთან მიბრუნდა, ალბათ დაეჭვდა, კარი ნამდვილად დაკეტიე თუ არაო და გასაღებების ასხმულას სულ სხვა ჯიბეში დაუწყო ძებნა. ამასობაში მე ვითომ აფიშას ვათვალიერებდი, თან მისგან რომ განვსხვავებულიყავი, ჩიბუხს მოვუკიდე, უკვე შიში შემეპარა, ვაითუ ისევ მანქანაში ჩაჯდეს და წავიდეს, სანამ მე აფიშასთან ვდგავარ და ვითომ ტნპ-ს<sup>1</sup> რეპერტუარს ვათვალიერებ-მეთქი. მაგრამ მალე კარის მიჯახუნების ხმა გავიგონე და შემოვბრუნდი. იგი ფეხით მიდიოდა და მეც შემეძლო ავედევნებოდი. ვაკვირდებოდი მის სიარულს, მის ჩაცმულობას, მის მიხრა-მოხრას. მხოლოდ ის გეცემოდა თვალში, რომ სიარულისას ნიჩბებივით უსვამდა მკლავებს. აშკარად ეჩქარებოდა. კვარტალიდან კვარტალამდე კუდში მივდევდი. სენისკენ მივდიოდი. მივდევდი თუნდაც იმიტომ, რომ ამ ქალაქში სხვა საქმე არაფერი მქონდა. მას ახლა ტყავის პორტფელი ეჭირა ხელში. როგორც მერე გამახსენდა, პირველად რომ გადმოვიდა მანქანიდან, მაშინ პორტფელი ხელში არა ჰქონია.

გადასასვლელზე ჩემსკენ მომავალმა ხალხის ნაკადმა წამლეკა და იგი თვალიდან დამეკარგა. ის იყო ხელი ჩავიქნიე, რომ ახლა სხვა ნაკადმა გამიგდო წინ, რომელსაც წითელი შუქის ანთებამდე უნდოდა მოესწრო მეორე მხარეზე გადასვლა. გზა ჩემდა უნებურად განვაგრძე. მშვენივრად ვიცი, რომ აქედან არაფერი გამოვა. ადრე თუ გვიან ნიშანში ამოღებული კაცი დამეკარგება ან რომელიმე კარებში გაუჩინარდება, ან ტაქსს დაუქნევს უცებ ხელს და სანამ მეც თავისუფალ მანქანას ვიშოვიდე, დადევნებას ყოველგვარი აზრი დაეკარგება. მეც რაღა დამრჩენია, უაზრო დევნა-სირბილისაგან ქანცაწყვეტილი სასტუმროში უნდა მივბრუნდე და ტანთგაუხდელი, ფეხსაცმლიანად მივეგდო საწოლზე. ახირებაც ამას ჰქვია! ის იყო ბედს დავმორჩილდი და გულში მიხაროდა კიდევ, ამ დევნას გადავრჩი-მეთქი, რომ ისევ დავინახე იგი, ხელების ქნევაზე ვიცანი. დილა იყო, მას კი ისეთი მუქი ფერის კოსტუმი ეცვა, თითქოს ეს-ესაა ოპერიდან გამოსულაო. იქნებ უცნობს იმ დილის მოგონებამაც მიმაჯაჭვა, მეც ასევე მუქ კოსტუმში გამოწყობილი ერთი ქალის ბინიდან რომ ვბრუნდებოდი. იგი ჯერ კიდევ ვერ გრძნობდა ან უკვე ველარ გრძნობდა, რომ

<sup>1</sup> "ტეატრ ნუვო პარიზიენ" — პარიზის ერთ-ერთი თეატრი.



მივსდევდი. სხვათა შორის, ისიც ჩემსავით უქულოდ მიდიოდა ქუჩაში. მართალია ჩქარობდა, მაგრამ ჩემზე სწრაფად მაინც ვერ მიიწევდა წინ. მეც რომ მისთვის ამეწყო ფეხი, არ ივარგებდა — გამვლელთა ყურადღებას მივიპყრობდი. ამიტომ ისე მივდიოდი, ვითომ სხვაზე მეტად არც მე მეჩქარებოდა. ასე იგებდა იგი კვარტალიდან კვარტალამდე მცირე მანძილს, მით უმეტეს, რომ მზად ვიყავი, უაზრო დევნისათვის თავი დამენებებინა, მაგრამ მუქნიშანთან კვლავ და კვლავ ერთმანეთის გვერდით აღმოვჩნდებოდით ხოლმე. სახეზე ჯერ კიდევ არ შემეხედა მისთვის. ის იყო ერთხელ ბრბოში გავძვერ-გამოძვეერი და გვერდში ამოვუდექი, რომ მან პირი მიიბრუნა. ერთხელ ვიტრინის წინ შეჩერდა და მისი სახის ანარეკლი დავინახე, მაგრამ აღარ გამოვლაპარაკებინარ. სახეს რა თავში ვიხლიდი, ჰოდა მეც პირველსავე შემხვედრ ბარში შევუხვიე და საუბრეს შევუდექი...

მეორე კაცს, ვისაც თვალი დავადგი, ისეთი კანი ჰქონდა, როგორიც მხოლოდ ამერიკელებსა აქვთ ხოლმე — დაჭორფლილი რძის მსგავსი, საპონივით სლიპინა კანი. მაინც ავედევნე. ზურგიდან, ჩემი ჭკუით, ოცდათხუთმეტი წელი მივეცი. მშვენიერი ასაკია. ის იყო უკან დასაბრუნებელი ბილეთი დავიჯავშნე და ვაპირებდი გაფრენამდე დარჩენილი საათები თუნდაც სენტრალ-პარკში ხეტიალში გამეტარებინა, რომ იგი დამეჯახა. Sorry<sup>1</sup>, — მითხრა მან. შემოვტრიალდი, მაგრამ მის ზურგსღა მოვკარი თვალი. ფიქალისფერი პალტო ეცვა. დავინტერესდი, აბა საით წამიყვანს-მეთქი. ხანდახან მეჩვენებოდა, რომ თვითონაც არ იცოდა, სად მიდიოდა, ისე ზოზინობდა, გეგონებოდათ, ამ მანჰატენში რალაც დაჰკარგვიაო. რაც უფრო დიდხანს მივდიოდი, მით უფრო მომწონდა. ვფიქრობდი, რით ირჩენს თავს, სად მუშაობს, როგორ ცხოვრობს, რა გამოუცდია ცხოვრებაში და რა არა, რას ფიქრობს, როცა ასე გაერევა მილიონობით უცხო ხალხში, თავი რად მიაჩნია-მეთქი. ფიქალისფერ პალტოს და უცნობის ქერა თავს კარგად ვხედავდი. ის იყო 34-ე ქუჩა გადავჭვრით, რომ იგი უცებ შეჩერდა და სიგარეტს მოუკიდა. ეს ამბავი გვიან შევამჩნიე, თავს ანგარიში ვერ მივეცი და სანამ პირველ ნაფაზს დაარტყამდა, კარგა დიდ მანძილზე გავცდი, თორემ ამ შემთხვევას ხელიდან არ გავუშვებდი, ზრდილობიანად შევთავაზებდი კვესს და საუბარსაც გავუბამდი. როცა შემოვტრიალდი, ერთი ღერი თმაც ველარ დაჯუნახე თავზე და რა თქმა უნდა, გულში ვთქვი, ეს იგივე კაცი არ იქნება, ის ალბათ ბრბოში დამეკარგა და სხვაში შემეცვალა, ფიქალისფერ პალტოებს რა გამოლევს ამ ქვეყანაზე-მეთქი. ეს კი გავიფიქრე, მაგრამ მაინც შევცბუნდი, როცა უცნობი ორმოცდაათი წლის კაცი აღმოჩნდა. ამას კი აღარ მოველოდი.

— Can I help you?<sup>2</sup> — მკითხა მან და რაკი დახმარება არ მჭირდებოდა, თავისი გზით წავიდა და მხრებსზემთ გაშლილი ბოლი თან გაიყოლა.

ლურჯად მოხასხასე მზიანი დღე იდგა, მაგრამ ჩრდილში სუსხი ძალობდა. ქარიც უბერავდა. მზედაფრქვეული ცათამბჯენები ჩრდილის მხარეს მოქცეულ მინის კედლებში ირეკლებოდნენ, ხოლო მათ შორის ხეობასავით ჩაღრმავებულ ქუჩებში ისე ციოდა, არ გაიძლებოდა. მეჩვე რა, ყოფილიყო ის კაცი ორმოცდაათი წლის. მე ხომ მისი სახე მჭირდებოდა და ვითომ რა დაშავდე-

<sup>1</sup> უკაცრავად (ინგლ.).

<sup>2</sup> შემიძლია დაგეხმაროთ? (ინგლ.).



ბოდა, ეს სახე მელოტიისა თუ იქნებოდა. კარგი იყო, ერთხელ კიდევ დამენახა წინადან, მაგრამ აღარ დამცალდა. იგი მის წინამორბედ ახალგაზრდა კაცზე უფრო დინჯად მიდიოდა, მაგრამ მაინც უეცრად გაუჩინარდა ერთ-ერთი შენობის კარებში, მეც მივყევი — სულ ორი-სამი წამის მეტი არ დამიყოფნებია, მაგრამ მხოლოდ ამის დანახვა მოვასწარი: იგი სწორედ იმ ლიფტში შევარდა, რომლის ბრინჯაოს კარები ნელ-ნელა იხურებოდა (კრემატორიუმის კარებივით). ლიფტს ლივრეიანი ზანგი ემსახურებოდა. სიგარეტი მეც სილით სავსე ურნაში ჩავაგდე და მეორე ლიფტში შევვარდი. ლიფტის კაბინაში ისევე ვიდექი, როგორც ყველა იდგა, მაგრამ სხვები შემოდიოდნენ თუ არა, თავიანთი სართულის ნომერს ასახელებდნენ და ლიფტიდან უმაღლვე გადიოდნენ, როგორც კი მელიფტე შესატყვის ნომერს დაიძახებდა. მე კი ვიდექი და შევყურებდი, როგორ იხურებოდა სართულების მაჩვენებელი ნომრები. ბოლოს მე და ზანგიდა შევრჩით ლიფტს. მან მკითხა, თქვენ სად იხებებთ გადმოსვლასო — შენობა ორმოცდამეცხრამეტე სართულიანი გახლდათ — და მე მხრები ავიჩეჩე...

ადამიანს რაღაც გამოცდილება შეუძენია და ახლა ამ გამოცდილების შესატყვის ისტორიას დაეძებს. ეტყობა, კაცი ისე ვერ იცოცხლებს ამ ქვეყანაზე, თავის გამოცდილებას რაიმე ისტორია თუ არ მოარგო, და ხანდახან მეჩვენება, ვიღაც სხვასა აქვს-მეთქი მორგებული ზუსტად ჩემი ცხოვრებისეული გამოცდილების შესატყვისი ისტორია...

(არა, ოღონდ ბარმენი არ არის ის კაცი).

შვიდი იქნებოდა დაწყებული, როცა ღია ფანჯარაში კლდესავით აისვეტა რიჟრაჟი, რუხი და დაუბზარავი გრანიტი — უეცრად ამ გრანიტიდან უხმო ყვირილივით გამოიჭრა პირზე დუჟიმოდგარი, ფართოდ თვალგახელილი ცხენის თავი. ჭიხვინებს ცხენი, მაგრამ ხმა არ ამოსდის, ერთი კი სცადა სულიერმა გრანიტიდან ამოხტომა, მაგრამ პირველივე ცდაზე გაუცუდდა ნახტომი და მე ვხედავ, რომ ვერც ვერასდროს შესძლებს ამოხტომას, მხოლოდ ფაფარაშლილი თავი გამოუჩრია გრანიტიდან, გაშმაგებულია, შეძრწუნებული. სხეული გრანიტში ჩარჩენია უსასოოდ, გადარეული თეთრი თვალეები შემომყურებენ, შეწყალებას ითხოვენ თითქოს.

შუქი ავანთე.

გამოფხიზლებული ვიწექი:

ვხედავდი:

წითელი ტერაკოტის უეცრად გაქვავებულ უსიცოცხლო ფაფარს, ტერაკოტზე თუ ხეზე ამოკვეთილ ცარცივით თეთრ კბილებსა და შავად მოლაპლაპე ნესტოებს. ყველაფერი ოსტატურადაა გაფერადებული. ცხენის თავი უხმოდ იხევს კლდეში უკან. კლდე უხმაუროდ იხურება, დაუბზარავია, როგორც ფანჯარაში ასვეტილი რიჟრაჟი, რუხი, როგორც გოტჰარდის გრანიტი. ქვევით, შორს, ღრმა ხეობაში გზატკეცილი მოჩანს, მოსახვევები ჭრელ-ჭრელი მანქანებითაა სავსე, ყველა მანქანა იერუსალიმისაკენ მიჰქრის (არ ვიცი, საიდან ვიცი ეს!), პატარ-პატარა ჭრელ-ჭრელი მანქანები სათამაშოებს ჰგავს.

ზარი დავრეკე. გარეთ წვიმიდა.

თვალგახელილი ვიწექი.



როგორც იქნა, მოვიდა მედლა და მკითხა, რა გნებავთო. მე აბაზანა მოვი-  
თხოვე, ეს კი ამ დილაადრიან ექიმის ნებართვის გარეშე შეუძლებელი გახლ-  
დათ. სამაგიეროდ მედლამ ხილის წვენი მომიტანა და მითხრა, ჭკვიანად იყა-  
ვითო. უნდა იძინოთ, თუ გინდათ ხვალ კარგი მაჩვენებლები გქონდეთ და შა-  
ბათს საავადმყოფოდან გაგწერონო, დასძინა და შუქი ჩააქრო...

წარმომიდგენია:

როცა ახალგაზრდა მორიგე მედლა, ეროვნებით ლატვიელი (მას ელკე  
ჰქვია), ბოლოს და ბოლოს შემოდის ოთახში, საწოლი ცარიელი დაუხვდება.  
ავადმყოფს თვითონ მოუშვია აბაზანაში წყალი. გაოფლიანებულა და ამიტომ  
დაუპირებია ბანაობა. ახლა შიშველი დგას ორთქლის ღრუბელში და ესმის  
ელკეს საყვედურები. იგი ჯერ ვერ ხედავს შეშფოთებულ მედლას, გაცხარე-  
ბული რომ უმტკიცებს, თქვენ თვითონ არ იცით, რას სჩადიხართო, და მხო-  
ლოდ მაშინ ხვდება, შიშველი ვყოფილვარო, როცა ქალი ფანჯარას კეტავს.  
თანდათან იფანტება ოხშივარი, რომელსაც სარკეც დაუბურავს. იგი იღიმება.  
ახლავე გადაკეტეთ ონკანი და ლოგინში ჩაწექითო, ეუბნება ქალი და რაკი  
ავადმყოფი ხელს არ ანძრევს, თვითონ აპირებს ონკანის გადაკეტვას. მაგრამ  
ტიტიკანა გზას უღობავს. კაცს იმ წუთში არაფერი აქვს ხელთ, რომ ქალიშ-  
ვილს შიშველი არ დაენახოს და ხუმრობით ცდილობს თავის შველას: მე ადა-  
მი ვარ! — ამბობს იგი, მაგრამ ქალს არ ეცინება ამ ხუმრობაზე. თვითონ რა-  
ტომ ეცინება არ იცის. მედლა პროფესიული ტონით ეკითხება, ამ დროს ბანა-  
ობა რატომ მოისურვებთ და ისიც ექიმის ნებართვის გარეშეო. შემდეგ ქალიშ-  
ვილი მარდად იღებს კარადიდან ხაოიან პირსახოცს, რათა ბოლო მოუღოს ამ  
უმსგავსობას. უსიტყვოდ უწვდის პირსახოცს ავადმყოფს, არ გაცივდეთო, ის  
კი ისე შეჰყურებს, თითქოს პირველად ხედავდეს ელკეს. ქალიშვილს წყლის-  
ფერი თუ მომწვანო თვალები აქვს. იგი მხრებში სჭიდებს ქალიშვილს ხელებს.  
ქალიშვილს უფერული თმა და დიდრონი კბილები აქვს. ეს რა ამბავიაო, ამ-  
ბობს იგი, ავადმყოფს კი ორივე ხელი ქალიშვილისათვის ჩაუვლია მხრებში და  
**ესმის თავისივე ხმა: მე ვარ ადამი და შენ ხარ ევა!** ეს ჯერ კიდევ ხუმრობას  
ჰგავს, ქალიშვილი ღამის მყუდროებაში ჩაფლულ საავადმყოფოში დაყვირებას  
ვერ ბედავს, მხოლოდ ზარს აჭერს ხელს, მეორე ხელით კი ჭკუიდან გადა-  
სულს იგერიებს. ქალი უკვე შიშმა აიტანა, რადგან მამაკაცმა წითელი ჯვრით  
დამშვენებული ცისფერი ჩაჩი სათუთად მოხადა თავიდან. ქალიშვილის სახეს  
იგი რამდენიმე კვირაა იცნობს, სამაგიეროდ, თმას მისთვის ახალი, მისი უფე-  
რული, ამ წუთში ჩამოშლილი და აწეწილი თმა. მას სულაც არ უნდა ელკეს  
ტივილი მიაყენოს, მხოლოდ უნდა უთხრას: მე ვარ ადამი და შენ ხარ ევა!  
თან თმებში ისე სჭიდებს ხელს, რომ ქალიშვილი თავს ვეღარ ანძრევს. ეეს-  
მის ჩემი? ეკითხება იგი. საკმარისი იყო ერთი გაეღიმა ღამის მორიგედ გამო-  
ცხადებულ ევას, ამ ცხენისუბიან, მწვანეთვალემა სტუდენტს, ზღვისპირელ  
გლეხის გოგოს, რომ კვლავ ხუმრობად ქცეულიყო ეს ყველაფერი, მაგრამ იგი  
გაშტერებული მისჩერებია ავადმყოფს. მგონი, კაცმა არც იცის, რომ შიშვე-  
ლია. მედლა აღარ იგერიებს ავადმყოფს, თუმცა იგი ამას ვერცა გრძნობს,  
მედლა ახლა მხოლოდ თავისი ცისფერი ჩაჩის ხელში ჩაგდებას ღამობს, მაგ-  
რამ ამოდ, თუმცა ამასობაში დერეფანში ღამის მორიგე ექიმიც გამოჩნდა.  
ექიმი, რაღა თქმა უნდა, ვერაფერს მიმხვდარა, ავადმყოფი კი უცხო ენის მას-  
წავლებელივით დაუსრულებლად იმეორებს ერთსა და იმავეს, თითქოს უნდა



მოწაფეს ჩაუბეჭდოსო ტვინში: „მე ვარ ადამი და შენ ხარ ევა, მე ვარ ადამი და შენ ხარ ევა!“ ელკე ისე უმწეოდ ფართხალებს, თითქოს მთვრალს ჩავარდნოდეს ხელში, და მის მაგიერ ღამის მორიგე ექიმს უყვირის, მანდ რას უდგეხართ, რატომ არ მეშველებითო. თუმცა ელკეს საშველიც არაფერი სჭირს. მორიგე ექიმს თეთრი ხალათის ჯიბეებში ჩაუწყვია ორივე ხელი, იკრიჭება და ადგილიდან არ იძვრის, თითქოს ვერ გადაუწყვეტია, მართალია, უნებური მყურებელი კი ვარ, მაგრამ ამ ამბავზე პასუხისმგებლობა მე მეკისრება თუ არაო. როგორ მოიქცეს? ამასობაში ტიტლიკანა ხვდება, რომ ეს ახლად გამოჩეკილი ადამ და ევა დერეფანში მარტონი აღარ ყოფილან და მორიგე ექიმი-საკენ მიიწევს. ექიმს მყისვე ეკარგება კრეჭის ხალისი, ოღონდ ხელებს არც ახლა იღებს თეთრი ხალათის ჯიბეებიდან. თქვენ ვინ ბრძანდებით? — ისე ეკითხება ტიტლიკანა, თითქოს მორიგე ექიმი აქამდე არ არსებულებოდა ამ ქვეყანაზე. ექიმს კვლავ თეთრი ხალათის ჯიბეებში უწყვია ხელები, — ეს ხალათი ანსხვავებს მას ტიტლიკანასაგან, იგი აღარ იკრიჭება, მაგრამ უარესს სჩადის: ტიტლიკანას სახელით მიმართავს, მიმართავს მეგობრულად, მაგრამ ამ წუთიდან ხდება, რაც ხდება. ელკემ თავი დახსნილად დაიგულა და თმა აიკრიფა. თქვენ ხართ ეშმა! — ეუბნება ექიმს ტიტლიკანა. მორიგე ექიმმა ამასობაში, როგორც იქნა, ამოიღო თეთრი ხალათის ჯიბეებიდან ხელები, რათა მოაჯირს ჩასჭიდებოდა და ნაბიჯ-ნაბიჯ ჩაპარულიყო კიბეზე. თქვენა ხართ ეშმა! — ამბობს ტიტლიკანა, არ ყვირის, მაგრამ მტკიცედ ამბობს, რადგან თეთროსანი შეჩერებასა და რალაცის თქმას აპირებს: თქვენა ხართ ეშმა, თქვენა ხართ ეშმა! ელკეს კი ამასობაში ისევ წამოუკოსებია უფერულ თმებზე თავისი სულელური ჩაჩი და ავადმყოფის დაშოშმინებას ცდილობს, მაგრამ ამაოდ. ტიტლიკანა არც ფიქრობს თავის ოთახში დაბრუნებას. მას ლიფტში უნდა შესვლა, ლიფტი სხვა სართულზეა გაჩერებული, მას კი დიდხანს ლოდინისათვის მოთმინება აღარ ჰყოფნის, კიბეს მივარდება და ისე სწრაფად ჩაუქროლებს მორიგე ექიმს გვერდით, რომ ექიმსა და ელკეს ისღა დარჩენიათ, უსიტყვოდ გადახედონ ერთმანეთს... ორი წუთის შემდეგ იგი ქუჩაში მიაბიჯებს, ეტყობა, ვერც გაოგნებულმა მეკარემ შესძლო მისი შეჩერება, მიაბიჯებს ქუჩაში, სადაც რამდენიმე კვირაა ფეხი არ გაუდგამს, მიაბიჯებს ხალხში, ალაპლაპებულ ქოლგებს ქვეშ შეყუყუული ადამიანები ტრამვაის ელოდებიან, ისინი თვალს არ უჯერებენ: ტიტლიკანა კაცი ირიბად სჭრის ქუჩას, შუქნიშნებს არავითარ ყურადღებას არ აქცევს და უნივერსიტეტისაკენ მიეშურება. შუა ქუჩაში თავის მაჯის საათს მართავს, საათის გარდა არაფერი შერჩენია. სტვენა-სტვენით მოაქროლებს ველოსიპედს ხაბაზის შევირდი, იძულებულია მისი გულისთვის დაამუხრუჭოს ველოსიპედი, სველ ასფალტზე ბორბალი უსხლტება და მიწაზე ეცემა. ამ ამბავმა ტიტლიკანა ისე შეაშინა, რომ უცებ სირბილზე გადავიდა, თუმცა არავინ გამოჰკიდებია, პირიქით, ხალხი უკან აწყდება მის დანახვაზე, ჩერდებიან და მხოლოდ თვალს აყოლებენ. მას კი მაინც ჰგონია, ვიღაც მომდევსო. მხოლოდ უნივერსიტეტთან ითქვამს სულს, წელში იხრება, ხელებით გალურჯებულ მუხლებს ეყრდნობა, მერე ისევ სწორდება წელში, განმკლავს აკეთებს, მერე ძირს უშვებს მკლავებს, ისევ მალლა სწევს, თითქოს ტანვარჯიშის გაკვეთილზე იყოს და თან ხვნეშის, ეჰ, იმ გაკვეთილების შემდეგ რა დიდი დრო გავიდაო. საბედნიეროდ, წვიმს, არ იცის, რატომაა წვიმა ბედნიერება, მაგრამ ამ ბედნიერებას გრძნობს კი. იცის, რომ ადამი არ



არის, იცის, სადაც იმყოფება: ციურიხშია, სრულ ჭკუაზეა, მაგრამ შიშველია, ამიტომ იძულებულია ისევ გაიქცეს და რაც ძალი და ღონე აქვს ამუშაოს იდაყვები. არ იცის რატომაა შიშველი, არ იცის, როგორ მოუვიდა ეს. ერთი მოსინჯვა ისიც კი მოსინჯა ნაბიჯის შეუხელებლად, სათვალე თუ მიკვთიაო, ხოლო თავის სიშიშველესი საბოლოოდ მაშინ დარწმუნდა, როცა დაინახა, აქეთ-იქით როგორ უქანავებდა ასო. მაშ, წინ! რაც ძალი და ღონე გვაქვს ვამუშაოთ იდაყვები! ტიტველი რომ არ ყოფილიყო, დაღლილობისაგან ჩაიკეცებოდა. მაშ, წინ და წინ. ძალი რომ დაზოგოს, თავქვე ეშვება, ესე იგი ქალაქისაკენ მიექანება, თუმცა ერჩივნა ტყეებისაკენ აეღო გეზი. ერთხელ გზიდან გადახვევა მოუხდა, რადგან უეცრად აინთო წითელი შუქი და ქუჩაში ავტომანქანების კოლონა გაიჭიმა, რომელიც, რა თქმა უნდა, იერუსალიმისკენ არ მიემართებოდა. ერთმანეთს მიჰყვება მოქანავე მინის საწმენდებს. შორის გამომკრთალი სახეები, უქოლგო ტიტლიკანა კი გზას მიიკვლევს ლაპლაპა თუნუქებს შორის: იგი ვერ დაიცდის, კაცი როცა არ მირბის, მაშინ უფრო შიშველი ჩანს. ისევ აგრძელებს გზას, გვერდით ჩაუქროლებს პოლიციელს, რომელიც თითქოს თვალს არ უჯერებსო, ისევ ისე მკლავგაწვდილი დგას თავის კვარცხლბეკზე. ნადირის ალლოთი პოულობს თავშესაფარს. ეს სამშენებლო მოედანი გახლავთ: „გარე-შე პირთათვის შესვლა აკრძალულია“. მესრის გადაღმა სულს ითქვამს, მაგრამ დიდხანს ვერც იქ უდგება გული, ისევ უნდა გაიქცეს. ოღონდ საით? ახლა პარკს შეაფარა თავი, სადაც დილაადრიან, თანაც ამ წვიმაში, კაციშვილი არ ჭაჭანებდა. აქ შეეძლო სველ მერხზე ჩამომჯდარიყო, არავინ არ შეაწუხებდა, ისე მოცარიელებულია ხოლმე ამ დროს მერხები. მხოლოდ თავისი სიშიშველე თუ შეაწუხებდა. ეს ამბავი როდი ესიზმრება, არა, სიშიშველეს მაშინ ხედავს, როცა არ გარბის. არც სიზმარშია, რომ გამოეღვიძოს. იგი შიშველია, უფერულ სხეულზე შავი ბალანი, ასო, სათვალე და მაჯის საათი მოუჩანს. ქანც-გაწყვეტილია, ხვნიშის, მაგრამ ერთხანს ნეტარებს, მიწას რომ გრძნობს ფეხის თითებში, ბალახს რომ გრძნობს ფეხის თითებში, ნელ-ნელა უკლებს ნაბიჯს, მაგრამ არ ჩერდება, სუნთქვაშეჭირვებული ისე ტოკავს, თითქოს მათრახს ურტყამენო, და სულ უფრო და უფრო ანელებს ნაბიჯს, მოციგურავესავით მოღვენთილი მიდის, ხელები ზურგსუკან შემოუწყვია, მოციგურავესავით მოწყვეტილი ხაზავს წრეებს, გაზონიდან გაზონზე გადარბის და მახლობელ ჭადარს ხან მარცხნიდან არტყამს წრეს და ხან მარჯვნიდან. თან ეცინება: მე ვარ ადამი და შენ ხარ ევა! ოღონდ ახლა ეს აღარაფერს ნიშნავს, რაკი ისევ გარბის და ქუჩის გადაჭრას ლამობს. რაც ძალი და ღონე აქვს მიიქნევს იდაყვებს, სანამ პოლიციელებს არ დაინახავს. ორი მოტოციკლისტი უკან კი არ მოსდევს, მისკენ მოემართება. რაკი ტიტლიკანა იცინის, იმათ ჰგონიათ, გვნებდებოთ, და თავიანთ შავ ჯაბახანებს გზის პირას აყენებენ, ფეხს გამოუშლიან, ცოტას უკან დასწევენ, რომ მოტოციკლი არ წაიქცეს და მისკენ მოემართებინ. პოლიციელებს შავი ტყავის ქურთუკები და ჩექმები აცვიათ, თავზე მუზარადები ახურავთ, მოკლედ, მყვინთავებივით არიან აღჭურვილნი და მისკენ მოიზღაზნებიან. სანამ ისინი ხელახლა აბობლდნენ თავიანთ შავ მოტოციკლებზე, სანამ მოტორი ჩართეს, სანამ ცალ ფეხს ასფალტზე დააბჯენდნენ და მოტოციკლს შემოაბრუნებდნენ, მან კიბემდე მიაღწია, კიბეზე კი მოტოციკლი ვერ ამოვა. ახლა მხოლოდ მისი სხეული გარბის. თითბრით შეჭედილი ნაცნობი კარი ჩაჩაზულია. ისევ მანქანის სავალ გზაზე გარბის, თითქოს მოტოციკლისტებს უნ-



და საქმე გაუიოლოსო, მირბის, მიჯირითობს, სანამ შავი მოტოციკლისტები არ წამოეწივნენ მოსახვევში და ერთი მარცხნიდან არ ამოუდგა გვერდში და მეორე მარჯვნიდან. ესკორტი ამხიარულებს. უყვირიან, შეჩერდიო. ეტყობა, დაავიწყდათ, რომ იგი დედისშობილაა...

მაგონდება:

შემდეგ რაც მოხდა, ერთმა კაცმა მიამბო, იმას კი წამდვილად გადახდა ასეთი ამბავი თავს... მეგობრულად და გულისხმიერად მომექცნენო, აკანკალებული მჯდარა წინა საღამოს დეკორაციებით გაწყობილ სცენაზე. ფარდა გახსნილი ყოფილა, ცარიელ, ჩაბნელებულ პარტერში ბალკონიდან აღწევდა სუსტი დღის სინათლე და ამ შუქზე მუქად ბზინავდა სავარძლების საზურგეები. ორკესტრის ადგილიც ცარიელი იყო. სცენაზე სამუშაო შუქი ენთო, მაგრამ ჯერ რეპეტიცია არ დაწყებულიყო, მხოლოდ სცენის მუშები დაფუსფუსებდნენ. პოლიციელს შავი ჩექმები ეცვა და თავზე სფეროსებური მუზარადი ეხურა. იგი თავის სიცოცხლეში პირველად მოხვედრილიყო სცენაზე და ისე იყო დამფრთხალი, რომ დაჯდომის ვერ ბედავდა, თუმცა სავარძლების ნაკლებობა არ იგრძნობოდა. სავარძლები ისე განელაგებინათ, როგორც საკონონაციო დარბაზს შეეფერებოდა, მაგრამ სუსტ შუქზე მაინც უბადრუკად გამოიყურებოდნენ. პოლიციელი გაოცებული მისჩერებოდა პროექტორებს. ამ დროს მაყურებელთა დარბაზის კარი გაიღო და დამლაგებელი ქალები შემოვიდნენ. პოლიციელმა ქალები გარეკა, სხვა საქმე არაფერი გამოსჩენია. დროის გასაყვანად ბოლთის ცემას ერიდებოდა. ასევე ერიდებოდა საუბრის გამას შიშველ კაცთან, თუმცა მაყურებელთა დარბაზში არავინ იყო, როგორც ვთქვით, ახლო-მახლო დამლაგებლებიც კი არ ჭაჭანებდნენ. პოლიციელი ბლოკნოტს ფურცლავდა და პარტერისაკენ ზურგშექცეული იდგა. პარტერი აშკარად უკარგავდა მხნეობას. ერთმა სცენის მუშამ, როგორც იქნა, მოუტანა სიცივისაგან აძაგძაგებულ შიშველ კაცს რაღაც მოსასხამის მაგვარი თეატრალური კოსტუმი, რომელსაც ქაფურის სუნი ასლიოდა. მუშამ იკითხა, რა მოხდაო, მაგრამ პოლიციელმა ცერები ქამარში გაიჩქო და უსიტყვოდ ჩააკმედინა ხმა. ტიტლიკანამ მადლობა გადაუხადა მუშას და ეს მადლობა თავაზიანად და სავსებით ჩვეულებრივად ჟღერდა. მოსასხამი ცისფერი იყო, ოქროს ფუნჯებით გაწყობილ სამეფო მანტიას სარჩულად იაფფასიანი ჯუთი ჰქონდა გამოკრული. კაცს ფეხები სტკიოდა, ამ ფეხებმა ხომ გუდრონზე ატარეს, წვრილხრეშგარეულ გუდრონზე. ცოტა ხნის შემდეგ სამოქალაქო ტანსაცმელში გამოწყობილი მამაკაცი მობრძანდა, რომელსაც, მისდა გასაოცრად, არ უკითხავს ვინ ბრძანდებითო, ეტყობოდა, ისედაც იცოდა ყველაფერი. შემდეგ მოვლენები ჩვეულებრივად წარიმართა. მანქანაში — ეს სამედვიცინო სამსახურის მანქანა არ იყო, მაგრამ მძღოლს ქალაქის ღერბიანი ქუდი ეხურა — საუბრობდნენ ამინდზე, ქალაქში ფიონის მასების შემოჭრაზე. წინ მდუმარე მძღოლი და მყვინთავი ისხდნენ. მყვინთავს მუზარადი ახლა მუხლებზე დაედო და ტანთან შედარებით საოცრად პატარა თავი მოუჩანდა. უკან ისხდნენ: ინსპექტორი (ასე მიმართავდა მძღოლი იმ კაცს) და ოქროს ფოჩებიან სამეფო მანტიაში გახვეული ფეხშიშველა კაცი. მაინცდამაინც ოპერაში რატომ შევარდითო, ვითომ სხვათა შორის ჰკითხა ინსპექტორმა, მაგრამ თვითონვე გაწყვიტა სიტყვა და ტიტლიკანას სიგარეტი შესთავაზა. მეფის მოსასხამში გახვეულმა კაცმა თავი გააქნია. გეზი კანტონის საავადმყოფოსკენ აღარ ეჭირათ, ბალგრისტის-



კენ გადაუხვიეს. რა თქმა უნდა, სად მიდიოდნენ, არ უთქვამთ. კროიცილატ-თან უკვე ცხადი გახდა, რომ მას სულით ავადმყოფად სთვლიდნენ და სულით ავადმყოფივითაც ექცეოდნენ. კროიცილატიდან მოყოლებული ბურგვიხამდე უბრად იარეს, აქ კი მან საქმიანად იკითხა, ჩემს ფოსტას დღესვე თუ გად-მომიგზავნიანო; იგივე კითხვა გაიმეორა მისაღებ ოთახში, როცა ახალგაზრდა ასისტენტის პირისპირ დასვეს მაგიდასთან. ასისტენტი ცდილობდა ოქროს ფუნჯებიანი ცისფერი მოსასხამი არ გაეკვირვებინა. თქვენს ტანისამოსს საცაა მოიტანენო, უთხრეს. კვლავ მეტიხმეტად სათუთად ექცეოდნენ, ისე, რომ მი-სი გვარის ხსენებასაც კი ერიდებოდნენ, პროფესორი ჯერ არ იყო მოსული. მან საუბრის გაბმის მიზნით თქვა, ასეთი რამ ჯერ არ მომსვლიათ, და იმდე-ნად დაუჯერეს, რამდენადაც ასისტენტი (მასაც თეთრი ხალათის ჯიბეებში ეწყო ხელები) უფლებამოსილი იყო პროფესორის მოსვლამდე თვითონ დაე-ჯერებინა რამე. ყვირილი მინდაო, თქვა მან. თან სავსებით მშვიდად და ჭკვი-ანად იჯდა და ჩვეულებრივად ეჭირა თავი. ხელები გუდრონითა და სისხლით ჰქონდა გათხიპნილი და სანამ იბანდა და იმშრალებდა, სარკეში იხედებოდა. კოსტუმმა შიში მოჰგვარა, გვირგვინილა აკლდა მის მორთულობას. თქვენს ტანისამოსს საცაა მოიტანენო, უთხრეს ერთხელ კიდევ და თვითონაც ერთხელ კიდევ გაიმეორა, ყვირილი მინდაო. მისი ნათქვამი ყურად იღეს. ყვირილი გინ-დათო? მან თავი დაუქნია, დიახო, მუნჯის დაჟინებით დაუქნია თავი, რომელ-საც ჰგონია, გამიგესო. რატომ გინდათ დაიყვიროთო? ეს კი აღარ იცოდა.

ამ დროს ისეთი გრძნობა გეუფლება, თითქოს სარკეში ხარ შეჭრილი, ხოლო რომ გამოგედვიძება, არაფერი აღარ გახსოვს, ასე გგონია თითქოს ყვე-ლა სარკეში ერთად შეიჭერი, შემდეგ კი სულ მალე სამყარო ისევ შეიკრავს პირს და ისე დალაგდება, ვითომც არაფერი მომხდარიყოს. ჰოდა აღმოჩნდე-ბა, რომ არც არაფერი მომხდარა თურმე.

ვზივარ ბინაში, ჩემს ბინაში... დიდი ხანი არ უნდა იყოს გასული მას შემ-დეგ, რაც აქ უცხოვრია ვილაცას. ვხედავ ბოთლში ჩარჩენილ ბურგუნდულ ღვინოს, ობის პაწაწკინტელა კუნძულებს წითელი ხავერდით ჩამუქებულ ღვინოზე, ვხედავ პურის ნარჩენებსაც, მაგრამ ისინი აგურივითაა გამაგრებუ-ლი. მაცივარში (არ მშობდა, შიგ ისე შევიხედე) ლორის ნაჭერი მოკრუნჩხუ-ლა, სიცივეში გამომშრალა და თითქმის გაშავებულა, ცოტა ყველიც დარჩე-ნილა, ხის ქერქივით დახეთქილი და მომწვანო, ერთ ჭიქა ნალებსაც ვხედავ, ოღონდ მას თხევადი აღარ ეთქმის, თასში კომპოტის ამღვრეული ნაშთი — გარგარის ლექი თხამპალებს. იქათ კიდევ ბატის ღვიძლის პაშტეტით სავსე ჭურჭელი დევს. ვითომ მუმისის საგზალია, არა? არ ვიცი, სანაგვეში რატომ არ გადავუძახე ყველაფერს. არც პალტო გამიხდია და არც ქუდს ვიხდი, რადგან გარეთ წვიმს. რბილი სავარძლის საზურგეზე ვარ წამოსკუპული და კორპსაძ-რობს ვათამაშებ ხელში. კორპსაძრობი კორპსაძრობია, ეპოქის სტილში გადა-წყვეტილი სტანდარტული საოჯახო ნივთი. ვხედავ: ვილაცას ჩვენი ხალიჩები დაუგორგლებია, ქაფური უპკურებია და ისე დაუგორგლებია, ზედ ზონარი გა-დაუჭერია, დარაბებიც დაუხურავს, ფანჯრები დაუცავს წვიმის, მზისა და ქა-რისაგან, ზაფხულისაგან და ზამთრისაგან. დარაბებს არ ვაღებ. რბილ ავეჯს თეთრი ტილო აქვს გადაფარებული. სასაცილო საყურებელია: თითქოს საი-



დუმლო სამსჯავრობანა ეთამაშოთ, ან უცხო ადამიან-წესებიან ქვეყანაში მოეწყოთ მიცვალებულის დაკრძალვა. ვხედავ, რომ საფერფლებიც დაცლილია, არა მხოლოდ დაცლილი, გარეცხილიც კი. ყველა საყვავილე ვაზა დაცლილია და გარეცხილი, რომ შემორის სუნი არ დამდგარიყო ბინაში... მე ისევ პალტოთი და ქუდით ვზივარ, ხელები ჯიბეებში მაქვს ჩაწყობილი. მტვრისა და მასტიკის სუნი დგას. ერთი რამ აშკარაა: აქ თუ ოდესღაც ვინმეს უცხოვრობია, ერთი მამრობითი სქესის ყოფილა, მეორე კი მდედრობითისა. კარადაში ვხედავ ქალის კოფტებს, მცირეოდენ საცვლებს, რომლებიც ჩემოდანში ვეღარ ჩატეულა ან უკვე მოდიდანაა გამოსული, მეორე მხარეს ჰალსტუხები და მამაკაცის მომჩვარული ქურთუკები კიდია, სამი საზამთრო და ორი საზაფხულო. ძირს თითქოს სააღლუმოდ გამწკრივებულან ფეხსაცმელები, ზოგიერთში კალაპოტია ჩადგმული. რატომაა ასე შემადრწუნებელი ცარიელი ფეხსაცმელები? ხელში ვიღებ ქალის ფეხსაცმელს, ყვავილივით ჭრელსა და ფარატინას, და ვყნოსავ. მხოლოდ ტყავის სუნი უდის. სუნთქვას ვიკრავ, ბინაში ქურდულად შემოპარულივით მეშინია და ვაყურადებ. ვინ უნდა მოვიდეს! თუმცა რატომაც არა, ხომ შეიძლებოდა ზარი დარეკილიყო და ვთქვათ, კარდაკარ მოხეტიალე მეწვრილმანე მომდგომოდა, რომელსაც არ ეცოდინებოდა, რომ აქ აღარავინ ცხოვრობს. ვაყურადებ, ფეხსაცმელი ხელში მიჭირავს; არ მინდა შინ ვიყო. უწინდებურად მოშლილი ონკანის წკაპუნს თუ არ ჩავაგდებთ სათვალავში, ირგვლივ სიჩუმეა. სიჩუმეა, როგორც პომპეიში. ტელეფონიც დუმს. ვხედავ: მას როზეტი გამოუძვრია. სამწუხაროდ ასანთი არა მაქვს. რა სიჩუმე დგას, თუ არ ეწევი! გარედან ისმის ტრამვაის რახრახი, შიგადაშიგ პიპინიც, გარეთ წვიმს, აქ კი დახურული დარაბების უკან, სადაც მე პალტოთი და ქუდით ვზივარ თეთრად შებურვილი რბილი სავარძლის საზურგეზე, ყველაფერი ისეა, როგორც პომპეიში: ყველაფერი ჯერ კიდევ თავის ადგილზეა, მხოლოდ დრო გაგვფრენია ხელიდან. როგორც პომპეიში: შეიძლება იბორილო ოთახებში, ხელები ჯიბეებში გეწყოს და წარმოიდგინო, როგორ ცხოვრობდნენ ადამიანები აქ, სანამ ცხელი ფერფლი წაეყრებოდათ თავზე. და აქაც ისევ ისმის ნაბიჯების ექო (რადგან ხალიჩები აკეცილია), როგორც პომპეიში...

ერთხელ მართლა დარეკა ზარმა.

კარს არ ვაღებ...

ჩემი გვარის კაცი აქ აღარ ცხოვრობს, წასულია.

ამაოდ დავყუდებულვარ პალტოგაუხრდელი და ქუდმოუხრდელი, მოუკიდებელი ჩიბუხი პირში მაქვს. ვერ წარმოვიდგინე, როგორ ცხოვრობდნენ ადამიანები აქ, აქაურობა პომპეიზე უფრო იდუმალი მეჩვენება, თუმცა მისი ცისფერი პენუარი ჯერ კიდევ კიდია სააბაზანოში... იქნებ სჯობდეს კიდევ, ასანთი რომ არა მაქვს; ამის წარმოდგენაც კმარა: აქ რომ ცხოვრობდა, ის კაცი როგორ ანთებს ასანთს, როგორ აფარებს ხელს პაწაწკინტელა ალს, სანამ ალი გაიზრდებოდეს, რათა ანთებული ასანთი ფარდასთან მიიტანოს, პირველი ღერი, მეორე, მესამე, მეოთხე, მეხუთე. ფარდა არ იწვის, არ აბრიალდა, მხოლოდ იტრუსება, ხრჩოლავს, არც აბაჟური იწვის წესიერად, მხოლოდ ტრუსის სუნს გამოსცემს და ზედ ყავისფერკიდებებიანი ნახვრეტი აჩნდება სასაცილოდ. კარგი იყო ბენზინი ჰქონოდა. ბენზინი უნდა გადაესხა, რომ მართლა აბრიალებულიყო ფარდებიც, რბილი სავარძლებიც, ხალიჩებიც, წიგნებიც,



ტანსაცმელიც. ასანთის ღერებით ვერაფერს გახდები, სასაცილო დღეში ჩავარდები მხოლოდ.

ვიყიდი ახალ ტანსაცმელს, მაგრამ თან მეცოდინება: ეს არაფერს მიშველის, ტანსაცმელი მხოლოდ ვიტრინაში ჩანს სხვანაირი. გამყიდველი ტანსაცმელს მოსაზომებელ კაბინაში მომართმევს და თვითონ ტაქტიანად გაუჩინარდება, რომ ტანსაცმელი მოვიზომო. დავხედავ თუ არა, მეცოდინება, ორიოდ თვეში რას დაემსგავსება ეს ტანსაცმელი. მაგრამ რას იზამ, შიშველი ხომ არ ივლი ამ ქვეყანაზე. ჰოდა, მეც თავს ძალას ვატან, აქეთ-იქით ვტრიალებ მოძრავი სარკეების წინ და იმ ფასონს ვამოწმებ, ვიტრინაში ასე თუ ისე რომ მომივიდა თვალში. სიმართლე თუ გნებავთ, მხოლოდ გამყიდველის ხათრით ვყიდულობ ამ ტანსაცმელს, გამყიდველი აღტაცებულია, მე კი ჩემს კეფას ვუყურებ სარკეში, რომელსაც ვერაფერს მოუხერხებ. ტანსაცმელს ყოველთვის ნაჩქარევად ვყიდულობ და ყოველთვის ერთსა და იმავეს. უკვე ის წუთები მექცევა ტანჯვად, მკერავი რომ მონურად ჩაიმუხლებს ჩემს წინ, ქინძისთავებიან ბალიშს მოიმარჯვებს და გაწაფული ხელით აღნიშნავს ცარციით იმ ადგილებს, სადაც მზა ტანსაცმლის ნორმებს ვერ ეგუება ჩემი ტანი. სულერთია, დაფუასიან კოსტუმს ვყიდულობ თუ ძვირფასს, ინგლისურს, იტალიურს თუ აქაურს, ერთსა და იმავე ადგილზე ერთნაირად მასხდება ნაოჭი. ეს კარგად ვიცი.

სხვა ცხოვრება როგორიღა იქნება?

წარმომიდგენია:

ადამიანი ავარიაში მოხვდა, ვთქვათ, საგზაო ავარიაში, სახე ჭრილობებით დაესერა, მის სიცოცხლეს საფრთხე არ ემუქრება, ოღონდ შეიძლება მხედველობა დაკარგოს. მან იცის ეს, დიდხანს წევს საავადმყოფოში, წევს თვალახვეული. ლაპარაკი შეუძლია, სმენა აქვს: ესმის, ღია ფანჯარასთან როგორ გალობენ ჩიტები, ესმის თვითმფრინავების გუგუნე, ოთახში შემოჭრილი ხმები, ღამით ჩამოვარდნილი მყუდროება, რიყრაყზე წვიმის შხაპუნი. შეუძლია ყნოსვით გაარჩიოს: ვაშლის მუსი, ყვავილები, ჰიგიენა. ფიქრის უნარიცა აქვს და ფიქრობს კიდევ... ერთ დილას სახვევს ხსნიან და ხედავს, თვალისჩინი დაბრუნებია, მაგრამ ღუმს, არ ამხელს ვხედავო, ამიერიდან აღარავის გაუმხელს, რომ ხედავს.

წარმომიდგენია:

მისი ცხოვრება ამიერიდან, ერთ კაცთან პირისპირ დარჩენილიც რომ ბრმას თამაშობს; მისი ურთიერთობა იმ ადამიანებთან, რომლებმაც არ იციან, ის რომ მათ ხედავს. მისი საზოგადოებრივი როლი და პროფესიული შესაძლებლობანი იმაზე იქნება დაფუძნებული, რომ არასდროს არ იტყვის, რასაც ხედავს. წარმომიდგენია თამაშად ქცეული მისი სიცოცხლე, ამ საიდუმლოების წყალობით შეძენილი თავისუფლება და ასე შემდეგ.

ვთქვათ, იყოს გვარად განტენბაინი.

ისტორიებს ტანსაცმელივით ვიზომებ ტანზე!

სოფლის სასტუმროში ვზივარ.

ბედმა გამიღიმა, თორემ ახლა შეიძლებოდა მკვდარიც ვყოფილიყავი და



დაუსჯელად დამდებოდა თერთმეტი ბავშვის ცოდვაც. ამის მაგიერ სოფლის სასტუმროში ვზივარ და ალუბლის ნაყენს ვუკვეთავ, ხოლო მანქანა (ის მანქანა ჩემი არც კია, ბურისა გახლავთ) გარაჟში დგას და სათადარიგო ნაწილებს ელოდება. იმაზე ფიქრსაც ვერ ვბედავ, რა შეიძლებოდა მომხდარიყო...  
ბედმა გამიღიმა.

ნეტავ რას ვფიქრობდი, პირში ჩამქრალი ჩიბუხი რომ მეჭირა და მოღვენთილი, დაღლილი კი არა, სწორედ რომ მოღვენთილი ვიჯექი საჭესთან, საჭე ორივე ხელით მეკავა და მხოლოდ თვალებს ვატანდი ძალას, თორემ ფიქრით სხვაგან ვიყავი და მოსახვევში ისე შევედი, არც კი მომგონებია, რომ შეიძლებოდა გზა მოლიპული ყოფილიყო (ბურისთან გატარებულ საღამოზე თუ ვფიქრობდი). როგორც მოწმეები ადასტურებენ, 60 კილომეტრი სიჩქარისათვის არ გადამიჭარბებია, და აქამდე მთელ გზაზე არსად შემხვედრია მოლიპული ყინული, ყინულის ნასახიც კი არსად შემხვედრია (ან იქნებ ჰარვარდში რომ მიმიწვიეს, იმაზე ვფიქრობდი).

ალარ თოვს.

ვსვამ ალუბლის ნაყენს.

როცა რამე მოხდება, ყოველთვის მიკვირს, ეს მარტო ფიქრი რომ არ ყოფილა და ისე სახტად ვრჩები, თითქოს სინამდვილეს გამოეცნოს ჩემი ფიქრები ან პირიქით, მცდარად გაეგოს რამე. უეცრად სოფლის მოედანზე აღმოვჩნდი, მოწმეებით გარშემორტყმული, წაკუზული ვდგავარ და მანქანის ქვეშ შემძვრალ ხელოსანს ვეთათბირები, თან ვაღიარებ, რომ სწორედ მე ვარ ის კაცი, კინაღამ რომ დახოცა ერთი დუჟინი ბერნელი მოწაფეები. შევყურებ ზამთრის სიცივისაგან ლოყებდაწითლებულ ბავშვებს, ცივ ჰაერში აღმებივით რომ დაჰტრიალებთ თავზე საკუთარი ამონასუნთქი. ცოცხლები არიან. ეს რომ მართლა მომხდარიყო, ასევე დაუჯერებლად მომეჩვენებოდა. ისევ ის ვიქნებოდი, ვინც ახლა ვარ და არც ვიქნებოდი, არ ვიქნებოდი ის, ვისაც ახლა ერთი დუჟინი ბერნელი მოწაფეები მახვევია გარს, პირდაღებულნი მომშტერებიან, ტლიკინებენ, ცოცხლები არიან, მოწმენი ამა და ამ დღეს და ამა და ამ ადგილას მომხდარი ავარიისა, ბედნიერებას ანიჭებთ ეს სენსაცია. მანამდე იტკარცალეს, სანამ არ დაირეკა სკოლის ზარი...

მეორე ჭიქა ალუბლის ნაყენს ვუკვეთავ.

ათი საათია, ესა და ეს რიცხვი, სამშაბათი...

ხელოსნები უკვე ერთი საათია მანქანას უჩხიკინებენ. მანქანა ჩემი არ არის. მოწაფე ბიჭუნებმა კარგად გამოიცნეს: ღერძი დაზიანებულია, ფერსო შეჭყლეთილი, ალბათ ბურთულა-საკისარიც გამოსაცვლელი გახდება — ამ ამბების ბევრი არაფერი გამეგება. იმის გაფიქრებაც კი მაშინებს, რომ ღამე აქ უნდა გავათიო, თუმცა სასტუმრო საკმაოდ რიგიანია. პალტო ჯერაც არ გამიხდია, ვზივარ და გაზეთის წაკითხვას ვცდილობ (შეიძლებოდა მატარებლით გამგზავრებაც, რომ ღამე აქ არ გამეთია. ადგილობრივი მიმოსვლის განრიგი საპირფარეშოს კართან ჰკიდია). მე აქ ჩიბუხს ვაბოლებ, ამ დროს კი ალჟირში (ამას გაზეთში ვკითხულობ) ადამიანებს აწამებენ.

ეს გახლავთ ის, რაც სინამდვილეში ხდება.

როცა ხელახლა ვკითხულობ, რა ხდება ალჟირში ან სხვაგან, რამდენიმე წუთის განმავლობაში თვალწინ მიდგას წაკითხული, სხვა აღარაფერი მახსოვს და ამის წარმოდგენაც კი ისე ძნელი მოსათმენია, რომ იმ წუთებში, მგონია

15984

პ. მარშსის სახ. ს.პ. სსრ  
სახელმწიფო რეკლამა



თავსაც გავწირავ, მაგრამ მე ვზივარ, ძველ გაზეთს ვკითხულობ და ყველაფერს ვითმენ. ვზივარ უმოქმედოდ... იმ მანქანის სათადარიგო ნაწილებს ველოდები, რომელიც ჩემი არ არის.

ეს უკვე მოგონებად იქცა:

(ალჟირში კი ამ დროს ადამიანებს აწამებენ).

თოვლი ცივი იყო და მშრალი, ძლივს აჩნდა ასფალტს, მტვერივით შჩატე ფიფქების კორიანტელი ყოველ ჩავლილ მანქანას კუდივით მიჰყვებოდა უკან, გზის შუაგულზე თითქმის არსად არ იდო თოვლი, გზა რუხი და მშრალი იყო, მხოლოდ კიდევებზე რჩებოდა მოთეთრო არშია, სანამ კიდევ არ ჩაივლიდა მანქანა. მანქანის კი არა, ველოსიპედის ნელა ჩავლაც კმაროდა, რომ თოვლის ბული დამდგარიყო და მერე კვლავ არშიასავით, მაგრამ ახლა სხვაგვარად შემოვლებოდა გზას. გადასწრება თითქმის არასოდეს მიცდია, დაუსახლებელ ადგილებშიც კი იშვიათად თუ გადავაჭარბებდი ოთხმოცს. ეს რომ დასახლებული ადგილი იყო, ვხედავდი, თუმცა ჯიუტად მოქანავე მინის მწმენდავებს მიღმა უაზროდ ვიყურებოდი და სულ სხვა რამეზე ვფიქრობდი. თვალემა დაინახეს საფრთხე, ფეხმაც აუშვა გაზის პედალი, ერთი წუთითაც არ დამიკარგავს სულიერი მხნეობა, ლამის სასწაულს რომ უტოლდება ხშირად, თუმცა ჯერ საჭემ, შემდეგ კი საკუთარმა სხეულმა მაგრძნობინა, როგორ მოცურდა მანქანა. იმის მაგიერ, რომ დამემუხრუტებინა, იმ წუთში კვლავ გაზი მივეცი, მოცურება რომ ვიგრძენი, მარცხნივ მოწაფეების გუნდი დავინახე, მარჯვნივ კი სოფლის სარძევე მალაზიის ვიტრინები, სადაც ყველისა და შოკოლადის რეკლამა მოჩანდა. ერთ წამს სავსებით მშვიდად ვიყავი და იმედი მქონდა, რომ მანქანას შევაჩერებდი, მაგრამ მივხვდი, რომ საჭეს ველარ ვიმორჩილებდი! ამას რომ მივხვდი, კბილები ისე მაგრად მოვუჭირე ჩიბუხს, თითქოს ეს ყოფილიყოს ახლა მთავარი. ასე მეგონა მარადისობად იქცა ის წამი, როცა რაღაც ძალამ შემომპროწიალა, თუმცა მე საჭეს მაინც ვატრიალებდი. ცოტა არ იყოს, ბედის დაცინვას ჰგავდა, რომ მარცხნივ კი არ მიმატრიალა იმ ძალამ, ციგასავით გამასრიალა მარჯვნივ და ქუჩაში გარდიგარდმო გამჩხირა. აღარ ვიცოდი, მარჯვენა და მარცხენა საით იყო, ყველაფერი აირ-დაირია. ჩემს ბედზე იმ წუთში გზაზე არაფერი მოდიოდა, მძიმე მისაბმელიანი საბარგო მანქანა, რომელიც, ასე ვთქვათ, ჩემს ცნობიერებაში ამოტივტივდა, სინამდვილეში უკვე ჩავლილი იყო. მხოლოდ ის დავინახე, როგორ დატრიალდა სოფელი. წინ ვიყურებოდი, გონზე ვიყავი, მაგრამ ძალ-ღონე წართმეული მქონდა. მარცხნივ რძის მალაზიის ვიტრინები მოექცა, მარჯვნივ — მოწაფეები, — კარუსელივით. როცა ბოლოს და ბოლოს გაისმა ჭახანის ხმა, დაგვიანებულ ექოსავით სასაცილოდ მეჩვენა და ჩემზე აღარ უმოქმედია. უკვე დიდი ხანია ვიცოდი, რომ იმ შეჩვეულ სასწაულს მიტოვებული ვყავდი. ჩიბუხი დამეკარგა; ეს იყო და ეს, უკუღმა შებრუნებული მანქანა კი ბორდიურს შეეჩერებინა, თორემ ახლა ვიტრინაში მექნებოდა თავი ამოყოფილი. მინის მწმენდავები ისევ ქანობდნენ. უცებ ნერვები ამეშალა და მოწაფესავით დავუწყე მანქანას ჩხიკინი, რომ გზა გამეგრძელებინა, მაგრამ მანქანა ადგილიდან არ იძვროდა. მესამე სიჩქარე მქონდა ჩართული, მობორი სდუმდა, მანქანა პირველ სიჩქარეში გადავრთე და გაზის პედალს ფეხი დავაჭირე, რომ ძრავა ამემუშავებინა, მაგრამ მანქანას არაფერი ეშველა. ძლივს მიღოღავდა, მეტი რაღა დამჩინოდა — გადმოვვდი და მანქანა დავათვალიერე. თუნუქი არსად არ იყო შეჭყლეთილი,



გულზე მომეშვა. მაგრამ ახლა ისეთი გრძნობა მქონდა, თითქოს მთელი სოფელი ფანჯრებში იყო გადმომდგარი და სირცხვილმა ამიტანა. ირგვლივ მოწაფეები მეხვივნენ და მეგონა მე მომშტერებოდნენ, სინამდვილეში კი ისინი მხოლოდ „პორშეს“ მისჩერებოდნენ, რომელიც ასე მხიარულად დატრიალდა მათ თვალწინ. ერთი ბიჭუნა წამდაუწუმ გაიძახოდა: აუჰ, რას დატრიალდა, აუჰ, რას დატრიალდა! ჩიბუხი დამეკარგა და უიმისოდ გამიჭირდა უდარდელი პოზა მიმელო. შუა ქუჩაში გავედი და ფეხით მოვსინჯე მიწა, რათა მთელი ქვეყნისათვის დამენახებინა, რომ ამ ადგილზე მიწა მოლიბულის იყო. მხოლოდ ახლა გაიღო ირგვლივ ყველა ფანჯარა.

იძულებული ვიყავი დამეცადა, სანამ მანქანას გადაათრევდნენ, ხელები ჯიბეებში მეწყო და ციდან ჩამოვარდნილივით ვკითხულობდი, ამ სოფელს რა ჰქვია-მეთქი.

ლენგნაუში ვყოფილვარ, ბერნის კანტონში. შემდეგ სასტუმროში ალუბლის ნაყენს რომ ვსვამდი, ოფიციალტი ქალი მიყვებოდა, ამ მოსახვევში რა არ მომხდარა, სასიკვდილოდაც კი დაშავებულა ხალხიო.

არ ვიცი, რისთვის ვყვები ამ ამბავს.

ჩემი ავარია სულაც არ მაინტერესებს...

ვიქნები თუნდაც განტენზაინი.

დაწყება ალბათ არ იქნებოდა ძნელი:

დილაა, შევდივარ მაღაზიაში და ვდგავარ. რა გნებავთო, მეკითხებიან. თავს ვიკატუნებ, ვითომ შვეიცარიული გერმანული არ მესმოდეს. ვიხედებო ირგვლივ: აწყვია სათვალეები, ლუპები, ჭოგრიტები, ყოველნაირი სათვალე, პენსნეები, თეატრალური ბინოკლები, მაგრამ უპირველეს ყოვლისა სათვალეები. მე რაც მინდა, ის რა ხანია ფრაუმიუნსტერშტრასეზე დევს ვიტრინაში (წინა პლანზე, მარჯვნივ). მესმის თეთრი ქალიშვილის ხმა, რომელიც ადგილობრივ დიალექტზე დასმულ კითხვას, რა გნებავთო, ჯერ ამერიკულ ყაიდაზე მიმეორებს, მერე კი ლიტერატურულ გერმანულ ენაზე მეკითხება, თან სხვა კლიენტს ემსახურება და ჯერჯერობით ჩემი თავის დაქნევა კმარა იმის ნიშნად, რომ მოთმინება მყოფნის ან ყოველ შემთხვევაში თავაზიანობა მაინც გამაჩნია (მირჩევნია ჩემი როლის თამაშს ლიტერატურულ გერმანულ ენაზე შევუდგე-ყოველთვის როლში მგონია თავი, როცა ლიტერატურული გერმანულით ვლაპარაკობ და როლის თამაშიც უფრო მიადვილდება ხოლმე. ჩემი საცოდავი ინგლისური ვერ გასწვდებოდა სათქმელს, ინგლისური მხოლოდ იმდენზე მყოფნის, რომ ასე თუ ისე გამოვთქვა რაიმეზე თანხმობა. ფრანგულს ხომ ნულარ იკითხავთ: ყველა იმ ფრანგთან დაჩაგრულად ვგრძნობ თავს, ვისაც მხოლოდ თავისი მშობლიური ენა ესმის). ჰოდა, ვდგავარ ფეხმოუცვლელად, ქალიშვილი ერთ ქალბატონს ემსახურება. ქალბატონი, რამდენ ახალ სათვალეს მოირგებს ცხვირზე, იმდენჯერ წყალს დაწაფებული ჩიტვიით იწვდის კისერს, მე კი მხოლოდ იმით ვიიმედებ თავს, რომ მაღაზიაში ჩემი ნაცნობი არავინ შემოვა. ქალბატონი ამერიკელია. რამდენ ახალ სათვალეს გაიკეთებს, იმდენჯერ მიდის სარკესთან და ყოველთვის იმედგაცრუებული რჩება, ეტყობა ვერ ურიგდება იმ სახეს, სარკე რომ უჩვენებს და ეს ამბავი შეიძლება კიდევ დიდხანს გაგრძელდეს. დრო მაქვს, შემიძლია ერთხელ კიდევ ავწონ-დავწონო გან-



ზრახული, მაგრამ ჩემი გადაწყვეტილება ურყევია. როცა ქალიშვილი ბოლოს და ბოლოს იცლის ჩემთვის, გაგულისებების კვალიც არ ეტყობა, პირიქით, ამერიკელ ქალბატონს ყოველ წუთს აგრძნობინებს, აქაურებს მხოლოდ სხვათა შორის ვემსახურებო. ესე იგი, მე მინდა, — რატომ მებმება ენა? — მზის სათვალე. ინებეთ! ქალიშვილი ერთ სათვალეს მაწვდის და თან ამერიკელ ქალბატონს ეტიტინება. მე კი ვხედავ მზის სათვალეებით გაჭედულ ყუთს, მზის სათვალეების მთელ არსენალს, სულაც რომ არ მჭირდება. როგორ ვუთხრა? თეთროსანი ქალიშვილი, ჩვეულებრივი გამყიდველი გოგონა, მეცნიერმუშაკივით რომ გამოწყობილა, მიმტკიცებს, უფრო მუქი არაფერი გვაქვსო, უფრო მუქ სათვალეებში ვერაფერს ველარ დაინახავთო, ხოლო ის სათვალე, ბატონს ვიტრინაში რომ დაუნახავს, მზის სათვალე კი არ არის, ბრმის სათვალე გახლავთო. მე ვთხოვ, მომცეს ის სათვალე. იგი გაოცებულია, მაგრამ ამასობაში ამერიკელმა ქალბატონმა საბოლოოდ გადაწყვეტილება მიიღო და ქალიშვილმა იგი კარამდე უნდა მიაცილოს, ქალბატონი ხელცარიელი მიდის და მით უმეტეს, განსაკუთრებული თავაზიანობით მართებს მისი გაცილება. სანამ ამერიკელ ქალბატონს გაისტუმრებდა, გაოცებამაც გაუარა, ახლა ერთადერთი მუშტარი შევრჩი ხელთ და კვლავ მე ვემსახურება. პირდაპირ არ მეუბნება, ბრმის სათვალეს ვერ მოგყიდითო, მაგრამ თხოვნას ვითომ ხუმრობად მითვლის და კვლავ მზის სათვალეებს მთავაზობს. რამდენიმე ცხვირზეც კი ჩამომაცვა, სანამ მოთმინებიდან არ გამოვედი და ნათლად არ ავუხსენი, რაც მინდოდა: მე მინდა მხოლოდ და მხოლოდ ბრმის შავი სათვალე. ბატონი ბრძანდებით! იმედია, ახლა ბოსი არ გამობრძანდება და ამ საგანგებო შემთხვევით თვითონ არ დაინტერესდება. ვინ იცის, იქნებ ექიმის ცნობაც იყოს საჭირო! ქალიშვილი ბოლოს და ბოლოს დააჰყვა ჩემს სურვილს და ამიხსნა, ბრმის სათვალე მხოლოდ და მხოლოდ ბუტაფორიაა, მან მხოლოდ ბრმა თვალეები უნდა დაფაროს, ამიტომაც ასეთი მუქიო. მე ფასს ვკითხულობ. სათვალე მოგერგოთ თუ არაო, მეკითხება თეთროსანი ქალიშვილი, რომელიც ახლა ფერფლივით რუხი, უფრო სწორად მორუხო ლილისფერი ჩანს, და ხელებს საფეთქლებზე მკიდებს. უცებ სულ ახლოს ვხედავ მის სახეს, მის საფსე, რბილ ტუჩებს, ახლა მწიფე ქლიავივით იისფერი რომ გამხდარა. უცებ მოსაღამოვდა, ბინდ-ბუნდი ჩამოდგა, მზე დაბნელდა. თან კი დილაა, მესმის, რომ ასეა, რადგან მხოლოდ ცინცხალ დილით ჟღერს ასე ზმები. ახლა მზეს ისე ვხედავ, დიდი ხნის წინათ რომ ვხედავდი, სიყმაწვილეში, როცა მზეს გაჭვარტლული შუშით ვაკვირდებოდი ხოლმე, მზე მკრთალი ჩანდა და იმაზე გაცილებით პატარა, ვიდრე გვეგონა, სხივების გვირგვინი აღარ ერტყა გარს, მოყვითალო, თითქმის მოთეთრო-მორუხო ფერი დაჰკრავდა, მკვახე გარგარისა თუ რაღაც ამდაგვარი ფერი, ოღონდ ლითონისებური. სათვალე ჩინებულად მომერგო-მეთქი, ვეუბნები, ის ერთხელ კიდევ ამოწმებს და მეც ერთხელ კიდევ ვხედავ მის ქლიავისფერ ტუჩებს. საკოცნელ მანძილზე ვხედავ. აღარასოდეს აღარ ვაკოცებ არავის, ვფიქრობ მე. ის მასალა, რომლისგანაც ტუჩებია გაკეთებული, მეტისმეტად უცხოა ჩემთვის, ვიყნოსავ მისი სუნამოს სურნელს და სულ ახლოს ვხედავ მის მამლის ფრთასავით მომწვანო-მოწავო-მოლურჯო თმებს, მის სათოვლიასავით კანს. სარკეში ჩახედვას ვერ ვხედავ. სათვალეს ვიხსნი. არავითარი დაისი, დილაა, გარეთ ქუჩაა, ხალხი, მანქანების ფერად-ფერადი თუნუქი, მზე, ვიტრინები, მზეში ჩაფლული ქუჩა, ყველაფერი ძველებურადაა. ფრაუმიუნსტერს თოლიები შესევიან, ისმის თერ-



თმეტი საათის მაუწყებელი ზარების გუგუნის. საბედნიეროდ, მორიგი მუშტარი შენოდის. თეთროსანი ქალიშვილი ბოდის მიხდის, ცოტა ხნით მანებებს თავს და შემოსულს ეგებება. მე ისევ ვიკეთებ სათვალეს, ვხედავ ჩემს ხელს, ვხედავ საკუთარ ხორცს, იმ მარციპანივით ფაშარსა და გარუხებულს, თავის დროზე რომ არ შეუჭამიათ. სარკეში, დიახ, იმასაც ვხედავ, რომ ეს გარეთ გასასვლელი კარი კი არა, სარკეა, ვხედავ ჩემი ტანის კაცს, ოღონდ არ ვიცი, სარკეში ასვეტილი თვალეზღარული კაცი მეც ასევე მცნობს თუ არა. მისი თვალების დასანახად სარკეს ვუახლოვდები, ის კაცი ჩემსკენ ბრმასავით მოდის, გზიდან არ უხვევს, ისე მოდის, თითქოს ჩემს სხეულში აპირებდეს გავლას — ამ დროს მოვიხსენი სათვალე.

— ინებეთ! — ვამბობ და ფულს ვიხდი...

ეს იქნებოდა დასაწყისი.

მერე?

რა თქმა უნდა, ჯოხიც დამჭირდება...

წარმომიდგენია:

განტენბაინის პირველ გამოსვლას ქუჩაში გულის კანკალის გარეშე არ ჩაუვლია, მაგრამ არც საღავიდარბო გამხდარა. მისი პირველივე თანამედროვე, რომლისკენაც ჯიქურ მიემართება მუქი სათვალეებითა და შავი ხელჯოხით აღჭურვილი განტენბაინი და ბრმების წესისამებრ ქვაფენილზე ჯოხს მიაკაკუნებს, ისე უხეშად მიადახებს, თვალები არა გაქვსო, რომ განტენბაინი სახტად რჩება. იმის მაგიერ, რომ გახარებოდა თავისი სიბრმავის პირველი დადასტურება, წყენისაგან ენა ჩაუვარდება და იმ ტუტუცს მოუხედავს. ბრმა უკან იხედება! უკვე მოუვიდა პირველი მარცხი. მისი ჩანაფიქრი, ვინც არ უნდა ყოფილიყო, არავისათვის არ დაეთმო გზა, შეიძლება სწორი იყოს, მაგრამ პირველივე ცდა მეტისმეტად თამამი და შემზადებული გამოუვიდა. თავიდან კაცი ყოველთვის აჭარბებს ხოლმე. განტენბაინი ერთხანს დგას. ცოტა უნდა დაშოშმინდეს, სანამ გზას გააგრძელებდეს ქვაფენილზე ჯოხის კაკუნით. რა თქმა უნდა, მიდამო ნაცნობი აირჩია. კროიცპლატცი, ცელტვეგი, ჰაიმპლატცი. ამ გზით ოდესღაც ყოველდღე დადიოდა სკოლაში და ხუთი თითივით იცის ეს გზა. ბულვარზე, ხეივანში მარტო რომ დარჩა, სათვალე მოიხსნა. ციურიხი ცისფერი ქალაქია, ჩემი სათვალე კი ისე რუხად აჩვენებს, რომ შიში აგიტანს, აჩვენებს ფერფლისფრად, ოდნავ მოლილისფროდ. ვერ უარყოფს, რომ სათვალის გაკეთებისთანავე გარესამყაროსთან გამომშვიდობების გრძნობა ეუფლება. მაშ განვაგრძოთ გზა. მგონი, დროც სწორად შეურჩევია: შესვენებისას გამოსულა გარეთ, როცა ხალხი სასადილოდ მიიჩქარის და სხვების სათვალე-ერებლად არა სცალია. მაგრამ ცოტა ხნის შემდეგ, როცა ჰელმჰაუსთან ვიდაც კაცი მაინც იჩენს გულისხმიერებას, ხელს ჰკიდებს და ქუჩაზე გადაჰყავს, თავი გაიძვერა ჰგონია. განტენბაინი ამას უნდა მიეჩვიოს. შტორჰენგასე, ვაინპლატცი, რენვეგი. თანდათან გაიწაფა. ჯოხის მეტისმეტი კაკუნიც არ ვარგა, თითო-თითოჯერ აქეთ-იქით მიკაკუნება, მე მგონი, საკმარისი უნდა იყოს. უპირველეს ყოვლისა, აუცილებელია: რაც არ უნდა დაინახო, არ შეიმჩნიო. რატომღა, რომ ბრმის დანახვაზე ნაღველი კი არ გერევა, არამედ სიმშვიდე გეუფლება? მგონი, განტენბაინი თანდათან უგებს ამ გრძნობას გემოს, მაგრამ ამ დროს ზურგს უკან — მისი სათვალე წითელ ფერს არ ატარებს — უეცრად აჭრიალდნენ დამუხრუჭებული საბურავები, დიახ, ზედ მის ზურგს უკან. მან-



ქანა არც შეჰხებია, მაგრამ ისე შეშინდა, რომ ჯოხი გაუვარდა ხელიდან. განტენბაინმა მაშინვე დაინახა, ჯოხი დამუხრუჭებულ საბურავებს შორის რომ ეგდო ასფალტზე და წამსვე მეორე მარცხიც მოუვიდა: ბრმა ველარ მოითმინა, დაიკუნა და თვითონ აიღო თავისი ჯოხი. ვაითუ უკვე გასცა თავი? მოწმეების ნაკლებობა არ იგრძნობა, საბურავების ღრჭიალმა ბევრი შეაჩერა, იგი ხედავს ლემურებს, ზოგიერთები ახლოს მოდიან, ცნობისმოყვარეობისაგან თუ ბრაზისაგან გალურჯებულები, იისფერ სპორტულ მანქანაში კი („კარმანის“ მარკის მანქანაში) სახეშეთხიპნილი ქერა ქალი ზის და თავს აქნევს. ამ მომწვანოთმიან უნდინესაც ქლიავისფერი ტუჩები აქვს. ბრმა ხომ არა ხარო? მისი ქურქი დამპალი წყალმცენარის ფერისაა. ბრმა ხარო? დიახ, ეუბნება იგი, დიახ, პირველად ეუბნება ქვეყანას, ბრმა ვარო, დიახ, და მიმოიხედავს, დამიჯერეს თუ არაო... საბედნიეროდ, პოლიციელი არ გამოჩენილა, ლემურები ჯერ ერთმანეთს ეკამათნენ, ვის უნდა უმადლოდეს ეს კაცი სიცოცხლესო და მერე ადევნებულ კარმანოსანს მხარი აუბეს, ვალდებული ხართ ყვითელი სამკლავური გეკეთოთო. განტენბაინს ამაზე კი აღარ უფიქრია. იგი სდუმს. თავზე ქუდი აღარ ახურავს, ქუდს იქვე ხედავს ასფალტზე, მაგრამ ქუდს რაღას დაეძებს, რაკი დავიდარაბას გადარჩა: არც მარცხენა წვივის ძვალი დაშავებია და არც იმ ქალის პრიალა ბუფერს დასტყობია რამე. რატომ არავინ მიაწოდა ქუდი? მომწვანო უნდინე ჯერაც არ დაწყნარებულა, გაიძახის, რა ბედზე გადარჩითო და გზის გაგრძელებას აღარ აპირებს, სანამ ყველა არ დაუდასტურებს, უმწიკვლოების განსახიერება ხართო, მათ შორის ის დიასახლისიც, ჯიუტად რომ ჩაუკმენდია ხმა. განტენბაინი ხედავდა, რომ ახლა იგი აღარავის ენაღვლებოდა, ყველა ერთხმად ყაყანებდა, განა შეიძლება ასეთ მანქანას ასეთი ვინმე ატარებდესო? ქალი შეეცოდა, უეცრად ყველამ მის წინააღმდეგ რომ გაილაშქრა. ქალს თვალები შარშანდელი შემოდგომის სველი ფოთოლივით ჰქონდა ამოშავებული, უბეები მოშავო-მოყავისფროდ თუ მოშავო-მოლურჯოდ მოუჩანდა. დიასახლისს, განტენბაინისათვის მკლავში ჩაევლო ხელი და ხმამაღლა ჩასჩიჩინებდა, ერთი შეხედეთ ამ კოკოტს, დიახ, კოკოტს, კინალამ არ გაგიტანათო, მაგრამ განტენბაინს მისთვის ხმა არ გაუცია. ბრმა ვერავის განსჯის. ხომ არ დაშავდითო, ჰკითხა დიასახლისმა, თითქოს შეღებულ კარმანოსანს უკვე დიდი ხანია არ ეკითხოს მისთვის იგივე. არათუ არ დაშავებულა, განსჯის უნარიც სწრაფად დაუბრუნდა. განტენბაინმა ახლა იკითხა, რა მოხდაო. სანამ უსურათხატებდნენ, ბეწვზე ხართ სიკვდილს გადარჩენილიო, მან ქუდი დაიხურა თავზე. ქუდი ყველას თვალწინ აიღო საკუთარი ხელით და თავზე დაიხურა. ხედავდა, რომ მის სიბრმავეში არავის შეუტანია ეჭვი. ლემურებს აღარ უნდოდათ მოსაწყენ ყოველდღიურობას დაჰბრუნებოდნენ და მოჰყვნენ საყვედურებს, ქუჩაში მოძრაობა მოუგვარებელიაო. აქ ერთხელ უკვე გაიტანა კაცი მანქანამო, გაიძახოდნენ გაცხარებულნი. არ ივარგებდა, განტენბაინი გზას პირველი დასდგომოდა. ამიტომ ქუდი ხელახლა მოიხადა და ქუჩის მტვერი ჩამოფერთხა, დიასახლისი კი ამ დროს სულ უფრო და უფრო უშვერი სიტყვებით ლანძღავდა კოკოტს. ბოლოს განტენბაინმა თავისი გაწმენდილი ქუდი დაიხურა, წასვლის დრო იყო. აღარ უნდოდა პოლიცია წამოსდგომოდა თავზე. პოლიცია მძღოლის მოწმობას მოითხოვდა, ვინ იცის, იქნებ ბრმის მოწმობაც მოეთხოვა და განტენბაინმა კარმანოსან ქალბატონს უთხრა, სიცოცხლეს თქვენ და მხოლოდ თქვენ გიმადლითო. ქალმა ლილისფერ ხელთათმანში გამოკვარ-



თული ხელი სპორტული ყაიდის ბერკეტს მოჰკიდა, იაფფასიანი ძრავა ჩართო და მადლობის ნიშნად ჰკითხა, საით გნებავთ წაგიყვანოთო. შინ! — უპასუხა მან. სად ცხოვრობთო; ჰკითხა ქალმა. უკან ხელახლა ატყდა პიპინი, განტენბაინმა შუა გზაში გაჩხერილი ტრამვაიც დაინახა და უყოყმანოდ ჩაუჭდა ქალს მანქანაში. პატარა ძაღლმა შესწკავეწკავა, ძაღლი კი მართლა არ დაუნახავს განტენბაინს. ეს იყო გაკრეჭილი პუდელი. ქალმა ნერვიულად ჩართო სიჩქარე და მანქანა ბიძგით დაძრა.

ახლა რაღაზე ვილაპარაკოთ?

ყვითელ სამკლავურს რატომ არ ატარებთო, სასაყვედუროდ კი არა, დედამვილურად ჰკითხა ქალმა. აქაოდა, ბრმა ვარო, მან კითხვა შეუბრუნა, ეს თქვენი ძაღლი, კინალამ რომ გავსრისე, ფოქსტერიერი ხომ არ არისო. ეს დილექტანტურად, დამწყებივით გამოუვიდა. მერე სულ ჩაიკმინდა ხმა. რა საშინელი მოძრაობააო, თქვა ქალმა, რომ მოებოდიშებინა, ბიძგებით ამიტომ მიმყავს მანქანაო. ქალაქის გარეუბნისაკენ მიდიოდნენ. იგი ხედავდა: ტბა ისე ლაპლაპებდა, თითქოს მთვარის შუქი ეცემო, თითქოს ღამის ნათელში გახვეულ, ტოტებგაბარდნილ შავ ხეებს ბრინჯაოს ფოთლები გამოსხმოდა, ირგვლივ არავის ეცვა თეთრი პერანგი, ხილზე გამოკიდებული ნაცნობი დროშებიც უცხოოდ აჭრელებულიყვნენ, რომელიღაც არარსებული დროშის ფერები მიეღოთ და გულს უხალისებდნენ. არ შეცვლილიყვნენ მხოლოდ კოშკების ნაცნობი სილუეტები. ბედნიერებას ჰგვრიდა ის, რომ არავის ეცვა თეთრი პერანგი, საითაც არ გაიხედა, გულზე მოესალბუნა, კმაყოფილება იგრძნო. თოლიები ლილისფერნი არიან. პოლიციელების მუზარადებიც ლილისფერია. განტენბაინი აღტაცებას ვეღარ მალავს. „კარმანით“ კმაყოფილი თუ ხართო, ჰკითხა ქალს. საიდან უნდა სცოდნოდა ბრმას, რომ „კარმანში“ ისხდნენ, მაგრამ ესეც გაუვიდა და გაოცდა. სიბრმავის დასამტკიცებლად ისიც კმაროდა, რომ ხანდახან სიგარეტის ფერფლს საფერფლეს ააცილებდა და ძირს ყრიდა. მხოლოდ ის აწუხებდა, რომ ფილმებზე ვერ ისაუბრებდნენ. ფილმებზე სიტყვის ჩამოგდებით იოლია საერთო ენის გამოძებნა. ეტყობა, არც ქალმა იცოდა, ბრმასთან რაზე უნდა ელაპარაკა და დიდი იყო ცდუნება, ამასობაში ინტიმურ საუბარზე არ გადასულიყვნენ. ცოლი თუ გყავთო? ამ დროს იგი შეშინებული უყურებდა, როგორ გადაკვეთა ქალმა ქუჩის გამყოფი მოთეთრო-მოლილისფრო ხაზი და პასუხის გასაცემად ენა ვერ მოატრიალა, ხოლო შემდეგ ტრამვაიც უკან მოიტოვეს და ეს კითხვაც. მან შვებით ამოისუნთქა. დიახ, თქვა ქალმა, „კარმანის“ კმაყოფილი ვარო. ხანდახან ქალი გვერდიდან შესცქეროდა ცნობისმოყვარედ, ვის შევუნარჩუნე სიცოცხლეო. იმედი მაქვს, გზა ძალიან არ გაგიგრძელეთო, უთხრა მან ქალს. ნამდვილი მისამართი, რა თქმა უნდა, არ უთქვამს, მხოლოდ თავისი სახლის ახლომახლო ქუჩა დაუსახელა ყასიდად. ქალს ლილისფერხელთათმანიანი ხელი საჭეზე ედო და უცდიდა მოლურჯო ლემურების ჯგრო როდის გადავიდოდა ქუჩაზე. მან ხელახლა ჰკითხა ბრმას, ნუთუ მიმხედავი არავინ გყავთო? ამ დროს, საბედნიეროდ, ისევ აინთო მწვანე შუქი, მანქანები დაიძრნენ და მანაც ჩართო სიჩქარე. იგი უკვე გრძნობდა, რა ძნელი იქნებოდა ყოველდღე ბრმის როლის თამაში, მაგალითად, რა ძნელი იყო ქალის გვერდით მანქანაში მჯდარიყავი და სიტყვა არ დაგცდებოდა, ერთიც არ ამოგეხვნეშა, არც ერთი მამაკაცური დარიგება არ მიგეცა, წარბიც კი არ შეგეხარა, როცა დაინახავდი იმას, რაც ქალს მხედველობიდან გამოეპარე-



ბოდა, ვთქვათ, ვერ შეამჩნევდა მარჯვენა მხარეს მომავალ საბარგო მანქანას. ძნელი იყო, ამ დროს მეგობრული კილო არ შეგეცვალა, ქალი კი თავის შეცდომას ვერც შეამჩნევდა და ერთხელ კიდევ გახსლტებოდა მშვილობიანად.

— გმადლობთ, — თქვა მან, — მოვედი.

— აქ გაგიჩეროთ? — ჰკითხა ქალმა, მუხრუჭი მოსწია და დასძინა, — მეზობლები ვყოფილვართ.

განტენბაინი ამას კი აღარ მოელოდა.

— დიახ, — გაუმეორა ქალმა, — მეზობლები ვართ.

გაჩერებულ მანქანაში ისხდნენ, ქალმა ძრავაც გამორთო, განტენბაინი კი გაოგნებული იჯდა. შემდეგ? ბრმამ რომ მიმავალი მანქანიდან, ესე იგი ბორდიურზე ჯოხის მიუკაკუნებლად შესძლო ეთქვა, აქ არის ჩემი სახლიო, ეს ქალს არ გაჰკვირვებია. მას ნამდვილად სჯეროდა ბრმის მეექვსე გრძნობისა და ალბათ გახარებულაც იყო, ისეთი მეზობელი რომ იშოვა, რომელიც ვერასოდეს დაინახავდა მასთან მოსიარულე მამაკაცებს. იმის გაფიქრებამ, რომ ამ კაცის წინაშე მაინც შეეძლო მანდილოსნის როლი ეთამაშა, ფრთები შეასხა. ყავას ხომ არ მიირთმევთ? განტენბაინს ამ წუთში ნამდვილად კონიაკი ერჩივნა. ან იქნებ ჩაი დაგელიათო. უარის თქმა ვეღარ გაბედა, თუ უნდოდა ბრმის როლი გადაერჩინა, მას მანდილოსანივით უნდა მოჰქცეოდა, ხოლო, როცა ქალმა უმანკო სახით ჰკითხა, რა გვარი ბრძანდებითო, არც გვარი დაუმალავს.

— განტენბაინი? — ჰკითხა ქალმა, — თქვენი ნათესავი ხომ არ არის...

— არა, — უპასუხა მან.

— არა, — თქვა ქალმა, — ასეთი დამთხვევა ნამდვილად საოცარია.

ეს სიტყვები მან რამდენიმეჯერ გაიმეორა, თან ხელი ნიანგის ტყავის ხელჩანთაში მოათვათურა და კუწუწებიანი სადარბაზო ბარათი ამოიღო. ბარათს თვითონაც მშვენივრად წაიკითხავდა, მაგრამ ქალმა მაინც წაუკითხა: კამილა ჰუბერი. სახელის ქვეშ რა ეწერა, ის აღარ გაუმხელია. მემანიკიურე. მის ხელობასთან ბრმას არაფერი ესაქმებოდა. არც ის უენიშვნა იყო საიმისო, მიღება მხოლოდ ტელეფონით წინასწარ შეთანხმებითო. რაც გაიგონა, მხოლოდ ის გაიმეორა: კამილა ჰუბერი.

ეს საკმარისი გახლდათ. ბარათი ჯიბეში ჩაიღო, ქალმა კი იკითხა, მაინც სად ცხოვრობს ჩემი მეზობელიო.

— აი, იმ ლურჯ სახლში, — მიუგო მან.

ქალმა ვერსად დაინახა ლურჯი სახლი.

— ჰმ, — თქვა განტენბაინმა, — სადა ვართ?

იძულებული გახდა ახალი ტყუილი მოეგონებინა.

— განა ეს ფელდეგშტრასე არ არის? — ჰკითხა მან ქალს.

— სწორედ ფელდეგშტრასე გახლავთ.

მაშინ ეს ფელდეგშტრასეს დასაწყისი კი არა ბოლო იქნება, ხოლო ფელდეგშტრასე საკმაოდ გრძელი ქუჩაა და გამოდის, რომ მეზობლობაზე ლაპარაკი ზედმეტი ყოფილაო. მან დაინახა, რომ ქურქოსან ქალიშვილს გულიც დასწყდა და შეწუხდა კიდევ, ბრმის მეექვსე გრძნობა სანდო რომ არ გამოდგა. თავს იმის უფლებას როგორ მივცემ, მიგატოვოთ, თანაც ასეთ გარემოებაშიო.

ქალმა ისევ ჩართო ძრავა, რომ განტენბაინი თავისი სახლის წინ ჩამოეს-



ვა, რაკი ყავაზე არ დამეწვიეთ, ვერ მოვისვენებ, შინამდე თუ არ მიგიყვანეთო და ასე შემდეგ.

განტენბაინი ღებულობს შიპატიყებას.

ლიფტში ქალი დაინტერესდა, ხშირად იბნევით ქალაქში თუ არაო. კაცი თვალს ხუჭავს, რომ როლში შევიდეს, იგი ხომ პირველად მიდის სტუმრად როგორც ბრმა, და ლიფტიდან გამოსვლისას დამაჯერებლად (ოდნოდ შეტისმეტი არ უნდა მოუვიდეს) წაიფორხილოს. კამილა გულის ამაჩუყებლად იქცევა. ბინაში წესიერად არც ჰქონდათ ფეხი შედგმული, რომ პალტო, ქუდი და ჯოხი ჩამოართვა. არც კამილამ იცის, ბინაშიც საჭიროა შავი ჯოხი თუ არა — ის პირველი ბრმა სტუმარია მისი. თვითონ კი ჰგონია, რომ აუცილებლად საჭიროა, რადგან ჯოხმა როლი უნდა შეახსენოს ხოლმე.

— დაბრძანდით!

ქალს ავიწყდება, რომ იგი სავარძელს ვერ ხედავს.

— რა მშვენივრად ხართ მოწყობილი! — ამბობს განტენბაინი.

— ჰო, არა? — ეუბნება ქალი, მის წინდაუხედაობას ვერ ამჩნევს და დასძენს: — თქვენ რომ ჩემი ბინიდან გადაშლილი ხედი დაგანახათ! აქედან მთელი ტბა მოსჩანს.

კამილა აზვიადებს.

— მთები თუ მოსჩანს? — ეკითხება იგი.

კამილას ჯერ არ გაუხდია თავისი წყალმცენარისფერი ქურჭი, მან ჩუმად გამოაღო ფანჯარა, რომ სტუმარს სუფთა ჰაერით ესუნთქა და ერთხელ კიდევ ჰკითხა, მართლა ხომ არაფერი დაგშავებიათო. განტენბაინი უთვალთვალს, როგორ უხმაუროდ აფარებს კამილა დივანზე პლედს, ასევე უხმაუროდ იღებს კონიაკის ორ სასმისსა და ლიფს, თითქოს თავისი სტუმრის სიბრძავეში მაინც ეჭვი ეპარებაო. ამ ფაციფუცში იატაკზე რჩება ერთმანეთში აბურღული წინდები. ქალმა როგორც კი ზურგი შეაქცია, განტენბაინმა დრო იხელთა და ფეხით შეჰყარა ის წინდები დივანქვეშ. სხვა მხრივ, ისევე იქცევა, როგორც სხვის სახლში პირველად შემოსულ კაცს შეეფერება: ოდნავ უხერხულად გრძნობს თავს, ცდილობს ბინა არ შეათვალიეროს, მაგრამ პირველი შთაბეჭდილება მაინც ექმნება და ლაპარაკით ცდილობს დამალოს ეს შთაბეჭდილება. იგი ბინის ქირაზე და სიძვირეზე საუბრობს, კამილა კი ღამით გავსებულ საფერფლეს ცლის და ყველაფერზე თავს უქნევს სტუმარს. შემდეგ ოთახს მოავლებს თვალს. ახლა, როცა აბურღული წინდებიც მიმალულია, ბინას შეეხედება. ეს დამოუკიდებელი ქალის ბინაა. შემდეგ განტენბაინი ქალს ეუბნება, ნუ სწუხდებითო და რაღაც ამდაგვარებს, მაგრამ ამაოდ. კამილა უკვე სამზარეულოშია და წყალს ადგამს.

განტენბაინი მარტო დარჩა.

შემდეგ, ბრმის გამოცდილებას რომ შეიძენს, სითამამე მოემატება და ყოველნაირ საზოგადოებაში გაბედავს გამოჩენას განტენბაინი.

ბრმის სათვალე ექნება გაკეთებული, ერთ ვილაში შევა და შვეიცარიელ პოლკოვნიკს გაუბამს ლაპარაკს, რომელიც ვითომ ნაცნობ სპეკულიანტში შეეშალა. ბრმას ვერაფერს უსაყვედურებ. იგი ერთმანეთისაგან ვერ გაარჩევს ვეჟილსა და ყალბისმქნელს, იმავე სპეკულიანტს ბიძაშვილად რომ ერგება. განტენბაინს ყოველთვის შეეშლება რაღაცა, რომ დაამტკიცოს, ბრმა ვარო. განტენბაინს სუფრასთან დასვამენ და სუფრულ საუბარში გაანათლებენ, ბატო-



ნებს რისი დანახვა სურთ და რისი არა. მას ისე წარმოუდგენენ ქვეყანას, როგორც გაზეთებში ხატავენ ხოლმე და რაკი განტენბაინი თავს მოიკატუნებს, ასეც მჯერათ, კარიერაც განაღებულ ექნება. ნიჭისა და უნარის ნაკლებობა ნუ შეაშინებს. ქვეყანას სწორედ განტენბაინისთანა ხალხი სჭირდება, ასეთები არასდროს არ ამბობენ იმას, რასაც ხედავენ. ზემდგომნი მის ღვაწლს დააფასებენ და ამ დაფასების მატერიალურ გამოვლენასაც არ დასჭირდება დიდხანს ლოდინი. იმის შიშით, როლიდან არ გამოვიდეთ, განტენბაინი ხელს ვერ აიღებს თავის შეხედულებებზე, ვერც მათ შეცვლას გაბედავს, აქაოდა ჩემი შეხედულებების საწინააღმდეგო მოვლენებს ვხედავო. იგი პოლიტიკურ კარიერას გაიკეთებს, ნამდვილს თუ არა, საპატიოს მაინც. არც ერთ თავშეყრას არ გამოაკლდება, ყველგან დაინახავთ თავის ხელჯოხზე დანდობილს და რაკი ერთხელ და სამუდამოდ ცნობილი იქნება, განტენბაინი ვერ ხედავს, მის თვალწინ რა თამაშდებაო, მის აზრს ყველგან სიამოვნებით მოისმენენ. ხანდახან უხერხულ მდგომარეობაშიც ჩავარდება, ვთქვათ, ვინმე თავს მონსენიორად გააცნობს, განტენბაინი კი ბრმად შეეკითხება, ის ვინლა იყო, ებრაელებს ლორებს რომ უძახდაო. თურმე ის კაცი თვითონ მონსენიორი ყოფილა. თან ამ დროს ხიზილალას მიირთმევენ. იგი შეხვდება ერთ ვაჟბატონს, რომელიც ეს-ესაა კულტურის თავისუფლებაზე ლაპარაკობდა და შეეკითხება, ჰიტლერის დროს რომ ასეთსავე წამყვან როლს თამაშობდა, დარბაზში ისიც თუ არისო და ვერ დაინახავს, რომ სწორედ იმ კაცს ელაპარაკება. თან ამ დროს სიგარებს აბოლებენ და ასე შემდეგ... მემანიკიურე კამილა ჰუბერთან სტუმრობა მისი პირველი ცდაა მხოლოდ და როცა ქალი ფინჯნებით ხელში ოთახში შემობრუნდება, განტენბაინს ჯერ კიდევ ახალბედა ეთქმის.

— რა ჰქვია თქვენს ძაღლს? — ეკითხება იგი ქალს.

— ტედი.

— დიდებული ვინმეა.

— ჰო, არა? — ამბობს ქალი და თავის თავს ეკითხება, საიდან უნდა იცოდეს განტენბაინმა ჩემი ძაღლი რანაირიაო? სანამ ქება ამოსდის პირიდან, ბრმასაც შეუძლია ყველაფერზე ილაპარაკოს, მაგრამ განტენბაინი თავს ვერ იკავებს და საწინააღმდეგო ცდასაც ატარებს.

— ერთი მითხარით, — ცოტა ხნის შემდეგ ამბობს იგი, — განა მილერის სავარძლები საძაგელი არ არის? მე თუ მკითხავთ, ნამდვილად საძაგელია.

ქალი ამ დროს სწორედ ყავას ასხამს.

— თქვენ რას შეატყობთ? — მოკლედ პასუხობს იგი, რომ აგრძნობინოს ამ საქმეში არაკომპეტენტური ხართო და შემდეგ ალერსიანად დასძენს, შაქარს ხომ არ ინებებთო.

განტენბაინი თავს უქნევს.

— ტორტს?

განტენბაინი ყოყმანობს.

— ენგადინური<sup>1</sup> ტორტია, — ეუბნება ქალი, — სამწუხაროდ, უკვე გაჭრილი გახლავთ, — გულახდილად დასძენს იგი, — მაგრამ სულ ახალია.

განტენბაინს ნამცხვარი საერთოდ არ უყვარს, მაგრამ მაინც უქნევს თავს. ეს მისი პირველი ტრაპეზია ბრმის როლში! ტორტი იოლი საჭმელია. ბრმად

<sup>1</sup> ენგადინი ხეობაა შვეიცარიაში (მთარგმნ.).



მოათუებ თეფშზე ჩანგალს, სანამ ტორტის ნაჭერს მიაგნებდე (აი, კალმასის ჭამა კი უფრო ძნელი იქნება. მიყვარს, როცა კალმასს მე თვითონ ვაცლი ხოლმე ფხებს. რა გაეწყობა, განტენბაინს აქედან ნომრის გაკეთება მოუწევს: ბრმა საკუთარი ხელით ისე მარჯვედ აცლის კალმასს ფხებს, რომ ვერც ერთი ოფიციალტი ვერ შეედრება. პირდაპირ საზღაპრო ამბავია. თანამესუფრეებს ჯულწრფელად აოცებთ ეს და დაუჯერებელი ამბით აღტაცებულნი ბრმას ეხვეწებიან, ჩვენც გაგვირჩიე თევზიო).

— ღმერთო ჩემო, კოვზები დამავიწყდა, — ამბობს ქალი. იგი გამოუცდელი დიასახლისის როლს თამაშობს.

— რა საშინელებაა, — იცინის ქალი, — დიასახლისობა სულ არ მემარჯვება.

მაშ, კამილას ამ როლის თამაში ნდომებია: იგი დიასახლისი არ არის. იქნებ ფიქრობს, რომ განტენბაინს იგი განათლებული ქალი ჰგონია? მაშასადამე, დიასახლისი არ არის, ეს ცხადია. ხელოვანი ხომ არ არის? ყველაფერი გასაგებია: ასეა თუ ისე, ამ ქალს აქვს პროფესია. ასე რომ არ იყოს, ყოველი კოვზისათვის არ ირბენდა აქეთ-იქით. თან წყალმცენარისფერი ქურჭი ჯერაც არ გაუხდია და ისე გახარებული დაფუსფუსებს, თითქოს თავიდან დაეწყოს ცხოვრება. ეს აღმაფრენა ალამაზებს, ყოველ შემთხვევაში, თუ არ ალამაზებს, აახალგაზრდავებს მაინც. სიამოვნებს, ვერაფერს რომ ვერ ხედავს, როგორ ირთხამს ტახტზე ფეხს, მანამდე კი უჩუმრად იხდის თავის იისფერ ფეხსაცმელებს, რომ განტენბაინმა ცუდი არაფერი იფიქროს და ასევე უჩუმრად აწყობს მისაწვდომ მანძილზე.

— არა უშავს! — ამბობს ქალი.

— რას არა უშავს?

— ტედი მოუღებენს, — დასძენს იგი.

ალბათ ტორტის ნაჭერი თუ დავარდა ხალიჩაზე, მაგრამ რაკი ეს განგებ არავის უქნია, დამაჯერებელი ჩანს. ოღონდ განტენბაინი ახლაც ვერ უნდა მიხვდეს ვერაფერს, არც მადლობა არ უნდა გადაუხადოს კამილას, როცა იგი გუშინდელი ტორტის კიდევ ერთ ნაჭერს გადმოუღებს თეფშზე. ისე ურჭობს ჩანგალს ტორტში, თითქოს იგივე ნაჭერი ყოფილიყოს, რომელსაც ამასობაში ძალღი მიირთმევს ხალიჩაზე. ბრმა კაცს ძალღი რატომ არა გყავთ, წარმომიდგენია, როგორ შეშინდებოდით, უეცრად მანქანის ბამპერს რომ იგრძნობდით ფეხზეო. შემდეგ როცა განტენბაინი ამ შიშის გახსენებაზე გულის მოსაბრუნებლად კონიაკს სთხოვს, ქალი ამაოდ დაეძებს ბოთლს, რომელსაც კარგა ხანია ხედავს განტენბაინი. კამილა ბოთლს ვერ ხედავს. იგი იძულებულია დაეხმაროს ქალს, ვითომ ლამბაქის გადადგმა უნდოდეს, ლამბაქს გასწევს და კონიაკის ბოთლს უჭახუნებს. კამილა საუბრის გაუწყვეტლად (ამასაც თუ საუბარი ჰქვია), სამზარეულოში გადის კონიაკის ჭიქების გასარეცხად, განტენბაინს კი, როგორც ეს კონიაკის მცოდნე კაცს შეეფერება, გული არ უთმენს, რომ საეჭვო ბოთლი ხელში არ აიღოს და ეტიკეტი არ წაიკითხოს. კამილა უხმაუროდ შემოდის ოთახში, ქურჭი ჯერ ისევ ტახტზე აცვია, მაგრამ როგორც ვთქვით, ფეხსაცმელები გახდილი აქვს და ამიტომ უჩუმრად წაადგა განტენბაინს თავზე, განტენბაინს კი მარცხენა ხელში ბოთლი უჭირავს, ხოლო მარჯვენაში ბრმის სათვალე, რომ უკეთ შესძლოს ეტიკეტის წაკითხვა. ამაზე უფრო აშკარად როლიდან ვერ გამოვიდოდა განტენბაინი, მაგრამ კამილა მხო-



ლოდ ბოდიშს უხდის, სხვა მარკის კონიაკი არა მაქვსო. ის კი, ეტყობა, შიშმა იხსნა, თავი საბოლოოდ რომ არ გამოიაშკარავა: სათვალე მაშინვე რომ გაეკეთებინა, კამილა სახტად დარჩებოდა. შიშისაგან სათვალე ხელში შერჩა. შემდეგ ჯერ ფულის მოსაბრუნებლად კონიაკი გადაჰკრა და სათვალე ისე გაიკეთა. გაიკეთა ჩვეული ჟესტით, ძალდაუტანებლად, ვითომ სხვათა შორის, შეუმჩნევლად, ისე რომ საუბარიც არ შეუწყვეტია. საუბრობდნენ კოსმოსში უკანასკნელ გაფრენაზე, მაშასადამე, მომავალზე და კაცობრიობაზე, ესე იგი ისეთ მოვლენებზე, რომელთა დანახვა არავის ძალუძს. სხვათა შორის, უსათვალოდ დაადგინა, რომ მისი ქურქი ქარვისფერი ყოფილა, თმა რა თქმა უნდა, მომწვანო-მოლურჯო კი არა, ქერა აღმოჩნდა, წყალბადის ზეჟანგით შეღებილი ქერა. არც ტუჩები ჰქონია ქლიავისფერი, მაგრამ განტენბაინი ისე შეეჩვია ქლიავისფერს, რომ ახლა უსათვალოდ დანახული პომადის ნამდვილი ფერიც ასევე არაბუნებრივი ეჩვენება. მაინც ღირდა ცოტა ხანს სათვალის მოხსნა. განტენბაინმა ახლა იცის, რომ კამილას ოთახი იისფერი კი არ არის, ერთი ჩვეულებრივი, გემოვნებით მოწყობილი ოთახია. ეს ბინა ნამდვილად შეიძლებოდა განათლებული ქალის ბინაც ყოფილიყო და უბრალო მხაზველისაც, ან ვისიც გნებავთ. მხოლოდ წიგნები აკლდა აქაურობას. ფირფიტას ხომ არ მოისმენთო? ასე მყუდროდ ფეხის მორთხმა მეტისმეტი იყო და იკითხა, რომელი საათიაო. კამილა ეუბნება, ორი დაიწყოო. მის საათში კი ორს აკლდა ათი წუთი. ქალს, როგორც ჩანს, არ უნდა მისი გაშვება, სიამოვნებს, რომ ვერ ხედავენ. ქალი თავისი როლით ტკბება. განტენბაინი მეორე ჭიქა კონიაკს ცლის და საათიც ორს რეკავს. კამილა, ეტყობა, სადმე ბიუროში არ უნდა მუშაობდეს. არც გათხოვილი უნდა იყოს. როგორც ჩანს, თავი მოაქვს ბურჟუა ქალბატონისაგან განსხვავებული შეულამაზებელი ლექსიკით. კამილა კვლავ ფეხებს იკეცავს და განტენბაინს აინტერესებს, ქალს როგორი უნდა გამოჩნდეს მის თვალში. თავის ასაკზე უფრო ახალგაზრდად რომ სურს მოაჩვენოს თავი, ეს ცხადია. ჩემისთანა ახალგაზრდა ქალიც კიო. ბევრჯერ თქვა მან. განტენბაინი თვალებს ხუჭავს, რათა უკეთ გაუგოს ქალს. კამილა განათხოვარი ყოფილა. ერთხელ გათხოვილა და მეტად აღარც გათხოვდებოდა. მამაკაცებს ჰგონიათ, ფული ყველაფრის უფლებას აძლევთ, სამსახურში ჩამდგარ ქალს კი იგივე უფლებები აქვს, რაც მამაკაცსო, ამბობს კამილა. კაცი თუ გიყვარს და ამიტომ უდგები დიასახლისად, ეს კიდევ მესმისო. მხოლოდ ესო, ამბობს კამილა. კამილა საკუთარ თავს არ ჰყიდის. ის დრო წავიდა. რა თქმა უნდა, ასე ახალგაზრდა ქალი ხანდახან მეგობარს გაიჩენს ხოლმე, მაგრამ ყველას ფეხის ხმას ვერ აჰყვება, რაც უნდათ ის იფიქრონ მეზობლებმა, იგი დამოუკიდებელი ქალია, საკუთარი თავის ბატონ-პატრონი გახლავთ. არც ერთი ხელის დაქნევით გაეკიდება ვინმეს. თავისთავად გასაგებია, არც ბურჟუაზიული ქორწინებასწამს დიდად. ქორწინებაც ხომ გაყიდული დამოუკიდებლობაა და მეტი არაფერი. განტენბაინს ესმის მისი. კამილა თანამედროვე ქალია, მსახურობს, თუმცა განტენბაინი ხომ ვერასოდეს დაინახავს, როგორ მუშაობს იგი. ეს არის ქალი, რომელიც თვითონვე პატრონობს საკუთარ თავს, საკუთარ მანქანას ატარებს, თავისთავად გასაგებია, საკუთარი შრომით შეძენილ მანქანას. კამილას ვერც წარმოუდგენია სხვაგვარად აწყობილი ცხოვრება, დამოუკიდებელი ქალი ვარ, თანამედროვე ქალი ვარო, ამბობს კამილა, ოღონდ ამის მრავალჯერ გამეორებას აზრი არა აქვს. განტენბაინი უკვე მიხვდა, რა როლის თამაში



აქვს მის წინაშე კამილას ჩაფიქრებული და ისიც ირწმუნებს ამ როლს, თუკი კამილა სამაგიეროდ ბრმის როლს დაანებებს.

განტენბაინი კარებში დგას. ქალმა უკვე მისცა შავი ხელჯოხი, კინალამ რომ დარჩა ოთახში.

— რაკი მეზობლები ვყოფილვართ, უეჭველად შევხვდებით ისევ ერთ-მანეთს... — ეუბნება იგი ქალს.

კამილა ბედნიერი ღიმილით უქნევს თავს.

ინტელიგენტმა მამაკაცმა ორმოცდაერთ წელს ისე მიატანა, რომ არც განსაკუთრებული წარმატებებისათვის მიუღწევია და არც განსაკუთრებული დაბრკოლებანი შეხვედრია ცხოვრების გზაზე. ახლა კი, მიეცა თუ არა განსაკუთრებული წარმატების შესაძლებლობა, შეეშინდა იმ როლის, რომელსაც აქამდე აშკარად თამაშობდა.

ნამდვილად შეფერებული ჰქონდა კი ეს როლი?

ეს ამბავი ხდება პატარა მეგობრულ წრეში, იცის, რომ ამ წრეში პატივს სცემენ, თან დღეს ისეთი არაფერი ხდება, საერთოდ არ ხდება არაფერი, ჩვეულებრივი საღამოა, მას კი ვერ გაუგია, რა აშინებს. საკუთარ თავს ჩააგონა, ბევრი დავლიეო (დალია ორი ჭიქა! ალბათ მეტს ვერც აიტანდა) და სასმელზე უარს ეუბნება სტუმართმოყვარე მასპინძელს, რომელსაც ხელში ბოთლი უჭირავს და ჭიქებს უვსებს მოსაუბრეებს. ენდერლინი ხელს აფარებს თავის ცარიელ ჭიქას, უსიტყვოდ აფარებს ხელს, რომ სხვების ყურადღება არ მიიქციოს, სამაგიეროდ მტკიცედ, გამწარებითაც კი ირიდებს სასმელს, თითქოს ასე შეიძლებოდეს შიშის თავიდან მოშორებაც და თან ცდილობს ყურთასმენად ქცეული მოსაუბრის გამომეტყველება შეინარჩუნოს. რა მოგივიდათო, ეკითხება ერთი მანდილოსანი, რომელიც კარგა ხანია გამოეთიშა საუბარს. მასპინძელი ეს-ესაა შეახურა ცოლმა დაცარიელებული ჭიქების გამო და ისიც განსაკუთრებით იღებს თავს, რა მოუვიდა ენდერლინსო? თვითონ კი იცის, რომ არაფერი აქვს სათქმელი. შემდეგ ენდერლინი კვლავ ავსებინებს ჭიქას, რადგან ატყობს, რომ ალკოჰოლი არაფერ შუაშია, პირიქით, გრძნობს, რომ სასმელი სულ არ მოჰკიდებია. სამწუხაროდ, ჯერ თერთმეტი საათია და შემუშინებულად გაპარვა თითქმის შეუძლებელი ჩანს. იგი სვამს. სწორედ იმ დღეებში გამოჩნდა პრესაში და არა მარტო მისი მშობლიური ქალაქის, არამედ საზღვარგარეთის პრესაშიც (ეს გარემოება ყოველთვის განსაკუთრებულ შთაბეჭდილებას ახდენს, თუმცა ფაქტი უცვლელი რჩება) სამსტრიქონიანი ცნობა, ენდერლინი ჰარვარდში მიიწვიესო და უხერხულად გრძნობს თავს, ამ ცნობაზე მაინცდამაინც ახლა რომ ჩამოვარდა ლაპარაკი. განსაკუთრებით კი ის ეხამუშება, დიასახლისმა მის გამოსაცოცხლებლად რომ აიჩემა, ამ ამბის აღსანიშნავად სადღეგრძელო უნდა შევსვათო. ენდერლინი ცდილობს საუბარი სხვა საგანზე გადაიტანოს, მაგრამ ამაოდ ირჩება. ტორშერის ჩრდილში შეყუჟულ ქალიშვილს არ სცოდნია, ჰარვარდი რა არის. ამის გამო სადღეგრძელო ფერხდება. მასპინძელი იძულებულია იმ ქალიშვილს აუხსნას, რა არის ჰარვარდი და რას ნიშნავს ჰარვარდში მიწვევა. მას გაუმარჯოს! სადღეგრძელო საზეიმოდ არ ისმევა, მაგრამ იმდენი მეგობრული სერიოზულობა ახლავს თან, რომ ენდერლინის გარშემო სუფრაზე წამით სიჩუმე ისადგურებს. მიწვევა ჰარვარდში, ჰო, კარგით ერთი, ვითომ ცდილობს გააბიაბრუოს ეს მიწვევა, მაგრამ



მაინც უფუჭდება გუნება, რადგან ატყობს, რომ აღარავის ჰქონია მისი წარმატების იმედი. ღვინოს სვამენ, 1947 წლის ბურგუნდულს, მაგრამ ენდერლინის გარშემო ჩამოვარდნილი სიჩუმე გრძელდება. ბოლოს და ბოლოს (ენდერლინს რაღაც ხომ უნდა ეთქვა, რომ ძეგლივით არ ყოფილიყო დადუმებული), ჰარვარდში შარლატანებსაც კი იწვევენ და, ესეც არ იყოს, უცხო უნივერსიტეტში პირველად როდი მიმიწვიესო. ეს ისე, სხვათა შორის თქვა. სამართლიანობა მოითხოვს აღინიშნოს, რომ უფრო პატარა უნივერსიტეტებიც, მაგალითად ბაზელის უნივერსიტეტიც, დამსახურებულად სარგებლობს ავტორიტეტით. ან თუნდაც ტიუბინგენის უნივერსიტეტი ავიღოთო. მაგრამ ამაზე ენდერლინს არც მართებდა ლაპარაკი და, კაცმა რომ თქვას, არც უნდოდა ელაპარაკა. ესეც ერთ კაცს უთხრა მხოლოდ, რაკი საზოგადოებამ სწორედ ამ დროს პუდელს მიაპყრო თავისი ყურადღება, რომელიც ოთახში დაკუნტრუშებდა და მალაყებზე გადადიოდა. რა დიდებული ცხოველია! ენდერლინიც ამ აზრისაა, უხარია, რომ ჭერჭერობით მაინც ყველას ყურადღება პუდელისკენაა მიპყრობილი. ჰარვარდში როდის მიბრძანდებითო, ეკითხება ერთი მანდილოსანი, ისიც პასუხობს, მაგრამ სამწუხაროდ ისე ჩუმად, რომ ტორშერის იქით მოქცეულებიც იმავე კითხვას უსვამენ. ენდერლინიც იძულებულია ერთხელ კიდევ უპასუხოს ამ კითხვაზე, უპასუხოს ხმამაღლა, ყველას გასაგონად, როდის აპირებს ჰარვარდში წასვლას, და, ბუნებრივია, კვლავ ექცევა ყურადღების ცენტრში, აკუნტრუშებული პუდელი აღარავის აინტერესებს. ახლა ერთი მხიარული ამბის, ერთი კარგი ანეგდოტის მოყოლა სულ სხვა გუნებაზე დააყენებდა საზოგადოებას, მაგრამ ისეთი არაფერი აგონდება. მის პასუხს დაძაბულად არ ელოდებიან, მაგრამ სიამოვნებით მოუსმენენ. მაინც რას მოყვება უკვე სახელმოხვეჭილი კაცი? თითქმის ყველა სახელმოხვეჭილი კაცი ირწმუნება, სკოლიდან ერთხელ გამონაგდები ვარო. ეს ყველამ იცის, მაგრამ მაინც ყოველთვის სიამოვნებით ამის მოსმენა. ენდერლინი კი გაოგნებულია, რაღაც უნდა თქვას, მაგრამ მხოლოდ ის იცის, რომ სათქმელი არაფერი აქვს. ამასობაში მასპინძელი სიგარეტს სთავაზობს სტუმრებს, მისმა მეუღლემ კი დრო იხელთა და აკუნტრუშებული პუდელი ოთახიდან გაიყვანა, რადგან ძალს ეგონა, დადუმებული საზოგადოების ყურადღების ცენტრში მე ვარ მოქცეულიო. შუალამის დადგომას კი არა და არ დაადგა საშველი...

„შემოვიდა ჰერმესი“.

მხოლოდ ამ ანტიკურ ანდაზას თუ იტყოდა ახლა ენდერლინი, რადგან იგი ამ წუთში გამეფებულ უხერხულ სიტუაციაზეა ზედგამოჭრილი. მაგრამ ამის თქმა რომ არ ივარგებს? მას სწორედ ჰერმესზე დაწერილი შრომის გამო იწვევენ ჰარვარდში. ბოლოს და ბოლოს, მასპინძელს აწუხებს ოთახში გამეფებული უხერხული დუმილი და რაკი საზოგადოება თვითონ აღარ ირთობს თავს, მასპინძელი ცდილობს მათ გართობას, დიახ, ანეგდოტებით ლამობს საზოგადოების გართობას, მაგრამ მისი ანეგდოტები მიზანს ვერ ხვდება. ყველა ენდერლინს შესცქერის. ის კი ვერაფერს გამხდარა, სდუმს, მარცხენა ხელი შარვლის ჯიბეში უდევს, მეორე ხელში ჭიქა უჭირავს და ერთადერთი ის უსმენს მასპინძელს, დანარჩენები, ასე ვთქვათ, მხოლოდ ენდერლინის მეშვეობით ისმენენ ანეგდოტებს, მხოლოდ მაშინ იცინიან, როცა ენდერლინი იცინის, ენდერლინი მით უფრო ექცევა ყურადღების ცენტრში, რაც უფრო დიდხანს სდუმს. საქმეს ვერაფერს შველის ის ამბავი, მასპინძელი რომ ბრწყინვალე



მთხრობელია. შემდეგ მასპინძელი სარდაფში ჩადის და კვლავ ისადგურებს უწყინარი სიჩუმე. ვინ ფეხს ინაცვლებს, ვინ ფერფლს ფერთხავს სიგარიდან, ვილაც ფანჯარას ალებს, მიხვედრილობას უწონებენ, მაგრამ ღუმილი გრძელდება, ვილაცა ნამცხვარს ჩამოატარებს სუფრაზე, ეწევიან, ქანქარაანი საათი თორმეტჯერ რეკავს, მასპინძელს ახალი ბოთლები მოაქვს, ჰგონია, ენდერლინის გამოსვლას ვერ მოვუსწარიო, საზოგადოებას გადახედავს. მიტხარით, რაზე ლაპარაკობდითო, და ბოთლს საცობს აძრობს.

ნელ-ნელა აეწყო საუბარი.

ენდერლინმა დრო იხელთა და საზოგადოებას გამოემშვიდობა. მხოლოდ მისთვის მოხდა რაღაც, ეს არც პირველი შემთხვევაა და ალბათ არც უკანასკნელი იქნება, ოღონდ სანამ ნათლად გაიაზრებდე ამას, ბევრი პატარ-პატარა ელდა უნდა გამოიარო. თავის მანქანაში მარტო რომ დარჩა, გასაღები ზანტად გადაატრიალა და გულზე მოეშვა, მოტორი მაინც რომ მიუშაობდა, და ამაზე მეტი აღარ უფიქრია. ეს იყო უღიმღამო საღამო...

წარმომიდგენია, რა გრძელი, გულის გამაწვრილებელი და სანერვიულო იქნებოდა ის საათი, განტენბაინმა ქალაქის ჯანმრთელობის სამმართველოს მოსაცდელში რომ გაატარა. განტენბაინს ლურჯი სათვალე ეკეთა, ჯოხი მუხლებშუა ჩაედო და თავის რიგს ისე უცდიდა. იძულებული გახდა შეეგნო, რომ ბრმაც საზოგადოების წევრია და ყვითელი სამკლავურის გარეშე არავითარი უფლებები არ გააჩნია. განტენბაინი მარტოდმარტო იჯდა ამ მიუსაფარ ოთახში და ადგილობრივი მხატვრის სურათს შეჰყურებდა, რომელსაც ეტყობოდა, სახელმწიფოსათვის თავი რომ შეესაღებინა, ახლა ცოდვა აქ უნდა მოენანიებინა. განტენბაინი ალბათ პირველი ბრმა იყო, ვინც ამ სურათს ხედავდა, სამაგიეროდ, ჯიბეში რომ გაზეთი ედო, იმას ვერ წაიკითხავდა. ყოველ წუთს შეიძლებოდა ვინმე წამოსდგომოდა თავს. მასზე ადრე ერთ გნომივით დალეულ ბებრუცუნას მოუწია რიგმა. დედაბერს ყველაფერი დასრულებოდა — მოჯღანული ფეხსაცმელებიც, მომჩვარული ქუდიც და ხელოვნური ყბაც. იგი ციურიხის იმ თავშესაფარში მოხვედრისათვის იკლავდა თავს, ყველა გაზეთში სამართლიანად რომ იყო ნაქები და განტენბაინი შეჰპირდა, შენთვის ვილოცებო, მაგრამ როგორც კი ატყდა თერთმეტი საათის მაუწყებელი ზარების გუგუნის, დანაპირები, რა თქმა უნდა, დაავიწყდა. სადარდებლად თავისი საკუთარი მომავალიც ეყოფოდა, ის დალეული, ყბამოყანყალეული, უღვაშიანი დედაბერი კი უკვე ათი წუთი იქნებოდა, ქალაქის ექიმის კაბინეტში იჯდა და ხედავდა, გულკეთილობის მიუხედავად ექიმს მისი შველა რომ არ შეეძლო. თერთმეტი საათის მაუწყებელი ზარების გუგუნის, ციურიხის ეს ყველაზე ხალისიანი გამოგონება, ღია ფანჯარაში უფრო მშვენიერი მოსასმენი და დამატკბობელი იქნებოდა, მაგრამ განტენბაინი ვერ ხედავდა ამდგარიყო და ფანჯარა გამოეღო. სათვალე ეკეთა, შავი ჯოხი მუხლებშუა ედო, ესე იგი, იჯდა ისე, როგორც შეეფერება კაცს, რომელიც ყვითელ სამკლავურს თხოულობს და მოთმინებით ელოდა რიგს. ცნობები და მოწმობები ორი სპეციალისტისგან მაინც უნდა აეღო. აქეთ-იქით სირბილში (ბორდიურზე ჯოხის კაკუნით!) და ქაქანში, სანამ ორი ადგილობრივი ექიმი, თანაც ყოველგვარი განსაკუთრებული გასამრჯელოს გარეშე, მოიტყუებდა თავს, განტენბაინს, ნერვიულობაზე რომ აღარაფერი ვთქვათ, ერთი თვე დაეკარგა. ახლა მოწმობები ჯი-



ბეში ედო და ოფიციალური დაწესებულების ბეჭედილა აკლდა, ეს დაწესებულება წესით გულისხმიერი უნდა იყოს, განტენბაინს კი იმდენხანს ალოდინებდა, თითქოს ბრმას ამ ქვეყანაზე აღარაფერი ჰქონოდა დასაკარგავი. სიბრმავეს სიყრუე ხომ არ აჯობებდაო, ერთხელ კიდევ ჰკითხა განტენბაინმა საკუთარ თავს, მაგრამ ახლა გვიანდა იყო... თერთმეტი საათის მაუწყებელი ზარების გუგუნი ჩაჩუმდა; სამაგიეროდ, საბეჭდი მანქანის კაკუნი ისმოდა. ალბათ ბებრუცუნას სანუგეშებლად თუ აკაკუნებდნენ, ერთხელ კიდევ იწერდნენ დაწვრილებით მონაცემებს: დაბადების თარიღს, მამის სახელს, რომლის საფლავიც აღარ არსებობდა ამ ქვეყანაზე, დედის ქალიშვილობის გვარს, უკანასკნელ საცხოვრებელ ადგილს, გადატანილ სნეულებებს, ოკეანის გადაღმა გადახვეწილ ჯერ კიდევ ცოცხალი ვაჟიშვილის მისამართს, რომელსაც შეეძლო ტვირთისაგან გაეთავისუფლებინა სოცუზრუნველყოფის ორგანო. მოკლედ, რალაცას კი ბეჭდავდნენ. განტენბაინს უკვე გული უფანცქალებს, იმ საბეჭდი მანქანისათვის გასაცემ პასუხებზე რომ ფიქრობს. იქნებ სინდისი ქენჯნის? ხა! გამოშვებით თვალებს ხუჭავს, რომ როლში შევიდეს, მერე მალიმალ ახელს, მაგრამ ეს ხილული სამყაროს დანახვის წადილით არ მოსდის — ყველამ იცის, როგორი შეიძლება იყოს დაწესებულების მოსაცდელი ოთახი. იქნებ სიბერის ნიშანია, ყველაფერი, რისი დანახვაც თვალებს ძალუძთ, მოსაცდელი ოთახით რომ გვეჩვენება? მაგრამ აღამიანი მაინც კვლავ და კვლავ ახელს თვალებს. თვალის ბადურა გვიქარწყლებს იმ წარმოდგენებს, რასაც თითქმის ყოველი ფაჩუნი აღვიძებს ჩვენში, იგი დრო-ჟამისაგანაც გვიფარავს. კაცი ხედავს, რა დროს უჩვენებს სანკტ-პეტერის საათი ქუჩის მეორე მხარეს, საათები კი ყოველთვის ახლა დამდგარ წამს უჩვენებენ. ბადურა გვიფარავს მოგონებისა და მისი უფსკრულებისაგან. განტენბაინს უხარია, რომ მართლა ბრმა არ არის. საბოლოოდ იგი თითქმის მიეჩვია სათვალის წყალობით შეცვლილ ფერებს: ფერფლით ნაგები შენობების თავზე დაკიდულ რძისფერი შუშის მზეს, ბრინჯაოსფერ ფოთლებს, თითქოს საავდროდ მოქუშულ ჩამელნისფერებულ ღრუბლებს, ოღონდ ვერაფრით ვერ შეეგუა და კვლავ უცნაური ეჩვენება ქალების სათოვლიასფერი კანი.

ერთხელ განტენბაინმა საათზე დაიხედა და სწორედ ამ დროს მოსაცდელში დაწესებულების თანამშრომელმა გაიარა. მოლურჯო ხელში შავი პორტფელი ეჭირა (მხოლოდ შავი რჩება შავად), ისე ჩაიარა, განტენბაინისათვის თავი არ დაუქნევია, ალბათ, იცოდა, რომ მოსაცდელში ბრმა იჯდა, ასე იყო თუ ისე, არ მისალმებია და არც განტენბაინს დასჭირვებია თავის დაქნევა, შემდეგ კვლავ მარტო ზის განტენბაინი, ჯობი მუხლებს შორის უჭირავს და დრო აქვს, ერთხელ კიდევ აწონ-დაწონოს თავისი თამამი წამოწყება: უპირატესობა, ნაკლი...

გადაწყვეტილებას არ იცვლის.

ნელ-ნელა რწმუნდება, რომ ახლა რიგი არ მოუწევს, რამდენადაც იცის, ქალაქის დაწესებულებანი, თორმეტს რომ თხუთმეტი წუთი დააკლდება, ქუჩების ტრანსპორტით გადატვირთვას ერიდებიან და სარკმლებს კეტავენ. მოკლედ, იფიქრა, ნაშუადღევის ორ საათზე მომიწევს ექიმთან შესვლაო და ჩიბუხის გაწყობას შეუდგა. ჩიბუხს ჩვეულებრივად ტენის, ეს ისეთი ოპერაციაა, რომელიც თვალდახუჭულმა შეიძლება თითებს მიანდო... უპირატესობებმა გადასძლია... ახლა მხოლოდ ჩიბუხის გაჩაღებისას ახელს თვალს და აფარფატე-



ბულ ალს უყურებს, თუმცა ენამ მანამდეც იგრძნო, რომ თამბაქო იწვის. ყველაზე უფრო ერთი ნაკლი აშინებს: ბრმის როლი გულჩახვეულობას უქადის. ჩიბუხი გაღვივდა. განტენბაინმა კვლავ შვება იგრძნო, რომ მართლა ბრმა არ არის. კვამლს რომ არ ხედავდე, ჩიბუხს სულ სხვა გემო ექნებოდა, მწარე გემო, აბივით ან ინექციასავით გამაბრუებელი, მაგრამ უნაღისო კამილა ჰუბერთან ხანმოკლე შეხვედრამ ერთხელ კიდევ განუმტკიცა იმედი, რომ შესძლებს ადამიანებს ცოტა უფრო მეტი თავისუფლება მიანიჭოს, გაათავისუფლოს შიშისაგან, ვინმე ჩემს სიცრუეს არ ხედავდესო. უპირველეს ყოვლისა კი, განტენბაინს იმედი აქვს, რომ ადამიანები ბრმის წინაშე ნაკლებად შეინიღბებიან, ამიტომ უკეთ გაიცნობს ადამიანებს და რაკი მათ სიცრუესაც გაუწევს ძალაუნებურად ანგარიშს, ურთიერთობაც უფრო რეალურია და უფრო სანდო გამოუვათ.

როგორც იქნა მიიღო ექიმმა.

თეო განტენბაინი, დაბადებული ამა და ამ წელს, ამა და ამ ადგილას — ყველა მონაცემი მოწმობაში წერია. ექიმი ჯერ თვითონ დაჯდა და მერე გადაათვალიერა მოწმობები, დიდი ცნობისმოყვარეობა არ გამოუჩინია. ქალაქებს ზერელედ არა, მაგრამ შედარებით სწრაფად გადაავლო თვალი, რადგან საცაა შესვენების დრო დადგებოდა. ექიმი ისე გულგრილად ათვალიერებს მოწმობებს, რომ ეტყობა, ყველაფერი რიგზე უნდა იყოს. ბრმის ოფიციალური საბუთი, ორივე გვერდზე ნაბეჭდი ფორმულარი, მდივანმა ქალმა უკვე ჩალო საბეჭდ მანქანაში. განტენბაინმა თავიდან ბოლომდე სწორი პასუხები უნდა გასცეს ყველა კითხვას, რაც ყოველთვის არ არის იოლი, მოგეხსენებათ, ყოველი ფორმულარი ისეთ ტიპურ შემთხვევებს ვარაუდობს, ქვეყანაზე საერთოდ რომ არ არსებობს; მაგალითად, განტენბაინს საერთოდ არა ჰყავს დამსაქმებელი. ქონება? ეს კითხვა ეწინააღმდეგება კონსტიტუციას, იგი ხელყოფს ანაბრის საიდუმლოების დაცვის შვეიცარიულ წესს, რასაც ეს ქვეყანა ამდენ სიკეთეს უმადლის, მაგრამ განტენბაინი გართულებებს არიდებს თავს და თანხას ასახელებს, შეწუხებულ სახელმწიფოს გულზე ეშვება, ქალიშვილი კი ბეჭდავს გამალებული. სულ არ ენაღვლება „დიახს“ დაბეჭდავს თუ „არას“, ოღონდ შეცდომა არ მოუვიდეს. განტენბაინი თან ქალაქის ექიმის სახეს აკვირდება და ხედავს: ექიმი თავის მდივან ქალს არ ენდობა, თორემ ბრმისა ყველაფერი სჯერა. ეს განტენბაინს ხელს აძლევს. ახლა ერთი მდივან ქალს რაიმეს წაშლა რომ დასჭირდეს, ქალაქის ექიმს ზედ ეტყობა, არ დაუყვირებს, მაგრამ იმით დასჯის, რომ ბრმას მასზე უფრო დაუტკბება. ექიმი წინასწარ ხსნის თავს ავტოკალამს, რომ ბრმის ყვითელ მოწმობას დაბეჭდვისთანავე მოაწეროს ხელი. მგონი, ყველაფერი რიგზეა. განტენბაინს უფრო თავისი ზედმეტი ეჭვები ანერვიულებს. მაგალითად, ვაითუ დაფიცება დამჭირდეს ოკულისტების მოცემული მოწმობების თაობაზეო. ქალაქის ექიმი სწორედ ახლა ეუბნება, ბევრი კარდაკარ მოსიარულე მეწვრილმანე შანსავს ასეთ მოწმობებს, რომ დიასახლისებს გული აუჩუყოსო. რატომ ამბობს ამას? ნდობით რომ ეკიდებიან, მგონი, იმ ბებრუცუნას უნდა უმადლოდეს — ალბათ დაიმოწმებდა, მოსაცდელში რომ უსინათლო კაცი ზის, იმან ასე და ასე თქვაო. განტენბაინი გრძნობს, რომ მისი შემოსვლა დრამატურგიულად შემზადებული ყოფილა. სათქმელად იოლია! — მეგობრულად ეუბნება ქალაქის ექიმი და განტენბაინის შეხვედრულებებს არ ეთანხმება: აბა ყველა მოხუცს სად მოვუნახოთ თავშესაფარი? ექიმი



ციფრებს იშველიებს, რათა შემდეგ ჰკითხოთ, თქვენ თუ ხედავთ გამოსავალსო. საუბარს ტელეფონის ზარი აწყვეტინებთ და განტენბაინი აზრის მოკრებას ასწრებს, სანამ კვლავ დაუსვამდნენ კითხვას, გამოსავალს თუ ხედავთო. განტენბაინი მხოლოდ უთანაგრძნობს ექიმს, მესმის, ქალაქის ექიმი რა სიძნელეებს აწყდებო. ბებრუცუნას გასამხნევებლად მოსაცდელ ოთახში გამოთქმული შეხედულებანი კარგად გამოადგა: ისინი მის სხვაგვარ სიბრძნავს ხდიან სარწმუნოდ. ექიმს უნდა მდივანი ქალის უგერგილობისაგან მოგვრილი ბრაზი სიგარეტით დაიოკოს და უსიტყვოდ ეძებს ასანთს, განტენბაინი კი ამ დროს თავაზიანად აგებებს კვესს. ექიმს ამისათვის ყურადღება არ მიუქცევია. ახლა მდივანი ქალი რაღაცას შლის. აი ამას კი აქცევს ექიმი ყურადღებას. ჩვენს გონებას არ ძალუძს ერთდროულად ყველაფერს გასწვდეს, ექიმს სიგარეტიც ავიწყდება და განტენბაინიც, მდივან ქალს უყურებს და ცდილობს მოთმინებიდან არ გამოვიდეს, სანამ ბრმის მოწმობას ბოლოს და ბოლოს აღირსებენ, განტენბაინი კი ამ დროს ჯიბეში მალავს თავის კვესს. ექიმი ხელს აწერს მოწმობას. ყვითელ სამკლავურს ფასდადებით გამოგიგზავნითო, ეუბნება განტენბაინს მდივანი ქალი. განტენბაინი, როგორც კი მიიღებს რომელიმე დაწესებულებისაგან სასურველ ცნობას, იმ დაწესებულებისადმი თანაგრძნობით განიმსჭვალება ხოლმე, ექიმი თავის მხრივ მაღლობელია ამ თანაგრძნობის გამო, თან ალბათ თავისი მდივანი ქალის შეხედულების გაბათილებასაც ლამობს (მდივანი ქალი მას აუტანელი ხასიათის კაცად თვლის) და განტენბაინს თვითონვე მიაცილებს ლიფტამდე, არც ნუგეშისცემა ავიწყდება, ცხოვრებაში მაინც არ დაიკარგებითო. განტენბაინი ცდილობს დაამშვიდოს ექიმი, თანაგრძნობა უხერხულ დღეში აყენებს და ექიმს არწმუნებს, დაბრძანებამდე ამ წუთისოფელში ბევრი რამ მინახავსო: საბერძნეთი და ესპანეთი ხომ მომივლია და მომივლია, მაროკოშიც კი ვყოფილვარო. მაროკოში, მაგალითად, ექიმი არ არის ნამყოფი. პარიზი, ლუვრი, ხომ თქმა არ უნდა, ნანახი მაქვს, დამასკოშიც ნამყოფი ვარ და ახალგაზრდობაში ერთხელ მატერპორნზეც კი ავედი, დიახ, თუმცა მწვერვალი ნისლში იყო გახვეულიო. რაკი ლიფტიც იგვიანებს, გაცხოველებული საუბარი ჩაღდება იმოგზაურობის გარშემო. სამ ან ოთხკვირიანი შვებულების შემყურე სახელმწიფო დაწესებულების ექიმმა აბა რა უნდა იმოგზაუროს. განტენბაინი განსაკუთრებით ურჩევს ჰავანას. გაისად ესპანეთში ვაპირებ წასვლასო, ეუბნება ექიმი. განტენბაინი უპირველეს ყოვლისა ამ ქვეყნის შიდა რაიონებს უსახელებს — სალამანსას, ავილას, სეგოვიას, კორდოვას, ესპანეთზე უფრო ცუდი გზები, ირწმუნება განტენბაინი, დღეს თურქეთში თუ იქნება, ირანზე რომ აღარაფერი ვთქვათო. ამ დროს ლიფტიც ამოდის, მაგრამ შიგ არავინ შედის და კარები ისევ იხურება. რა არ მინახავს, ამბობს განტენბაინი, მხოლოდ რუსეთში არ ვყოფილვარ, ალბათ არც თქვენ იქნებით ნამყოფიო. იწყება პირველი პოლიტიკური საუბარი, რომელშიაც განტენბაინი ბრმის კვალობაზე ჩაება და გრძნობს, რომ ასე არასოდეს გაიოლებია პოლიტიკაზე ლაპარაკი: საკმარისია დაანებო სხვას, ჰკუთა გასწავლოს... ლიფტი მეორედ იღება და განტენბაინს ბევრი რჩევა-დარიგებისათვის დრო აღარ რჩება: ესპანეთში თუ ჩახვალთ, ალტამირის მღვიმეები არ დაგრჩეთ უნახავიო, სეგოვიაში თუ მოხვდებით, „კანდილოში“ ისადილეთ, ჰემინგუეის რესტორანში, იქვე აკვადუკთან რომ არისო, თურქეთში თუ იმოგზაუროთ, ედირნის მეჩეთი არ დაგრჩეთ მოუნახულებელიო, იერუსალიმში თუ მოგიწევთ ყოფნა, მაშინ



ერთ პარასკევს... განტენბაინი უკვე ლიფტში დგას, მაგრამ ექიმი ხელს კი არ ართმევს, თითზე ჰკიდებს ხელს, და განტენბაინი მაშინვე ვერ ხვდება, რაშია საქმე. ექიმი საჩვენებელ თითზე ავლებს ხელს და ასწავლის, რომელ დილაკს უნდა დააჭიროს თითი, როგორც კი ლიფტის გარეთა კარის ჯახუნს გაიგონებს. განტენბაინი იძულებულია ერთხელ კიდევ გაიმეოროს, ქვემოთ მელოდებიანო. სამკლავურს გამოგიგზავნიანო, ერთხელ კიდევ ეუბნება ექიმი...

ჯერჯერობით ყველაფერი რიგზეა.

ლიფტში მარტო დარჩა თუ არა, ისე მოეშვა, როგორც მსახიობს ემართება ხოლმე კულისებში, როცა იცის, რომ აღარავინ უყურებს. განტენბაინმა ოფიციალური მოწმობა წაიკითხა. იგი უკვე ოფიციალურად არის ბრძაღ ალიარებული. ეს მყისვე სულ სხვა შეგრძნებას განიჭებს, თვით ქალაქის მთავარი ექიმის წინაშეც კი სხვაგვარი რიხით შეგიძლია წარსდგე. ასე დაემართა განტენბაინს, როცა აღმა-დაღმა ატარა ლიფტი და კვლავ ექიმის წინაშე წარსდგა ხუთიოდე წუთის შემდეგ. განტენბაინს თავისი შავი ჯოხი დარჩენია ექიმის კაბინეტში. სწორია! — ამბობს ექიმი და განტენბაინისაკენ იხედება. იგი ხელებს ისაპნავს და იბანს, სასადილოდ ემზადება. რაკი მდივანი ქალი უკვე წასულია, განტენბაინი, აქაოდა გულისხმიერი ექიმი არ შევაწუხო, თვითონ იღებს სავარძლის საზურგეზე მიყუდებულ ჯოხს და თან შიშისაგან კანკალებს ასეთი წინდაუხედაობის გამო. ამით მხოლოდ საკუთარი თავი კი არ გასცა, ორი ექიმიც ჩააგდო საფრთხეში. ახლა რაღა ქნას? მაგრამ ქალაქის ექიმი ამას, ეტყობა, არაფრად ავდებს, იმდენად სჯერა თავისი საკუთარი ხელმოწერისა. იგი მხოლოდ თავს უქნევს განტენბაინს და თან დაბანილ ხელებს იმშრალებს. ექიმს, ცოტა არ იყოს, თვითონაც ეუხერხულება პერანგის ამარას რომ შემოუსწრეს. ხოლო ზუსტად ერთი კვირის შემდეგ, როგორც ეს შევიცარიული დაწესებულებისაგან იყო მოსალოდნელი, განტენბაინს მოსდის სამკლავური და ცხოვრებას უიოლებს.

მხოლოდ ქალებთან ურთიერთობა უჭირს.

ახალი სამკლავურის გამოსაცდელად განტენბაინი, რა თქმა უნდა, პირდაპირ იმ კაფეს არ მიაშურებს, სადაც დაბრმავებამდე დადიოდა, მიდის სხვა კაფეში, სადაც ოფიციალტები არ იცნობენ და ალტაცებულია, ამდენ ახალ სახეს რომ ხედავს და ქალებსაც სულ სხვა თვალთ რომ ჭვრეტს. იგი ხედავს, მისი ალტაცება ქალებს მოსვენებას რომ უკარგავს. განტენბაინი კამპარის სვამს, შავი ჯოხი მუხლებშუა უდევს, ყვითელი სამკლავური მკლავზე აქვს შემოხვეული. სიგარეტს საშაქრეში დებს და კიდევ ვინ იცის, რა ოინებს არ სჩადის. ვითომ არ სჯერათ მისი ოფიციალური სამკლავურის? გრძნობს, როგორ უთვალთვალებენ. ცდილობს მამაკაცური, ძალდაუტანებელი პოზა მიიღოს, მაგრამ ამ ცდამ გასცა და შედეგსაც ხედავს: მეზობელ სუფრასთან მჯდომი ქალიც ცდილობს თავისუფლად დაიჭიროს თავი — ხან ცხვირს იპუდრავს, ხან ტუჩებს იღებავს, ხან თავს ისე ატრიალებს, თითქოს უნდა მამაკაცის მზერას გაექცესო, ხან კი უეცარი ღიმილით ცდილობს ტყუილში გამოიჭიროს იგი. ეტყობა, გაუჭირდება განტენბაინს. ქალები სავსებით არასდროს არ ირწმუნებენ მის საბრძავეს, სამკლავური გინდ ჰქონია და გინდა არა, ქალი ზურგით გრძნობს, უყურებს თუ არა ვინმე.

ბარში ვზივარ. ნაშუადღევია. ამიტომ ბარში ჩემს მეტი არავინაა და ბარმენი მე მიყვება თავისი ცხოვრების ამბავს. დიდებული მთხრობელია! მე ვი-



დაცას ველოდები. ის ჭიქებს რეცხავს და ამბობს: დიახ, ასე იყო ეს ამბავი! მე ვსვამ. ნამდვილ ამბავს გიყვებითო. მჯერა-მეთქი, ვეუბნები. იგი გარეცხილ ჭიქებს ამშრალებს. დიახ, ასე იყო ეს ამბავი! ერთხელ კიდევ გაიმეორა მან. მე ვსვამ და მშურს ამ კაცის — მისი რუსეთში ტყვედ ყოფნა როდი მშურს, თავისი ისტორია რომ სჯერა, ის აღმიძრავს შურს...

— ჰმ, — ამბობს იგი, — ისევ არ გაწვიმდა!

ამ სიტყვებს არ გამოვკიდებივარ, კვლავ ვსვამ.

— ყოველი ისტორია გამონაგონია, — ვამბობ ცოტა ხნის შემდეგ, განა ეჭვი მეპარება, რუსების ტყვეობაში საშინელ დღეში არ იქნებოდა-მეთქი, საერთოდ ვამბობ: ყოველი გამომყლავნებული „მე“ უკვე როლია.

— ბატონო დოქტორო, — მეუბნება იგი, — კიდევ ხომ არ ინებებთ ვისკის?

ბატონო დოქტორო!

— ადამიანს სწყურია ისტორიის გამოგონება, — ვამბობ და ვამჩნევ, რომ უკვე ბევრი შემისვამს. შეზარხოშება იმაში მეტყობა, რომ წინადადებას არ ვასრულებ, ვვარაუდობ, მე თუ მესმის რასაც ვამბობ, მსმენელიც გამიგებს-მეთქი. — ადამიანს ორი ან სამი, დიდი-დიდი ორი ან სამი ამბავი თუ გადახდება თავს ისეთი, მოსაყოლად რომ ღირდეს, სულ ერთია, საკუთარ თავგადასავალს გვიამბობს თუ საერთოდ მოყვება რაიმეს: ეს თავს გადახდენილი ამბის ნიმუშია მხოლოდ და არა ისტორია, დიახ, ეს არ არის ისტორია, — ვამბობ მე და ცარიელ ჭიქას ვიყუდებ.

— ადამიანი საკუთარ თავს ვერ ხედავს, ისტორია კი მხოლოდ უცხო თვალთ იქმნება, — განვაგრძობ მე, — ჰოდა, სწორედ ამიტომ გვწყურია მისი გამოგონება.

არ ვიცი, ბარმენი, ექვსი წელი ურალში რომ გაატარა, მას შემდეგ ყურს მიგდებს თუ არა და თავი რომ არ შეევაწყინო, სიგარეტს ვუკიდებ.

— თქვენ გაქვთ ცხოვრების ისტორია? — ვეკითხები მერე, თუმცა მან უკვე მიაგებო ის, რასაც აშკარად თავის ისტორიად თვლიდა, და ვეუბნები, — მე კი არ გამაჩნია.

სიგარეტს ვეწევი და ვაკვირდები, როგორ იღებს ჩემს ჭიქას თუთიის დახლიდან და გასავლებად წყალში დებს, როგორ იღებს სხვა ჭიქას, სუფთა, მშრალ ჭიქას და უარს ვერ ვეუბნები, ახალ ვისკის რომ მიმზადებს. ვერ ვეუბნები, იმიტომ რომ ვაკვირდები... იმ კაცზე ვფიქრობ, კეშზე რომ გადავეყარე. ეს ამბავი დღემდე არავისთვის გამინდვია, თუმცა გამუდმებით თანა მღევს, თანა მღევს ერთი მკვლელობის ისტორია, რომელიც არ ჩამიდენია. ჭიქას ვატრიალებ და ბარმენს ვეკითხები:

— ოდესმე თუ ყოფილხართ კეშზე?

— კეშზე? — მეკითხება იგი, — ეს რა არის?

— კეშის პიკზე ვეკითხებით, მთაა ასეთი, — ვეუბნები მე.

— არა, რატომ მეკითხებით?

სისულელეა! როგორ შეიძლება ეს ის კაცი იყოს, ათას ცხრაას ორმოცდაორში კეშზე რომ შეგხვდი? გავჩუმდი. ნამდვილად სისულელეა. სასმელს ვეწაფები.

— ყოველი კაცი ადრე თუ გვიან თხზავს ისტორიას, რომელსაც თავის ცხოვრებად თვლის, — ვამბობ მე, — ერთს ან რამდენიმე ისტორიას ერთად, —



ვამბობ, მაგრამ იმდენად მთვრალი ვარ, რომ თვითონ ველარ მივყვები საკუთარ აზრებს, საკუთარ თავზე გული მომდის და ვჩუმდები.

ვილაცას ველოდები.

— ერთ კაცს ვიცნობდი, — ვცდილობ სხვა საგანზე გადავიტანო საუბარი, — მერძევეს, რომელმაც ცუდად დაასრულა თავისი ცხოვრება. მან საგიჟეთში ამოყო თავი, თუმცა თავს არც ნაპოლეონად თვლიდა და არც ანშტაინად, პირიქით, მხოლოდ მერძევე ეგონა თავი და ჰგავდა კიდევ მერძევეს. შიგადაშიგ მარკებსაც აგროვებდა, მაგრამ მის ხასიათში მხოლოდ ეს ერთი შტრიხი თუ ერია ფანატიკური. საიმედო კაცად რომ თვლიდნენ, იმიტომაც დააყენეს ათისთავად სახანძრო რაზმში. ახალგაზრდობაში, მგონი, ტანმოვარჯიშე ყოფილა, ყოველ შემთხვევაში ჯანმრთელი და მშვენი კაცი გახლდათ, ქვრივი იყო, სმა არ უყვარდა და იმ არემარეზე ვერავინ იფიქრებდა, თუ ოდესმე საგიჟეთში ამოყოფდა თავს. ნაფაზი დავარტყი და განვაგრძე.

— ოტო ერქვა, დიახ, ოტო, — კიდევ დავარტყი ნაფაზი, — ის „მე“, რომელიც ამ კეთილმა კაცმა გამოუგონა საკუთარ თავს, საკამათოდ არავის გაუხდია მთელი მისი სიცოცხლის მანძილზე, მით უმეტეს, რომ ირგვლივ მყოფი ადამიანებისაგან ეს არავითარ მსხვერპლს არ მოითხოვდა, პირიქით, ყველა სახლში რძე და კარაქი დაჰქონდა ოცდაერთი წლის განმავლობაში, კვირაობითაც კი. ბავშვებს გვიყვარდა ეს კაცი, ხშირად წამოგვასკუბებდა ხოლმე თავის სამთვალაზე, — ნაფაზი დავარტყი და განვაგრძე: — ეს იყო გაზაფხულზე. ერთ შაბათ საღამოს ოტო საკუთარი სახლის აივანზე გამოსულიყო და ჩვეულებისამებრ ჩიბუხს აბოლებდა. სტანდარტული სახლი შარაგზის პირას იდგა, მაგრამ იმოდენა ბაღია ერტყა ირგვლივ, რომ ნამსხვრევეები ვერავის დააშავებდა. ჰოდა, მისთვისაც სამუდამოდ გაურკვეველი მიზეზების გამო, ოტომ უეცრად ხელი დაავლო ყვავილების ქოთანს, თუ არ მეშლება, გერანის ქოთანს, და ბაღში გადაუძახა, რასაც მსხვრევეც მოჰყვა და საყოველთაო ყურადღებაც მიიპყრო. ყველა მეზობელმა მაშინვე მოაბრუნა თავი, ზოგი მასავით პერანგისამარა იდგა აივანზე და შაბათ საღამოთი ტკბებოდა. ზოგი ბაღში კვლების მორწყვით იყო გართული. ყველამ მაშინვე მოაბრუნა თავი. ამ საყოველთაო ყურადღებამ, ეტყობა, ისე გააღიზიანა ჩვენი მერძევე, რომ დაერია ქოთნებს და ჩვიდმეტივეს გადაუძახა ბაღში, რომელიც, ბოლოს და ბოლოს, ქოთნებისა არ იყო, მისივე საკუთრება გახლდათ, მაგრამ მაინც მოჰკიდეს ხელი და წაიყვანეს. მას შემდეგ ოტო შეშლილად ითვლებოდა და ასეც იყო, რადგან მასთან დალაპარაკება აღარ შეიძლებოდა, — ვამბობ და თან სიგარეტს ვეწევი. ჩემი ბარმენი ილიმება, რამდენადაც ამ ამბავს შეჰფერის, მაგრამ თამამად ვერა, რადგან ვერ გაუგია, ამით რისი თქმა მინდა. — ჰოდა, ასე, — ვამბობ მე და სიგარეტს თუთიის დახლზე დადგმულ საფერფლეში ჩავსრესავ, — მისი „მე“ გაცვდა, ეს შეიძლება მოხდეს, ხოლო სხვა „მე“ ველარ გამოიგონა. ეს საშინელება იყო.

არ ვიცი, ბარმენმა გამიგო თუ არა.

— დიახ, — ვამბობ მე, — ასე იყო ეს ამბავი.

მეორე სიგარეტს ვიღებ.

ვილაცას ველოდები.

ჩემი ბარმენი ცეცხლს მაგებებს.

— კიდევ ერთ კაცს ვიცნობდი, — ვამბობ მე, — იგი, მართალია, საგიჟეთ-



ში არ მოხვედრილა, მაგრამ სულ გამონაგონი ცხოვრებით ცხოვრობდა, — ვამბობ და თან სიგარეტს ვეწევი, — ჰოდა იმ კაცმა დაიჩემა, ერთი პატიოსანი და უიღბლო, ბედისაგან დაჩაგრული კაცი ვარო. იგი ყველას გვეცოდებოდა. ქონებას შეაკოწიწებდა თუ არა, დევალვაცია მოუსწრებდა. და ასე იყო მუდამ. სახურავიდან კრამიტი არ ჩამოვარდებოდა, იგი თუ ქუჩაზე არ გაივლიდა უიღბლო ვარო, ამის გამოგონება, ერთ-ერთი ყველაზე უფრო ხელსაყრელი და ამიტომაც ასე გავრცელებული ხერხია. თვე არ გაივლიდა, კვირა არ ჩაივლიდა, დღე არ დაღამდებოდა ისე, რომ ამ კაცს დაჩივლების საბაბი არ მისცემოდა. ვინც ასე თუ ისე იცნობდა, ყველას ეშინოდა ეკითხა, როგორ ხარო. ჩივილით, კაცმა რომ თქვას, არ დაიჩივლებდა, მხოლოდ გაიღიმებდა თავის საოცარ ბედუკუღმართობაზე. და მართლაც, ყოველთვის ის წააწყდებოდა ისეთ რამეს, რასაც სხვა გვერდს აუვლიდა. უიღბლო რომ იყო, ამას ვერ უარყოფდი, დიდ თუ პატარა საქმეში ბედი ნამდვილად არ სწყალობდა. თან თავის უბედობას მამაცურად უძლებდა, — ვამბობ მე და ვაბოლებ, — უძლებდა მანამ, სანამ სასწაული არ მოხდა.

სიგარეტს ვაბოლებ და ველოდები, როდის მკითხავს ბარმენი უგულოდ, რა სასწაულიო. ბარმენი ძირითადად თავისი ჭიქების წმენდითაა გართული.

— ეს იყო მეხის დაცემა, — ვამბობ მე, — დიახ, მეხის დაცემას ჰგავდა, ლატარიაში დიდი თანხა რომ მოიგო. ეს ამბავი გაზეთში გამოაქვეყნეს და ხომ ვეღარ უარყოფდა. ქუჩაში რომ შევხვდი, კაცის ფერი არ ედო, დაბნეული იყო, ოღონდ თავის გამონაგონში კი არ ეპარებოდა ეჭვი, უიღბლო ვარო, არა, ლატარიისა არა სჯეროდა, თუმცა ლატარია რა სათქმელია, არც ამქვეყნისა სჯეროდა რამე. სასაცილოდ არ ჰქონდა საქმე და მეც იძულებული გავხდი მენუგეშებიანა, მაგრამ ამაოდ. ვერ გაეგო, რატომ გაუღიმა ბედმა, ვერც იჯერებდა და არც უნდოდა დაეჯერებინა, უიღბლო აღარა ვარო, და მართლა ისე აებნა თავგზა, რომ ბანკიდან გამოსულს საფულე დაეკარგა. და მე მგონი, ასეც სჯობდა მისთვის, თორემ სხვა, უკეთესი „მე“ ექნებოდა გამოსაგონებელი, აბა თავს უიღბლოს ხომ ვეღარ დაუძახებდა. კარგად მესმის, რომ ახალი „მეს“ გამოგონება გატენილ საფულეზე უფრო ძვირი დაუჯდებოდა, მთელ თავის ცხოვრებაზე უნდა ეთქვა უარი, ყველაფერი, რაც თავს გადახდომოდა, ხელახლა უნდა განეცადა და თანაც სხვაგვარად უნდა განეცადა, თორემ მის ახალ „მეს“ აღარ მოუხდებოდა.

ესვამ.

— ამ ამბიდან დიდ ხანს არ გაუვლია, რომ ცოლმაც უღალატა, — ვამბობ მე, — ის კაცი მეცოდება, ნამდვილად უიღბლო იყო.

ვეწევი.

გარეთ კვლავინდებურად წვიმს... აღარ ვიცი, ამით, ბოლოს და ბოლოს, რისი თქმა მინდოდა და ჩემს ბარმენს ვაკვირდები. უარი კი თქვა, მაგრამ იქნებ მაინც ის არის? ჩემი კეშელი კაცის სახე აღარ მახსოვს და ალბათ, ამიტომაც ვერ ვიცილებ თავიდან. ვეწევი, ვფიქრობ, ვდუმვარ, ვეწევი.

ეს იყო 1942-ში, აპრილის თუ მაისის ერთ კვირა დღეს. ზამადენში, გრაუბიუნდენის კანტონში ვიყავით დაბინავებულნი. უღრუბლო დღე იდგა. კვირის ბოლოს ორდღიანი შვებულება მომცეს, მაგრამ შინ არ წავსულვარ, მარტო მინდოდა ყოფნა და მთებისაკენ გავსწიე. კაცმა რომ თქვას, შვებულებაში მყოფთ საფრთხის გამო სასტიკად ეკრძალებოდათ მთებში მარტო სია-



რული, მაგრამ მე ჩემი არ დავიშალე და მთებში, თანაც კეშზე წავედი. ღამე სათივეში გავათიე. საშინლად ციოდა, სათივეში თივის ერთი ბულულიც კი არ მოიძებნებოდა, გამჭოლი ქარი მიბერავდა, ვარსკვლავიანი ღამე იდგა. კეშის თავშესაფარ ქოხს განგებ ავუარე გვერდი, რადგან იქ ოფიცრები იქნებოდნენ და მე, რიგით არტილერისტს, შვებულების მიზანი საბატაკო გამიხდებოდა. სწორედ ეს არ მინდოდა, არ მინდოდა ჩემი შვებულება პატაკებს დაემძიმებინა. მთელი ღამე ვერ გავთბი და ადრიაანად ავდექი, მზის ამოსვლამდე დიდი ხნით ადრე. რუხი ქვა-ლორღის ნაყარში ვერავინ შემამჩნევდა, რადგან მეც რუხი ფერის ტანსაცმელი მეცვა. მალლა სწრაფად ავედი. თოვლის საფარს რომ მივალწიე, თოვლი ჯერ კიდევ ისეთი მაგარი იყო, რომ ზარივით რეკავდა. ნაპრალს მივაგენი და ცოტა ხანს სული მოვითქვი. მზე ის-ის იყო ამოდოდა, იმ არემარეზე ძეხორციელი არ ჭაჭანებდა. ყავის კონცენტრატით ვისაუზმე. თან წერაყინი მქონდა და არ მინდოდა მარტო მიმავალი ხეობაში ვინმეს დავენახე; ახლა კი მიხაროდა, ეს პატარა, პრიალა წერაყინი რომ მქონდა თან, თუმცა უიმისოდაც გავიდოდი იოლად, რადგან თოვლი სულ მალე მოლბა მზეზე და მხოლოდ ჩრდილში მჭირდებოდა საფეხურების გამოჭრა. ხეში მუნდირი გავიხადე და ქამარზე გამოვიბი. ხანგამოშვებით კვლავ ვზვერავდი მიდამოს, ვინმე ოფიცერი არ გამოტყვრეს საიდანმე-მეთქი. ჩემი ფიქრით, მწვერვალზე თუ ავასწრებდი, მერე ველარაფერს დამაკლებდნენ, დიდი-დიდი ეკითხათ, ბრძანებას არ იცნობო, და მთამსვლელთა ადათ-წესების ხათრით არაფერს მეტყობდნენ. მაგრამ, როგორც ვთქვი, ირგვლივ არავინ იყო, ყოველ შემთხვევაში თოვლიან ფერდობებზე ვერავის ვხედავდი და თუ მეც არ ვუკაკუნებდი წერაყინს, ჩამი-ჩუმიც არსაიდან მესმოდა. თავი მთვარეზე მეგონა, ასე მარტოდმარტო რომ ვიყავი. მესმოდა კლდეებზე ჩამომქვლეული თოვლის ხმაური, მეტი არაფერი, ხანდახან კი ჩემი წერაყინი თუ გაიწკრიბებდა სალ კლდეზე, ისმოდა ქარის ზუზუნი, მეტი არაფერი. სალ კლდეებში ქარი დათარეშობდა. მწვერვალს რომ მივალწიე და ზედ აღმართული ჯვარი შემომეგება, თავი ბედნიერად ვიგრძენი. თანდათან დათბა. ნაყარი ქვებით ქარისაგან დაცული, ნიშისებური თავშესაფარი ავიშენე, გაოფლილი პერანგიც გავიხადე, მუნდირი მუთაქასავით დავაგორგლე და უძილო ღამისაგან მოღლილმა დავიძინე. რამდენ ხანს მეძინა, არ ვიცი. ყოველ შემთხვევაში თვალი მაინც წავატყუე, სხვა საქმე მაინც არაფერი მქონდა. უცებ ვილაც დამელაპარაკა. სამოქალაქო ტანსაცმელში გამოწყობილი უცნობი ვითომ შვეიცარიულ ყაიდაზე მომესალმა, აშკარად გერმანელი კი იყო. შეცბუნება რომ შემატყო, მითხრა, თქვენი შეწუხება არ მინდოდაო. მე, რა თქმა უნდა, წამოვიწიე, მაგრამ ჯერ ხმას არ ვიღებდი. კარგა ხნის მოსული უნდა ყოფილიყო, ზურგჩანთა მოშორებით მიეტოვებინა. შვეიცარიულ სალამზე გერმანული გამარჯობით ვუპასუხე, წელში საბოლოოდ გავიმართე და ახლა ერთმანეთის გვერდით ვიდექით. მან დურბინი მოიმარჯვა და მკითხა ბერნინას მთები რომელიაო. თქვენ ხომ ჯარისკაცი ხართო, მითხრა და ჩემს ჩაფართხუნებულ შარვალს რომ შეხედა. ცოტა არ იყოს დამცინავად გაიღიმა. რაც უნდოდა, ის რომ დავანახე, შევამჩნიე, რა კარგად იცოდა ეს მხარე. ენგადინის მოტრფიალე იქნება, უცხოელია, მაგრამ ეტყობა, აქურობას კარგად იცნობს, ყოველ შემთხვევაში სახელები არ ეშლება: ბერნინა. პალიუ და როზაჩი ხომ იცის და იცის, ქვემოთ, ხეობაში ჩაკარ-



გული სოფლების სახელებიც კარგად მოეხსენება. როგორც მთამსვლელს შეეფერებოდა, რუკაც ჰქონდა და ლაიკაც<sup>1</sup>, თუმცა მაშინ რუკები ყველას ჩამორთმეული ჰქონდა. ჩვენს საუბარს ქარზე უფრო ის აძნელებდა, რომ უცნობი ჯიუტად ცდილობდა ჩვენებურად ელაპარაკა. და თან ისე, თითქოს ბავშვს უჩილქდა ენას, თუმცა შვეიცარიულ კილოს ვერ ბაძავდა, მაგრამ ისტიბარს არ იტეხდა და მაინც ამ გზით ცდილობდა ჩემთან დამეგობრებას, გულკეთილად და თან მფარველური ტონით მელაპარაკებოდა და ვერ ამჩნევდა, რომ ამით გუნებას მიწამლავდა. მე, რა თქმა უნდა, ალემანური აქცენტით, თუმცა მაინც ლიტერატურული გერმანულით ვპასუხობდი, მაგრამ არაფერი გამომივიდა — მან ისიც კი იცოდა, საწინააღმდეგო კარადას ჩვენში როგორ ეძახდნენ. ეს ისე, სხვათა შორის თქვა, საუბართან ამას არავითარი კავშირი არ ჰქონია. აქ სამხედროები ბლომად არიან, არაო? ვხედავდი, როგორ ატანდა თავს ძალას, რომ ჩემს ჯარისკაცულ ფორმას სერიოზულად მოჰკიდებოდა, იქნებ მე ვიჩენ უქმურობას-მეთქი, გავიფიქრე, როცა მან თავისი ღურბინდი შემომთავაზა, და სამაგიეროდ ჩემი ველტლინური მათარა მივაწოდე. მისი ღურბინდით ვხედავდი, რომ უცნობი ჩემს ნაკვალევს გამოჰყოლოდა. აქეთ სხვას არავის გამომოუვლია. ღურბინდისათვის მადლობა გადავუხადე. იგი დაახლოებით ნახევარ საათს დარჩა. ჩვენი საუბარი უპირველეს ყოვლისა მთებსა და ფლორას შეეხებოდა და იგი საქებარ სიტყვებს არ იშურებდა. სახეში შეხედვა ისე მიჭირდა (კაცმა რომ თქვას, რატომ?) თითქოს უტაქტობაში დავეჭირო ვისმეს. ეს უტაქტობა კი წინასწარ მაგდებდა სირცხვილში და სიტყვას სიტყვაზე ველარ ვაბაძდი. იმ კაცს ვინ ვეგონე, არ ვიცი, მაგრამ დოყლაპიად კი ნამდვილად ჩამთვლიდა. რომ ვთქვი, ბერლინს ვიცნობ-მეთქი, საშინლად გაუკვირდა. რაც უფრო გაცხოველდა საუბარი (გაცხოველდა კი იმის წყალობით, რომ იგი ჩვეულ კილოს დაუბრუნდა) მით უფრო ვნატრობდი იმ წუთის დადგომას, როცა თავის ზურგჩანთას დაავლებდა ხელს. ჩემი რჩევა — აქედან მადულაინში ჩასვლა როგორ აჯობებდა — ზედმეტი აღმოჩნდა. ღამე კეშის თავშესაფარ ქოხში გაეთია და იმ ქოხს ისე მიქებდა, თითქოს ჩემი აშენებული ყოფილიყოს. იქ ბევრი ოფიცერი ვნახე, დიახ, კარგი ბიჭები არიანო. მისი შეკითხვა, მთამსვლელობაში თუ გწრთვნიანო, ქარს გავატანე. ოთხ საათზე მადულაინში რომ მოახერხებდა ჩასვლას, არც მეეჭვებოდა. ბოლოს, როგორც იქნა, დაავლო ხელი თავის ზურგჩანთას და ერთი ვაშლიც მომცა. ცოტა არ იყოს, შემრცხვა. ამსიმალლეზე ვაშლი ძვირად ფასობდა. ამასობაში ზურგჩანთა ბეჭებზე მოიგდო, უკვე ხელიც ჩამოვართვით ერთმანეთს და აღარც მეგონა კიდევ თუ მომიბრუნდებოდა, რომ უცნობს გულახდილობა მოუნდა. რა მითხრა, სიტყვა-სიტყვით აღარ მახსოვს. მაგრამ რაიხის ხსენებაც კმაროდა, რომ მისი ნათქვამის აზრი ჩემთვის ნათელი გამხდარიყო. ამაზე პასუხი არ გამიცია, საერთოდ არ დამიძრავს კრინტი, ვდუმდი და ვიდექი. ხელები საძულველი ჩაფართხუნებული ხაკისფერი შარვლის ჯიბეებში მეწყოდა და იმ ქვეყანას გავყურებდი, მისი სიტყვით, მალე რაიხის საკუთრება რომ უნდა გამხდარიყო. აი, რას ვხედავდი: კლდეს, მოშავოს, ზოგან მოწითალოსაც. ქვა-ლორღსა და შუადღის შუქმოფენილ თოვლს, რუხი ქვა-ლორღით დაფარულ ქარაფებს, შემდეგ ალპურ მდელოებს, მოტიტვლებულს, ქვიანს,

<sup>1</sup> ლაიტცის ფორმის ფოტოაპარატი (მთარგმნ.).



მზის ათინათებიან ნაკადულებს, იალალებს, ნახირს, რომელიც შორიდან პატარ-პატარა მატლების გროვას ჰგავდა, ტყეშერეულ, ღრუბლის ჩრდილებით მოფენილ ველს. ახლოს შავი ჭკები დაფარფატებდნენ. მან თავის ლაიკა შეინახა, ხელიც დამიქნია, მომადახა. აბა, შენ იცი, სამსახურში თავს როგორ გამოიჩენო და მხოლოდ მერე მომივიდა ჩემს თავზე გული, რატომ სიფათში არ ვლევწე-მეთქი. უცნობის განსაკუთრებული ნიშნებითაც მხოლოდ მერე დავინტერესდი და შვერილზე გადავდექი, მაგრამ გვიანლა იყო: იგი მხოლოდ მაშინ დავინახე კვლავ, როცა კლდის თხემს შემოუარა და ახლა ჩემს ქვემოთ გამოჩნდა ოცდაათი მეტრის სიღრმეზე. ასე რომ, მისი მწვანე თექის ქუდის ხილვალა მერგო წილად. ფეხი დაუცდა, მაგრამ თავი შეიკავა და შემდეგ უფრო ფრთხილად მიბობლავდა. დავუძახე, იქნებ ამოიხედოს-მეთქი, მაგრამ ვერ გავაგონე. მინდოდა მეთქვა, ჩამონაშალ ქვებს უფრთხილდი-მეთქი, მესმოდა დაგორებული ქვების ხრიალი, მაგრამ, ეტყობოდა, ქვების ცვენას აინუნშიაც არ აგდებდა, ის ხომ ზევით იყო. რაც უფრო ვცდილობდი მისი სიტყვებით მოგვრილი ბრაზი დამეოკებინა, მით უფრო უზომოდ მომდიოდა ახლა გული, ეს იდიოტი როგორ მარჯვედ მიცოცავს-მეთქი. ისევ ხრიალებდნენ ქვები! თითები პირში ჩავიწყე და დავუსტვინე. მოიხედა, მაგრამ, ეტყობა, ჩემი ხმა ზაზუნას სტვენად ჩათვალა, რომელიც ასევე მალე გახდებოდა ჰიტლერის რაიხის კუთვნილება. მანამდე ვიდექი კლდეზე, სანამ თოვლში მიმავალმა შავმა კაცუნამ კეშის ნაპრალს არ მიაღწია. ალბათ ისევ სურათებს თუ იღებდა, ყოველ შემთხვევაში, დიდხანს კი დააბოტებდა თოვლში. მუნდირს ხელი დავავლე, უცებ გადავწყვიტე ქვევით ჩავსულიყავი და დავწეოდი. რისთვის? მწვერვალზე დავრჩი, მაგრამ მისთვის მაინც არ მომიცილებია თვალი, სანამ თოვლიანი ველიდან არ გააღწია. შემდეგ ფლატეზე დავლანდე, მაგრამ მალე იალალს შეერწყა თავისი წყალგაუმტარი რუხი ქურთუკის წყალობით და მეც ამაო თვალთვალს მოვეშვი.

მერე მეძინა...

ეტყობა, სიცივემ გამომალვიდა და უცებ ერთმა აზრმა შემაშინა: ვითომ ის კაცი კლდიდან გადავადდე, თუმცა ვიცოდი, რომ ეს არ ჩამიდენია. ისე, კაცმა რომ თქვას, რატომ არ უნდა ჩამედინა? ეს კი არ დამსიზმრებია, ამ ფხიზელ აზრთან ერთად გავიღვიძე: ერთი ხელის წაკვრა კმაროდა, როცა ზურგჩანთის ასაღებად დაიხარა, და... ამას ვფიქრობდი და თან მის ვაშლს ვჭამდი.

რა თქმა უნდა, მიხარია, ასე რომ არ მოვიქეცი. ეს ხომ მკვლელობა იქნებოდა. ამ ამბავზე არავისთან დამცდენია სიტყვა, თუმცა არაფერი ჩამიდენია... ვხედავდი: ირგვლივ ძეხორციელი არ ჭაჭანებდა. თითო-ოროლა შავი ჭკა დაფრინავდა მხოლოდ. ვერც ვისიმე თვალი გახდებოდა ამ ამბის მოწმე და ვერც ვისიმე ყური. მხოლოდ ქარი ქროდა. საღამოს ზამადენში სიის ამოკითხვისას უკანა რიგში დავდგებოდი. თავს მარჯვნივ მივაბრუნებდი. სწორდითო, ხელებს ჩავასწორებდი. სმენაო, გავიჯგიმებოდი, მერე კი ლუდს დაღლევდი. მჯერა, ვერაფერს შემატყობდნენ. მას შემდეგ ბევრ მკვლელთან მისაუბრია, ვაგონ-რესტორანში იქნებოდა ეს, კონცერტის ანტრაქტზე თუ სადმე სხვაგან და სახეზე ვერაფერი შემიტყვია. ვაშლი შევჭამე და კვლავ შვერილზე გავედი, მინდოდა დამენახა, სად იქნებოდა იგი უკვე ჩასული. ყინულის ბრჭყვიალა ქერქგადაკრული ნაბუქის მეტი ვერაფერი დავინახე. შავი ჭკები



უხმოდ მინანობდნენ შორეული მყინვარის თავზე. სულ ახლოს მოჩანდა ჩრდილოეთის პატარა, მაგრამ თითქმის შვეული კედელი. საათს დავხედე. ჩასვლის დრო იყო. ავიღე ჩემი ხეშეში მუნდირი, ქამარი, წერაყინი. თოვლი ახლა საკმაოდ მომბალიყო და ვალიარებ, რომ ერთხელ მეც დამიგორდა ქვა. კეშის ნაპრაღში რომ ჩავედი, ის კაცი აღარც კი მახსოვდა. ჯერ ერთი, ფაშარ თოვლში სიარული ხანგამოშვებით ჩემგან ყურადღების დაძაბვას მოითხოვდა და მერე იმ კაცზე უფრო მნიშვნელოვანი სადარდებელი სხვაც ბევრი მქონდა. ჯარში ერთი საზიზღარი ფელდფებელი მყავდა გადაკიდებული და ვიცოდი, ისევ საგუშაგოზე მიკრავდა თავს. ყველაზე უფრო ის მაღარდებდა, რომ ჩემი პროფესია შინ დამატოვებინეს — აბა სალდათი კი არ ვიყავი ხელობით. ნაშუადღევს კეშის ნაპრაღში ვიჯექი, მისი ნათესურებით გადაჭრელებულ თოვლს ვუყურებდი და ვერაფრით ვერ გამეხსენებინა, სინამდვილეში რა მითხრა იმ კაცმა მწვერვალზე, სადაც ახლა თეთრი ჯვარია და იდგა ეულად. მხოლოდ ის მაგონდებოდა, რომ გასაკეთებელი არ გავაკეთე. ჰოდა, ამიტომაც ამ საქმეს აღარაფერი ეშველებოდა. ახლა, ისე, უბრალოდ მაინტერესებდა, სად შეიძლებოდა იგი გადაჩეხილიყო. გეზი კეშის პიკის ძირისაკენ, ჩრდილო-დასავლეთისაკენ ავიღე, თუმცა იქ პატარა მყინვარი მეგულებოდა. შორს არ წავსულვარ, მხოლოდ იმ ადგილის დანახვა მინდოდა და სულ რამდენიმე ნაბიჯი გადავდგი. თოვლი აქ ისე ფაფუკი იყო, რომ მუხლებამდე ვეფლობოდი. გავიხვიტე. კარგი იყო, თხილამურები წამომეღო. მყინვარზე გადასასვლელი გზა ვიცოდი. ზურგზე კარაბინი და სხვა საჭურველი რომ არ მქონოდა წამოკიდებული, იმ გზით სიარულს არაფერი აჯობებდა; მარჯვნივ სერტიგისაკენ მიემართებოდა გზა, მარცხნივ — ბერგიუნისაკენ. ნაბიჯს ხვათი ვერ დავატანე. მაგვიანდებოდა. სამი შესრულდა! უცნობი ამასობაში ხეობაში ჩავიდოდა, საიდანაც წყალგამყოფს იქით მაღულაინის ხედი იშლებოდა. სიარულიც თუ ისევე ემარჯვებოდა, როგორც ლაპარაკი, მაშინ ახლა პირველ ფიჭვებამდე იქნება მისული. მე კი ჯერ ისევ მუხლამდე თოვლში მივაბოტებდი! ასე იყო თუ ისე, უკვე იმ პატარა კედლის ძირს მივალწიე და რადგან არ ვიცოდი გაჩეჩქვილი თავის ქალის დანახვაზე რა დამემართებოდა, საქმიანად ვფიქრობდი, ის კაცი მართლა ამ ქარაფზე დაეცემოდა თუ არა-მეთქი. რამდენიმე მეტრზე ავცოცდი, რომ უკეთ დამეთვალეებინა კედელი, თანაც აქ ფეხს კარგად მოვიკიდებდი. ჩემს ქვემოთ გაწოლილი ნაპრაღის შემხედვარეს გული მისკდებოდა, ვქოშინებდი. ვინ იცის, იქნებ თვითონ კლდეზე გარჩენილიყო და მხოლოდ მისი ლაიკა დავარდნილიყო თოვლზე, იქნებ არც ეს მომხდარიყო. კაცმა რომ თქვას, ახლოდან ამ კლდეს კედელი არც კი ეთქმოდა. არა, ალბათ აქამდე ვერც ჩამოაღწევდა, სადმე ჭიუხში გაიჩხირებოდა-მეთქი, ვფიქრობდი. ნეტავ მაცოდინა, რაც არ მომხდარა, იმაზე თავს რად ვიმტვრევდი. აქამდე მწვერვალზე მონავარდე ქარი ველარ აღწევდა და სამარისებური სიჩუმე იდგა. მხოლოდ წყლად ქცეული თოვლის წკაპუნი ისმოდა, რადგან ნაშუადღევს ამ ნაპრაღშიც ჩამოეხედა მზეს. ცხელოდა და ვინ იცის, მერამდენეჯერ ვწყევლიდი ჩვენი არმიის უხეირო მუნდირს. ნაშუადღევს შუქით განათებული კლდე ახლა ქარვასავით ბღღვრიალებდა, კლდის თავზე გადმომხობილ ცას იისთერი დაჰკრავდა, პატარა მყინვარს კი, ყოველ შემთხვევაში, ნაპრაღებს მაინც, მოლურჯო ფერი ედო, თოვლი უფრო რძეს წააგავდა და ზედ მხოლოდ ჩემი



ღრმა ნაფეხურები აჩნდა შუშასავით მოლურჯოდ. მიდამო გარინდულიყო. მხოლოდ შავი ჭკები მინანობდნენ მალა ცაში. მწვერვალზე აღმართული ჯვარი აქედან არ მოჩანდა. კვლავ კეშის ნაპრალისაკენ გავემართე. მეგონა, ალაგ-ალაგ ჩავსრიალდებოდი, მაგრამ ეს იმედიც გამიცრუვდა. ჩასრიალება ბევრჯერ ვცადე, მაგრამ თოვლი გალხობილიყო. კვალს დათოვლილი მინდვრის ბოლომდე მივსდიე, თუმცა ფიქალის ნაშალზეც შეიძლებოდა მისი ნაფეხურების ცნობა. ზოგან ნაფეხური გადაგლესილი იყო, მაგრამ სამაგიეროდ, ზოგან ბეჭედივით აჩნდა მიწას. ნაფეხურებზე ვატყობდი, საუკეთესო ხარისხის სამთო ფეხსაცმელი ეცვა. მხოლოდ იალაღზე დამეკარგა მისი კვალი სამუდამოდ.

სულ ეს იყო.

სალამოს, ზამადენში, სიის ამოკითხვისას უკანა რიგში დავდექი, მაგრამ არაფერმა მიშველა. საგუშაგოზე გამამწესეს, ლუდმაც ჭირი მოგჭამა და ძილმაც, ჯოჯოხეთურად ვიყავი მზისაგან დათუთქული და სიცხეც მქონდა. თანდათან დავრწმუნდი, რომ ის კეშელი კაცი უწყინარი ტურისტი არ უნდა ყოფილიყო, მაგრამ არავისთვის არაფერი მიაძვნიდა. ჩემი საგუშაგო სოფლის მოედანზე გახლდათ. სხვა აღარაფერი დამჩვენოდა — ხელში კარაბინი უნდა დამეჭირა და მეყურებინა, სოფლის მოედანზე მწვანე თექის ქუდი არ გამოჩენილიყო. ჩემი ბელეტრისტული იმედი, რა თქმა უნდა, არ გამმართლებია. ამოდ ვგუშაგობდი, ათი ნაბიჯი წინ, ათი ნაბიჯი უკან. მაშინ, 1942-ში, საერთოდ არ არსებობდნენ ტურისტები. რომ შემხვედროდა, უეჭველად ვიცნობდი, მაგრამ მაინცდამაინც ზამადენში არ გამოუვლია.

მაშ ხაზი გადავუსვათ ამ ამბავს!

რას გადავუსვათ ხაზი?

მომდევნო წლებში, როგორც ვიცით, ბევრი რამ მოხდა და ნამდვილად მოხდა. ეს ამბავი აღარ მომგონებია, ღმერთმა კი იცის, წვრილმანებისთვის არავის სცხელოდა და მით უმეტეს ქიმერისათვის, გამოგონილი მკვლელობისათვის ვინლა მოიცლიდა, როცა ყოველდღე საკმარისად ხდებოდა ნამდვილი მკვლელობა. ამგვარად, ამაზე აღარ მიფიქრია და არც არავისთვის მიაძვნიდა კეშის პიკზე გატარებული იმ ლურჯად მოხასხასე კვირა დღის ამბავი. სასაცილოდ ამიგდებდა ყველა. აღარც კეშის პიკზე ავსულვარ როდისმე. მაგრამ, როგორც შემდეგ გამოირკვა, ეს ამბავი თურმე არ დამვიწყებოდა, თუმცა ბევრი ნამდვილი ამბავი მართლა დამავიწყდა სამუდამოდ. საოცარია. ეტყობა, ჩვენს მეხსიერებას ყველაზე იოლად ნამდვილად ჩადენილი საქმეები ავიწყდება. მხოლოდ ქვეყანა ამჯობინებს გაიხსენოს დიდი მოწიწებით ჩემი ნამოქმედარი, რაკი ჩაუდენელი საქმეებისა არაფერი იცის, ხოლო ნამდვილი ამბები, სიმართლე თუ გნებავთ, ჩემში მოწყენილობის გრძნობას ბადებს მხოლოდ. ჩვენი ნამოქმედარის გაზვიადების ცდუნება სიკეთისა თუ ბოროტების მეტად წარმოჩენის მიზნით სწორედ ამ მოწყენილობის ბრალი გახლავთ. აღარ შემიძლია იმის მოსმენა, რომ ჩემდა სანაქებოდ თუ სამარცხვინოდ ესა და ეს მაქვს გაკეთებული, მხოლოდ დაუვიწყარი მომავლის სახით, თუნდაც ქიმერის სახით წარსულში გადატანილი ჩემი ცხოვრება არა მგვრის მოწყენილობას: აი ის კეშელი კაცი წანამქრული ბორცვიდან თავდაყირა რომ გადამეშვა...

მე ეს არ ჩამიდენია.



ჯალათი ხელს ვერ აღმართავს ჩემზე.

მაშ ხაზი გადავუსვათ ამ ამბავს!

მხოლოდ დიდი ხნის შემდეგ კვლავ მომაგონდა ეს ამბავი. ერთ დღეს გაზეთში სხვა ცნობებთან ერთად ისიც ამოვიკითხე, რომ კლოსტერსისა და გრაუბიუნდენის მიდამოებში გერმანელები საკონცენტრაციო ბანაკის აშენებას აპირებდნენ თურმე. გეგმები მზად ყოფილა, ხოლო ასეთი გეგმები, მოგეხსენებათ, მიდამოს საფუძვლიანი შესწავლის გარეშე ვერ მომზადდებოდა. ვინ შეისწავლა კლოსტერსის შემოგარენი? იქნებ იმ კაცმა, 1942 წლის ერთ კვირა დღეს ვითომ ბუნების სიყვარულმა რომ ამოიყვანა კემზე და მე წანამქრული ბორცვიდან თავდაყირა არ გადავუშვი...

არ ვიცი.

ვერასდროს ვერ შევიტყობ, ვინ იყო იგი.

მეორეჯერ მაშინ მომაგონდა ეს ამბავი, ახალგაზრდა ექიმი ბური საბერძნეთიდან რომ დაბრუნდა. ბური იქ საერთაშორისო წითელ ჯვარში მსახურობდა და ბევრი ამბავი მოგვითხრო საკუთარი თვალთ ნანახი. მათ შორის ასეთიც: თურმე ერთი დამშეული ბერძენი ბავშვი ათენის ცენტრში ვერმახტის მანქანიდან ბურის მოპარვას ცდილობდა, ვიღაც ჯარისკაცს დაუჭერია ბავშვი და იქვე მიუხვრეტია ქუჩაში. რა თქმა უნდა, ბურიმ სხვაც ბევრი ნახა: ყველა ჯარისკაცს არ მიუხვრეტია ასე ტყუილუბრალოდ ბერძენი ან პოლონელი ბავშვი, მე ვიცი ეს. მე მხოლოდ ვკითხე, ის ჯარისკაცი, ათენში რომ ნახე, როგორ გამოიყურებოდა-მეთქი, ისე ვკითხე, თითქოს შემძლებოდეს იმ ჯარისკაცის ამოცნობა.

ნეტავი რისთვის?

ჩვენ ისე ვსაუბრობდით, როგორც მთის მწვერვალზე ისაუბრებდა ორი კაცი, უბრალოდ, ამხანაგურად, ისე, როგორც თოვლის უდაბნოში მარტო დარჩენილ ორ მამაკაცს შეეფერებოდა, ამხანაგურად, სიტყვაძუნწად, — მწვერვალზე მონავარდე ქარი გრძელ-გრძელი წინადადებების წარმოთქმას მაინც არ დაგვანებებდა. თავისთავად გასაგებია, რომ ყოველგვარი ფორმალობის გარეშე წავისაუბრეთ, ხელიც ჩამოვართვით ერთმანეთს, გვარი კი არც ერთს არ გვითქვამს. ორივემ მივალწიეთ იმ მწვერვალს. ესეც კმაროდა, ორივეს ერთი და იგივე ხედი გვქონდა თვალწინ გადაშლილი. თუმცა ერთმანეთს ხელი მართლა ჩამოვართვით თუ არა, ეს კარგად აღარ მახსოვს. შეიძლება ჯიბიდან არც ამომიღია ხელები. შემდეგ მის ვაშლს გეახლებოდით, ეს იყო და ეს, და წანამქრული ბორცვიდან ძირს ვიყურებოდით. რაც არ ჩამიდენია, ის კი მახსოვს მტკიცედ. იქნებ კარგი კაცი იყო ის უცნობი, იქნებ ძალიან კარგიც-მეთქი, ჩავჩიჩინებ ჩემს თავს, რათა იმას აღარ მივსტიროდე რაც არ ჩამიდენია. იქნებ ომის შემდეგ კიდევ შევხვედრივარ სადმე და არაფერი მიგრძენია, შევხვედრივარ ალბათ სხვაგვარად ჩაცმულს, შევხვედრივარ ისე, ძალიანაც რომ მომენდომებინა, ველარ ვიცნობდი. იქნებ იგი ერთი მრავალთაგანია, ვისაც პატივს ვცემ და ვერასოდეს ვერ შეველევ. მხოლოდ ხანდახან ვჭოჭმანობ ასე, უეცრად მომივლის ხოლმე. მას შემდეგ ხომ ოცი წელიწადი გავიდა. ვიცი, რომ სასაცილოა, არ გავიწყდებოდეს საქმე, რომელიც არ ჩავიდენია. მე ხომ არც არავის ვუყვები ამ ამბავს. დროდადრო კი სულაც აღარ მაგონდება ეს ამბავი...

მხოლოდ მისი ხმა მიდგას ყურში.





ჭიქას ვცლი.

დროა დანახარჯი გადავიხადო.

— დიახ, დიახ. — ვამბობ მე, — ეს რუსები!

ვხედავ, რომ ჩემი ბარმენიც სხვა ფიქრებში ყოფილა ამასობაში გართული... ჰოდა, რაც არ მომხდარა, იმასაც მოვეშვათ და მისი რუსული მალარობების ამბავსაც, ჩემს გამონაგონთან მოკლე ჩართვით რომ არის დაკავშირებული.

— ბატონო დოქტორო, კიდევ ხომ არ ინებებთ ვისკის? — მეკითხება იგი.

— მითხარით, — კითხვას ვუბრუნებ მე, ბარმენი ამ დროს საფერფლეს ცლის და ჩვრით წმენდს თუთიის დახლს, რომელიც, ეტყობა, ფერფლით დაფარე, — მითხარით, კეშის პიკზე თუ ყოფილხართ ოდესმე?

— არა, — მეუბნება იგი, — ეგ ერთხელ უკვე მკითხეთ.

ბევრი შემისვამს... ამასობაში ბარში ვიღაც ქალი შემოდის და თვალებს აცეცებს. მის დანახვაზე მაგონდება, რომ საათ-ნახევარია აქ ვიღაცას ველოდები. როგორც იქნა მივხვდი, რომ ეს იმ ვიღაცის მეუღლეა, ის ვიღაცა სამწუხაროდ, იძულებული გამხდარა სადღაც გამგზავრებულიყო და მისი მეუღლე აქ მოსაბოდიშებლადაა მოსული. ტაბურეტიდან ჩამოვხტი და ზრდილობის გულისათვის ქალს სველი პალტო ჩამოვართვი... ამით ისიც მინდა გამოვხატო, რომ ბოდიშს ვღებულობ, თუმცა სიმართლე თუ გნებავთ, საბოდიშოდ საქმე მე მქონდა, რადგან სულ გადამავიწყდა, ვიღაცას რომ ველოდებოდი. ასევე ზრდილობის გულისათვის ვეკითხები ქალს:

— რამეს ხომ არ დალევდით?

თავს უხერხულად ვგრძნობ. ზუსტად დათქმულ დღეს ლონდონში წასულა ის კაცი, თვითონ ჯერ თვალთ არ მინახავს და მის მეუღლეს კი ვხედავ. ცოტა არ იყოს, უხერხულად ვიგრძენი თავი.

— ისევ წვიმს? — ვეკითხები ქალს.

ის იყო დანახარჯის გადახდას ვაპირებდი.

— არ მინდა მოგაცდინოთ! — მეუბნება იგი და ტაბურეტზე ჯდება დახლთან. — ნამდვილად არ მინდა მოგაცდინოთ...

— რას დალევთ? — ვეკითხები მე.

— არა, მაინც როგორ წვიმს, — ამბობს იგი.

ქალმა ჯერ თმა გაისწორა და რაკი შემატყო, ბევრი მქონდა დალეული, თავისთვის ჯინჯერეილი<sup>1</sup> შეუკვეთა... ახლა რაღაზე ველაპარაკო? შევხედე თუ არა, გავიფიქრე, მსახიობია-მეთქი. არ ვიცი, საიდან მომივიდა თავში ეს აზრი. ამ ქალს პირველად ვხედავ და ალბათ უკანასკნელადაც. რა პროფესიის ბრძანდებით-მეთქი რომ ვკითხო, უზრდელობაში ჩამომერთმევა, ამიტომ აღარაფერს ვეკითხები. იქნებ ცნობილი მსახიობია და ჩემმა შეკითხვამ გული ატკინოს. მოკლედ, მე კრენდელებს ვახრამუნებ, რამდენსაც მოვფოთნი მარცხნივ და მარჯვნივ და თან ყურს ვუგდებ, სვობოდას, მის ქმარს, რატომ მოუხდა ლონდონში წასვლა, დროდადრო კვესს ვაწვდი ქალს და ერთხელ კიდევ ვანიშნებ უსიტყვოდ, ბოდიშს ვღებულობ-მეთქი. იგი, ცოტა არ იყოს,

<sup>1</sup> ჯანჯაფილით შემზადებული ლუდისებური სასმელია, მეტწილად ვისკის გასაზავებლად ხმარობენ (მთარგმნ.).



გამალებით ეწევა, როცა ქმარზე ლაპარაკობს. წვიმაში დასველებული თმა შავად უბზინავს. გადაწყვეტილი მაქვს, არავინ შემიყვარდეს. ფართო ლურჯი თვალები აქვს. რაღაც მეც ხომ უნდა ვთქვა, რომ ქალს დაბნეული ან გამოთავყანებული არ ვეგონო. ვორჭოფობ, მსახიობია თუ არა-მეთქი და კიდევ უფრო ვიბნევი, ის კი, არ ვიცი რატომ, პერუსზე ლაპარაკობს. ჩემს თავს ვეკითხები, ამ ქალს რა როლს მივცემდი-მეთქი. თვალებად გადაქცეული, უსიტყვოდ ვუსმენ და აშკარად ჰგონია, რომ ყველაფერი გავუგე. თუმცა ამასობაში მასაც ოდნავ შეეტყო უხერხულობა. ჯინჯერიელს ისე დაეწაფა, თითქოს უეცრად მოჰგონებოდეს რაიმე საშური საქმე. არ მინდა უცხო მამაკაცი მოვაცდინო. პერუს ამბებს ვეკითხები, მაგრამ მხარს აღარ მიბამს, ისედაც მოვაცდინებო. მე მხოლოდ სვობოდას მაგიერ მოსაბოდიშებლად მოვედიო, ამბობს და დანახარჯის გადახდას აპირებს, მაგრამ მე არ ვანებებ. როგორ გეკადრებათ-მეთქი, ვეუბნები. ბარმენი პეპეც ამ დროს ყურს იყრუებს, აქეთ აღარც კი იხედება, რომ დანახარჯი გადავიხადო და იძულებულნი ვართ განვაგრძოთ საუბარი. მაგრამ რაზე? ქალს ქმარზე ჩამოვუგდე სიტყვა, მისი ქმრის გაცნობა ოღონდაც რომ მმართვედა. ის, როგორც ვთქვით, ლონდონში იმყოფება. ისე ერთბაშად გამოვფხიზლდი, თითქოს განგამის ხმა ჩამსმოდეს ყურში, ის უცხო მამაკაცი, ქალს რომ არ უნდოდა მოეცდინა, უწინდებურად მთვრალია, მაგრამ ისე მაგრად არა, რომ საკუთარი თავისა და იმ უცხოს ერთმანეთისაგან გარჩევა გამიჭირდეს. პერუ ჩემი ალტქმული ქვეყანააო, ამბობს ის კაცი, ვიცი, სისულელეს რომავს, მაგრამ ქალი ყურთასმენადაა ქცეული; ეტყობა, მოსწონს მისი ლაპარაკი და ასე გრძელდება ჩემთვის უცნობ ქვეყანაზე საუბარი. მას კი თავის მეუღლესთან ერთად უმოგზაურია პერუში. ჩემს თავს გამოვუტყდი: იაშვიათად დამაინტერესებს ქალის საუბარი, თუ იგი ქალადაც არ მომეწონა. სწორედ ამიტომ ვაკვირდები ბაგეზე. ჩამესმა, ერთგული ცოლი ვარო, მაგრამ არ ვიცი, რაზე თქვა ეს — ყურს არ ვუგდებდი. როცა ლაპარაკობს, სახე ცოცხალი და ლამაზი აქვს. უსიტყვოდ, ღიმილით ვაკვირდებოდი (უცხო მამაკაცი კი ამ დროს ლაპარაკობდა), სახამ სიწითლე არ მოედო სახეზე. ქალმა თმა უკან გადაიყარა და სიგარეტი ჟინიანად ჩამობერტყა, თუმცა სიგარეტს ჯერ ფერფლი არ ჰქონდა მოდებული, თან თავს ისე მაჩვენებს, ვითომ ბარის თავზე დაკიდული რეკლამის ამოკითხვას ლამობდეს: „Johnnie Walker, highest awards“<sup>1</sup>. თვალებს ჭუტავს, რადგან საკუთარი სიგარეტის კვამლი სახეზე მოეფინა. „Guaranteed same quality throughout the world“<sup>2</sup>. მისი სახე გვერდიდანაც ღირს საყურებლად და მისი ხელიც უცხოდ არ მეჩვენება. მისი თმაც კი, ადამიანის სხეულზე ამოსული ეს საოცარზე საოცარი მატერია, უცხოდ არ მეჩვენება. იგი თავის პაწაწკინტელა საათზე იყურება.

— ო, — ამბობს იგი, — სამი საათი გამხდარა!

მე კი დრო მაქვს.

კაცმა რომ თქვას, მასაც აქვს დრო.

— მართლა არ მიირთმევთ ვისკის? — ვეკითხები მე.

პეპე, როგორც ყოველი ბარმენი, ადამიანების ცნობაში კარგადაა დახე-

<sup>1</sup> ჯონი უოკერი, უმაღლესი ჯილდოები (ინგლ.).

<sup>2</sup> ვიძლევიტ მთელ მსოფლიოში ერთნაირი ხარისხის გარანტიას (ინგლ.).



ლოვნებული, მას უკვე სუფთა ჭიქა უჭირავს ხელში და მხოლოდ ისღა დამ-  
რჩენია ვუთხრა, ორი-მეთქი.

მერე, მერე როგორ გრძელდება ეს ამბავი?

ნაშუადღევს სამი საათი საშინელი დროა, უდალმართო, გლუვი და  
უპერსპექტივო. მაგონდება, ჩემს შორეულ ბავშვობაში ავად რომ გავხდე-  
ბოდი ხოლმე, მაშინაც ასე უღიმღამო იყო სამი საათი, სურათებიანი წიგ-  
ნები, ვაშლის მუსი, მარადისობა... მხოლოდ სიტყვის მასალად ვკითხე, შვი-  
ლები თუ გყავთ-მეთქი, რაც, კაცმა რომ თქვას, მე სულაც არ მეკითხებოდა.  
ვუყურებთ, როგორ საქმიანობს ბარმენი: ყინული, ვისკი, სოდა... ამ უცხო  
მამაკაცს, რომელიც შემდეგ (დაახლოებით 15. 30) ქალს შიშველ მკლავში  
ჰკიდებს ხელს, მისი კი არა, ჩემი რცხვენია. მოლოდინი გამიცრუვდა, ქალს  
დამცინავი ღიმილით არ შემოუხედავს ჩემთვის, ბატონო ჩემო, ეს რას ნიშ-  
ნავსო, არც თბილი მკლავი წაურთმევია და რახან სდუმს კიდევ, სხვა გზა არ  
არის — უცხო მამაკაცის ჟესტს ბოლომდე უნდა გავუძლო. გულწრფელად  
მეწყინა, ძარღვი რომ არ შემტოკებია. უფრო მეტიც: ჩემმა უნდილობამ  
შემაცბუნა. უცხო მამაკაცმა ბოლოს და ბოლოს ხელი უშვა ქალის მკლავს,  
რადგან ის ხელი მე დამჭირდა — ჩემი ვისკი უნდა ამელო, სანამ გათბებო-  
და — ქალმა შენიშნა ჩემი შეცბუნება და მგონი არასწორად გაიგო. ასე იყო  
თუ ისე, იმანაც ჭიქას მოჰკიდა ხელი და თან ისე ამოიხვნეშა, თითქოს გული  
თან ამოატანაო, შუბლიდან თმა გადაიწია და მე შემომხედა, მე! მიყურებს  
დიდრონი ლურჯი თვალებით და ვერ ხვდება, რომ მარტო ყოფნა მინდა.  
სიგარეტს ვეწევით, გარეთ კი ისევ წვიმს. ვეწევით. უკვე ვგრძნობ, საცაა  
ის მელანქოლია დამრევს ხელს, მამაკაცებს ასე რომ უხდებათ და ქალებს  
ქედს რომ ახრევინებს. ვერაფერს მშველის, იმ უცხო მამაკაცს გულმოდგინედ  
რომ ვაკვირდები. იგი, როგორც მოსალოდნელი იყო (მე ხომ ვიცი მისი  
ამბავი!), ახლა ხუმრობანარევი გულწრფელობით აგრძელებს საუბარს და  
იმაზე უფრო ინტიმურად და მიუკიბ-მოუკიბავად ლაპარაკობს ცხოვრები-  
სეულ საკითხებზე, ვიდრე ეს ჩემს გუნება-განწყობას შეეფერება. უნდა  
ჰყავდეს თუ არა პროფესიის მქონე ქალს შვილი? რას ნიშნავს ქორწინება?  
ამ თამაშს კარგად ვჭვრეტ. ოღონდ კი სიტყვები წარმოითქვას, სანამ ისინი  
რალაც პირადულ-ისტორიულ მნიშვნელობას არ შეიძენენ, ისეთი სიტყვები,  
როგორცაა სიყვარული, მამაკაცი და ქალი, სქესი, მეგობრობა, ლოგინი და  
პროფესია, ერთგულება, ეჭვი, ტიპი და ცალკეული პიროვნება და ასე შემდეგ  
და ასე შემდეგ. და ვინაიდან და რადგანაც ასე ზოგად ცნებებამდე დასული  
საკუთარი შეხედულებანი მე თვითონვე მბეზრდება, უცხო მამაკაცი მათ თა-  
ვისი გამონაგონი პატარ-პატარა მაგალითებით აზავებს. ვთქვათ, ამბობს იგი,  
ორი ჩვენისთანა ადამიანი ერთმანეთს მკლავებში უვარდება. ანდა ასე: ჩვენ  
ვახვრხებთ, რომ აქედან არავითარი ისტორია არ გამოგვივიდეს, ვთქვათ,  
თავს ვარიდებთ ყოველგვარ განმეორებას. უცხო მამაკაცი კიდევ ერთ ნა-  
ბიჯს დგამს წინ, რათა ზოგადი მაგალითი ოდნავ უფრო თვალსაჩინო გახადოს.  
ისეთ დიალოგებს იგონებს, მოულოდნელად შენობით მიმართვის საშუალებას  
რომ იძლევიან, მაგალითი მოითხოვს ამას და ქალსაც ესმის, რომ უცხო მა-  
მაკაცი მხოლოდ მაგალითისთვის ეუბნება „ჩვენო“ ან „მე და შენო“. ანდა:  
შენც იცოდი და მეც, რომ ერთმანეთს მივატოვებდითო. ქალი სიგარეტს  
ეწევა, ესმის, რომ მამაკაცი ბრჭყალებში სვამს თავის ნათქვამს. ქალი ეწევა,



ის კი ჩემს ჭიქას ავლებს ხელს, ქალს რომ აჩვენოს, ამ ცარიელ ბარში ვსხედვართ და არა სხვაგან სადმეო და კვლავ თქვენობით მიმართავს. თამაში დამთავრებულია. ქალი კარგა ხანს არ იღებს ხმას, ოდნავ გაბობილი-ბაგვდან კვამლი ამოსდის და მოციხსტრო პირბადესავით ევლება-სახეზე, იგი უსიტყვოდ ეთანხმება მის დებულებებს, ამ დებულებათა პრინციპულ, ზოგად, საყოველთაო ხასიათს. სიყვარულზე სიტყვა არ თქმულა, არა, რას ბრძანებთ, მაგრამ შენობანას თამაშმა ისეთი რამ შემოიტანა მათ ურთიერთობაში, ისე შეცვალა საუბრის კილო, რომ ამ ამბავს თქვენობით ლაპარაკით აღარაფერი ეშველება. დროს ვიხელთებ თუ არა, საათზე ვიხედები, რათა უცხო მამაკაცი გავაფრთხილო, მაგრამ ამაოდ. ამიერიდან რაც არ უნდა ხშირად მიმართონ ერთმანეთს „თქვენობით“, ამ სიტყვამ უკვე შეიძინა ერთგვარი მომხიბლაობა, მოწყენილობას რომ აქარვებს. ამგვარად, მე ახლა უწყინარ თემებზე, მაგალითად, მსოფლიო მოვლენებზე, წარმოვთქვამ მონოლოგს. დროდადრო, ვითომ კვამლისაგან შეწუხებული ქალი ისე ნაბავს თვალებს, თითქოს ვიღაცას ეხვევაო და ეს მართლაც ასე იქნება, უცხო მამაკაცმა, ხუმრობით, ანდა უსიტყვოდ, ძალღური მზერით შიშველ მკლავში რომ მოჰკიდოს ისევ ხელი, ჯერ ხელზე მოჰკიდოს ხელი, საფერფლესთან ჩამოდებულ ხელზე, რომელშიაც სიგარეტი უჭირავს, შემდეგ კი მხრებამდე და კეფამდე აუყვეს. იგი ამას არ სჩადის. მე რომ არ ვღარაჯობდე, იქნებ ეს უნებურად ეცადა კიდევ...

ახლა კი მართლა მინდოდა გადამეხადა დანახარჯი...

— პეპე! — დავიძახე მე.

ბარმენი, აქაოდა შეყვარებულებს ხელს არ ვუშლიო, ფანჯარას მიჰყინვოდა და თავი ისე ეჭირა, ვითომ პირველად ხედავდა მანქანებს წვიმიან ამინდში. ბარმენმა იმდენჯერ წამიყრუა, რამდენჯერაც დავაკაკუნე მონეტით თუთიის დახლზე. უცებ ისევ მომერია მოწყენილობა და წყნარად და ღუნედ განვაგრძე კაკუნი.

— თქვენ წასვლას აპირებთ, — მითხრა მან.

— დიახ, სამწუხაროდ, — გამოვუტყდი მე.

— მეც, — მომიგო მან.

ისევ დავაკაკუნე მონეტით დახლზე.

არ ვიცი, რა მოეპრიანა იმ უცხო მამაკაცს (იგი მე უფრო მამეზრებს თავს ვიდრე ქალს — პირველად როდი ვუსმენ მის ლათაიებს), რომ მოულოდნელად ჰომოსექსუალისტი მამაკაცების მომხიბლაობაზე ჩამოაგდო სიტყვა. მის ლაპარაკს ცალი ყურით ვუსმენდი, იმ წუთში მინდოდა უყურადღებოდ ბარმენს ჩემთვის ყურადღება ეღიროსებინა. ქალიც კვერს უკრავდა, დიახ, დიახ, კობტაობის მოყვარულ მამაკაცებს ნამდვილად აქვთ მომხიბლაობა (ახლა მაგონდება: ჩვენ ჯერ ერთ რომელიღაც მსახიობზე ჩამოვაგდეთ სიტყვა, მერე კი საერთოდ მსახიობებს გადავწვდით). ისინი ქალის კოსტუმებშიც კარგად ერკვევიან და ნელსაცხებლის ყადრიც კარგად იციანო. ქალს ყვითელი კოსტუმი აცვია. უცხო კაცი აღიარებს, თქვენი კოსტუმი ძალიან მომწონს, მაგრამ კიდევ ერთ რამეში უნდა გამოგიტყდეთ, რომც არ მომწონდეს, ვერაფრით ვერ მოვიფიქრებ, მისი გაუმჯობესება რითი შეიძლებაო. გეფიცებით, ასეაო. იმ ყაიდის მამაკაცი კი პირიქით, მაშინვე, — ამას მხოლოდ მაგალითისთვის მოგახსენებთო, — ჩააფრინდებოდა კოსტუმის საყელოს, რაღაცას შეუსწორებდა, ვთქვით, აი ასე, და მთლად გადაასხვაფერებდაო.



დაიმორცხვა. ვხედავ. როგორ გაამწვენიერა და შეცვალა ქალი შეცბუნებამ...

დანახარჯს ვიხდი.

არ მინდა სასიყვარულო თავგადასავალში გავეხვიო.

მინდა ვიმუშაო.

სანამ ხურდას ჯიბეში ჩავიდებდი, მან უკვე ილღიაში ამოიღო თავის თმასავით შავი ხელჩანთა, რომელიც მშვენივრად ეხამებოდა მის ყვითელ კოსტუმს და მითხრა, მიხარია, რომ შეგხვდითო. შემდეგ მე პალტო მივაგებე. ვახშამზე დაპატიყებას არაფერი ედგა წინ, რაკი ქმარი აქ არ იყო, მაგრამ ამაზე არც მაშინ ამომიღია ხმა, როცა შარფს იხვევდა ყელზე. მეც იგივე ვუთხარი, მიხარია, რომ შეგხვდით-მეთქი, და სანამ პალტოში გაეხვეოდა, თავიდან ფეხებამდე პირველად შევაავლე თვალი. თან იმედი მქონდა, პირველად და უკანასკნელად ვხედავდი. მე თუ მკითხავთ, სასიყვარულო ამბების უმრავლესობა, ჯობია, საერთოდ არ იწყებოდეს.

— ხომ არაფერი გრჩებათ? — ისე ვკითხე, თითქოს უკვე მცოდნოდეს მისი გულმავიწყობის ამბავი. ეს მოეწონა. ვინ იყო ეს, მე თუ ის უცხო მამაკაცი — ქალი შემცბარი შეჰყურებდა ხან ერთს და ხან მეორეს — ვითომ ხუმრობით, მაგრამ თამამად, თან ნამდვილად დამცინავად რომ გადაუსვა ქალს შუბლზე ხელი, აქაოდა ბედისწერას ვერსად გაექცევიო, — არ ვიცი. ყოველ შემთხვევაში ასე კი მოხდა. როგორც კი გამოჩნდა ტაქსი, ერთმანეთს წვიმაში ნაჩქარევად და ოფიციალურად გამოვემშვიდობეთ და მხოლოდ მაშინ მიკბინა გულზე იმ რაღაცამ, რასაც გრძნობას ეძახიან, როცა მას უკვე თავზე აღარ აწვიმდა და ჩემდა გულსატკენად მხოლოდ თავის შავი ხელჩანთის ჩხრეკაში იყო გართული. მე მგონი, შემატყო, რაც მჭირდა. მძლოლს აქ გაჩერების უფლება არ ჰქონდა და შუბლმოდღუშული იცდიდა. წარბი არც მერე გაუხსნია, ისე დასძრა მანქანა წვიმაში და ქალი თან წაიყვანა, მე კი ამოდ ველოდი, იქნებ ქალმა ხელთათმანი დამიქნიოს-მეთქი და თან შიშისაგან გული მეწურებოდა, ვაითუ ჩემს თავისუფლებას ბოლო მოღებოდა... ქუდი ჩამოვიფხატე.

ქუსლებზე შემოვტრიალდი — არ მინდოდა ის „მე“ ვყოფილიყავი, ჩემს წარმოდგენილ ისტორიას გულთან ახლოს რომ მიიტანდა. ქუსლებზე შემოვტრიალდი, რათა რაც შეიძლება სწრაფად გავმიჯნოდი იმ უცხო მამაკაცს.

ქუსლებზე შემოვტრიალდი — როცა ერთხელ კიდევ მივიხედე, წვიმის ღვარებში მიმავალი მისი ტაქსი სხვა ტაქსებისაგან აღარაფრით გამოირჩეოდა, გზაჯვარედინზე მაინც ხომ უამრავი ტაქსი შეგროვდა და ყველა ერთნაირად აშხეფებდა წყალს...

სასტუმროსაკენ წავყილდი.

საწოლზე ტანსაცმლიანად მივწექი. სასტუმროს წინ, ქუჩაში, პნევმატური ბურღი დგანდგარებდა, დაძინება მინდოდა და ეს ხმაური ჯოჯოხეთურად ჩამესმოდა ყურში. ვერც ფანჯრის დაკეტვამ მიშველა და ვერც დარაბების ჩამოშვებამ. მინები ზანზარებდა. აღარ ვიცოდი, რა მექნა. ხანგამოშვებით ბურღი ჩერდებოდა, მაგრამ ამით ხმაურის ტონალობა იცვლებოდა მხოლოდ — ახლა კომპრესორს გაჰქონდა დგანდგარი. მართლა არ ვიცოდი, ამ ქალაქში რა



უნდა მეკეთებინა და ვითომ ხუმრობით მისი ნომერი ავკრიფე. იგი შინ იყო. ასევე ხუმრობით, მისი ხმა გავიგონე თუ არა, ყურმილი უცხო მამაკაცს გადავეცი. დიახ, გისმენთ! მე სათქმელი არაფერი მქონდა! სხვათა შორის, არც იმას. მაშინ რაღა გვალაპარაკებდა? მე გავიხუმრე. მისი სიცილი (სახეს რომ ვერ ვხედავდი) მოწყენილობას მგვრიდა. ამ გაჯანჯლებული საუბრისას საწოლზე ვიწექი და ვაკვირდებოდი, როგორ ირხეოდა ჩემი შარვლის მარცხენა ტოტი თოკზე დაკიდებული ჯამბაზივით, ვაკვირდებოდი უცხო მამაკაცის ლურჯ წინდებს, შემეძლო ჩემს ნებაზე მემოძრაებინა იმ უცხო მამაკაცის ფეხის თითები, ცერს სოლოსაც კი ვაცეკვებდი და თან ნიშნის მოგებით ვუგდებდი ყურს ქალის ხმას, რომელიც მეუბნებოდა, ამ საღამოს არა მცალია, „ლა სკალას“ საგასტროლო სპექტაკლზე უნდა წავიდე ოპერაშიო. ყოველ შემთხვევაში, მე ასე გავიგე მისი ნათქვამი. სამაგიეროდ, მისი ქმრის ბილეთს ეცალა. სამწუხაროდ, ჩემი ქმარი, თქვენც იცით, აქ რომ არ არისო. ჯოჯოხეთური დგანდგარი უეცრად შეწყდა. ახლა, როცა უეცრად ჩაჩუმდა ჩემსა და მას შორის გაწოლილი ქალაქი, მისმა ხმამ, რომელიც, სხვათა შორის, სულაც არ იწვევდა ლამაზი ქალის ასოციაციებს, წყნარად და ყოყმანით იკითხა, ამ საღამოს თქვენ რას აკეობთო. მე გულახდილად ვუბასუხე, ოპერას დიდად არაფრად ვაგდებ-მეთქი. უცხო მამაკაცი კი მაინც არ მორჩა ლაყობას. არავითარი სურვილი არ მქონდა კიდევ მენახა იგი. ყურმილი დავკიდე და როგორც ხშირად მემართებოდა ხოლმე მას შემდეგ, როცა რაიმეს ჩავიდენდი, სასაცილოდ მეჩვენა ყველაფერი: უცხო მამაკაცისა და ქალის ბუნდოვანი შეთანხმება მე არაფერს ძავალდებულებდა, ტვირთად მაწვა, თორემ არაფერს ძავალდებულებდა. ვითომ უამისობა არ იქნებოდა-მეთქი, ვფიქრობდი, როცა ჩემი შავი კოსტუმი ჩემოდნიდან ამოვიღე და საკიდზე ჩამოვკიდე. ერთბაშად გამოვფხიზლდი. ხელახლა წამოვწექი და სიგარეტს მოვუკიდე... თვალწინ ჩემს შავ საგარეო კოსტუმში გამოწყობილი უცხო მამაკაცი მედგა, ვხედავდი, როგორ იჯდა იმ ქალის ქმრის ადგილზე. ხოლო ჩემს თავს იმ ქალის ქმრის როლში ვხედავდი, რომელიც წასული გახლდათ: წვიმს და არ იცის უცხო ქალაქში საით მიაწყდეს, ჩაცმული წამოწოლილა სასტუმროს ზუსტად ასეთსავე ოთახში და სიგარეტს აბოლებს...

შევეცადე წიგნი ამეღო ხელში.

(ხანდახან მეც მეჩვენება, რომ თუკი წიგნი ომის წინააღმდეგ არ არის მიმართული, თუკი უკეთესი საზოგადოების შექმნისაკენ არ მოგვიწოდებს და ასე შემდეგ, იგი უაზროა და უმაქნისი, უბასუხისმგებლოა, მოსაწყენი, მისი წაკითხვა არა ღირს, იგი მიუღებელია საზოგადოებისათვის, „მე“-ს ირგვლივ შეთხზულმა ამბებმა თითქოს თავისი დრო მოჭამა. მაგრამ ცხოვრება ხომ მაინც ცალკეულ „მე“-ში აღსრულდება, ცალკეულ „მე“-ში გარდატყდება და სხვაგან არსად?).

უსაქმურობისაგან ვწრიალებდი.

შვილის წუთებზე სასტუმროდან გამოვედი (ქალი შემპირდა ექვსიდან შვიდამდე დაგირეკავო, მე კი არ მიხდოდა ტელეფონის ზარს დავლოდებოდი) და გადავწყვიტე კინოში წავსულიყავი, რომ ხელახლა ამუშავებული პნევმატური ბურღის ხმა აღარ გამეგონა. წვიმამ გადაიღო... სველ ასფალტში ცის სილურჯე და გაზაფხული ირეკლებოდა, ქუჩაში უპალტოოდ გამოვედი. უკვე საოპეროდ ვიყავი გამოწყობილი, ესე იგი, შავი საგარეო კოსტუმი მეცვა.



ხელები ჯიბეებში მეწყო. ასე შევედი შუა ფილმზე, ვერ გავიგე, რატომ ისროდნენ იმ ფილმში და მომეწყინა. შემდეგ ჯერ ერთ ბარში შევედი, მერე მეორეში და ერთხანს რომელიღაც ავტომატთან გავერთე.

უცხო მამაკაცი: ენდერლინი.

მეორე დღით ჩვეულებრივზე ადრე გამოვიდა ქუჩაში და ხალხში გაერია. დილის შვიდი საათი იყო. შავკოსტუმიანი კაცი უცხო ქუჩაზე ჩამოდიოდა ყოველდღიურ სამუშაოზე მიმავალი სხვა ხალხის მსგავსად. პალტო არ ეცვა, ხელები ჯიბეებში ჩაეწყო და ცდილობდა რაც შეიძლება ნაკლებად მოხვედროდა ვინმეს თვალში. მერე ბარში იდგა მუშების ჯგროში, მუშები ყავას ყლურწავდნენ, ისიც ყავას წრუბავდა, სიგარეტი იყიდა. რაც ჰქონდა ხომ წუხელ გააჩანაგეს, და მიხვდა, რომ წუხელ მის მკლავებში მოქცეულა ქალი იმ უცნაურ რიცხვს მიემატებოდა, რომელსაც ზუსტად არასოდეს ასახელებენ ხოლმე: Mille e tre!<sup>1</sup> ფუნთუშებს უანგარიშოდ ყლაპავდა და შემდეგ მეორე ფინჯანი ყავაც შეუკვებოდა. სჯეროდა, რომ ყველაფერი დამთავრებული იყო, უფრო სწორად, იმედი ჰქონდა, მჯერაო. გაფითრებულ სახეზე არაფერი ეტყობოდა, მაგრამ მაინც ისეთი გრძნობა ჰქონდა, ყველა მატყობს საიდან მოვდივარო. ეს ამბავი ისევე აკრთობდა, როგორც გარეთ მოჩახჩახე მზე, როგორც ბოთლებს უკან ასვეტილი სარკე, როგორც უცხო ქალაქის ქუჩებში გაცხოველებული მოძრაობა, როგორც ის ფაქტი, რომ დღეს სამშაბათი იყო, ამა და ამ რიცხვის სამშაბათი, ოღონდ არ იცოდა, რატომ აკრთობდა ყველაფერი ეს. აქ მას არავინ იცნობდა. მართალია, დაუგვიანდა და ღამის სიბნელე ველარ იფარა, მაგრამ იმედი ჰქონდა, მაინც მოვახერხებ იმ სახლიდან უცხო თვალისგან დაფარულად გამოვსულიყავიო. ამ იმედს მისი გულისთვის ელოლიავებოდა. შემდეგ სულ მიხვეულ-მოხვეული ქუჩებით იარა და ალბათ მარტო ქუჩის მხვეტავი თუ დაინახავდა. პირი შადრევანზე დაიბანა. ის შადრევანი არასოდეს დაავიწყდება... შარვლის ჯიბეში ჩაჩურთული სველი ცხვირსახოცი ახლა აწუხებდა, იდგა, მეორე ფინჯან ყავას სვამდა ზეზეურად და აქაც კი წამოუვლიდა ხოლმე სურვილი ფეხის წვერებზე ევლო, აქ, სადაც ყავის სახარში ქშინავდა და ხალხის გაუთავებელი ყაყანი და ფინჯნების ზრიალი იდგა. ეს განცდა ისე უბნევდა თავგზას, თითქოს მის ირგვლივ შეჯგუფული მამაკაცები, ტყავის ფეშტამლიანი მზიდავები, არასოდეს მოხვეოდნენ ქალს! სხვათა შორის, მისი ბინის გასაღების საქმე კარგად მოგვარდა; გასაღები შეთანხმებისამებრ საფოსტო ყუთში ჩააგდო, საფოსტო ყუთის გასაღები კი სასთუმალთან ედო ქალს — თავზე თუ არ დაათენდებოდა, ყველაფერი რიგზე იქნებოდა. მეორე ფინჯანმა ყავამ ისე გამოაფხიზლა, თითქოს კარგად გამოეძინოს და დაღლილობაც გაუქარვა. ყველაზე უფრო ის უხაროდა, მარტო რომ იყო და თან მამაკაცებში იდგა. ქალს ალბათ ჯერ კიდევ ეძინა, ძილზე უშორესი ქვეყანა კი დედამიწის ზურგზე არ არსებობს. ამას მხოლოდ გულში როდი ფიქრობდა, გრძნობდა კიდევ: რაკი ეძინა, ამ ქალაქშიც ვერ იქნებოდა და თვითონ გუშინდელივით მარტოდმარტო იყო. ლურჯი კოლოფი გახსნა და იმ პირველი სიგარეტის დანახვა გაეხარდა, კვლავ მარტოს

<sup>1</sup> სამი ათასი (იტალ.) — აქ ნახმარია უამრავის მნიშვნელობით.



რომ უნდა მოეწია. ამ დროს შეამჩნია, რომ კვესი აღარ ჰქონდა, მარჯვენა ჯიბეში მხოლოდ სველი ცხვირსახოცი ედო. კვესი ღამეში მირჩენოდა სადღაც. თავს მართლა ბედნიერად გრძნობდა, რადგან გულწრფელად სჯეროდა, წუხანდელი ღამე აღარ განმეორდებაო. მოუკიდებელი სიგარეტი პირში გაიჩარა და მიმოიხედა. კვესი რომ ველარ იბოვა, თვალებს უახლოვდებოდა. ერთი მზიდავი წამდაუწუმ იპურჭყებოდა ნახერხმოყრილ მოზაიკის იატაკზე. ნეტავ სად არის კიდევ, რომელ ქვეყნებშია ასე ნახერხმოყრილი მოზაიკის იატაკი? უეცრად მოიღვენთა, რაც კვლავ იმ ქალთან უქაღდა სიახლოვეს, მერე ყოყმანი დასძლია და ერთ მუშას ასანთი სთხოვა, მაგრამ ასანთის მაგიერ მუშამ დახეთქილ, გაზეთილ მუშტში მომწყვდელი კვესი გაუწოდა, იმ ერთადერთი სიგარეტისათვის მიაგება პატარა ალი, კვლავ მარტოს რომ შეეძლო მოეწია. ეს იყო და ეს. მადლობა ვიღაცის კეფას გადაუხადა. ერთადერთი სახე ამ ბარში, რომელიც ხანგამომშვებით აკვირდებოდა, ბოთლებს უკან ასვეტილ სარკეში არეკლილი საკუთარი სახე იყო: რქის სათვალისანი მოგრძო პირისახე, მოკლედ შეკრეჭილი თმა. ვერ გაეგო, ქალებს რა მოსწონდათ მისი. მხოლოდ წყლისფერ თვალებზე სცნობდა საკუთარ თავს... ეს თვალები ისე იყურებოდნენ, თითქოს მართლა სარკეში ყოფილიყვნენ ამოკვეთილნი, ხოლო სხეული სარკის გარეთ დარჩენილიყო. ნეტარებას ჰგვრიდა ახლახან ნაყიდი უცხო გაზეთის კითხვაც და იმ სიგარეტის მოწევაც, წუხანდელივით თამაშ-თამაშით ბაგედან ბაგეზე რომ არ გადადიოდა. სასიამოვნო იყო იმის შეგრძნება, რომ, ბოლოს და ბოლოს, არსებობდა გარესამყარო. მარცხენა ხელში ფინჯანი ეჭირა, მარჯვენაში კი გაზეთი, სადაც ისევ ალყირზე კითხულობდა რალაცას, რომ თავისდაუნებურად ქალის წუხანდელი ვერაგობა მოაგონდა. წუხელ საქმიანი და ასე განსაჯეთ, თავშესაქცევიც კი ეჩვენა, ქალმა საქალაქთაშორისო ხაზით ლონდონში რომ დარეკა, ჩემი ქმარი ნამდვილად იქ არის ისევ თუ არაო, დღეს კი ამ ფანდის გახსენებამ უსიამო გრძნობა მოჰგვარა. თან არ იცოდა, ფიქრით თავს რატომ იტეხდა. ბოლოს და ბოლოს, ეს იმ ქალის საქმე იყო. თვითონ მხოლოდ ის აზრი უკლავდა გულს, რომ ერთ შორეულ დღეს, რომელსაც, სხვათა შორის, დასაბამი უკვე დასდებოდა, სხვა დანარჩენზე უფრო ცხადად მისი ვერაგობა მოაგონდებოდა, როგორ ეკავა ლოგინიდან წამოწყულს მარცხენა ხელში ყურმილი და ლონდონს ეტიკტიკებოდა, მარჯვენა ხელი კი მის მკერდზე ედო. თვალები დახუჭა, რომ ამ სურათისათვის აღარ ეცქირა, მაგრამ ყურებსაც ხომ ვერ დაიხშობდა. შემდეგ დიდხანს ეწეოდნენ და დუმდნენ. ბოლოს და ბოლოს, რა მისი საქმე იყო, თავის ცოლ-ქმრულ ცხოვრებაში ქალი ამ ამბავს როგორ ჩააკერებდა, რა დროს ამაზე ფიქრი იყო, როცა ხელში ფინჯანი ეჭირა და ალყირის ამბებს კითხულობდა. თუმცა სიმართლე თუ გნებავთ, მას არც ალყირის საქმე ეკითხებოდა და ამიტომ ამჯობინა დანახარჯი გაესტუმრებინა. თხუთმეტი წუთის შემდეგ უკვე ამ ბარში იყო, სხვებისაგან არაფრით გამოირჩეოდა, ყოველ შემთხვევაში, დასაბნევი მაინც არაფერი სჭირდა. დანახარჯი რომ გაისტუმრა, აღარც ფეხისწვერებზე გაუვლია და აღარც ის გაჰკვირვებია, დღეს რომ ამა და ამ რიცხვის სამშაბათი იყო. დღეს ამ ქალაქიდან მიემგზავრებოდა — ეს მტკიცედ ჰქონდა გადაწყვეტილი. დაამთქნარა და უცხო გაზეთი პირზე მიიფარა, მერე ბარიდან გამოლასლასდა და ტაქსს ხელი დაუქნია, რომ სასტუმროში



წასულიყო. ახლა ძილი უნდოდა, აბაზანა და ძილი. მისი გვარი რომ იცოდა, ესეც მეტისმეტი იყო... ტაქსში ჩაჯდა, ხელი გაქეჩილ ღვედს ჩამოადო და შეეცადა მეხსიერებაში ჩარჩენილი ამბები დაეღაგებინა: ეს იყო გუშინ ნაშუადღევს ბარში. წვიმდა. ის ვიღაცას ელოდებოდა. შეხვედრა იმ ვიღაცის ცოლთან, მისი ყვითელი კოსტუმი, მისი სველი თმა, ჯინჯერეილი, იმ უცხო მამაკაცის თამაში... ეს თამაში ნაცნობია და თავმომაბეზრებელი, არაფერი აქვს მასთან საერთო, მასა და იმ უცხო მამაკაცს შორის უფსკრული ძევს. თვითონ ერჩია თავისი გზით წასულიყო...

ეს იყო გუშინ.

ღღეს კი ეჩვენებოდა, რომ არსებობს დემონი, რომელიც მხოლოდ თავის თამაშს ითმენს, სხვისას კი არა, იგი ჩვენს თამაშს ისაკუთრებს, ხოლო ჩვენ სისხლი ვართ და სიცოცხლე, სიცოცხლე როლი არ გახლავთ, ჩვენ ხორცი ვართ, რომელიც კვდება და სული ვართ, რომელიც მარადისობაში დაეხეტება ბრმად, ამინ... ხელი გაქეჩილ ღვედზე ჰქონდა ჩამოდებული და მიმავალი ტაქსიდან გაპყურებდა სამყაროს: ხედავდა გუშინდელ ფასადებს, გუშინდელ მოედნებს, ისინი სულ არ შეცვლილიყო, ქუჩებიცა და გზაჯვარედინებიც ისეთივე იყო, როგორც გუშინ, ავიოკომპანიის უშველებელი რეკლამა, ჯერ კიდევ გუშინ რომ მოხვდა თვალში, ისეთივე იყო, როგორც გუშინ. არაფერი არ შეცვლილა: ოღონდ ამას გუშინ აღარ ჰქვია, ეს ღღესაა. რატომაა ყოველთვის „ღღეს“? ეს უმაქნისი კითხვა, ასე უნდა ყოფილიყო თუ არა, ისევე აწუხებდა, როგორც შარვლის ჯიბეში ჩაჩურთული სველი ცხვირსახოცი. ფანჯარა ჩამოუშვა, იქნებ სველი ცხვირსახოცი მაინც გადავაგდო სვლის დროს შეუმჩნეველად, მაგრამ ვერ გაბედა. ის ორგულობა როდი აწვა ტვირთად, რომელიც ორთავემ ჩაიღინა, — ამაზე ფიქრი ჯერ კიდევ არ აწუხებდა — მხოლოდ ის აღარდებდა, რომ ეს ამბავი უკვე ფაქტი იყო და უფლებებით ამქვეყნად არსებულ ყველა სხვა ფაქტს გაუტოლდებოდა. ცოტა არ იყოს, უკვირდა. აბა ეს ასე თუ ისე გამოცდილი კაცი ნეტავ სხვას რას მოელოდა? დილის რვა საათზე, როცა ქალს თმაგაშლილს ეძინა ისევ, ხვევნა-კოცნაში გატარებულ ღამეში უსახელოდ ჩაფერვლილი სამყარო კვლავ აღმდგარიყო და მის ხვევნაზე უფრო რეალური ჩანდა. უცვლელი სამყარო, თავისი მომწვანო, ჭუჭყისფერი ავტობუსებითა და რეკლამებით, უკიდევანო სამყარო, დახუნძლული ქუჩების სახელებით, ძეგლებითა და თარიღით, რომლის დამახსოვრება მას არ უნდოდა. მაგრამ ფაქტი ფაქტად რჩება, რაც არ უნდა უღიმღამო და უჩინარი იყოს იგი, სველი ცხვირსახოცივით მაინც ვერ მოიშორებ თავიდან. იგი ცოდვას არ ინანიებდა, არავითარ შემთხვევაში. მხოლოდ ის ეუხერხულდებოდა, რომ ღღეს გუშინ არ იყო. თუმცა ქალაქს არაფერი ეტყობოდა და ეს ისე გაუხარდა, სიხარულს ვეღარ მალავდა. ისევ შეხვედრას აზრი არა აქვს. მისი ნახვა ძალიან უნდა, მაგრამ არ დაურეკავს, აეროდრომიდანაც კი არ დაურეკავს, რადგან იცის, რომ ამას არავითარი აზრი არა აქვს... სასტუმრომდე არ მისულა, მანქანა გააჩერებინა, ფული გადაიხადა და გადმოვიდა. მუზეუმში უნდოდა შესვლა, რომ ქვეყანას განრიდებოდა, მარტო დარჩენილიყო და დროის მიღმა ეგრძნო თავი, მაგრამ ამ დილაადრიან მუზეუმის კარი დაკეტილი დახვდა. ტაქსი უკვე თვალს მიეფარა, იგი კი იდგა კიბეზე, ხელები ჯიბეებში ეწყო, უპალტოო, შავ კოსტუმში გამოწყობილი გაუპარსავი მამაკაცი, პირში სიგარეტი გაერჭო, მაგრამ ჯიბეში არც ასანთი



ჰქონდა და არც სხვა რაიმე, რომ მოღუღუნე მტრედები მაინც დაეპურებინა, ჯიბეში არაფერი ედო სველი ცხვირსახოცის გარდა.

ხელის ზურგს უყნოსა.

მისი სუნამოს სურნელი აქროლებულიყო...

კვლავ შეხვდებიან ერთმანეთს, თუ დღეს სამუდამოდ გაფრინდება აქედან, სულ ერთია, მაინც დამთავრდება ყველაფერი. კარგად იცის, რომ დამთავრდება, დრო-ჟამთან ვერაფერს გააწყობ: კარგა ხანს იდგა ასე, შესცივდა და პიჯაკის საყულო წამოიწია, მერე სვეტის ძირში ჩამოჯდა. მის ფეხებთან თეთრი და ნაცრისფერი მტრედები დაღუღუნებდნენ, ზოგჯერ დაფრთხებოდნენ (რისგან?) და კლასიციკლურ ლავგარდანებზე შეფრინდებოდნენ ფრთხილ-ფრთხილით.

ნეტავ კიდევ თუ სძინავს?

შეთანხმდნენ, წერილები არ მიეწერათ ერთმანეთისათვის. არ უნდოდათ მათ ურთიერთობას მომავალი ჰქონოდა, ეს იყო მათი ფიცი:

არავითარი განმეორება...

არავითარი ისტორია!

მათ მხოლოდ ახლანდელი წამი უნდოდათ, აღარასოდეს რომ არ განმეორდება, ეს ნაშუაღამევს შეჰფიცეს ერთმანეთს და ფიცის შესრულება იმასაც მართებდა, ვინც ახლა სვეტის ძირში იჯდა თეთრი და ნაცრისფერი მტრედებით გარშემორტყმული. მტრედები ამჯერად უხმაუროდ ჩამოფრენილიყვნენ ძირს და ცარიელ მოედანსა და კიბეზე დაგოგმანებდნენ. სვეტის ძირში ჩამომჯდარმა კაცმა არ იცოდა რა ეღონა მომავლის წინააღმდეგ, რადგან იცოდა, რომ მომავალი ეს მე ვარ, იმ ქალის მეუღლე, მე ვარ განმეორება, ისტორია, წარმავლობა და ყველაფრის წყევლა-კრულვა, მე ვარ დაბერება წუთიდან წუთამდე...

საათს დახედა, რომელიც სხვათა შორის, მაჯაზე არ ეკეთა. ისე ეჩქარებოდა მისი ბინიდან გამოსვლა, რომ საათი შარვლის ჯიბეში ჩაიდო. ახლა 9.05 იყო, თუკი საათი კიდევ მუშაობდა. 11.30 საქმიანი პაემანი ჰქონდა დანიშნული, ამ პაემანს ალბათ სადილი მოჰყვებოდა. სანამ მაჯაზე გაიკეთებდა, საათი ყურთან მიიტანა. საათი მუშაობდა. მაშ 9.05. მას შემდეგ რაც ერთმანეთი პირველად ნახეს — გუშინ ნაშუაღამევს იმ უკაცრიელ ბარში — ოცდაოთხი საათი ჯერ არ იყო გასული. ესე იგი, მათთვის ჯერ დროც კი არ განმეორებულა. არ არსებობდა არავითარი გუშინ, არავითარი დღეს, არავითარი წარსული, დროს ჯერ არ გაუსწრია მათთვის; ყველაფერი ახლაა: მათი პირველი დილა, მათი პირველი შუადღე. იმ ორიოდე უმნიშვნელო სიტყვის გარდა, ყავა რომ შეუკვებთა, სიგარეტი იყიდა და მუშას ცეცხლი სთხოვა, სხვა სიტყვა არ ჩამდგარა მათ შორის, სხვა ხალხს ამის მეტად არ დალაპარაკებია. სამყარო ჯერ კიდევ მის მიღმა არსებობდა. ამ წუთში სიგარეტს ეწეოდა. უცაბედად ასანთი იპოვა სველი ცხვირსახოცის გვერდით და ერთი ცალი აინთო კიდევ. იჯდა ასე, სიგარეტს აბოლებდა, დაჰყურებდა თავის დამტვერიანებულ შავი ლაქის ფეხსაცმელებს და არ იცოდა, რა ეღონა მომავლის წინააღმდეგ, რომელსაც მისმა მოგონებებმა უკვე დაუდო სათავე... აგონდებოდა ის ბინა: შინ ოპერაში წასაყვანად მიაკითხა, ქალს კი უნდოდა მისთვის პერუს ფოტოსურათები ეჩვენებინა და თავისი აღარ დაიშალა, თუმცა ოპერაში უკვე აგვიანდებოდათ. იგი პოლში იდგა და მოუთმენლად ცმუტავდა, თუმცა ოპერა ქალს აინტერესებდა და არა მას. თვითონ ოპერას ჯერ კინოში შესვლა და მერე ერთი ვახშამი ერჩინა. ხელებს ველარაფერი მოუხერხა და ჯიბეში ჩაიწყო. ასე იდგა და ელოდა



პერუს გზამკვლევეებს, რომლებიც, ქალის აზრით, უეჭველად უნდა გამოსდგომოდა. ერთი წამოსცდა, თუ ოდესმე პერუში წავედი, მეც მანქანით უნდა შემოვიარო ეს ქვეყანაო, და ქალიც ასე თავგამოდებით ამიტომ ეძებდა პერუს სამანქანო გზების რუკას. იმ ამბამდე სულ ერთი წუთის წინ ვერც კი წარმოიდგენდა, რომ ეს შესაძლებელი იყო. ქალი იდგა და გულმოდგინედ შლიდა პერუს სამანქანო გზების რუკას. ნამდვილად ვერ წარმოიდგენდა, რომ ეს შესაძლებელი იყო, უფრო სწორად, ამაზე სულ არ უფიქრია და როცა იგრძნო, ჯიბეში ნაგულები ხელი ქალს შუბლზე ეფერებო, თვითონ უფრო გაუკვირდა. ქალმა არაფერი შეიმჩნია. განა ეს მსუბუქი და უგერგილო ხუმრობისმაგვარი ჟესტი პირველი იყო მისთვის? ეს მერეღა გაახსენდა და განმეორებისა შერცხვა. ჯერ კიდევ ნაშუადღევს, იმ ბარში, მისი ხელი უნებურად შეეხო ქალის შუბლს: ვითომ ხუმრობით, ვითომ გამომშვიდობების ნიშნად. ქალმა მაშინ უბრალო ჩვეულებად ჩაუთვალა ის ჟესტი, ახლა კი პერუს გზების გაქეჩილ რუკას ათვალეობდნენ, რომელსაც მას შემდეგ სამახსოვროდ ვინახავ. მისი ჟესტი ქალს საწყენად არ მიუღია, მაგრამ მაინც სიჩუმე ჩამოვარდა. სანამ კვლავ პერუს გზების ავ-კარგზე გააბამდნენ უწინდელზე უფრო საქმიან საუბარს. ეს იყო რვა საათზე. ქალს პალტო ეცვა, ისინი ხომ ოპერაში აპირებდნენ წასვლას. თავს არ იკატუნებდნენ, ორივეს ჯერ კიდევ ნამდვილად სჯეროდა, რომ პირველ მოქმედებაზე დააგვიანებდნენ. მაგრამ ოპერაში მაინც წავიდოდნენ. ქალს მანქანა ისეთ ადგილზე ჰყავდა ჩაუკეტავად მიტოვებული, სადაც მხოლოდ ჩასხდომა-გადმოსხდომა იყო ნებადართული. მეორე დილით ნახა, რომ ქალს შუქიც კი არ გამოერთო. პერუს რუკის წინ, რომელიც დილასაც, ბინიდან გამოსვლისას ისევე გადაშლილი დაუხვდა სკივრზე, ისინი სხვაგვარად ლაპარაკობდნენ, ისე არა, როგორც ნაშუადღევს, იმ გამოცარიელებულ ბარში. იქ უხერხულობის გამო ეარშიყებოდა ქალს, არ იცოდა, რაზე ელაპარაკა, ახლა კი, პერუს რუკაზე დახრილნი ისე საუბრობდნენ, როგორც ეს ორ გონიერ ადამიანს შეეფერებოდა. ქალი წუხდა, რაღა ახლა არ არის ჩემი ქმარი აქ, პერუზე ის გაცილებით უფრო ზუსტ ცნობებს მოგაწვდიდათო, ქალს ეგონა, კაცი მართლა აპირებდა პერუში წასვლას. გაეღიმა. პერუ! ეს იყო ერთადერთი სიტყვა, რომელიც მერე ხვევნა-კოცნაში წამოსცდა. მაგრამ როცა გაეღიმა, მაშინ ეს ჯერ კიდევ არ იცოდა და მისმა ღიმილმა ქალი შეაცბუნა, თუმცა კაცი თავაზიანად ცდილობდა, ინკებზე თუკი რაიმე იცოდა მისთვის გაეზიარებინა. ქალი კი არც თვითონ ჯდებოდა და არც მას სთავაზობდა სავარძელს. მერე სიგარეტი აიღო. სიმართლე თუ გნებავთ, ორივე ღობე-ყორეს ედებოდა. ერთმანეთს შეხედეს, ცხრა საათი შესრულდა, ქალს კი არაფერი შემოუთავაზებია, ისევ ისე იდგნენ ფეხზე, სიგარეტს ეწეოდნენ. ქალს ისევ პალტო ეცვა. როგორც ჩანს, ენაზე ადგა ქმრის სახელი, თითქოს ეშინია არ დაავიწყდესო. აშკარად მოეშვა გულზე, როცა კაცმა ახსენა მისი ქმარი, რომელსაც მხოლოდ გვარით იცნობდა. ქალმა თქვა, რა სასაცილოა, ამდენ ხანს ფეხზე რომ ვდგავართო და პალტოგაუხდელი ჩამოჯდა. კაცმა ოპერა გაახსენა, სპექტაკლი უკვე დიდი ხნის დაწყებული იქნებაო. თვითონ კარგა ხანს იდგა ფეხზე. პალტო რომ არ ეცვა, ეუხერხულებოდა — უკვე ერთი წუთით შემოსულ კაცს აღარ ჰგავდა. ზეზეურად ლაპარაკობდა, ლაპარაკობდა ბევრს, მაგრამ გრძნობდა, საცაა მოწყენილობა მოერეოდა. ხელები შარვლის ჯიბეებში ეწყო. საკუთარი ხელების ეშინოდა, რადგან ხელები აღარ უგონებდნენ.



ეშინოდა წამით ჩამოვარდნილი სიჩუმის. უკვე მესამეჯერ შეხედეს ერთმანეთს მამაკაცმა და ქალმა, უსიტყვოდ შეჰყურებდნენ ერთმანეთს, უსიტყვოდ, გაუღიმებლად და დაუმორცხვებლად. ამასობაში კაცი მაინც დაჯდა, ოღონდ ისე, რომ მათ შორის მაგიდა მოექცა. თითქოს ორივეს ეშინოდა, ისეთი ტამ არ ჩაედინათ, რაც თუნდაც გარეგნულად შეცვლიდა რაიმეს. ამიტომ ფირფიტის დაკვრასაც კი მოერიდნენ. ისხდნენ და ეწეოდნენ. კაცმა კატებზე ჩამოაგდო სიტყვა. საიდან სადაო. თერთმეტს აღარაფერი უკლდა, როცა ერთმანეთს გამოუტყდნენ, სასმელზე უარს არ ვიტყვოდიო. ქალმა სიგარეტი მაშინვე ჩასრისა საფერფლეში. გაცილებით მოსახერხებელი იყო შინ დაელიათ რამე, მაგრამ ორივემ იგრძნო, ჯობდა ქალაქში გასულიყვნენ და იქ რომელიმე ბარში მოექლათ წყურვილი. ამ უსიტყვო შეთანხმებამ გააოცა. რომ მოსწყურდათ, ორივეს გაეხარდა და ფეხზე წამოიჭრნენ, თუმცა კაცი გრძნობდა, რომ ქალისათვის საჩოთირო არ უნდა ყოფილიყო, ამ შუალამისას სტუმარს შინ თუ გაუმასპინძლებოდა. ქალმა ტორშერი ჩააქრო. რაც პერუს რუკას დაუწყო ძებნა, მას მერე მთელ ბინაში სინათლე ჩახჩახებდა და ყველა კარი ღია იყო, სამზარეულოს კარიც კი ღია იყო, თითქოს დაკეტილი კარის ორივეს ეშინოდა. უცნაური გრძნობა გაუჩნდა, როცა ქალმა ჯერ ტორშერი, ხოლო შემდეგ ქალიც ჩააქრო. იგი ჰოლში იდგა, პალტოგაღებული ქალი კი ოთახებში დაწრიალებდა. კაბინეტშიც რომ დააპირა ქალმა შუქის ჩაქრობა, პირველად მაშინ დაუარა კაცს ტანში ტკბილმა გრძნობამ, რომ ეს სხეული არასოდეს დაავიწყდებოდა, თორემ მას კი დაივიწყებდა! ეს მაშინაც იცოდა, სვეტის ძირში რომ იჯდა თეთრი და ნაცრისფერი მოღუღლუნე მტრედებით გარშემორტყმული და ვერ გადაეწყვიტა, ქალი ისევ ენახა, თუ არა. წასვლა უნდოდა. სად? გუშინდელივით წამოდგა, ხელები ისევ ისე ეწყო შავი კოსტუმის ჯიბეებში, როგორც გუშინ, მის ბინაში. სწყუროდა. ეს იყო გუშინ: ორივეს წასვლა უნდოდა. სად? უკვე ჰოლში იდგნენ წასასვლელად გამზადებულები და იგი მხოლოდ ელოდა, ქალი როდის იპოვიდა თავისი მანქანის გასაღებს. შუქი ჰოლშიდა ენთო, ქალმა მარცხენა ხელი უკვე გამომრთველს შეახო და ერთხელ კიდევ მიმოიხედა, უწესრიგოდ ხომ არაფერი მრჩებო, მერე წავიდეთო, თქვა. და ამ დროს მისმა ხელმა თითქოს რაღაცის შანსთან გამომშვიდობების ნიშნად, უნებურად და თან დამცინავად გაისრიალა ქალის შუბლზე, აქაოდა კარგად მესმის, ისევ იმ უესტს რომ ვიმეორებო, წავიდეთო, თქვა მანაც, ქალმა სინათლე ჩააქრო და მას შემდეგ შუქი აღარ ანთებულა, სანამ ფანჯრებში რიჟრაჟმა არ შემოიხედა. ქალს ჯერ კიდევ პალტო ეცვა, როცა კოცნამ არარად აქცია ყოველგვარი სამოსი და ერთბაშად სასაცილო გახდა ბეწვეულის, შალისა და აბრეშუმისაგან შეკოწიწებული სიცრუე, რომლის შემოძარცვა არც ისე ადვილი იყო. მაგრამ ამას ვნების წესი და რიგი მოითხოვდა. ქალმა თქვა, მანქანაზე ნამდვილად ჯარიმის ქვითარი დამიხვდებო. ეს იმ დროს უთხრა, როცა კაცი ვითომ ზოზინით უფათურებდა ხელებს, აშკარად კი ეტყობოდა, ქალის თეთრეულში მშვენივრად იყო გათვითცნობიერებული. ოღონდ ქალი დამცინავი ღიმილით რომ არ მიხმარებოდა, მაინც ვერ გართმევდა საქმეს თავს. თან გონებაში უკვე უტრიალებდა აზრი, რომ ყველაფერი ისევე მოხდებოდა, როგორც ყოველთვის ხდებოდა. იგი ფხიზელი იყო, დიახ, ოღონდ ირონია აღარ ეტყობოდა. ფხიზელი იყო და დუმდა. ქუჩის სინათლემ გაანათა ოთახის ჭერი, ჭერმა კი ოთახს



მოჰფინა შუქი, როცა საოპეროდ გამოწყობილმა მამაკაცმა ქალის უცხო სხეული შეიგრძნო. მამაკაცს საოპერო ლაქის ფეხსაცმელები და თეთრი პერანგი ეცვა, ჰალსტუხი ეკეთა, საათი მაჯაზე შერჩენოდა. სათვალე ქალმა თვითონ მოხსნა და ახლა მისი უცხო ბაგეებიდან ღიმილს თითქმის კითხულობდა. ერთმანეთს მოყირჭებამდე რომ არ იცნობდნენ, ეს მშვენიერი იყო.

ზუსტად ათ საათზე გაიღო მუზეუმი.

მან იმ ბავშვივით დახუჭა თვალები, რომელმაც თქვა, თვალებს იმიტომ ვხუჭავ, ღამის წყვდიადი თვალში არ ჩამივარდეს და არ დამაბრმავოს... ახლა იგი შუშისჭერიან დარბაზში იჯდა მერხზე... საბარგო სადგურიდან სტვენის ხმა მოდიოდა. ის სადგური თვალთ არ უნახავს, ესმოდა პატარა ორთქლმავლის ქშენა, ბუფერების დგანდგარი, სტვენა, სტვენის ექო, შემდეგ კვლავ სატვირთო მატარებელი მიგრუხუნებდა ღერძის ჭრიალ-ჭრიალით, ისრებზე გადასვლისას ისმოდა ბორბლების დაგა-დუგი, სტვენა, მუხრუჭების ღრჭიალი, სტვენის ექო, ისევ ბუფერების დგანდგარი, შემდეგ სიჩუმე ჩამოვარდებოდა და მერე ისევ ისმოდა ქშენა. ასე გრძელდებოდა მთელი ღამე. რომ გამოეღვიძა, სტვენა ვეღარ გაიგონა და ვერ გამოერკვა სად იყო, აღარც მტრედების ღულუნი ისმოდა, აღარსად ჩანდნენ მტრედები, აღარც თეთრი და აღარც ნაცრისფერი მტრედები, ერთი მტრედიც კი არსად ჩანდა. იგი შუშისჭერიან დარბაზში იჯდა, სადაც კუსტოსი სცემდა ბოლთას და მას უთვალთვალეობდა.

ასე სახალხოდ სძინებია.

ამან შეაძრწუნა.

ალბათ სულ ორი ან სამი წუთით თუ ჩამოეყვინთა, ისე როგორც მატარებელში ან თვითმფრინავში ჩაეძინება კაცს, იდიოტივით პირდაღებულს, სახე-მომჩვარულს. ეტყობა, დარბაზში ხალხმა გაიარა, ჯგუფი იქნებოდა ექსკურსიამძღოლთან ერთად; ისმოდა ხმები... ღამე და ქალის ღამეული სხეული როდი ეჩვენებოდა სიზმრად, სიზმარში ახლა ეგონა თავი, ამ შუშისჭერიან დარბაზში, ხოლო მტრედების ღულუნი გონებაში თითქოს შორეულ მოგონებად ჩარჩენოდა. სინამდვილედ მხოლოდ იმას აღიქვამდა, რომ მის პატარა სხეულს ვეღარ გრძნობდა გვერდით, თვითონ კი იდგა გულხელდაკრეფილი, ქალაქის ხმაური შორიდან ჩაესმოდა ტალღების ღულუნივით, ჩაესმოდა ყრუდ, მონოტონურად და გრძნობდა, რომ ის ტალღები მწვანე იყო. იქნებ კუსტოსს ის ეხამუშებოდა, მუზეუმში ამ დილაადრიან შემოსულ კაცს შავი კოსტუმი რომ ეცვა და თან საყელო ჰქონდა წამოწეული. ნამდვილად ასე იქნებოდა! საყელო ჩამოუშვა.

თავს ძალა დაატანა და წაიკითხა წარწერა:

„ჰერმესი. დაახლ. მესამე საუკუნე ქრისტეს დაბადებამდე. ნაწილობრივ აღდგენილია, შეცვლილია მარცხენა ფეხი და ყელი. თავი (ორიგინალი) ასე ედგა თუ არა, საბოლოოდ არ არის დადგენილი“.

ჰერმესის თავს კარგად დააკვირდა.

სამშაბათი იყო.

ვერ მიმხვდარიყო, მაინც რა ინავლებოდა საათიდან საათამდე, მაგრამ იმას კი გრძნობდა, რომ მისი მოგონებები ნამდვილად არსებულ ქალს შორდებოდა და გული ეტკინა. თუმცა შვებაც იგრძნო, რომ მის თავისუფლებას საფრთხე აღარ ემუქრებოდა. საფუღე ამოიღო, თვითმფრინავის ბილეთი ხომ არ



დამკარგვიაო. ბილეთი აღმოაჩნდა. 18.40 აეროდრომზე უნდა ყოფილიყო. მანამდე საქმე არაფერი ჰქონდა. მეხსიერებას მხოლოდ ისეთი ნიშნები შემოენახა იმ ქალისა, რომელიც მის არსებას დაპატრონებოდა, ადამიანის საძებრად გამოქვეყნებულ განცხადებაში რომ არის ხოლმე ჩამოთვლილი. ეს ნიშნები ყოველმხრივ ზუსტია, მაგრამ იმ განცხადებასავით უმაქნისია და არაფრისმთქმელი, თუ მოსაძებნი პიროვნება გვერდით არა გყავს: აქვს ასეთი და ასეთი თმა, აცვია ყვითელი კოსტუმი (ოღონდ ეს ნაშუადღევს იყო ბარში, საღამოს თეთრი კოსტუმი ეცვა), უჭირავს შავი ხელჩანთა, ლაპარაკობს ძლივს შესამჩნევი აქცენტით, ეტყობა, ელზასელია, ასაკი — დაახლოებით ოცდაათი წლისა, ტანკენარია...

კუსტოსი წავიდა.

ხანდახან ისევ ისმოდა ხმები, შუშისჭერიან დარბაზში ვილაციები შემოდინდნენ და გადიოდნენ, ხანგამოშვებით შუშის სახურავის თავზე თვითმფრინავის გუგუნის ისმოდა, გარეთ მზე ანათებდა, მაგრამ უცხო ქალაქის ცაზე ღრუდადრო ღრუბლები მიცურავდნენ. ღრუბლების გადავლას იმაზე შეატყობდით, რომ დარბაზში ჯერ უეცრად ჩამოწვებოდა ნაცრისფერი ბინდი და მარმარილოს სიგლუვე ემატებოდა, შემდეგ კი კვლავ განათდებოდა იქაურობა და მარმარილოც ხოშორა ხდებოდა...

რატომ არ გადიოდა სხვა დარბაზებში?

იჯდა მარტო ამ ვეებერთელა შუშისჭერიან დარბაზში და ხელი ზურგსუკან ისე დაეხინა, თითქოს იმ საკამათო მარმარილოს ქანდაკების ჰვრეტით ყოფილიყოს გართული. ამდენ ხანს ისევ იმ რბილ მერხზე იჯდა. უეცრად ეულად იგრძნო თავი, მაგრამ მასთან დასარეკად არ წასულა. იცოდა რა მოჰყვებოდა ამას. დადგება დღე, როცა ერთმანეთს ჰკითხავენ, თუნდაც მხოლოდ ასე: რას აკეთებდი გუშინ საღამოს? მე სამჯერ დაგირეკე. სად იყავი? ეს კითხვა ჯერ კიდევ უწყინარია და შენს თავმოყვარეობას ელამუნება, ადამიანი მართლა კი არ ჩაგეძიება, ამით გეუბნება, ძალიან მომენატრეო...

ახლა კი წამოდგა ფეხზე.

ვინძლო მომავალს არ ჩავარდნოდა ბრჭყალებში...

სასაცილოა: ვდგები, ვჯდები, ვეწევი, ვდგავარ, მძინავს, ვიღვიძებ, ვდგები, მივდივარ, ვჯდები, ვდგები. გარეთ კვლავ ღულუნებენ მტრედები...

ტაქსს ხელი დაუქნია.

ლამით თითქმის არ უძინიათ, მაგრამ ერთმანეთს კანტი-კუნტად ეხმიანებოდნენ, რომ სიტყვებითა და სახელებით გარესამყარო არ მოეშვათ ახლოს. განა სდუმდნენ, არა, მაგრამ ისე ჩურჩულებდნენ; თითქოს მხოლოდ ისინი არსებობდნენ ამჟამად, თითქოს არ არსებობდა არავითარი „მანამ“ და არავითარი „შემდეგ“, არ არსებობდა არც ერთი სახელი, არსებობდნენ მხოლოდ თვითონ და თვითონაც უსახელონი იყვნენ.

საათმა თერთმეტჯერ ჩამოჰკრა.

11.30 დანიშნულ თათბირზე წასვლა არ უნდოდა. სასტუმროში ოთახის გასაღებთან ერთად ბარათიც მიართვეს. ვისგანაა? ბარათი და გასაღები ასე წყვილად და თან იდუმალი სახით რომ მიაწოდეს, ქალის მაგიერ შეურაცხყოფილად იგრძნო თავი. ხომ შეიძლებოდა წუხელ მამაკაცების საზოგადოებაში გაეთია ღამე? ბარათში ეწერა, რომ მისთვის ქალს დაერეკა და ეთხოვა, დამირეკოსო. დაეტოვებინა თავისი ტელეფონის ნომერი, სახელი და გვარი.



წუხანდელი ღამე მის მკლავებში რომ გაატარა, ახლა ეს სახელი უსიამოდ მოხვდა გულზე. უფრო მეტიც. ბარათი ლიფტში გახსნა და კითხვაში თავისი სართულიც დაავიწყდა და ოთახის ნომერიც, მაგრამ დამირეკეო, ეს თხოვნა მისთვის სიტყვის გატეხას; უსინდისობას, ორგულობას ნიშნავდა. თვითონ წუხანდელი ფიცი არ გაუტეხავს, ეს იყო ერთადერთი რამ, რაც მათ აერთიანებდა, ქალი კი ამ ფიცის გატეხით მთელ ქვეყანას შერწყმოდა ისევ. ასეთი გრძნობა შეჰყვა თავის ოთახში. გაფრენამდე უნდოდა გამოეძინა. იმედგაცრუებული მასთან დარეკვას არ აპირებდა. შავი ლაქის ფეხსაცმელები გაიხადა და იმედის გაცრუებისაგან უეცრად მოერია დაღლილობა, თუმცა ცოტა კიდევ უხაროდა, იმედი რომ გაუცრუვდა. ეს გრძნობა თავისუფლებას ანიჭებდა — ახლა ისიც იმ უსახელო ქალების რიცხვში ითქვიფებოდა, მხოლოდ მამაკაცი რომ სჭირდებოდათ ხოლმე. ბარათი მხოლოდ ახლა წაიკითხა. გულდასმით, რათა ერთხელ კიდევ დასწყვეტოდა გული და მასზე აღნიშნული დრო შეამჩნია — 19. 10. თავის შეცდომას მიხვდა — ეს თხოვნა გუშინდელი იყო. ამ ამბავმა ხელახლა თავდაყირა დააყენა ყველაფერი. დრო გამოთვალა — 19. 10, გუშინ ამ დროს სწორედ მისკენ მიეშურებოდა. ამ ბარათში რომ ქალის თხოვნა ეწერა; ის ქალი ამ სახით აღარ არსებობდა და არც არასოდეს იარსებებდა. ეს იყო ყვითელკოსტუმიანი, ნაშუადღევს ცარიელ ბარში ტაბურეტზე წამოსკუპული უცნობი ქალი. ეს მკვდრეთით აღდგომა რაღა საჭირო იყო? ბარათი მოჭმუჭნა და კალათში ჩააგდო და ქალზე კი არა, გული დრო-ჟამზე მოუვიდა. დრო-ჟამი ყველგან და ყოველგვარ წვრილმანებში იჩენდა თავს, დრო-ჟამმა რომ არ გაგვასწროს, არ იქნება, იგი ყოველ წვრილმანში გვახსენებს თავის წარმავალობას. შავი კოსტუმი ჩემოდანში ჩადო, მომჩვარული სახელოები გულზე მიცვალებულივით დაუკრიფა, ზემოდან შავი შარვალი დაადო, მერე საწოლის კიდეზე ჩამოჯდა, საათი მაჯიდან მოიხსნა და ამ დროს კვლავ დაინახა დაჭმუჭნილი ბარათი, ეს იყო ერთადერთი რამ, რაც მისგან დარჩენოდა, საკუთარი ოცნების გარდა. ბარათი გაშალა, გაასწორა და ერთხელ კიდევ შეამოწმა. ეს მისი ხელი არ იყო, მის ხელსაც კი არ იცნობდა. თითქოს ერთბაშად ერთმანეთში აირია ის, რისიც ეშინოდა და ის, რისი იმედიც ჰქონდა და მაინც შემოაწვა ნალველი, რომ მას დღეს არ დაურეკავს, დღეს არ უთხოვია, სასწრაფოდ დამირეკეო, 19. 10 მხოლოდ გუშინ შეიძლებოდა ყოფილიყო. გარეთ, ქუჩაში ისევ დგანდგარებდა პნევმატური ბურღი, მაგრამ მას რომ ყურებში ედგა, ის სიჩუმე იმ ბურღზე უფრო ძლიერად ხმაურობდა. ეს მისი სიჩუმე იყო. საკუთარი სიჩუმე კი არა, რათაც დატკებებოდა, არამედ მისი სიჩუმე. რა მოხდება, ახლა რომ დაურეკოს და დაარღვიოს მისი სიჩუმე? იჯდა და ხელი ტელეფონის აპარატზე ედო. ლოგინი გაშლილი ჰქონდა, მაგრამ ჯერ არ მიჰკარებოდა. ბოლოს წამოვარდა და შხაპს შეუდგა... დღემდე ქალი არ შეხვედრია, პირველივე სიახლოვისას რომ არ დაეჯერებინოს, ამ კაცს ვუყვარვარო, მაგრამ ყოველი ქალი, რომელიც მართლა შეუყვარდებოდა, ადრე თუ გვიან ეტყოდა, ყველა მამაკაცისა არ იყოს, სიყვარულისა შენც არაფერი გაგეგებაო... წყალი თქრიალით დასდიოდა თავზე, ტელეფონმა რომ დარეკა. ერთი წუთით შეყოყმანდა, მერე ყოყმანი დასძლია და ისევ წყალს შეუშვირა თავი, მაგრამ წკრიალი არ წყდებოდა და იძულებული გახდა ყურმილი მაინც აეღო (თქვენ გკითხულობენ, ერთი წუთით, ახლაც შეგაერთებთ). გული აუძგერდა, გამხიარულდა და



ტელეფონმაც დაიჩხაკუნა. ალო? იდგა ადამივით შიშველი, გაწუწული და ელოდა, ტელეფონი როდის დარეკავდა. გულაძგერებულს ენა ჩავარდნოდა. მისი ხმა ველარ წარმოედგინა. ამ წუთში ყოველგვარ ფიცს გასტეხდა, ოღონდ კი ქალი ენახა. ამ დროს შეამჩნია, რომ ფარდები გაწეული იყო და ალბათ გარედან კარგად მოჩანდა, მაგრამ აპარატს მანამდე არ მოსცილებია, სანამ მამაკაცის ხმა არ გაიგონა. ის კაცი, შეთანხმებისამებრ, სასტუმროს ჰოლში უცდიდა.

დიახ, მოვდივარო, მიუგო წყნარად.

ვიქნები თუნდაც განტენბაინი.

წარმომიდგენია:

ჩემი ცხოვრება ვინმე დიდ მსახიობ ქალთან, რომელიც მიყვარს. ამიტომ ვაჯერებ, ბრმა ვარ-მეთქი და ჩვენი ბედნიერებაც ამაზეა დამყარებული. ერქვას მას თუნდაც ლილა.

ქვეყანას წმინდა წყლის სიგიჟედ ეჩვენება, მსახიობი ქალი და ბრმა ბლიცების შუქში რომ ვდგავართ და ხელს ვაწერთ. ხალხი (ამას სახეზე ვატყობ, როცა გვილოცავენ) ჩვენს ცოლ-ქმრობას, დიდი-დიდი, ერთი ზაფხულის ვადას უდებს, ოღონდ ის ვერ გაურკვევიათ, ჩვენს შორის მაინც რომელი იმსახურებს თანაგრძნობას, ლილა თუ განტენბაინი.

ჩვენი თანა ბედნიერი ალბათ წყვილი არ იქნება ამ ქვეყანაზე.

წარმომიდგენია:

ლილა თავიდანვე მატყუებს (თუ მაინცდამაინც გვინდა ეს უსაშველოდ სულელური სიტყვა ვიხმართ), მაგრამ არ იცის, რომ ყველაფერს ვხედავ და ბავშვივით უხარია, როცა აეროპორტში დავხვდები ხოლმე. მე დამხვდურთა ტერასაზე ვიციდი, ჩემს შავ ხელჯოხზე დაყრდნობილი, სათვალეც მიკეთია და ყვითელი სამკლავურიც. იგი ხელს არ მიქნევს, როცა მგზავრების ბრბოში მოაბიჯებს ბეტონის ფართო ბილიკზე, რაღა თქმა უნდა, არც მე ვუქნევ ხელს, რათა სისარულისაგან როლიდან არ გამოვიდე. ვხედავ მამაკაცს, რომელსაც მისი პალტო მოაქვს, ლილა კი აქეთ-იქით იხედება და თან იმ კაცს მკლავზე ეკონწიალება, აი, ახლა კი დამინახა. ვხედავ, რომ ასეა. შემდეგ ისინი ქვევით, საბაჟოში უჩინარდებიან. მე არასოდეს არ ვკითხავ ლილას, ის კაცი ვინ იყო-მეთქი. ლილა ხომ მას არასოდეს ახსენებს ჩემთან, ხოლო მე როლი თუ არ დავთმე, ისე ვერ აფუხსნი, საიდან ვიცი საერთოდ მისი არსებობა. როცა ვეკითხები, ჩემი ლილა მთელი ამ ბარგი-ბარხანის, ჩანთების, პალტოების, ქოლგის, ილუსტრირებული ჟურნალებისა და სხვა ათასგვარი წვრილმანის თრევას როგორ აპირებს-მეთქი, მაწყნარებს, დარდი ნუ გაქვს, ქალს მშველელი ყოველთვის გამოუჩნდებაო. ხანდახან საბაჟოში საქმე ჭიანურდება. ლილა აქ არაფერ შუაშია. მე მიყვარს აეროდრომზე ლოღინი, სიამოვნებით ვუყურებ რეაქტიულ თვითმფრინავებს, სულ ერთია, წვიმს თუ არა, მსიამოვნებს რადიორეპროდუქტორების გრიალი, სამყარო აქ მიზნებითაა სავსე: ვენა, ქაირო, შტუტგარტი, ლისაბონი, კარაკასი, პრაღა, ლონდონი, ნიუ-იორკი... სანამ საბაჟოს მოსაცდელ დარბაზში გავიდოდე, რა თქმა უნდა, ვამოწმებ, ყველაფერი წესრიგში მაქვს თუ არა, სარკესთან მივდივარ და ჰალსტუხს ან მარცხნივ მო-



ვიქცევ ან მარჯვნივ, რათა ლილამ მისალმების პირველი ქარტეხილის შემდეგ კვლავ შესძლოს მისი გასწორება.

რა თქმა უნდა, გულს ბაგა-ბუვი გაუღის.

ლილასთან ერთად სხვებიც უცდიან საბაჟო შემოწმებას, მათაც თავიანთი ცოლები თუ ქმრები ელოდებათ. ისინი მინის ტიხარს იქიდან ცდილობენ მუხურად ლაპარაკს, ასეთი რამ მე და ლილას არ გვჭირდება. ბოლოს და ბოლოს, ლილას ჭერიც დგება. ლილას მძიმე პალტო ყოველთვის ერთსა და იმავე მამაკაცს მოაქვს, მაშინაც ეს კაცი ახლავს, როცა ლილა გათვალისწინებულზე ერთი დღით გვიან მოფრინავს ხოლმე. თავს რაღად იქნევს? ესღა გვაკლია, საბაჟოს ბიჭ-ბუჭა მოხელეებს ბარგი აერიოთ. რა ბედნიერებაა, რომ ვილაც მფარველობს ჩემს ლილას! სხვა მამაკაცებს მხოლოდ თავიანთი საკუთარი ბარგი ენაღვლებათ. ახლა ვხედავ, რომ ისინი ერთმანეთს ეთხოვებიან: ეთხოვებიან უამბოროდ. ვითომ ბოლომდე არ სჯერა ლილას ჩემი სიბრძავე? შემდეგ ის კაცი წინ გამივლის, ლილა კი ამჯერად პალტოთი, ჩანთებითა და ილუსტრირებული ჟურნალებითაა დატვირთული და მასზე უფრო ნელა მოაბიჯებს. ის კაცი გვერდზე რომ ჩამივლის, ყოველთვის სახეს მარიდებს ხოლმე და ამიტომ მის სახეზე ვერაფერს მოგახსენებთ. როგორ მობოროდიკობს ლილა! მე კი შეგებებაც არ შემიძლია — მანეკენივით ვდგავარ, სანამ მის ტუჩებს არ ვიგრძნობ ლოყაზე. მერე ვეუბნები: შენა ხარ? და მის ბარგი-ბარხანას ხელს ვავლებ. რამე ხომ არ დაგრჩა? ლილას იმის დროც კი არა აქვს განზე მოქცეული ჰალსტუხი გამისწოროს. თავის მზიდავს ხომ არ ეძებს? იგი ათ ნაბიჯზე მოგვყვება უკან, მინდა ლილას მზიდავი დავანახო და ვეკითხები, მზიდავი ხომ არ აგიყვანია-მეთქი. არა, ლილას მზიდავის დარდი არ აწუხებს. ფილმის გადაღებებმა როგორ ჩაიარა-მეთქი, ეს კითხვა ნაადრევად მომივიდა, ამაზე მერე ვისაუბრებთ ალბათ. ლილა მთხოვს, ერთი წუთით მომიცადე, ადგილიდან არ დაიძრა, თორემ ველარ გიპოვიო. გაზეთის, მხოლოდ გაზეთის ყიდვა მინდაო. მეც ადგილიდან არ ვიძვრი, მანეკენივით ვდგავარ, მისი პალტოთი და ქოლგით ხელდამშვენებული და ყველას ფეხებში ვებლანდები. ლილას ალბათ რამე დაავიწყდა. იმ კაცს ნამდვილად გაასწრებს ავტობუსი, ჩვენს მანქანში კი ვერ ჩაჯდება, უხერხულია. დავინახე, როგორ შეშინდა იგი, ხელი ჯერ მარცხენა ჯიბეზე იტაცა, მერე მარჯვენაზე, თავი გააქნია. ძებნა განაგრძო, არ ვიცი რას ეძებს. ამ სცენას როგორც ფილმს ისე ვუყურებ: არც თუ დაუძაბავად, ცნობისმოყვარეობაც არ მაკლია. ადამიანს ფილმის დაწყებისას რომ აქვს ხოლმე, იმ იმედით, ან ახლა გაირკვევა რამე ან ახლაო. ყველაფერი ისე ხდება როგორც ფილმში. ეკრანზე ადამიანები მარტონი არიან, მათ ვხედავ, მაგრამ მათთან მაინც არა ვარ. მე მხოლოდ თანაგრძნობა შემიძლია, მაგრამ მაინც გარეშე მეთქმის, მე არაფერი მეხება და ამიტომ არც ვღელავ. ლილას პასპორტი მასთან ხომ არ დარჩა? მე მზიდავზე მეტი მოთმინება მაქვს. სწორად მივხვდი! ახლა ისინი იცინიან. რა თქმა უნდა, ლილას პასპორტი (ჩემთვის ეკითხა) მის საკუთარ ხელჩანთაში დევს. მეც რომ გავიცინო, არ ივარგებს. მზიდავს ამინდის ამბავს ვეკითხები, რომ ყურადღება ჩემსკენ გადმოვატანინო, თავს წინასწარ ვიზღვევ, ვაითუ ლილამ და იმ კაცმა, რომელსაც ახლა მართლა გაასწრო ავტობუსმა, პასპორტის პოვნისაგან გახარებულებმა ერთმანეთი გადაკოცნონ. ჯერ არც ისე თავისუფალი ვარ, როგორც ვისურვებდი. ნამდვილად წამიხდებოდა გუნება, ამ მზიდავს (ანუ საზოგადოებას) ნიშნი



რომ მოეგო, შენზე მეტს ვხედავო. ლილა დაწყნარდა და მკლავში ხელი მომკიდა. ვგრძნობ, რომ ლილა ამ წუთში კვლავ მე მეკუთვნის მთლიანად. იშოვე გაზეთი? ვეკითხები ყოველგვარი ქვეტექსტის გარეშე, მაგრამ იგი ახლა ჩემს წინა შეკითხვაზე მპასუხობს, გაიზელგაშტაიგში რა ამბავი-იყო-მეთქი, რომ ვკითხე. ოხ! ჩვენ ახლა მის მანქანას ვეძებთ. მანქანას კარგად ვხედავ, მაგრამ ლილას თურმე ზუსტად ახსოვს, რომ იგი უფრო შორსა-ჰყავს-დაყენებული და მეც აღარ ვედავები. აქეთ-იქით ვაწყდები, სახემოდუშული მზიდავი სულაც არ არის სიცილის გუნებაზე. აი! ამბობს ლილა, აგერ არა დგას! მე არ ვეუბნები, აი, ხომ ხედავ-მეთქი! ასეთი წვრილმანი ჯიბრიანობაა, დიდ სიყვარულს რომ უთხრის ძირს. შემდეგ მანქანაში ლილა საჭესთან ზის, მე კი ვიცი, რომ უბედნიერესი მიჯნური ვარ ამქვეყნად.

იმედია განტენბაინი არასოდეს დათმობს თავის როლს, ეს როლი მისთვის რწმენას ნიშნავს. რა ნაზი და ალერსიანია ხოლმე ლილა, გასტროლებიდან რომ ბრუნდება! მუხლზე ჩამოუჯდება და გულლიაობაში ტოლს არ უდებს, სიყვარულად იღვრება. რადგან არ არსებობს მზერა, რომელსაც შეეძლო გაეჯიქებინა და მატყუარად ექცია იგი. ასე ბედნიერი არც ერთ მამაკაცთან არ ყოფილა ლილა, არც პირფერობა სჭირდება, რადგან არავინ უთვალთვალეს ეჭვით აღსავსე თვალთ. მერე შავ სათვალეს მხსნის, რომ განტენბაინს თვალები დაუკოცნოს და ვგრძნობ, რა ჭეშმარიტია ეს სიყვარული, რადგან ლილას განტენბაინის მოტყუება არ სჭირდება. ხედავთ, რა ფიანდაზად გაშლა სცოდნია ლილას! სხვასთან ნამდვილად ვერ გავძლებდიო, მეუბნება ლილა და მეც მჯერა. მართალია, ყოველთვის ია-ვარდით არ იქნება ჩვენი ცხოვრება მოფენილი, მაგრამ ასე ცხოვრება მაინც ღირს.

ბრმას თვალში ნაცარს ვერ შეაყრი.

მე ჩემს თვალებს არ ვენდობი.

მის ჩემოდანზე ელვა შესაკრავი მხოლოდ ნახევრადაა გახსნილი და იქედან გადმოცვენილი ნივთები დერეფანში ყრია: სცენარები, წერილები, ფესსაცმელები. ყველაფერი დიდხანს ეყრება ასე, მაგრამ განტენბაინი არაფერს იტყვის. ლილა რომ მაღაზიებს მოივლის, ჩვენი ბინა ქალაქების კალათას ემსგავსება და ვიცი, არც მილაგდება, სანამ განტენბაინი არ აკრეფს კანაფებს და ქალაქებს და არ გადაყრის. თანაც სიტყვასაც არ იტყვის. ლილას ჰგონია, წესრიგი თავისით მყარდება, სწამს, რომ არსებობენ კეთილი შინაური გნომები და განა ეს გულისამაჩუყებელი არ არის?

რას მიქვია წესრიგი!

ვინც სამყაროსთან არ არის შერწყმული, იმას სჭირდება წესრიგი, რომ არ დაიღუპოს. ლილა კი სამყაროსთან შერწყმული გახლავთ.

ლილა ლამაზია. ამას რაღა თქმა უნდა, ბევრი ეუბნება. განტენბაინი თავისებურად ეუბნება, ლამაზი ხარო, თვალებს ხუჭავს, თითებით უვარცხნის თმას და კოცნით უვსებს ლავიწის ღრმულებს.

ლილა სარკის წინ ზის.

— ღმერთო ჩემო, მაგვიანდება, — წუხს ლილა.  
ყელსაბამს ვერ პოულობს.



— რომელი საათია? — კითხულობს იგი.

ლილა დაგვიანებას ვერ მოიშლის, აქ განტენბაინი ვერაფერს გახდება, ლილას ურჩევნია დააგვიანდეს, ვიდრე უყელსაბამოდ გავიდეს გარეთ. ბინა განტენბაინმა დაალაგა ჩუმად და იცის, სადაც არის მისი უელსაბამი.

რაკი ლილა უყვარს, გამოსაჩენ ადგილზე უღებს უელსაბამს და ლილაც პოულობს.

— აი სად ყოფილა! — ამბობს იგი.

ასე გვარდება ყველაფერი.

როგორღაც გვარდება.

წარმომიდგენია:

ზოგჯერ სტუმრები გვყავს. ამ დროს უფრო მიჭირს, რადგან სხვები მაკვირდებიან. მაგალითად, როცა ლილა ვერ ხედავს, რომ საფერფლეები დასაცლელია, რომ სამწუხაროდ, შავ ყავასთან ერთად სუფრაზე შაქრის მოტანა დაგვიწყებია, რომ ჩვენს ძაღლს (ვითომ ძაღლიც გვყავს), რომელიც მაგიდის ქვეშ მოკალათებულა და ხვრინავს, ვერავითარი წვლილი ვერ შეაქვს იმ საკითხის გარკვევაში, ერნსტ იუნგერმა სახე იცვალა თუ არა, მაშინ სიფრთხილე მმართვებს, რომ თავი არ გავცე, არ ავდგე და პირთამდე გავსებული საფერფლეები არ დავცალო. ვილაც ჯოისზე იწყებს ლაპარაკს. მე ძაღლს ვეფერები (ტაქსას თუ დოგს?). ვხედავ, ჩვენი სტუმრები როგორ დაეძებენ თვალთ შაქარს, მე კი ვდუმვარ, რადგან ჩემი ბრმის სათვალის წყალობით არ მიჭირდება ვითვალთმაქცო, „ფინეგანის ალაპი“ მეც წაკითხული მაქვს-მეტი. როდის დასცლიან საფერფლეებს? ვილაცამ ბენი ახსენა, არც ეს გამკვირვებია. კაფკას რიგი უკვე წავიდა. ლილას ფართოდ გაუხელია მშვენიერი, დიდი, ლურჯი თვალები! იგი ვერ ხედავს, ეს შეუპოვარი ვაჟბატონი, ახლა ყოველ სიტყვაზე ბრეჰტის დიად მაგალითს რომ იშველიებს, როგორ გაჭრილი ვაშლივით ჰგავს იმ კაცს, სულ უკანასკნელ ხანამდე რაიხში ლიტერატურის საქმეებს რომ განაგებდა. რა თქმა უნდა, მეც ისე მიჭირავს თავი, თითქოს ამას ვერც მე ვხედავდე. ეს ძნელი ასატანია. დრო ვიხელთე, ავდექი და საფერფლეები დავცალე... შემეშინდა ჩემი საქციელით თავი არ გამეცა, აბა წარმომიდგინეთ ბრმა, რომელიც ხედავს, რომ საფერფლეები დასაცლელია. ლილას შაში არა მაქვს. ლილა ასეთებს უკვე შეჩვეულია. მხოლოდ სტუმრების მეშინია, ისინი ჯერ არ მიცნობენ. სამზარეულოში ვდგავარ, საფერფლეებს ვცლი და გულს ბაგა-ბუგი გააქვს. გარედან მესმის:

— გვითხარით, ლილა, ის მართლა ბრმაა?

— თავგამეტებით ცდილობს, რომ არავინ შეატყოს სიბრმავე, — ამბობს ლილა, — მეც ისე მიჭირავს თავი, თითქოს ვერაფერს ვატყობდე.

— სულ ვერ ხედავს, თუ?..

— პირდაპირ გასაოცარია, — ამბობს ვილაც, — როგორ ხვდება, რომ აკვირდებიან. თვითონ თუ ლაპარაკობს, მხოლოდ მაშინ გრძნობ, მართლა რომ ბრმაა, არა? რომ გაცხარდება, მაშინ ხომ ძალიან ეტყობა სიბრმავე, აი, როგორც ამას წინ გაცხარდა.



(...ლაპარაკი იყო ლიტლ როკზე).\*

— თქვენ მართალი ხართ, — ამბობს ის ბატონი, რომელსაც ახლა აღ-  
მოუჩენია ბრეჰტი, — პირდაპირ გასაოცარია, აქ რომ ზის და თავის ძაღლს  
ეფერება, ისეთი გრძნობა გიჩნდება, თითქოს გაკვირდებოდ.

— ასეა, არა?

— რამდენი ხანია ბრმაა?

— რაც ერთმანეთს ვიცნობთ, — უბრალოდ ამბობს ლილა, — ჯერ მეგონა,  
ხუმრობს-მეთქი. — სიჩუმე. — თქვენთვის არასოდეს მომიყოლია ეს ამბავი?

— არა!

და ლილა ჩვენს ამბავს ჰყვება, რაც დრო გადის, სულ უფრო და უფრო  
თავშესაქცევად ჰყვება და მეც სიამოვნებით ვუსმენ ხოლმე. მით უფრო  
დაწვრილებით ჰყვება ამბავს, რაც უფრო ნაკლებად სარწმუნოა იგი. ჩვენი  
პირველი შეხვედრა კარგ ანეგდოტს ჰგავს: როგორ შემოდის მის საგრიმიო-  
როში განტენბაინი, აღფრთოვანების ნიშნად ხელში ყვავილები უჭირავს,  
მოხუც პირისფარემს რომ არ დაერწმუნებინა, ბრმა არისო, ლილა არც შე-  
მოუშვებდა ოთახში. ლილა ის-ის იყო გრიმს იშორებდა, პერანგისამარას  
მხრებზე პენუარი ჰქონდა მოსხმული. ბრმა? სახეზე ზეთი მესვა და ალქაჯს  
ვგავდიო (ასე ამბობს ლილა ყოველთვის). ბრმაა? — კითხულობს ლილა, მა-  
გრამ სანამ კარგად დაფიქრდებოდეს, ბრმა როგორ შეიძლება იყოს ჩემი თა-  
მაშით აღფრთოვანებულიო, განტენბაინი უკვე კარებში დგას. ბრმები ასეთი  
შეუპოვარნი არიან, იგი ვერ ხედავს, შემოსვლა რომ არ შეიძლება, ვერც პი-  
რისფარემის ღიმილჩამქრალ სახეს ხედავს. დგას თავისთვის, ხელში ვარდები  
უკავია, სამი ცალი ვარდი, და ამბობს, პირდაპირ აღფრთოვანებული ვარო.  
უნდა დაუჯერონ, მეტი რა გზაა. თან სწორედ იმ საღამოს (ამასაც ყოველ-  
თვის ამბობს ლილა) ჩვეულებრივზე უარესად ვთამაშობდი, პირდაპირ საშინ-  
ლად ვთამაშობდიო. განტენბაინმა არ იცის, ვარდებს რა უყოს. ლილა საგრი-  
მიორო სარკის წინ ზის, სახეზე, როგორც ვთქვით, ზეთი უსვია და თმაგაშ-  
ლილ ალქაჯს ჰგავს. მოსულს საცოდავად მოყანყალეებულ საგარძელს სთავა-  
ზობს. პირისფარეში ვარდებს ართმევს ბრმას. განტენბაინი ხელზე ჰკოცნის  
ქალს (ამას ლილა ჩემი თანდასწრებით არ ამბობს ხოლმე) და შემადრწუნებე-  
ლია, თავის შეცდომას რომ ვერც ამჩნევს. შემდეგ ლილა განაგრძობს მოყო-  
ლას, როგორ ზის სტუმარი მოყანყალეებულ საგარძელში და იუნესკოზე ლა-  
პარაკობს ჰკვიანურად. ეს არის პირველი სტუმარი მის საგრიმიოროში, რო-  
მელიც თვალებს კი არ აცეცებს, მხოლოდ და მხოლოდ ხელოვნებისადმი  
იჩენს ინტერესს. ამ დროს ლილა მისი თანდასწრებით ჯერ თმას ივარცხნის,  
შემდეგ კი იცვამს, დიახ, თხუთმეტი წუთის შემდეგ ბრმასთან თავს ისე  
გრძნობ, თითქოს მასთან ჯვარდაწერილი იყო, დასძენს ლილა. ვიღაც ბრი-  
ყვულად იცინის... მე სუფთა საფერფლეები შემომაქვს. სიჩუმეა. ვხედავ,  
როგორ უკვირს ყველას, განტენბაინი საფერფლეებს მაგიდაზე რომ ალაგებს,  
ერთს აქ, ერთს იქ და მათ ფინჯნებს და ჭიქებს კი არ ეჯახება. რატომ არა  
სვამთო, კითხულობს იგი და ცარიელ ჭიქებს ავსებს, განტენბაინს უყურებენ,  
კარგად ვატყობ, ვინ ეჭვით უყურებს და ვინ არა. ვისაც ეჭვს შევატყობ, იმას

\* ლიტლ როკი — არკანზასის შტატის (აშშ) მთავარი ქალაქი, სადაც 1957—58 წ.წ.-ში  
რასისტები გამოვიდნენ იმის წინააღმდეგ, რომ ზანგ ბავშვებს თეატრკანიანებთან ერთად  
ველოთ სკოლაში.



ისე პირთამდე ვულიცლიცებ ჭიქას, რომ სასმელი გადმოიღვაროს. ასეთი ფან-  
დები სულ უფრო და უფრო იშვიათად მჭირდება. ამ დროს ვილაც მუზილზე  
გადადის.

მნიშვნელოვანი გარემოება:  
მე ლილას ხარჯზე ვცხოვრობ.  
მიზეზი:

თითქმის არ არსებობს წყვილი, თუნდაც განშორებისას მაინც რომ არ  
აღმოეჩინოს, ცოლსა და ქმარს შორის ფულის საკითხი ვერასოდეს ვერ გა-  
დაიჭრებაო და გული მწარედ არ სტკენოდეს. აქ ის ბედნიერი წყვილი არ  
იგულისხმება, ცოტა ფული რომ აქვს. ასეთ შემთხვევაში ცოლსა და ქმარს  
შორის არც დგება ფულის პრობლემა. ეს პრობლემა მხოლოდ მაშინ წამო-  
იჭრება, როცა ორივე საკმარისად იღებს ერთის სამყოფ, მაშასადამე, რო-  
გორც ფიქრობენ ხოლმე, ორივეს სამყოფ ფულს. საერთო სალარო, სადაც  
ორივე დებს და საიდანაც ორივე იღებს ფულს, ბევრს შემოუღია, მაგრამ  
დღევანდელ საზოგადოებაში ეს ცდა მარცხით მთავრდება ხოლმე, რადგან სა-  
ზოგადოება, დაწყებული საჩუქრის მომლოდინე პერსონალით და დამთავრე-  
ბული სახელმწიფოთი, უწინდებურად მამაკაცს უშვერს ხელს...

წარმომიდგენია:

ლილა და განტენბაინი რესტორანში არიან, დიახ, ლილა, რომელიც, მა-  
შასადამე, მე მარჩენს. ოფიციანტს მოაქვს ანგარიში. ინებეთ. ვხედავ თეფშ-  
ზე მორცხვად დაკეცილ ანგარიშს და ბრმის როლს ვთამაშობ, ქალივით ვაგ-  
რძელებ ლაპარაკს (ვიქცევი ისე, როგორც ქალები იქცევიან ანგარიშის მო-  
ტანისას), ლილა ამ დროს ხელჩანთას ეძებს და ფულს იხდის, მე კი ენას არ ვა-  
ჩერებ, ვითომც არაფერი მომხდარიყოს. ოფიციანტი ხურდის დასაბრუნებ-  
ლად რომ მოდის, ვეკითხები, სიგარები თუ გაქვთ-მეთქი. ამასაც დრო მი-  
აქვს. მოკლედ, ვსაუბრობთ. ლილა დიდებული ქალია, მამაკაცივით სდუმს,  
ფულზე კრინტსაც არა სძრავს და ამრიგად, მართლა შეიძლება განვაგრძოთ  
საუბარი. მე დიდი-დიდი ერთი კითხვა დამცდეს: დანახარჯი ხომ გადავიხა-  
დეთ-მეთქი. ხანდახან მართლა მეპარება მხედველობიდან ეს მომენტი, რახან  
ანგარიშის გასწორება აღარ მევალება. ლილა თავის ბავშვობის ამბებს მიყვე-  
ბა, მე კი ამ დროს სიგარას ვირჩევ და თან მისი ბავშვობის ამბებს ინტერე-  
სით ვუგდებ ყურს. სანამ სიგარას ბოლოს წავაჭრიდე, ლილა იძულებულია  
ისევ ამოიღოს საფულე და სიგარის საფასური გადაიხადოს, თორემ სიგარე-  
ბის გამყიდველ ბიჭს, ბოლოს და ბოლოს, არაფრად ენაღვლება ლილას ბავ-  
შვობა და აქედან ფეხს არ მოიცვლის. წარმოდგენა არა მაქვს, რა ღირს ჩემი  
სიგარა, მხოლოდ ის ვიცი, რომ მის საფასურს გადაიხდიან, არხეინად ვუგ-  
დებ ყურს, ბავშვობაში კიდევ რა და რა გადახდენია ლილას თავს და თან  
სიგარას ვაბოლებ. ტაქსიდან რომ გადმოვდივართ, ვამბობ ხოლმე: დახე, წვი-  
მას გადაუღია-მეთქი! ლილა კი ამ დროს კვლავ თავის ხელჩანთაში იქექება,  
დანახარჯს იხდის და მასვე აკისრია გადაწყვიტოს, ზედმეტი რამდენი აჩუქოს  
მძღოლს. მე მის ხელს ველოდები. როცა ფოსტას ანგარიშების მეტი არაფე-  
რი მოაქვს, ვამბობ, დღეს ფოსტა საერთოდ არ მიმიღია-მეთქი! ანგარიშებზე  
მხოლოდ მაშინ ვლაპარაკობთ, როცა რაიმე უჩვეულოს წავაწყდებით ხოლმე.  
ბინის ქირა, ტელეფონის, ელექტრონის, გათბობის, ნაგვის გატანის, სატრან-



სპორტო სამსახურის რეგულარული გადასახადები, მოკლედ, ყველაფერი, რაც თვიდან თვემდე მეორდება, არც უჩვეულოა და არც სალაპარაკოდ ღირს, ისევე, როგორც ანგარიშში ჩასაგდებად არ ღირს სიბერის უზრუნველსაყოფი სავალდებულო დაზღვევის შესატანები. თუ ლილა მინ არ არის, მაშინ ფულს უჯრიდან ვიღებ. ლილა ანგარიშს არა მთხოვს, მაგრამ მე მაინც მოვახსენებ ხოლმე, როცა უჯრა დაცარიელდება. ლილა ან შემოფოთდება, ან არა ჩვენს შორის ფულთან დაკავშირებული პრობლემები რომ არ წამოიჭრას, მე არც შემოსავალს ვკითხულობ და არც გასავალს, მაგრამ მაინც მეცოდება ბუნებით ხელგაშლილი ლილა, ხანდახან იძულებული რომაა, ფულის მომჭირნედ ხარჯვაზე იფიქროს. მე პატივს ვცემ მის გრძნობებს. უარს ვამბობ სიგარებზე და უკმაყოფილებას არ ვამჟღავნებ, რადგან ვიცი, არსებობს მოსახლეობის ფენები, სიგარას საერთოდ რომ არ ეწევიან. ლილამ იცის, რომ მე მზად ვარ ყველაფერი მოვიკლო. თუკი მაინც მომიტანს მთელ ყუთ სიგარებს, ხეირიანიც რომ არ იყოს, მაინც მოვწევ. განა ლილამ უკეთ არ იცის, რისი ყიდვა შეგვიძლია და რისი არა? მე რომ უსათუოდ მჭირდება სმოკინგი, ეს ჩემი იდეა არ გახლავთ და სანამდეც შემიძლია, მანამდე გავძლებ უსმოკინგოდ. ისე, სიმართლე თუ გნებავთ, არც იმ სმოკინგის შესაფერი ლაქის ფეხსაცმელები მაქვს. აი, კბილის ექიმთან კი აუცილებლად წასასვლელი ვარ, საჭირო არ არის იმის თქმა, როგორ მაწუხებს ეს ამბავი. ამ საკითხზე საერთოდ არ ვლაპარაკობთ. ჩემი ლილა რამდენს ღებულობს, არ ვკითხულობ. ეს თვითონაც არ იცის ლილამ. მე მხოლოდ იმას ვხედავ, რამდენს მუშაობს და წამდაუწუმ ვუმეორებ, ერთი კარგი არდადეგები არ გაწყენდა-მეთქი. ნამდვილად არ აწყენდა. ლილას რომ დასვენება სჭირდება, ამას ბრმაც კი დაინახავს. ლილა ხან მეტს მაძლევს ჯიბის ფულს, ხან ნაკლებს, მაგრამ იმისთვის მაინც მყოფნის, დაბადების დღეზე ან საშობაოდ ისეთი რამ ვუსახსოვრო, თავისთვის რომ ვერ გაიმეტებდა. ლილას ასეთ დროს ყოველთვის გული უჩუყდება და მე თმაზე ვკოცნი ხოლმე. როცა სხვა ქალთან ვარ (ხომ შეიძლება ასეც მოხდეს), დანახარჯს არავინ მიხდის. თუმცა ასეთ შემთხვევაშიც ჩვენი როლები მთლიანად მაინც არ იცვლება. რაც უფრო დარწმუნებულია ქალი, რომ სხეულით მოვაჭრედ არა თვლი, მით უფრო იოლად გაპატიჟებინებს თავს. ეს ქვეყანა ასეა და ამაზე მეცინება. სხვათა შორის, ეს დანახარჯი მინაზღაურდება — სხვა კაცთან რომ მოხვდება, არც ლილა ამბობს დაპატიჟებაზე უარს. აბა რა სასიამოვნოა ყოველი ფინჯანი ყავის, ყოველი ტაქსის, ყოველი მეგარდერობე ქალის, ყოველი გაზეთის, ყოველი კინოსა და ავტოსადგომის ქირის ყოველი საათის გასასტუმრებლად თვითონ რომ უნდა ჩაიყოს ჯიბეში ხელი. ზოგჯერ ლილა მეცოდება და ვთაღლითობ — უჩუმრად ვიხდი ხოლმე ფულს. ლილა ამას ვერასდროს ვერ ამჩნევს, ის ხომ ნამდვილი ქალია, მერე რა, რომ დამოუკიდებელი ადამიანია. თაღლითობაში ძალიან ღრმად ვერ შევტოპავ, მეშინია, ლილას დამოუკიდებლობის გრძნობა არ წავართვა. ლილამ არ იცის, მე რომ ბანკში საკუთარი ანგარიში მაქვს და და მეც არასოდეს გავუმხელ, თორემ ყველაფერს ბოლო მოეღება. უფრო ნათლად რომ მოგახსენოთ: ჯერ ჩემი ანგარიშიდან საკუთარი დანახარჯი არ გამისტუმრებია. მე ლილა მინახავს. მან იცის ეს და საკმარისია. ჩემი საიდუმლო ანგარიშიდან ისეთ უმნიშვნელო საყოფაცხოვრებო ხარჯებს ვისტუმრებ, სალაპარაკოდაც რომ არ ღირს — ძალღის გადასახადი იქნება ეს თუ შემთხ-



ვევითი ჯარიმები, რომლებიც ლილას გააღიზიანებდა, მანქანისათვის ზეთის გამოცვლა თუ სხვა რამ. ამას დაამატეთ კიდევ საფოსტო მარკები, ათასნაირი შესაწევარი, მათხოვრებისთვის, ბარგის მზიდავებისათვის ნაჩუქარი ფული და ხსნის არმიის შესაწევარი—მოკლედ, უმნიშვნელო ხარჯებს ვისტუმრებ. არ შემიძლია ვუყურო, ქალი იძულებული რომაა მამაკაცივით სულ ჯიბეზე გაიქრას ხელი. პრინციპის დასაცავად ისიც კმარა, რომ ლილა მარჩენს და მმოსავს. ხოლო მე მის სარჩენად და შესამოსად, მისი კოსმეტიკისათვის, მისი და ჩვენი სიამოვნებისათვის თითსაც არ ვანძრევ. ლილა რომ იტყვის, მოდი, დღეს ასთაკვები მივირთვათო, მე მხარს ვუბამ. ვითომ მამაკაცმა რატომ უნდა გადაწყვიტოს, ფუფუნების უფლება როდის შეიძლება მივცეთ თავს? ყოველ ადამიანს სხვადასხვა დროს მოუვლის ხოლმე თავის გალაღების სურვილი და ამიტომ ერთმა მეორეს უნდა აუბას მხარი. ლილა იმ მამაკაცივით უგუნურია, რომელიც დანახარჯს იხდის. მაგრამ ხომ იხდის! ვისაც არაფერი ეხარჯება, ის რომ გამოიჩენს გონიერებას, ყველას გუნება უფუჭდება, მე ამას ვერიდები, თუმცა ყოველთვის არ მეხალისება სხვისი ხათრით ასთაკვების ჭამა. მაგრამ ვინც სხვის კისერზე ცხოვრობს, ის იმ სხვას უნდა დაემორჩილოს კიდევ. მე სხვის კისერზე ვცხოვრობ. ლილას ეს ბედნიერებას ანიჭებს.

ჩვენ მხიარულად ვცხოვრობთ.

კონცერტზე ვხედავ, რომ ქალბატონი ბატისტვინა კიბიდან გვითვალთვალებს და საუბარში ვურთავ: თუ იცი, ჩვენი ბატისტვინა რასა იქმს-მეთქი (ლილას სულ არ აწუხებს ბატისტვინას დარდი), იმედია, აქ არ იქნება! ამის თქმა და ლილა სახელოზე მქაჩავს, მოდი და ნუ გაგეცინება, აგერ არა დგასო? მე ისე ვიცი, ვითომ არ მჯეროდეს და ამასობაში სხვა კიბისაკენ მივემართებით.

ლილას ჩემი მეექვსე გრძნობისა სჯერა. სადღაც წაუკითხავს, ბრმა თავის საკუთარ სახლში გზას ყველა თვალხილულზე უკეთ იგნებსო. ბრმა არც კარის სახელოს ააცდენს ხელს და არც ონკანს. მას შველის სივრცის შეგრძნების უნარი, რომელიც ერთ სანტიმეტრშიაც არ ატყუებსო. ამ შეგრძნების წყალობით ბრმა ანგელოზივით დაფოფინებს ოთახში, არც არაფერს წამოედება და არც არაფერი უტყდება. ეს ამბავი, ცოტა უფრო მეცნიერული ენით ეწერა თურმე ერთ ამერიკულ ჟურნალში. ამის დამწერ პროფესორს ათასზე მეტი ცდა ჰქონია ჩატარებული. ლილამ წამიკითხა ის სტატია და მეც ამ სტატიას ვეყრდნობი. მხოლოდ მაშინ მიჭირს, მოკლე ჩართვის გამო ჩვენი ბინა რომ ჩაბნელდება ხოლმე, მეც ისევე მიჭირს, როგორც ყველა თვალხილულ ადამიანს, რომელიც ვერაფერს ხედავს, რადგან სახლში უკუნეთია გამეფებული. მაგრამ რახან უკუნეთია, ვერც ლილა ხედავს ჩემს გასაჭირს და როცა ბოლოს სანთლით ხელში გამოვეცხადები, კვლავ ანგელოზის სადარი ვარ მისთვის.

წარმომიდგენია:

ლილა კაბას ყიდულობს და განტენბაინი თან უნდა ახლდეს, თითქოს ის რომ გვერდით ეყოლება, კაბას უფრო იოლად აირჩევს და მეც, ერთადერთმა მამაკაცმა, ლამის დავაღამო პატარა, მაგრამ მდიდრულ, მთელი მსოფლიოს გემოვნებიანი ქალებისაგან აღიარებულ მაღაზიაში. ვზივარ კოსტუმებისა და სარკეების ალყაში მოქცეული და იმ სარკეებში ვიყურები, ვხედავ განტენ-



ბაინს, რომელსაც შავი ჯოხი მუხლებშუა უდევს და მუჭი სათვალე უკეთია. ვხედავ, რომ განტენბაინი უფრო დახვეწილა მას შემდეგ, რაც სხვას ვარჩენინებ თავს. ამას ლილას უნდა ვუმაღლოდე, საზოგადოებაში გამოსული ბრმა მამაკაცი. ლილა ახლა მორიგ მოდელს იზომებს, რიგით მეხუთეს, რომელიც განტენბაინის განაჩენს ელოდება, სული კბილით მიჭირავს, ოღონდ მოდელი კი არა, განტენბაინის განაჩენი მაინტერესებს. ამ საქვეყნოდ აღიარებული მაღაზიის მეპატრონე ქალბატონი გამყიდველი როდია, იგი ხელოვანი და თან მეგობარი გახლავთ. მართალია, ცოტა სისქე უშლის ხელს, რომ თავის მუშტრებს ტოლი არ დაუდოს ელეგანტურობაში, მაგრამ მაინც საზოგადოებაში გამოსული მანდილოსანი ეთქმის. იგი ლილას მუშტრად როდი თვლის, როგორ გეკადრებათ, დასავით ექცევა, ისეთ გემოვნებიან და გამოცდილ ქალად თვლის, ვისაც უნარი შესწევს მისი აღტაცება გაიზიაროს. თვითონ კი ტყავიდან ძვრება, რომ დაგვანახოს, მე ხომ სხვა არაფერი მინდა, ოღონდ იმ მოდელით მოგვრილი უანგარო და გულწრფელი სიხარული გამიგოთ, ლილა სწორედ ახლა რომ ჩაიცვამსო. მოკლედ, ეს ქალბატონი, რომელსაც მე ვერ ვიტან, აღტაცებულია განტენბაინით. ყველა კაცი როდი დახარჯავს ამდენ დროს ქალისათვის, გინდა მეუღლე იყოს და გინდა საყვარელიო. მე და ლილას ცოტა არ იყოს გვეხამუშება ჩვენი სიყვარულის ასე სააშკარაოზე გამოტანა. ქალბატონი ახლა ფარდას ხურავს. იგი დარწმუნებულია, მე იმ ფასებს ვერ ვხედავ, ლილა ვითომ ჩემგან დაფარულად ბანკნოტების მთელი დასტით რომ ანაღდებს. ეს ქალბატონი იჩემებს, ადამიანებს კარგად ვიცნობო და წარმოდგენა კი არა აქვს, ვინ ვის ინახავს. ამიტომ მის თვალში მე არა მართო ყველაზე მომთმენი, არამედ ყველაზე დიდსულოვანი კაციც ვარ მათ შორის, ვისაც კი ოდესმე თამბაქოს ბოლით შეუმჭვარტლავს მისი პატარა, მაგრამ მდიდრული მაღაზია, რომელიც რა თქმა უნდა, ატელიედ ან Boutique<sup>1</sup>-დ არის მონათლული. სანამ ლილა ფარდის უკანაა, გამყიდველი ისე მექცევა, თითქოს ბრმა არ ვიყო. აი ნახავთ! — მეუბნება იგი და ჩემთვის ერთი ფინჯანი ყავის მოსატანად მოპირდაპირე კაფეში აგზავნის მსახურს, რომ აღტაცების უნარი არ მომიჩლუნგდეს. აი, ნახავთ! რა ქნას, ეს მისი ამოჩემებული ფრაზაა. მაგრამ ფარდის უკან ლილასაც რომ ისევე უჭირავს თავი, ვითომ მთელი ეს სანახაობა მხოლოდ და მხოლოდ ჩემი სიამოვნებისათვის იყოს მოფიქრებული?! ყავას ვწრუპავ და ისე ვზივარ, ვითომ ფაშა ვიყო, მთელი ჰარამხანისათვის ვყიდულობდე ტანსაცმელს და ლილა მხოლოდ მანეკენობას მიწევდეს. წინ მიდევს აბრეშუმის ნიმუშებით გამოტენილი უზარმაზარი ალბომი და არ ვიცი, რა მოვუხერხო. ჩემს სიბრმავეში არავის ეჭვი არ ეპარება, პირიქით, მხოლოდ მაგრძნობინებენ, ხომ ხედავთ, მაინც ანგარიშს გიწევთო. რა თქმა უნდა, სათვალეს არასოდეს არ ვიხსნი. როცა საჭიროა, სათვალიდან აღმაცერად ვიყურები და ქსოვილის ფერს ვარჩევ. ასე ყურებას დიდხანს ვერ ვუძლებ, თავბრუ მეხვევა და ამიტომ სათვალიდან მხოლოდ გადამწყვეტ წუთებში ვიჭყიტები.

— იცი, გადავწყვიტე, ეს კოსტუმი ვიყიდო, — მეუბნება ლილა.

— ძალიან კარგი.

— დარწმუნებული ვარ, არ ინანებთ, — ენას ატარტალებს ქალბატონი, —

<sup>1</sup> მაღაზია, სადაც იყიდება მხოლოდ ერთ ეგზემპლარად დამზადებული ნივთები (ფრანგ.).



ხომ გითხარით, ეს კოსტუმი დიორთან ვნახე თუ არა, მაშინვე თქვენ გამახსენდით, მაღამ განტენბაინ...

ახლა კი გამოვიჭყიტე სათვალღიდან.

— აბა, ვის უნდა ეცვას ეს კოსტუმი, თუ არა თქვენ, მაღამ განტენბაინ! — მესმის ქალბატონის ხმა, — აი, საყელო კი, როგორც გითხარით...

ჩემი აზრით, კოსტუმი არ ჩაიცმევა.

— იცი, გადავწყვიტე, ეს კოსტუმი ვიყიდო, — მიმეორებს ლილა.

განმეორება იმის ნიშანია, რომ ლილა მტკიცედ ვერა დგას თავის აზრზე და შველა სჭირდება. ლილას აქვს გემოვნება, მაგრამ ყოველი ადამიანის მსგავსად ჩამომავლობაც აქვს. ვთქვათ, ლილა ბანკირის ქალიშვილია. რა თქმა უნდა, მაშინ ყოველნაირი საყელო შეაკრთობს, რომელიც მეტისმეტად დააქალებდა და ყოველთვის სისადავეზე ეჭირებოდა თვალი. ანდა, ვთქვათ, ლილა ელზასელი მეწვრილმანის ქალიშვილია. მაშინ უხდება თუ არ უხდება, ყველაფერს დარბაისლურს დაეხარბება და გადამწყვეტ მომენტში ფერების გარჩევის უნარსაც დაკარგავს. ჩემი ვალია, ლილას მივეშველო. უყვარს თუ არა ლილა ბატონ დიორს, რომელმაც ეს მოდელი მაინცდამაინც მისთვის შექმნა, არ ვიცი. მე კი მიყვარს ლილა, ბანკირის ქალიშვილი იქნება იგი, მეწვრილმანის თუ პურიტანელი მღვდლისა, ეს უკანასკნელიც შეიძლებოდა წარმოგვედგინა. მე ვეუბნები:

— ძალიან კარგი.

— იცი, მხოლოდ შემოტეხვა სჭირდება...

ქობაზე ქინძისთავეს აბნევენ.

— ყვითელია? — ვეკითხები მე.

— არა, — მპასუხობს ლილა, — ღვინისფერი.

ქალბატონი, დაიკო, ხელოვანი იძულებულია ქვედატანის შემოსატეხად ჩაცუცქდეს და თვითონ კაბა ლამისაა შემოსაკდეს ტანზე. იგი აღფრთოვანებულია, თურმე ნუ იტყვით, ჩემს ლილას პირდაპირ ხატავს ეს კოსტუმი, მე ვხედავ, რომ ლილა ქინძისთავეების შიშით ძლივს ინძრევა, მაგრამ მაინც ცდილობს სარკისაკენ გააპაროს თვალი და ყველა ქინძისთავის ჯიბრზე დაიჯეროს დაუჯერებელი.

— ღვინისფერია? — ვეკითხები მე, — ბურგუნდული ღვინის ფერი?

— ჰო, ასე ვთქვათ.

— ჰო, ეს ფერი გშვენის, — ვამბობ მე.

ძნელია ბრმა კაცის ცოლობა!

— მართლა ბურგუნდული ღვინისფერია, თუ? — ვეკითხები მე.

ბრმა განტენბაინი იხსენებს სხვადასხვა წითელ ფერს, მისი აზრით ლილას ღია წითელიც მოუხდებოდა და ნაზი აგურისფერიც, დაშვენდებოდა მუქი წითელიც, აი, დამჭკნარი ვარდი რომ არის, ისეთი, ოდნავ ჩაბინდული, თუ რაღაც ამდაგვარი. მას ვითომ უყვარს წითელი ფერი. მოაგონდებოდა ერთადერთი წითელი ფერი, რომელიც არ მოუხდებოდა ლილას: წყალწყალა, ყალბი, ქიმიური, ლიმონათისფერი წითელი. სიჩუმე ჩამოვარდა. მოაგონდებოდა, რომ წითელია სისხლი, წითელია განგაშის ფერი, წითელია თუნდაც აფეთქების ადგილზე გამოკიდებული ალამი, წითელია თევზის პირი, ამომავალი ან ჩამავალი მთვარე და მზე, წითელია ცეცხლი, წითელია ცეცხლში გავარვარებული რკინა, ხანდახან მიწაც წითელია და დახუჭული ქუთუთოებიდან დანახული ღლეც,



წითელია ტუჩები, წითელია კოროს ყავისფერ, მწვანე და რუხ პეიზაჟებზე დახატული ლეჩაქი, წითელია ჭრილობები, ყაყაჩო, სირცხვილი და მრისხანება, ბევრი რამ არის წითელი. პლუში თეატრში, ასკილი, რომის პაპი, კორიდაზე აფრიალებული ქსოვილი, ეშმაკიც წითელი იქნება ალბათ, მწვანე ფერიდანაც წითელი ფერი გამოსჭვივის, დიახ, წითელი ფერთა ფერია განტენბაინი-სათვის!

კაბა შემოტეხილია.

— იცი, ეს ლიმონათისფერი წითელი არ არის, — მეუბნება ლილა.

მე სიგარეტს ვეწევი და ვიცდი.

— არა, — ამბობს ქალბატონი, — ღმერთმა დაგვიფაროს!

მე ვეწევი და ვიცდი.

— იქნებ მაინც ლიმონათის ფერია? — ეკითხება ლილა ჩაცუცქულს და თან სარკეში იყურება.

— არა, რას ბრძანებთ!

სარკეში ვხედავ, როგორ გაფაციცებულია ლილა.

— შეგიძლიათ მშვიდად ბრძანდებოდეთ, — მოუთმენლად გადმომძახის გამყიდველი (იგი ყველა მამაკაცს ბრმად თვლის), — შეგიძლიათ მშვიდად ბრძანდებოდეთ, — ახლა ლილას მიმართავს იგი, — ბატონი აღფრთოვანებული დარჩებოდა, თქვენი დანახვა რომ შეეძლოს.

ვინაიდან ბრმა ვალდებული არ არის აღფრთოვანდეს, მე კითხვებს ვუსვამ ლილას და ისიც მტკიცედ მპასუხობს. ოღონდ ასეთ სიმტკიცეს სარკეში ვერ იჩენს.

მაგალითად, მე ვეკითხები:

— მეტისმეტად სადა ხომ არ არის?

კოსტუმში კი მეტისმეტად გადაპრანჭულია.

— არა, — მეუბნება ლილა, — სწორედ მაგას ვერ იტყვი.

მე ვეწევი.

— თუ შეიძლება, ერთხელ კიდევ მოვიზომებ ყვითელს... — ხმადაბლა ამბობს ლილა.

იქნებ ლილამ უკვე დიდი ხანია იცის, რომ ბრმა არა ვარ და ამ როლს სიყვარულის გამო მანებებს?

წარმომიდგენია:

ლილა პალტოგაუხდელი შემოდის სცენაზე. მიმდინარეობს რეპეტიცია. ლილა ლედი მაკბეტის რეპეტიციებს გადის. მე ჩაბნელებულ ლოჟაში ვზივარ, ფეხები წინა სავარძელზე მიწყვია და ესპანურ თხილს ვაკნატუნებ. ნაჭუჭები იატაკზე რომ არ დავყარო, თხილს პიჯაკის ჯიბეში, ესე იგი ბრმად ვამტვრევ. ნაჭუჭები ჯიბეში მიგროვდება და ნაჭუჭების გროვაში თხილის ამოძებნა სულ უფრო და უფრო საინტერესო ხდება. დირექციამ, დიდი სიამოვნებით არა, მაგრამ მაინც დამართო რეპეტიციაზე დასწრების ნება. სამაგიეროდ, ლილას, რომელსაც ამ თეატრში ყველაფერი გაუდის, ალბათ სხვა რაიმეზე ეტყვიან უარს. ალბათ დირექციას უკვირს, ამ ბრმა კაცს რა მინდა რეპეტიციაზე. ეს ლილამ ისურვა. მისი აქ ყოფნა მეხმარებაო, ამბობს იგი... ამგვარად: პალტოგაუხდელმა ლილამ სცენაზე გაიარა, ისე მიესალმა ყველას და ისე მიიღო საპასუხო სალაში, ვითომც არ დაეგვიანებინოს. როგორ ახერხებს ლილა ამას, არ ვიცი.



ჩვენ თითქმის დროზე მოვედით თეატრში, ლილამ ისევ ვერ იპოვა თავისი საათი და მეც აღარ გამოვეუჩინე, რომ ერთხელ მაინც მოვსულიყავით დროზე. ალბათ მსახიობების შემოსასვლელ კართან რომ მივიდა, მაშინ მიხვდა, არ დამიგვიანიაო, მერე ან კიბეზე შეჩერდებოდა ან კარისკაცთან წერილებს მოიკითხავდა, არ ვიცი, ეს კია, რომ ლილამ მაინც მოახერხა დაგვიანება. ჩვენ ვიცდით, რეპეტიციის წინ სიჩუმეა დარბაზში, სცენის სიღრმიდან ჩაქუჩის კაკუნის ისმის. სიჩუმეა. რეჟისორი პულტთან დგას და თანაშემწეს რაღაც საჭირო, მაგრამ არა საშურო საკითხზე ეთათბირება. ეს აუცილებელია, რათა არც მას და არც მომლოდინე მსახიობებს არ გაუჩნდეთ გრძნობა, რომ მხოლოდ და მხოლოდ ლილას ელოდებიან. იგი საცაა გამოჩნდება, მან ხომ გაიარა სცენა, იგი უკვე თავის საგრიმიოროშია. სიჩუმეა. შემდეგ რეჟისორის ლანძღვა-გინება აღწევს ჩემს ლოჯამდე. ლილა განზრახ როდი აცდევინებს ხალხს, თანდაყოლილი ნიჭი აქვს ასეთი. ისინი იცდიან. ლილასათვის რომ მეთქვა რაც გავიგონე, არ დამიჯერებდა. მას არასოდეს მოუსმენია ასეთი ლანძღვა-გინება, პირიქით, ლილა შემოვა თუ არა, ყველანი მოჯადოებულებივით შესცქერიან და ფარ-ხმალს ჰყრიან. მაშასადამე, მე ვიცდი და კვლავ ესპანურ თხილს ვაკნატუნებ, რადგან ლოჯაში მოწევა აკრძალულია, თხილს ვაკნატუნებ და ვიცდი...  
 ლედი მაკბეტის გამოსვლა.

ლედი მაკბეტს ჯემპრი აცვია, მაგრამ მისი გჯერა...

მართალია, განტენბაინი ვერ ჩაერევა საქმეში, როცა რეჟისორს სულელური იდეა მოსდის თავში — არც ერთი რეჟისორი არ მიიკარებს ბრმის სიტყვას — მაგრამ მე მაინც ვეხმარები ლილას, საიდუმლოდ, რეპეტიციის შემდეგ.

მაგალითად:

რეჟისორს საერთოდ მახვილი თვალი აქვს, მაგრამ ამჯერად თავში მოსდის სულელური იდეა: ლილა ზედ რამპასთან მიჰყავს, როცა ის მოლანდებულ სისხლს იწმენდს ხელებიდან. გადაწყვეტა ახლებურია, გეთანხმებით, მაგრამ არაფრად არ ვარგა. მიკვირს, რეჟისორი ამას რომ ვერ ხედავს და კვლავ ჩემს ესპანურ თხილს ვაკნატუნებ, ლილა კი რეჟისორს ემორჩილება. ესე იგი, ზედ რამპის კიდეზე დგას... რეპეტიციის შემდეგ სადილზე ვეკითხები, რატომ ამოიღეს-მეთქი ექიმი და გადია, რომლებიც შექსპირს გამოყვანილი ჰყავს ამ ცნობილ სცენაში? ეს კითხვა შეიძლება ბრმამაც დასვას, რადგან ექიმისა და გადიის ხმა არ გამიგონია. მართალია, მათ სათქმელი ბევრი არა აქვთ, მაგრამ იქვე დგანან, სანამ ლედი ბოდავს გაშმაგებული. ისინი სწორედ იმიტომ ამოიღეს, რომ სათქმელი ბევრი არაფერი აქვთო, მესმის პასუხად. ამ საკითხზე მე რას ვფიქრობ, ამის გამოთქმა ძნელი არ არის, მაგრამ როგორ გინდათ განტენბაინმა (ისე, რომ არ გამოამყლავნოს, რასაც სხვა ხედავს, იმას მეც ვხედავო) თავისი შთაბეჭდილება გაუზიაროს ადამიანს, ვინც იდეებს დაუბრმავებია და სწორედ ამ წუთში ფილე-მინიონს მიირთმევს? თავი რომ არ გავცე, ოფიციალტს ვეკითხები, ფილე-მინიონი თუ გაქვთ-მეთქი... შემდეგ რეპეტიციაზე, როცა ჩემი ლედი კვლავ გამოდის სცენაზე, შანდალს ზედ რამპის კიდეზე დგამს და ხელებს იბანს არა ექიმისა და გადიის თანდასწრებით, რომლებიც შექსპირმა მალულ მოწმეებად გაიარა, არამედ ხელებს იბანს მხოლოდ და მხოლოდ მაყურებლის წინაშე, მე თვალებს ვხუჭავ და ჩემს შთაბეჭდილებას ისე ვამოწმებ. განსხვავებას აშკარად ვგრძნობ. როცა ლილა სახლში სწავლობდა როლს და



არ იცოდა, რომ განტენბაინი გადიასა და ექიმივით მალულად უსმენდა, იგი თავის შიშთან მარტოდ დარჩენილი ადამიანივით მეტყველებდა და შემადრწუნებელ შთაბეჭდილებას ახდენდა ჩემზე. ახლა კი ვუსმენდი და - ესბანურ თხილს ვაკნატუნებდი არხეინად. იგივე ტექსტია, იგივე ხმა და მაინც ის არ არის. იმიტომ, რომ იგი ახლა რამპასთან დგას, არც ექიმი უგდებს ყურს და არც გადია, რომლებსაც გონდაკარგული ქალი ვერ ხედავს, იგი მარტო დგას რამპასთან და მას კრიტიკა და მაყურებელი უგდებს ყურს. ეს ლილას უნდა ვუთხრა. შენ ოქსფორდელთა ჯგუფის<sup>1</sup> წევრივით მეტყველებ, რომელსაც თავისი სულიერი ტანჯვა საზოგადოების წინაშე ნომრად გამოაქვს და მაყურებელს მთქნარებას ჰგვრის-მეთქი, ვეუბნები ლილას შესვენებაზე. ამ დროს რეჟისორიც გვიახლოვდება და ლილას აწყნარებს. რეჟისორსაც ვეკითხები, თქვენც ხომ არ გეჩვენებათ, რომ ლილა ოქსფორდელთა ჯგუფის წევრი ექსპიბიციონისტი ქალბატონივით მეტყველებს და მისი ხმა ისე ისმის, თითქოს ზედ რამპის კიდეზე იდგეს, დიახ, ზედ რამპის კიდეზე...

ისინი ხანდახან სცვლიან ხოლმე მიზანსცენებს.

ოღონდ განტენბაინს არაფერს ეუბნებიან: უნდათ მისი სმენა შეამოწმონ... რეპეტიციის შემდეგ მუდამ მსახიობების გამოსასვლელ კართან ვიცილი შავ ჯოხზე დაყრდნობილი და თავი ისე მიჭირავს, თითქოს საქვეყნოდ ცნობილ მსახიობებს არ ვიცნობდე, თავიდან ისინიც ისე ჩამივლიდნენ, თავსაც არ დამიქნევდნენ. უპატივცემლობის გამო არა — ბრმისათვის რა მნიშვნელობა აქვს, თავს დაუქნევენ თუ არა? დიდი-დიდი, რომელიმეს გვერდით ჩავლისას ეთქვა, თქვენი მეუღლე ახლავე გამოვაო. რა აქვს მსახიობს ისეთ კაცთან სალაპარაკო, ვისაც იგი არასოდეს უნახავს სცენაზე? შემდეგ შემეჩვივნენ და თავს მიკრავენ, მაგრამ სამწუხაროდ, როლიდან გამოსვლის შიშით, მე ვერ ვპასუხობ სალამზე. ვდგავარ საფრთხილობელასავით, სალამზე პასუხს არ ვიძლევი, მაგრამ იმას კი კარგად ვამჩნევ, როგორ იზრდება მათი მოწიწება, მოწიწება უფრო ჩემი სმენის წინაშე. ერთხელ ერთი მსახიობი გამომელაპარაკა და მკითხა, მესამე აქტში, შეთქმულნი შვიდი მეტრით რომ აღარ არიან დაცილებულნი ერთმანეთს, ეს სცენა მართლა უფრო ბუნებრივად ხომ არ ჟღერსო. ეტყობა, ლილას წამოსცდა ჩემი ნათქვამი. იგი თავს მაცნობს:

— მე მაკდუფი გახლავართ.

— დიახ, — ვეუბნები მე, — დღეს ეს ადგილი სხვაგვარად ჟღერდა.

— ხომ ხედავთ? — ამბობს მაკდუფი.

— თქვენ როგორ გგონიათ, — მეკითხება მეორე და ვხედავ, რომ იგი მხოლოდ და მხოლოდ ბრმა განტენბაინს მიმართავს, — როგორ გგონიათ, გაცილებით უკეთესი არ არის, უკეთესი კი არა, უფრო სწორი არ იქნება, რომ მან, — იგი მესამე მსახიობზე მითითებს, — კუდიანებს არ შეხედოს, რადგან კუდიანები მხოლოდ მე მეჩვენება?

მე ხმას არ ვიღებ.

— თუ თქვენ სხვაგვარად ფიქრობთ? — მეკითხება იგი და აგონდება, რომ ვერ ვხედავ. — მე მაკბეტი გახლავართ.

მეც ვაცნობ თავს:

— განტენბაინი.

<sup>1</sup> თანამედროვე რელიგიური მიმდინარეობა.





ისინი ხელს ართმევენ ბრმას.

— მე ბანკო გახლავართ, — მეუბნება მესამე.

— მოხარული ვარ, — ვპასუხობ მე.

ლილა ყოველთვის ყველაზე ბოლოს გამოდის.

წარმომიდგენია:

ხანდახან განტენზიანობა მბეზრდება და ბუნების წიაღს მივაშურებ ხოლმე. ნაშუადღევს გრიუნევალდში ვარ, ვაგროვებ ფიჭვის გირჩებს და რამსიმორეზედაც ძალა შემწევს, კრუმე ლანკეში ვისვრი. პაჩი, ჩვენი ძალღი, მოყავისფრო, ბუშტუკებიან, მდორე წყალში ხტება. მე ვხედავ წყალში მოტივტივე გირჩებს, ძალღი კი მეტისმეტი თავგამოდებისაგან მათ ვერ ხედავს და წყალში ფართხალებს. მე მეორე გირჩს ვისვრი და გაწვდილი ხელით ვუჩვენებ, რომ ძალღი ამოდ არ დაშვრეს, ისიც პირს ავლებს გირჩს და უკან ბრუნდება. წყლის ზედაპირზე ორი ყური, გირჩიანი ღრუნჩი და ერთი წყვილი თვალი მოჩანს... მიყვარს ეს პატარა ტბები, მოგონებები, ხოლო ბერლინის საქმე მართლა როგორ მიდის, განტენზიანს ამის დანახვა სულაც არ სჭირდება... გამიგონია, ცხოვრება დულს და გადმოდულსო... წყლის ზედაპირზე წყვილი თვალი მოჩანს, ოთხი ფეხი კი უჩინრად ფათქუნებს წყალში, ეს არის პაჩი, ბრმის სამეგზუროდ ჯერ კიდევ გაუწვრთნელი ძალღი. პაჩი ჯერ საამისოდ უნდა გავწვრთნა, ხოლო ძალღის წვრთნა, ბუნებრივია, მაშინ შემიძლია, როცა ირგვლივ კაცის ჭაჭანება არ არის, აი თუნდაც, დილით გრიუნევალდში, როცა ლილა რეპეტიციასზეა ხოლმე თეატრში. სამუშაო იქაც ბევრია და აქაც. ის სცენა, პაჩმა თავისი ბრმა პატრონის შავი ჯოხი რომ უნდა იპოვოს, ჯერ კიდევ არ გამოგვდის. ნეტავ მაცოდინა, ეს ძალღი სულელია თუ მეტისმეტად ჭკვიანი? ახლა იგი ნაპირზე გამოდის და პირით ფიჭვის გირჩი უჭირავს. შემდეგ ბუჩქებში დასუნსულებს, კუდს აქიცინებს, ქსუტუნებს, სილაში დაგდებული გირჩის წინ ჩერდება, ტანს იბერტყავს და ბეწვიდან ღვარად ჩამოსდის წყალი. ყოჩაღ, პაჩ, ყოჩაღ! ჯერ იქამდე არ მივსულვარ, რომ ჩემს ძალღს ამაზე უფრო გრძლად გავუბა საუბარი. გზას დავადექი. ირგვლივ კაცის ჭაჭანება არ არის! მივდივარ და თან ჩემი შავი ხელჯოხით ვითომ ბეისბოლს ვთამაშობ. აი ანე: ფიჭვის გირჩი მარცხენა ხელში მიჭირავს, ბრმის ჯოხი მარჯვენაში, გირჩს ჰაერში ავაგდებ და ჯოხს მივაყოლებ ხოლმე...

ათი დარტყმიდან შვიდს მაინც ვახვედრებ და გატყორცნილი გირჩის საპოვნელად პაჩი ბრანდენბურგულ სილაში დაკუნტრუშობს. გულიდან ლოდი მცილდება. დროდადრო მჭირდება ასეთი თამაში. კათოლიკეებს საიდუმლოსაგან თავის დასახსნელად აღსარება მოუგონიათ — დიდებული წესია. ცოდვილი მუხლს მოიყრის და ისე დაარღვევს დუმილს, რომ ადამიანებს არ გაენდობა, შემდეგ წამოდგება, ხალხში გაერევა, კვლავ თავის როლში შევა და აღარ მოუვლის უგუნური სურვილი, ვინმეს გადაუშალოს გული. მე კი მხოლოდ ეს ძალღი გამაჩნია და სულიერ მამასავით მინახავს საიდუმლოს. პირველი სახლები გამოჩნდება თუ არა, პაჩს ზურგზე ვუსვამ ხელს და ვეფერები. ყოჩაღ, პაჩ, ყოჩაღ! ჩვენ ისევ თოკით ვებმებით ერთმანეთს. გირჩობანას თამაში დამთავრებულია! პაჩს ყველაფერი ესმის. პირველსავე სანაგვე ურნაში ვაგდებ გასართობად წამოდებულ ბროშურას (წიგნებს ვკითხულობ, რათა ადამიანები თა-



ვიანთი ნააზრევით ვიცნო) და კვლავ ისე მივაბიჯებთ, როგორც ბრმასა და მის ძაღლს შეჰფერის. „ბიძია თომას ქოხთან“ მეტროში ჩავდივართ.

ყავას კურფიურსტენდამზე ვსვამთ:

ჟურნალისტები, მსახიობები, კინოოპერატორები, ერთი დოქტორი, ყველა ჯურისა და ჭკუის თაყვანისმცემლები... ხანდახან მოთმინება აღარ მყოფნის და გული მომდის — ეს ვაჟბატონები მხოლოდ იმიტომ მთვლიან ბრმად, ლილის ქმარი რომ ვარ. ადვილი მოსათმენი არ არის, ყველას რომ ვალდებულად მიაჩნია თავი ინფორმაცია მოგაწოდოს:

— ლილა დიდებული ქალია!

მე ძაღლს ვეფერები.

— თქვენ არ იცით, რა დიდებული ცოლი გყავთ, — მეუბნება მეორე.

პაუზა.

რა უნდა თქვას ამ დროს ლილამ?

ან მე რა უნდა ვთქვა?

ლილა ჰალსტუხს მისწორებს.

მე ვხედავ:

ლილას ყველა ეარშიყება, ვისაც კი თვალები აქვს და ამ დროს თვალები თავიანთ რქის სათვალეებზე უფრო შუშისებრი უხდებათ. ლილას თავის დაცვა არ შეუძლია და ისინიც ან ხელზე ჰკიდებენ ხელს, ან მკლავზე, მე კი ვიცი, რომ ლილას ეს არ სიამოვნებს, მაგრამ იმ ვაჟბატონებს როგორ გავაგებინო? ახლა გაზეთის კითხვა რომ დავიწყო, ყურადღებასაც არავინ მომაქცევს, ისე თამამად გრძნობენ თავს ჩემს გვერდით. რატომ იციან შეყვარებულმა მამაკაცებმა ასე გამოშტერება? მე ფეხზე ვდგები. რა მოხდაო, ისე მეკითხება ყველასაგან თაყვანისმცემელი ლილა, რომ თაყვანისმცემლებიც ატრიალებენ ჩემსკენ კისერს. არაფერი! ლილას პალტო ჩამოუცურდა სავარძლიდან და ამას ვერავინ ხედავს. მე ვამბობ:

— მომიტევეთ, ბატონო დოქტორო, მაგრამ ამდენი ხანია მანდილოსნის პალტოზე გიდგათ ფეხი!

— ოჰ! — ამბობს იგი, ფეხს კი იღებს, მაგრამ აქედან არავითარი დასკვნა არ გამოაქვს. იგი ლილას უხდის ბოდიშს, ქმარი რომ ბრმაა, ამ რწმენას ვერაფერი შეუწყევს.

ხანდახან არ მეადვილება ჩემი როლი.

მაშინ ჩემს თავს ვეუბნები, უპირატესობანი, შენი როლის უპირატესობანი არ დაგავიწყდეს, არ დაგავიწყდეს, არც დიდი და არც მცირე უპირატესობანი-მეთქი. ბრმის გაცურება შეუძლებელია... ზოგი მწერლის როლს თამაშობს. მისი სახელი წიგნით ვაჭრობის ყოველთვიურ ცნობარში შეუჩერებლივ მიილტვის ზევით, უფრო სწორად, თავში უდგას წიგნების სიას, რადგან სხვა სათაურები, ჩვენს შორის დარჩეს და, სათვალავში ჩასაგდები არც არის. მისი სახელი სწორედ იქ ნანაობს, სადაც ჯერ კიდევ არ შეიძლება ბესტსელერზე ლაპარაკი, ზუსტად ლიტერატურული მოვლენის უკიდურეს საზღვარზეა მისული, ოღონდ მას არ ეცოდინება, რომ ის ცნობარი შეიძლება წაკითხული მქონდეს და სუფრაზე განტენბაინს ეს ერთადერთი კაცი ელაპარაკება. მეც ასევე ერთადერთი ადამიანი ვაზღვარათ, ვინც ვალდებული არ არის, იცნობდეს მის შემოქმედებას. მე ყველას, ვისაც კი სჭირდება, გამოჩენილი ადამიანივით ვექცევ.



— ხომ ხედავთ, — ამბობს გამოჩენილი კაცი...

პაჩს მეტისმეტად ადამიანური ამბები მაინცდამაინც არ ეპრიანება და საბელით მიჭირავს, რომ ხელიდან არ დამისხლტეს, თან ვხედავ, როგორ აცეცებს ეს კაცი თვალებს, ვინმე არ გვისმენდესო, როცა ბრმა განტენბაინს საკუთარ თავზე ელაპარაკება. კარგად ვხედავ: ეს კაცი სერიოზულად მეკიდება, რადგან იცის, რომ განტენბაინი არაფერში შეეკამათება, ჰოდა, რაკი ეს კაცი ამჟამად გამოჩენილი გახლავთ, ერთბაშად სხვებიც სერიოზულად მეკიდებიან. ახლა თურმე განტენბაინმა უნდა თქვას, როგორა აქვს მას წარმოდგენილი გერმანიის მომავალი, დიახ, მხოლოდ და მხოლოდ განტენბაინმა. შიში მიპყრობს. სულ არ მინდოდა სერიოზულად მომკიდებოდნენ, მაგრამ ისინი მაინცდამაინც ბრმებს ეკიდებიან ასე სერიოზულად.

— რა აზრისა ხართ ამ ვითარებაზე?


თავს ისე ვიკატუნებ, ვითომ დასავლეთი არასოდეს მენახოს, ხოლო აღმოსავლეთის ამბავი თავისთავად იყოს გარკვეული... შემდეგ, მანქანაში, როცა ლილა კვლავ გასაღებს დაეძებს, ხელჩანთას ვაწვდი. დავინახე, ლილას ხელჩანთა სავარძელზე რომ დარჩა. ახლა შეგვიძლია დავიძრათ და თავგზადაკარგულ დოქტორთან შამპანური დავლიოთ, ასე ვთქვათ, მოწმეების გარეშე: ლილამ და დოქტორმა და მე. თავგზადაკარგული დოქტორი უკან ზის და ისე ატარტალებს ენას, თითქოს მე მხოლოდ ბრმა კი არა, მუნჯიც ვიყო. მე ლილას გვერდით ვზივარ და ვხედავ მის მხარზე დადებულ ხელს. ის ხელი ლილასადმი თანაგრძნობითაა განმსჭვალული და პრესაში გამოქვეყნებული ერთი ბრიყვული კრიტიკული წერილის გამო ნუგეშს სცემს ლილას. გულქვაობა იქნებოდა, სულ არ ამომეღო ხმა, რადგან კრიტიკა მართლაც მეტისმეტად უსამართლო და აგდებული გახლდათ. მე ჩემს ბრმა ხელს სხვა ხელზე ვადებ (ის ხელი გედექტნისკირჭედან მოყოლებული ლილას სუსტ მხარზეა დანდობილი) და ვამბობ: გულთან ახლოს ნუ მიიტან ამ ამბავს, ლილა! მანქანაში დუმილი ისაღვურებს.

და ასე შემდეგ და ასე შემდეგ.

აი, რა ვისწავლე თეატრში:

მსახიობს, რომელიც კოჭლს განასახიერებს, ყოველ ნაბიჯზე კოჭლობა არ სჭირდება. საკმარისია მხოლოდ საჭირო მომენტში იკოჭლოს. რაც უფრო მეტ სიძუნწეს გამოიჩენს, მით უფრო დამაჯერებელი იქნება მისი კოჭლობა. მთავარია იმ საჭირო მომენტს მიაგნოს. როცა იგრძნობს, მიყურებენო და მხოლოდ მაშინ ჩაჰკრავს ფეხს, ამას სიმულანტობად ჩაუთვლის ყველა, თუ გამუდმებით ითრევს ფეხს, მაშინ გვავიწყდება, რომ ის კოჭლია. თუ ხანდახან თავს მოგვაჩვენებს, სულაც არ ვკოჭლობო და მაშინვე წაიკოჭლებს, როგორც კი თვალს მოვაცილებთ, მაშინ გვჯერა მისი. მივიღოთ ეს სახელმძღვანელოდ! ხის ფეხი ნამდვილად გამუდმებით კოჭლობს, ოღონდ ჩვენ ასე გამუდმებით ვერ ვამჩნევთ ამას. ამიტომაც მართებს თავის მოჩვენების ხელოვნებას მხოლოდ შესაფერი მომენტების დაჭერა. დიახ, მთავარია მხოლოდ მოულოდნელი მომენტების დაჭერა. უეცრად რომ გაგვახსენდება, ეს კაცი კოჭლიაო, სირცხვილი დაგვწვავს, მისი მძიმე ხვედრი რომ დავივიწყეთ, და სწორედ ამ სირცხვილის გამო გვჯერა მისი... ასე რომ, სიმულანტს გამუდმებით კოჭლობა სულაც არ სჭირდება. ხანდახან თამამად შეუძლია შეისვენოს.





ჩემი ვარაუდით, განტენბაინის ძველი გატაცება ჭადრაკია. მერე რა, ჭადრაკსაც მოევლება.

გააკეთე სვლა? ვეკითხები პარტნიორს.

ერთი წუთით, ერთი წუთით! მპასუხობს იგი.

მე ვიყურები და ვიცდი...

ჰო, გამოვედი, ამბობს ჩემი პარტნიორი.

მერე?

b1:a3, მიპატაკებს იგი.

მაშ მხედრით გამოდიხართ, არა? ვამბობ მე.

ვინც ჯერ მიჩვეული არ არის, რომ დაფა ზეპირად ვიცი, სახტად რჩება.

მე ჩიბუხს ვტენი და თან ვამბობ, მაშ მხედრით გამოდიხართ, არა?

ყველაზე უფრო ის აოცებთ, რომ ფიგურებს ხელით არ ვეხები და მაინც მახსოვს, როგორ არიან განლაგებულნი. მერე ჩიბუხს ვუკიდებ და ვამბობ:

f8:a3.

ჩემს პარტნიორს იმედი ჰქონდა, რომ კუ აღარ მახსოვდა და თავი შეიპყრებინა — მხედარიც დაჰკარგა და სინდისიც. მე ვხედავ, როგორ ცუდლუტობს იგი.

აბა? გვეკითხება ლილა, ვინ იგებს?

განტენბაინი! ვითომ მხიარულად ამბობს ჩემი პარტნიორი, მაგრამ ნერვიულობას ვერ ფარავს, ვხედავ მის თითებს, ჩუმად რომ ითვლიან ფიგურებს. ვერაფერი გაუგია. წინათ ჩემი პარტნიორი ყოველთვის მიგებდა, ჩემს ცოდნას კი ჭადრაკის დარგში არაფერი მომატებია. მას მხოლოდ უკვირს, ფიქრით თავს არ იწუხებს, მხოლოდ უკვირს.

გააკეთე სვლა? ვეკითხები მე.

ჩემი პარტნიორი მგონი ველარაფერს ხედავს.

კარგი, ამბობს იგი, b2:a3!

ჩემს პარტნიორს მართლა ბრმა ვგონივარ.

e5:a1, ვთავაზობ მე. ჩემი პარტნიორი საკუთარი ხელით აგდებს დაფიდან თავის ეტლს, ჩემს ლაზიერს აყენებს თავისი მეფის ხაზზე, თავს აკანტურებს, ფიქრობს, იქნებ განტენბაინი საქმის კურსში არ იყოსო და თვითონ ამბობს:

ქიში!

ლილას ვეუბნები, ახლა ხელს ნუ შეგვიშლი-მეთქი, მაგრამ გვიანდაა. ჩემი პარტნიორი თავის მეფეს მუცელზე აწვენს, რასაც მე წესით ვერ უნდა ვხედავდე. მე ვიცდი და ჩიბუხს ვაბოლებ.

შამათი! მიცხადებს იგი.

როგორ?

შამათი! მიმეორებს კვლავ.

მე ფენომენი ვხდები.

საქმე იქამდე მივიდა, რომ ლილა თავის წერილებსაც კი აღარ ინახავს, ვიღაც უცხო მამაკაცის წერილებს. განტენბაინმა ის წერილები რომ წაიკითხოს, ჩვენი ცოლ-ქმრობა დაირღვევა. განტენბაინი არ კითხულობს იმ წერილებს. დიდი-დიდი ზედ საფერფლე ან ვისკის ჭიქა დადგას, რომ ფურცლები ქარმა არ ააფრიალოს.



აღბათ როლიდან არასდროს არ გამოვალ. რის მაქნისია მხედველობა! შეიძლება განტენბაინი ზოგჯერ ვერ მოერიოს თავის უზარმაზარ სიყვარულს და სახიდან ჩამოიგლიჯოს ბრმის სათვალე, მაგრამ მაშინვე ხელებს აიფარებს თვალებზე, თითქოს თვალები სტკიოდეს.

— რა მოგივიდა?

— არაფერი, — ვამბობ მე, — არაფერი, ძვირფასო...

— თავი ხომ არ გტკივა?

ლილამ რომ იცოდეს, ვხედავ, მაშინ ჩემს სიყვარულში შეეპარებოდა გჭვი და ეს ქვეყანა ჯოჯოხეთად გადამექცეოდა, მაშინ მამაკაცი და ქალი ვიქნებოდით და არა წყვილი. მხოლოდ ერთმანეთისაგან სათუთად დაფარული საიდუმლო აქცევს ქალსა და მამაკაცს წყვილად.

ასე ბედნიერი ჯერ არც ერთ ქალთან არ ვყოფილვარ.

ხანდახან ლილა უეცრად აფორიაქდება და აწრიალდება, რადგან აშკარად აგვიანდება სადღაც და სახლიდან გასვლისას იტყვის, პარიკმახერთან უნდა წავიდე, თმები ალქაჯივით მაქვს გაწეწილიო. შემდეგ ლილა საპარიკმახეროდან შინ ბრუნდება (მისი პარიკმახერი ცნობილია იმითაც, რომ კლიენტებს დიდხანს ალოდინებს). მე პირველი შეხედვისთანავე ვატყობ, რომ ლილას თმას პარიკმახერის ხელი არ მიჰკარებია. მერე ლილა ვითომ სხვათა შორის მიამბობს ქალაქის ჭორებს, სწორედ ისეთს, როგორსაც საპარიკმახეროში მოისმენს კაცი, ოღონდ ხაზს სულაც არ უსვამს, ეს ამბავი, საშრობელას ქვეშ რომ ვიჯექი, მაშინ მოვისმინეო. ასეთ შემთხვევებში არასოდეს ვეუბნები, ლილალაინ, რატომ ცრუობ-მეთქი. ეს ალერსიანად, ან თუნდაც ხუმრობით რომ მეტქვა, ლილა გამინაწყენდებოდა. იგი განტენბაინს შეეკითხებოდა, როგორ გაივლე გულში, რომ პარიკმახერთან არ ვყოფილვარ, შენ ხომ ჩემს თმას ვერ ხედავო. მე ვხედავ ლილას თმას, ოღონდ არა მგონია, ლილა ალქაჯს ჰგავდეს. ამგვარად, არაფერს ვამბობ, არც ხუმრობით და არც ისე. განა აუცილებელია ვიცოდე, სად იყო ლილა ნაშუადღევის ოთხი საათის შემდეგ? თუ თქმაა, მხოლოდ გვერდით ჩავუვლი, თმაზე ხელს არ ვახლებ და ისე ვეტყვი, რა დიდებულად გამოიყურები-მეთქი. მაშინ იგი არ მკითხავს, განტენბაინი ამას საიდან ასკვნისო. ვინც არ უნდა უთხრას ეს, ლილას მაინც გაეხარდება. მეც ხომ გულწრფელად ვეუბნები. ლილა სწორედ მაშინ გამოიყურება მართლაც დიდებულად, როცა პარიკმახერთან არ არის ნამყოფი.

ლილაც არასოდეს ყოფილა ასე ბედნიერი.

ჩვენს ბინაში გაჩენილ ყვავილებზე მხოლოდ მაშინ ვლაპარაკობ, როცა ვიცი, უფრო სწორად, როცა ლილასგან ვიცი, ვისი გამოგზავნილია ისინი. მაშინ მიუკიბ-მოუკიბავად შემიძლია ვუთხრა, შენი დირექციისაგან მოძღვნილ ჯადვარებს ახლა კი დროა სანაგვეში გადავუძახოთ-მეთქი და ლილაც მეთანხმება. ოღონდ ხანდახან რომ ყვავილები გამოჩნდება, ისინი მირჩევენია არ ვახსენო. იმ ვარდებს თვითონ ლილაც არ ახსენებს, ოცდაათი გრძელღეროიანი ვარდის სურნელება მთელ ბინას ავსებს, მაგრამ მე ხმას არ ვიღებ. როცა რომელიმე სტუმარი წამოაყრანტალებს, რა დიდებული ვარდებიაო, მე ყურს ვარიდებ. ლილას არც ახლა სჭირდება თქვას, ვინ მოუძღვნა ეს ყვავილები. როცა მესმის, ვარდები ამან და ამან გამომიგზავნაო, ვერ გამიგია, რატომ აქამდე არ დასძრა ლილამ ამაზე კრინტი, მე ხომ სამი დღეა უკვე, რაც ამ ყვავილებს ვხე-



დავ. ვარდები მისი ხელოვნების უწყინარ თაყვანისმცემელს მოუძღვნიან. ლილას ამ დროს სახელები არ შემოაკლდება. მის ხელოვნებას ბევრი ეთაყვანება. მათ განტენბაინიც ეცოდებათ, ლილას ხელოვნებას რომ ვერ ხედავს, და ლილაც. ისინი ამ ქალს მხოლოდ მისი ხელოვნების გამო არ ეთაყვანებიან, მის ადამიანობასაც უხრიან ქედს — ლილას უყვარს ქმარი, რომელიც მის ხელოვნებას ვერ ხედავს. ამიტომ უძღვნიან ვარდებს თუ სხვა საჩუქარს. მე არასდროს არ ვეკითხები ლილას, ეს კობწია სამაჯური ვინ გისახსოვრა-მეთქი. რას დავინახავ და რას არა, ეს ტაქტის საქმეა. საერთოდ, ცოლ-ქმრობაც ალბათ მხოლოდ ტაქტის საკითხი გახლავთ.

ხანდახან ლილა, როგორც ყოველი გონებაგახსნილი ქალი, სულიერ წონასწორობას ჰკარგავს. ჯერ გუნება შეეცვლება. მამაკაცი, რომელიც თავს ბრმად არ ასაღებს, ცოტა ხნის შემდეგ შეეკითხებოდა ცოლს, რა მოგივიდაო. ჯერ ალერსიანდ შეეკითხებოდა, შემდეგ მკვახედ, რადგან ქალი სდუმს, თანაც უფრო და უფრო ხმამაღლა სდუმს, რომ გუნება არ გამოუკეთდეს. შემდეგ მამაკაცი დამნაშავედ გრძნობს თავს, თუმცა არც იცის, მართლა დააშავა თუ არა რამე.

— მე გაწყენინე?

— თქვი, ბოლოს და ბოლოს!

— რა მოგივიდა?

და ასე შემდეგ.

ალერსიანად შეეკითხები თუ მკვახედ, კვლავ დაუყვავებ თუ უყვირებ მოთმინებიდან გამოსული, სულ ერთია, ქალი მტანჯველი სიჩუმის შემდეგ ხმადაბლა და უკვე სატირლად ათრთოლებული ხმით გეტყვის, არაფერიო, და შენი შეკითხვები დაძაბულობას მაინც ვერ განმუხტავენ, მათი წყალობით მხოლოდ უძილო ღამე შეიძლება გერგოს წილად. რაკი ლილა მეტყვის, თავი დამანებეო, უსიტყვოდ ავიღებ ბალიშს, სასტუმრო ოთახში გავალ და ლოგინს იატაკზე გავიშლი. მაგრამ სულ ცოტა ხანში ლილას ხმამაღალ ქვითინს გავიგონებ და ნახევარი საათის შემდეგ ლილასთან დავბრუნდები. ახლა გულამომჯდარი მართლა ვეღარ შესძლებს ლაპარაკს, მე კი ლილას დაშოშმინებაში ისე გავშმაგდები, რომ ყვირილზე გადავალ და გარიჟრაჟამდე მე გამოვალ მტყუანი. ხოლო მეორე დღეს ისე ვთხოვ პატიებას, მისი უგუნებობის მიზეზს მაინც ვერ გავიგებ და ლილაც მაპატიებს...

განტენბაინი ასეთი ამბებისგან დაზღვეულია.

ლილას უგუნებობას მე ვერ ვხედავ, სხვისი უგუნებობის ცქერა კაცს ფარხმალს აყრევიანებს. მე ბრმად ვლაქლაქებ და ასევე ბრმად ვდუმვარ, ვერ კი ვამჩნევ, რა უეცრად ჩაჩუმდა ლილა — მაშინ შესაძლოა ჩემმა სიბრმავემ აიძულოს გულწრფელად მითხრას, რამ გაუფუჭა ამჯერად გუნება. აი, ამაზე კი შეიძლება ვილაპარაკოთ.

განტენბაინი ბრმის სათვალეს სარეცელზე იხსნის, მაგრამ არც აქ გამოდის როლიდან.

ქალი და მამაკაცი.

ლილას ალბათ ბევრი მამაკაცი უნახავს, ასეთებიც და ისეთებიც. უნახავს ხელმოცარულნიც, რადგან ისინი ისეთ რამეზე დებენ თავს, რასაც ქალი მაინც-დამაინც პირველ რიგში არ ელოდება; უნახავს მოძალადეებიც, ვნებით კი არა,



ნებით აღგზნებულნი, და პატივმოყვარეებიც, სწორედ პატივმოყვარეობის გამო რომ ეცარებათ ხელი, უნახავს უგერგილონიც, ბრიყვებსაც შეიძლება გადაწყვიტოს სადმე, ვთქვათ, ვინმე იტალიელ მეთევზეს, მაგრამ მეტწილად მაინც გონებაგახსნილ მამაკაცებთან ექნებოდა საქმე, თუნდაც ნევროპათებთან, რომლებსაც ლილას თვალების დანახვაზე ელეთ-მელეთი მოსდით ხოლმე. ისინი თვალდახუჭულნი ჰკოცნიან ლილას, რომ აღტაცებისაგან დაბრმავდნენ, მაგრამ ისინი ბრმები არ არიან, მათ ეშინიათ, სმენა დახშული აქვთ, მათ ხომ ბრმის ხელები ვერ ექნებათ, ისინი მზად არიან მტლად დაედონ, მაგრამ თავდავიწყება აკლიათ, სინაზესაც იჩენენ, მაგრამ მათი სინაზე ბრმისას ვერ შეედრება. ბრმის სინაზე ყოველგვარი შიშისაგან გათავისუფლებს, რაც კი შეიძლება ადამიანს გაუჩნდეს, როცა სხვის მზერას გრძნობს ხოლმე. ბრმა გარე სამყაროდან არ მოდის შენთან, იგი თავის ზმანებასთან ერთ არსებადაა ქცეული, იგი სხვა ქალებს არ გადარებს, არც ერთი წამით არ გადარებს სხვებს, მას თავისი კანისა სჯერა...

ქალი და მამაკაცი.

მხოლოდ მეორე დღით, როცა ლილას ჯერ კიდევ სძინავს ან თავს იმძინარებს, განტენბაინს ძილი არ დავუფრთხოო, განტენბაინი ჩუმად იკეთებს სათვალეს, რომ ლილა არ დააეჭვოს. მხოლოდ ერთმანეთისაგან სათუთად დაფარული საიდუმლო აქცევს მათ წყვილად.

წარმომიდგენია:

განტენბაინი სამზარეულოში დგას. ლილა სასოწარკვეთილია. ვერ იტანს, განტენბაინი, მისი ქმარი, მუდამ სამზარეულოში რომაა დაყუდებული. ლილა შეგეცოდება. უბრალოდ ვერ დაუჯერებია, რომ დედამიწის ზურგზე აღარც ერთი სუფთა ფინჯანი აღარ არსებობს, აღარც ერთი. სადმე წავიდეთო, ამბობს ლილა, რომ კეთილ გნომებს დაუტოვოს ასპარეზი. სახლიდან გამოვდივართ... ლილა სიბინძურეს ვერ იტანს, ჭუჭყი პირდაპირ ბოლოს უღებს. ნეტავ დაგანახა, რას დაემსგავსა ჩვენი სამზარეულო, მეუბნება ლილა. ლილა ხანდახან თუ შევა სამზარეულოში და ერთ-ორ ჭიქას ან ერთ-ორ კოვზს გარეცხავს, განტენბაინს კი მაინც მამაკაცურად უჭრის ჭკუა და მიაჩნია, რომ საქმე სერიულად უფრო სწრაფად წავა. იგი ერთ საათს დაჰყოფს სამზარეულოში, ყველა კოვზს, ფინჯანს და ჭიქას ან სტვენა-სტვენიტ დარეცხავს ან ჩუმად და ერთხანს თავისუფალი იქნება.

კარგად იცის, ყოველთვის შეიძლება ან კოვზი დასჭირდეთ ან ჭიქა, უფრო ჭიქა სჭირდებათ ხოლმე, თუნდაც ერთი იყოს, მაგრამ გაუზინთავი. სამზარეულოში ლილა თუ გავა, განტენბაინი მაინც ვერ ისვენებს, იცის, ლილას დიასახლისობა არ ემარჯვება. უფრო მეტიც: ისიც იცის, რომ ქალს პრაქტიკული რჩევა არ უნდა მისცე, ამით მხოლოდ გულს ატკენ და საქმეს კი არაფერი ეშველება. რა ქნას? საყვარელ ქალთან ცოტა მოქნილობა თუ არ გამოიჩინე, უსიყვარულობა დაგბრალდება. არსებობს ერთადერთი გამოსავალი: ქალის უგერგილობაში მამაკაცმა მხოლოდ მისთვის დამახასიათებელი, განსაკუთრებული მომხიბლაობა უნდა დაინახოს, თუმცა განსაკუთრებული აქ არა არის რა. მაინც რა ქნას? სანამ ციდან დიასახლისი არ ჩამოუვარდებათ, მანამდე არაფერი ეშველებათ. მერე რა, რომ ლილა სულითა და გულით სწუხს, როცა ხედავს, როგორ ტრიალებს სამზარეულოში წინსაფარაფარებული განტენბაინი, რო-



გორ გააქვს ყოველდღე ნაგვის ვედრო, როგორ ჰყრის ცარიელ ბოთლებს, და დაჭმუჭვნილ გაზეთებს, ბროშურებს, მიყრილ-მოყრილ კანაფებსა და პომადადამჩნეული ნამწვავებით გავსებულ საძაგელ ქერქებს ფორთოხალისას...

მგონი, ვიპოვე გამოსავალი!

ლილას ნამდვილად არ უნდა, განტენბაინი, მისი ბრმა, ჭურჭელს რეცხავდეს მხოლოდ იმიტომ, რომ ჭურჭელი არამც თუ თავისით არ ირეცხება, არამედ სამზარეულოშიც კი არ გადის თავისით, ხოლო თუ სამზარეულო სპეციალურ მაღაზიაში გამოტანილივით კრიალებს, მაშინ ჰგონია, მალულად მესაყვედურებიანო და სახე ეღრუბლება. ამიტომ განტენბაინმა გადაწყვიტა, მთლიანად აღარასოდეს დააღაგოს სამზარეულო. ვადიარებ, რომ სამზარეულოს გაკრიალებაში ნამდვილად ურევია მამაკაცური ღვარძლისა და საკუთარი თავისადმი მდაბალი მამაკაცური სიბრალულის ნიშანწყალი, მაგრამ ეს აღარ მოხდება! განტენბაინი ახლა ერთ თეფშსა და კოვზსაც კი აღარ რეცხავს, როცა ლილა სახლშია, მხოლოდ საიდუმლოდ საქმიანობს და მაშინაც იმდენს აკეთებს, რაც თვალში არავის ეცემა: სამზარეულო ისე გამოიყურება, თითქოს მისთვის არავინ იკლავდეს თავს და შეხეთ, მაინც ყოველთვის მოიძებნება კიდევ რამდენიმე ჭიქა და რამდენიმე სუფთა დანა, მოიძებნება სწორედ იმდენი, რამდენიც საჭიროა. ახლა აღარც საფერფლეები კრიალებს საყვედურივით, ოღონდ შიგფერფლი აღარ ყრია გროვად, ინდის ხურმის საძაგელი კურკებიც აორთქლებულა, აღარც ღვინის ჭიქების წებოვანი რგოლები ჩანს მარმარილოს ტაბლაზე, უკანასკნელი კვირის ბროშურები და ჟურნალებიც ისე გამქრალა, თითქოს, ბოლოს და ბოლოს, თვითონვე შეეგნოთ თავიანთი სიყვითლედადებული სიძველე. განტენბაინი კი ლილას სარწეველაში ჩაბრძანებული ხვდება და სიგარას აბოლებს, ლილასაც გულზე ეშვება, რომ განტენბაინს სავალდებულოდ აღარ მიაჩნია, მიხედოს სამზარეულოს.

— ხომ ხედავ, — ამბობს ლილა, — თურმე ასეც შეიძლება ცხოვრება. ყოველდღიურობას მხოლოდ სასწაულის წყალობით ვუძლებთ.

მიყვარს სექტემბრის დილა, ნამიანი, მორუხო-მოცისფრო დილა, მზე თითქოს კვამლს ამოფარებიაო, სოფლური სახლები სიფრიფანა ქალაქისაგან გაკეთებულს ჰგვანან. ტბა ლაპლაპებს, გაღმა ნაპირი ნისლშია გახვეული, შემოდგომაა, შემინულ სათბურებს შორის ვდგავარ, პაჩი თოკით მიჭირავს, ვდგავარ სოფლური ბაღის კვლებს შორის, სათვალე მოხსნილი მაქვს, რომ ყვავილების ფერი კარგად გავარჩიო, ყვითელი სამკლავური კი ჯიბეში ჩავიხურთე, რომ ამ თავაზიანმა მებაღემ არ იფიქროს, დამჭკნარ ყვავილებს შევატყუებო. მისი დანა ტბასავით ლაპლაპებს. იყოს დეზურები, თუ რაც ჰქვია, ვეთანხმები მე, რამდენ ღეროზეც დავუქნევ თავს, იმდენს ხვდება დანის პირი და წყნარი ჩხაკუნით იჭრება ყვავილები ლილასათვის, ჩხაკ, ჩხაკ, ჩხაკ, მებაღეს მკლავი ევსება ცისფერი დეზურებით, დანას მანამდე გაუდის ჩხაკუნი, სანამ არ ვეუბნები, კმარა-მეთქი. კიდევ მინდოდა რამდენიმე ყვითელი ფერის ყვავილი დამემატებინა, თუმცა არა, ყვითელი კი არა, ცოტა უფრო მკრთალი ფერისა, ცოტას წითელ ქოლგებსაც შევურევდი, ასტრებსაც, ჰო, კიდევ გეორგინებს, დიახ, ბურგუნდული ღვინისფერ გეორგინებს, ბურგუნდული ღვინისფერს უხვად შევურევდი, უხვად...

დღეს ლილა საგასტროლო მოგზაურობიდან ბრუნდება.



ნეტავ იცოდეს, როგორ ტკბება განტენბაინი წუთისოფლის მკრთალი თუ ხასხასა ფერებით, როცა იგი სამოგზაუროდაა წასული და როგორ ატყუებს ყოველი ღერი ყვავილით, რომელსაც ხედავს!

მისი თვითმფრინავი 15. 40 მოდის.

შინ ყვავილებს ლარნაკში ვაწყობ, უკან ვიხევ, კისერს გვერდზე გადავიგდებ და უსათვალოდ ვამოწმებ, ფერები კარგადაა შეხამებული თუ არა. ყვავილებს ახლა სხვანაირად ვაწყობ, მე ხომ დრო მაქვს, მონატრების დღეები მძიმედ მიიზღაზნება, საათები კიდევ უფრო მძიმედ, მიყვარს ყვავილების ჩალაგება-გადმოლაგება და ლოდინი. თუმცა მშვენივრად ვიცი, რომ ლილა დაპირებულზე გვიან შეიძლება ჩამოვიდეს, ადრე კი არა, მაინც ვნერვიულობ. რაღად გვინდა ეს სიფრიფანა, შრიალა ქალაქის ღრუბლები, რაღად გვინდა ეს ყლორტები, მოვიცილოთ თავიდან! საქმეს რომ ვრჩები, თერთმეტი რეკავს, უკანასკნელად კიდევ უსათვალოდ ვავლებ თვალს ყვავილებს: ალტაცებული ვარ, თავის ქება აუგიაო, ნათქვამია, მაგრამ ჩემს გემოვნებას მაინც ალტაცებაში მოვყავარ. ყვავილები შემომელია, ახლა საქმე აღარაფერი მაქვს და ალბათ სტვენას მოვყვები. ისე ვარ აფორიაქებული, რომ ვერ დავჯდები და გაზეთს გულს ვერ დავუდებ. ამიტომაც არ ვჯდები, ერთი-ორჯერ დავიხარე და ხალიჩაზე დაცვენილი ყვავილების ფურცლები ავკრიფე. ამასაც მოვრჩი. ვიცი, რომ ლილა ჯერ თვითმფრინავშიაც კი არ ზის და მეოთხედ და მეხუთედ ვიხრები, რადგან მოუსვენარ დეზურებს ისევ ჩამოსცვენია ცისფერი ფურცლები, ალბათ ლილა ჯერ კიდევ ლოგინში წევს და მეშინია, თვითმფრინავმა არ გამოასწროს. ფეხზე ვდგავარ, პირში სიგარეტი გამიჩრია, მოკიდება კი დამვიწყებია, რადგან ხან საათს შევყურებ და ხან ყვავილებისაკენ გამირბის თვალი. ხან რომელიმე ტოტი მეჩხირება თვალში, ხან ქოლგა, ხანაც ფერი. ფერების შეხამება ბრმა შემთხვევითობას სულაც არა ჰგავს, ასე კი უნდა იყოს. ჩემი აზრით, აუცილებლად ასე უნდა იყოს. მინდა ლილამ შემდეგ, შინ დაბრუნებისთანავე კი არა, შემდეგ, როცა ეს ოთახი კვლავ აივსება ჩანთებით, ილუსტრირებული ჟურნალებითა და ხელჩანთებით, ისე გაიხაროს, რომ განტენბაინის შექება არ დასჭირდეს, პირიქით, თვითონ უნდა მიაშობს, რა მშვენიერია შემთხვევითობა. დიახ, ზოგჯერ რამდენიმე საათი დამჭირვებია, რომ ყვავილები ასე ლამაზად და ბუნებრივად დამელაგებინა. ისევ ვწლი თაიგულს, ისევ დაფარფატებენ ყვავილების ნამიანი ფურცლები, ლამაზად ეშვებიან ხალიჩაზე ყვითელი და ცისფერი ფანტელები. ბრმის სათვალე, რა თქმა უნდა, სულ ხელთა მაქვს, რომ ლილა მოულოდნელად არ წამომადგეს თავზე. როცა თაიგულის ასაღებად ორივე ხელი მჭირდება, მაშინ ბრმის სათვალე კბილებით მიჭირავს, ყურები იმ ბავშვივით მაქვს დაცქვეტილი, ჩუმად რომ იკოკლოზინებს ყელს და სული ფეხებში ეპარება...

მე მგონი, ლილა ნამდვილად მიყვარს.

მეორე დღეს ვღებულობ მის დებეშას: ჩამოვალ მხოლოდ პარასკევს 10.45. მე კი ვხვდები, რომ შემოდგომის ნისლის გამო ბუნების წიაღში დავეგმილი გადალება გადაიდებოდა, მაგრამ ჩემი თაიგული, სამწუხაროდ, უკვე მომჭკნარი გახლავთ. კვლავ ვკრეფ ხალიჩიდან ღამით ჩამოცვენილ ფურცლებს, ყველაზე უფრო გეორგინებს გასჭირვებიათ და მდუმარედ ჩაუქანდრავთ მძიმე თავები. დარჩენილ ყვავილებს კიდევ ერთხელ ვალაგებ, მაგრამ არაფერი გამომდის... მე ვხედავ: ჩემს თაიგულს ეტყობა, რომ გუშინდელია



და ახლა უსიტყვო საყვედურივით დევს ლარნაკში. ლილას გუნება წაუხდება მის დანახვაზე, თუმცა მე არც არაფერს ვეტყვი და არც არაფერს შევეკობები. ეს თაიგული ალაღბედზე შეკრულს აშკარად აღარ ჰგავს. ამიტომ თაიგულს მანამდე ვაგდებ, სანამ აეროპორტში წავიდოდე. რა თქმა უნდა, სანაგვე ვედროში არ ვაგდებ, სადაც შეიძლება ლილამ მოჰკრას თვალი, თაიგულს სარდაფში ვისვრი, იქ უჩუმრად დაჭკნება, ძველი ილუსტრირებული ჟურნალების ქვეშ მოქცეული. საქმე ისე უნდა მოვაწყო, თითქოს არც გამხსენებოდეს ყვავილები, ესე იგი, სანამ აეროპორტში წავიდოდე, ლარნაკი უნდა გამოვრეცხო კიდევ.


ლილას თვითმფრინავი უკვე მიწაზეა.

განტენბაინს კინალამ დააგვიანდა (უკანასკნელ წუთს კიდევ კიბეებზე გაუხდა ყვითელი და ცისფერი ყვავილების ფურცლები ასაკრეფი) და მე ვხედავ: კვლავ ის მამაკაცი მიათრევს საბაჟოსაკენ ლილას ბარგი-ბარხანას. პაჩი წკმუტუნებს, როცა უცხო მამაკაცი და ლილა, მისი ქალბატონი, მისივე ბრმა პატრონისაგან ხუთი მეტრის მოშორებით ემშვიდობებიან ერთმანეთს. ჩემს სულელ ფინიას ძლივს ვაკავებ.

იმედი მაქვს, არასოდეს ვიეჭვიანებ.

გაგრძელება იქნება





სომხურიდან თარგმნა ბიკმი შაჰნაზარმა

### ს ა ლ ა მ ი

— ს ა ლ ა მ ი! —

ვამბობ ამ სიტყვას ისე,  
ბეჭდიან პასპორტს გიწვდიდე თითქოს,  
გაცნობდე ავტობიოგრაფიას  
ანდა ანკეტას გივსებდე სრულად...

და ვისურვებდი  
დიდის სურვილით:  
ეს ერთადერთი სიტყვა  
პასპორტად  
მთელ ქვეყანაზე ყველას ჰქონოდა!

და ვისურვებდი  
დიდის სურვილით:  
ეს ერთი სიტყვა ახალ, ჭეშმარიტ  
„სეზამ, გაიღე!“-დ რომ ქცეულიყო.

— ს ა ლ ა მ ი! —

გემებს  
ან მატარებლებს  
ანდა თვითმფრინავს თავს დაუკრავდი  
და შეხვიდოდი შიგ ისე მშვიდად,  
გერვენებინოს თითქოს ბილეთი.





— ს ა ლ ა მ ი! —

უცნობ ქალს მიმართავდი  
და ისიც უმაღ შეგიყვარებდა,  
ანდა მღიმიარი გეტყოდა მორცხვად,  
სხვა შენზე ადრე მომესალმაო!..

— ს ა ლ ა მ ი! —

ნათელ ცას მიმართავდი  
და მაცოცხლებელ ნამს გაპკურებდა.

— ს ა ლ ა მ ი! —

მომცდარ მიწას ეტყოდი  
და მოსავლის ზღვად გადიქცეოდა!

— ს ა ლ ა მ ი! —

თავად სიკვდილს ეტყოდი  
და ისიც უმაღ მიგიხვდებოდა,  
რომ შენთან მოსვლა  
იჩქარა ძლიერ!..

— ს ა ლ ა მ ი! — ყველგან ისმოდეს როგორც  
ნაღდი, ახალი... „სეზამ, გაიღე!“  
და მაშინ დათვსაც თუ მიმართავდით

— ს ა ლ ა მ ი! —

ისიც თქვენი ბავშვისთვის  
მსწრაფლ სათამაშოდ გადიქცეოდა,  
რასაც მომართვაც კი არ სჭირდება  
და არც უბრალო რამე აფუჭებს!  
ასევე გველი — მოხუცებისთვის გადიქცეოდა  
ხელჯოხად, ხოლო  
ნიანგი — ყუთად, შიგ ნაირ-ნაირ სათამაშოებს  
რომ ინახავენ,  
კარხა კი, კარხა — ველურ ირემად,  
ქარიშხალი კი — სცენაზე ცეკვად,  
კაცი კი, კაცი — ჭეშმარიტ კაცად!..

შეუძლებელი არც რაა ქვეყნად,  
თუკი ქვეყანას სიკეთე მარჯავს,  
ჩვენს ბაგეზე რომ ქცეულა

ს ა ლ მ ა დ!

მაშ ასე, თითქოს გიწვდიდე პასპორტს,  
გაცნობდე ავტობიოგრაფიას  
ანდა ანკეტას გივსებდე სრულად:





— ს ა ლ ა მ ი! —

შენდა

— ს ა ლ ა მ ი! —

თქვენდა,

ჩემო ძვირფასო უცნობ-ნაცნობნო!

მთელ ქვეყანაზე, შეუძლებელი

დე შესაძლებლად იქცეს ყველასთვის,

იქცეს ყველასთვის ხვალ ანდა დღესვე —

სულ ერთადერთი სიტყვით:

— ს ა ლ ა მ ი! —

### სხივური სნება

სულაც არ არის ეს სხივური სნება ახალი,  
რვა ათას რვაას წლისა გახლავს, ჩემო კეთილო;  
სულაც არ არის ეს სხივური სნება ახალი!

ეს სნება სჭირდათ ძველ ინდოელთ,  
ძველ ელადელებს.

სწორედ ამ სნებამ დააბრმავა თვით ჰომეროსიც.

და საფლავებში სწორედ ამავე სნებით ჩავიდნენ —

ჩვენი შექსპირი! ნარეკაცი — თქვენი!

და ყველა,

ყოველი, ვისაც დედამიწის სფეროთა ტოლი

ფილტვები ჰქონდა, ანდა გული — ისეთი დიდი,

ამხელა ფილტვთა გულად ქცევა ვისაც შეეძლო...

ნურც გადამდები გეგონებათ! — ეს სნება მხოლოდ  
დედის მუცლიდან თუ დაჰყვებათ ადამიანებს!

სხივური სნება ხვედრი გახლავთ მხოლოდ იმათი,  
ვინც შვიდი ათას შვიდ ფერს ხედავს ცისარტყელაში,  
ვით მელოდრას,

გიჟურ სრბოლას მოლეკულათა,

ვინც აყურადებს შიგან ცულთა, შიგან უროთა,

ვისაც მაშინაც ეყურება მათი ხმა, როცა,

როცა ისინი კერპებივით უბრად... არიან!...

სხივური სნება ხვედრი გახლავთ მხოლოდ იმათი,

ვინც შავ კამერშიც პიანინოს ხედავს მოარულს,

რომელიც მათთვის, მხოლოდ მათთვის აღვიძებს ჰანგებს!..

სხივური სნება ხვედრი გახლავთ მხოლოდ იმათი,

ვინც ფორუმს, ზვართნოცს უხეშ ლოდში ხედავს! საღ კლდეში —





აჯანტას, გელარტს და ელორას! სუფთა ტილოზე —  
მაგდალინას და საიდუმლო სერობას!  
ხოლო,

ხოლო ყოველი ახალგაზრდის სულის სიღრმეში —  
მთვლემარე ჰამლეტს, ფჩიზელ ოტელოს!...

ამ სხივურ სნებით იტანჯვიან მხოლოდ ისინი,  
მარტოობაში ვისაც მთელი კაცობრიობა  
თავის წინ უზის სასაუბროდ!.. —

მხოლოდ ისინი, —

ვინც დედამიწის ბრუნვას გრძნობენ ლანჩებით,  
ხოლო

ხელისგულებით — საკუთარი ფესვების გადგმას,  
მაშინაც, როცა ჰაერში აქვთ ხელისგულები!..

მხოლოდ ისინი,

ვინც ვერა და ვერ შეიყვარა

ყოველი დროის ყველა (მუფე! და მათ ღუბავენ

არა ციხეში, არა მხოლოდ გადასახლებით,

არამედ... კარზე მიყვანით და...

ყალბ სიყვარულით...

სულაც არ არის ეს სხივური სნება ახალი!..

### ამოცანა მთელი მსოფლიოს გამოთვლით მანქანებსა და ზუსტ ხელსაწყოებს

ითვლით და ითვლით!..

მაშ ითვალეთ! —

რა ტალღა არის

ან რამდენ წამში რამდენ გრამ სისხლს აბრუნებს გული,

მორცხვი ქალწულის ღაწვებისკენ რომ დაძრავს, რაიც

იმ თერმობირთვულ აფეთქებას თუ იწვევს, რასაც

ჩვენ, გულუბრყვილოდ, შეუაკვლას რომ ვუწოდებთ ჯერაც?!  
და კოსმოსური რა სხივების დინება ხვდება

ჩვენს თვალებს, დიან, ატმოსფეროდ ქცეულ ჩვენს თვალებს,

როცა ისინი სხვათა თვალებს ეფეთებიან?

და ეს ორმხრივი დასხივება ჩვენი გულისთვის

სახიფათოა თუ, პირიქით,

სასარგებლოა?

ითვლით და ითვლით!..

ითვლით და ითვლით!..

მაშ ითვალეთ! ხელისგულებით

რამდენ კილოვატ ენერგიას მივცემდით ბავშვთა



აბრეშუმივით თმას და თმაზე უფრო რბილ ხელებს,  
სატრფოთ მოქნილ ტანს, ბებიების მხრებს სუსტს და მოღლილს  
და ენერგია, რაც იმათგან ჩვენც მიგვიღია,  
რამდენით მეტი  
ან რამდენით ნაკლები არის?

არადა, ითვლით, ითვლით და ითვლით...

გამოითვალეთ, გთხოვთ, აგრეთვე გამოითვალეთ,  
მის სიცოცხლეში თუნდაც ერთმა, ერთმა ჩვენგანმა  
ვნების წყურვილით თუ რამდენ ქალს ჩასჭიდა თვალი,  
შეცბუნებულმა რამდენს წმინდა შეავლო მზერა  
და კიდევ რამდენს — შეხვდა მხოლოდ ძმური სინაზით...  
ბრძანეთ აგრეთვე სამყოფელი იმ ქალთა, რომელთ  
ღრმა სიყვარულით შეყვარება შეუძლოთ ჩვენი,  
მაგრამ ვაი რომ. ისე მოხდა, ველარსად შეხვდით.  
დაგვისახელეთ იმ ბავშვების რიცხვი, რომლებიც  
ჩვენ, სიცოცხლეში... კიდევ უნდა გვეყოლოდა, მაგრამ  
არც გვეყოლა და, სამწუხაროდ, არც გვეყოლება!  
და კიდევ — რიცხვი იმ ბავშვების, რომლებიც თითქოს  
ჩვენი რომ უნდა ყოფილიყვნენ  
და არ არიან!...

არადა, ითვლით, ითვლით და ითვლით...


ის კი არადა,  
წესიერად ისიც არ ვიცით,  
თუ რა აცინებს ადამიანს?! რატომ იცინის  
მხოლოდ ის  
და სხვა სულიერი — ქვეყნად არც ერთი!  
მაშ მოგვახსენეთ ტალღათ რიცხვიც ჩვენი სიცოცხლის,  
გვიჩვენეთ მისი ათასგვარი ნაირფერობა,  
გაგვაგებინეთ კიდევ ისიც, და კიდევ ისიც,  
თუ რა ასხვაგვებს ჩაცინება ჩაქირქილებას...

მაშ ელექტრული უმძლავრესი მაგ თავის ქალით,  
ციკლოპურ თვალთ და სხივური მძლავრი საცეცით  
თქვენ მწუხარების ანალიზსაც მოახერხებდით  
და მისგან ალბათ იმ უხილავ კვამლს მიიღებდით,  
რომელსაც სწორედ მწუხარება გამოჰყოფს მუდამ  
და სად და როგორ ჰქრება ხოლმე, კაცმა არ იცის!..

არადა, ითვლით, ითვლით და ითვლით...

დაასახელეთ აბა ახლა ის წელიწადიც  
(დაახლოებით მაინც, ზუსტად თუ ვერ შეიძლება).





როცა ჩაგრული აღსდგებიან ქვეყნად ხალხები  
 და მიეზღვებათ ოდეს მჩაგვრელთ სასწავლო,  
 თორემ მრავალნი,  
 უთვალავი საუკუნეა,  
 (თუმც უმოწყალოდ ღვთისგან სასო გადაეწურათ)  
 ისევ ელიან,  
 ჯერჯერობით ისევ ელიან...  
 თქვენ ხომ ახალი ღმერთები ხართ ახალი დროის,  
 თქვენი იმედი მაინც ჰქონდეთ! —  
 თქვენ ნუ შეცდებით!..

გამოითვალეთ  
 და გვითხარით იმ ხიდთა რიცხვი,  
 ერთმანეთთან რომ აკავშირებს სხვადასხვა ქვეყნებს  
 და გადავლილი რომ გვქონოდა,  
 ჩვენც გვსურდა, მაგრამ  
 არც გადგვივლია ჯერჯერობით და ვერც გადვივლით...

განსაზღვრეთ რიცხვი  
 ზმანებათა, იმ ოცნებათა,  
 ამ სიტყვებით რომ მოინათლნენ ქვეყნად იმიტომ,  
 მხოლოდ იმიტომ,  
 ახდენა რომ არ უწერიათ...

და უეჭველი მოგვახსენეთ იმ ეჭვთა რიცხვი,  
 რითაც ჩვენ ხშირად სიმწიფეში შევსულვართ, ხოლო  
 უფრო ხშირად კი ნაადრევად დავმტკნარვართ, ვაგლახ!..

გატეხილ გულთა გვამცნეთ ბზარი!..  
 და იმედია,  
 რომ იგი მაინც ელვის ბზარს არ დაემგვანება!..

და გვაზიარეთ გაცრუებულ იმედთა ხაზსაც,  
 ჩვენს ცხოვრებას რომ პარალელად ასდევნებია;  
 და სამწუხაროც,  
 სამწუხაროც სწორედ ის არის,  
 პარალელები ერთმანეთს რომ, მგონი, არ ჰკვეთენ!..

იმ საათების ბრძანეთ რიცხვი აურაცხელი,  
 ჩვენმა ძნელმა თუ იოლმა დრომ რომ შეიწირა  
 რაღაც რიგებში,  
 სადღაც გზებში,  
 და ჭრელაჭრულა,  
 მრავალენოვან გაზეთების კითხვა-ფურცვლაში!  
 ცისმარე დილით  
 შავ-წითელი სათაურები



ზარბაზნებივით თვალეში რომ მოგჩერებია..  
 წყალქვეშა ნავით სულში სურვილთ ჩაძირვა რომ სურთ..  
 და ჩვენს ძარღვებად დაჭიმული წითელ სისხლისგან  
 წყალბადის ბომბით  
 თეთრი წყალის მიღება რომ სურთ..

და ყოველივე ამის შემდეგ, ისიც გვიბრძანეთ,  
 თუ კიდევ რამდენ ტონა ატომს ააფეთქებენ,  
 რომ ააფეთქონ დედამიწის გულიც იოლად!..  
 და, რა თქმა უნდა,  
 ისიც უნდა გამოითვალათ,  
 რა იარაღის დაბადების შემდეგ შესძლებენ,  
 რომ დედამ შვილის დაბადება ველარ შეიძლოს.  
 ამდენს თუ შესძლებთ, გამოითვლით ალბათ იმასაც,  
 სასოწარკვეთას რა წონა აქვს; შემდგომ ამისა  
 მხოლოდ ერთი რამ თუ დაგრჩებათ განსამარტავი:  
 რა სასწაულმა ან რა ძალამ გადაგვარჩინა,  
 სასოწარკვეთის სიმძიმისგან მახვილ სოლივით  
 ჩარჭობილები რომ არა ვართ მიწაში კისრით?!

მაშ მეგობრულად აგვიხსენით ისიც,  
 ქვეყანას  
 თუ რამდენ წელში ერთხელ მაინც მოევიწინება  
 ყმაწვილი იგი.  
 ანდერსენის გრძნეულ ზღაპრიდან,  
 რომლისაგანაც მეფეებმა უნდა შეიტყონ  
 სიშიშვლე თვისი...  
 და გთხოვთ ისიც, დასძინოთ ისიც,  
 სიშიშვლეს თვისას  
 შეიტყობენ თდეს მეფენი,  
 შეიმოსვიან?.. თუ, პირიქით,  
 მათი შემოსვის  
 მსურველთ თუ, უფრო ზუსტად, მორცხვებს აიძულებენ,  
 იცხოვრონ ასე, —  
 ახვეული თვალებით ქვეყნად...

და იქნებ გვითხრათ,  
 ბეთჰოვენის სიყრუვე ვითომ  
 უკავშირდება იმ შემზარავ,  
 მძლავრ აფეთქებებს,  
 ახლა რომ ხდება დედამიწის ზემოთ თუ ქვემოთ?!  
 და თუ კავშირი არის,  
 მაშინ, გთხოვთ, განგვიმარტოთ,  
 ამიერიდან აურაცხელ ბეთჰოვენებით



გავიხარებთ თუ, ამ ქვეყანას, უბრალოდ რომ ვთქვათ,  
მხოლოდ და მხოლოდ ყრუთა რიცხვი შეემატება?!

გამოითვალეთ, ბოლო თხოვნა ჩემი ეს არის,  
თუ როგორ, რა გზით,  
რა კეთილი მანქანის ძალით  
არის შესაძლო კაცის კაცად დარჩენა ჯერაც,  
ან კიდევ — მხოლოდ კაცის კაცად ქცევა ხელახლა?!

### ჩემი ბატაცეზა

რა? გატაცება?!  
განსაცვიფრებლად ჰგავს გულის წასვლას:  
სულ მცირე ხანი  
გრძლად მერვენება...

### რწმენის სიმბოლო

მეცა მაქვს ჩემი რწმენის სიმბოლო —  
სხარტია იგი  
და მახსოვს მუდამ:  
— უსახლკაროდ რომც დარჩე, გიჯობდეს —  
ხელოვნებაში ზედსიძედ... ყოფნას!

### მცდარი სიტყვა შეცდომის შესახებ

„მე არ მივმართავ არავის,  
მაგრამ სადღაც რაღაცა შეცდომა არის“  
უ. ს ა რ თ ი ა ნ ი

გაგიჟებული — გაზაფხული.  
ჰაერი — მთვრალი.  
ისეთი შუქი განფენილა, ვერ შეიცხადებ,  
მხოლოდ ნათლით რომ დაორსულდეს... თვით უშვილოც კი..  
მაგრამ მე ჩემს ტვირთს, აუტანელს, ვეწევი მაღლა,  
ჩემი თავის და ჩემი გულის ტვირთს,  
რომლის ქვეშაც  
რვარიგად ვათრევ შვიდსახიერ ჩემს სხეულს ახლა.

ვათრევ.  
არ ვფიქრობ! —  
ჩემი ფიქრიც სწორედ ეს არის.



არ ვისმენ!

არ მსურს, საიდანმე ხმა რამ ჩამესმას!

მაგრამ ჩემშიც და ჩემს ირგვლივაც ერთთავად ისმის —  
„სადღაც რაღაცა შეცდომა არის“.

...რაღაც შეცდომა დედამიწის ღერძშია სწორედ, —  
სწორად არ გადის... რაღაც მრუდედ უჭირავს გეზი..

რაღაც შეცდომა ნათელსაც კი ახლავს, ნათელსაც —  
უნდა ჰქონოდა სიმძიმე და წონა ნამდვილად!

სარწმუნოება მცდარი თუა, ეს უკვე ვიცით,  
მაგრამ თვით რწმუნაც ხომ არ არის მთლად შეუმცდარი?!

რაღაც შეცდომა ჭეშმარიტსაც კი ახლავს, — რასაც  
ჭეშმარიტს ვარქმევთ, შემოწმებას მოითხოვს ისიც!

სისხლიც, სისხლიც კი შემცდარია: მაშ რად იღვრება?  
და თუ იღვრება, მერე რატომ, რატომ დედდება?!

ჭიქას თუ ხელი სასომიხდით სწვდება, ღვინოც კი  
შემცდარი გახლავთ, —  
ყელში რატომ გადაადის მაშინ?!

წყალთა შეცდომა  
ვარდნა არის მათი — მუდმივი!..  
ზემოდან ქვემოთ  
ეშვებიან,  
ზემოდან — ქვემოთ!

არც ლანჩა არის შეუმცდარი —  
გვწყვეტს დედამიწას.


მცდარია მიწაც, —  
იყიდება და ყიდულობენ.

მცდარია ცეცხლიც, —  
მაშ ეს კვამლი რა ჯანდაბაა?!

შეცდომა გახლავთ დადუმება, —  
ფრთებს გვაცლის იგი.  
ხოლო გულწრფელი ლაპარაკი... მთლად შეცდომაა.

მაშ რითი, როგორ, რანაირად განესხვავება  
შლაგბაუმი და ჰორიზონტი ერთმანეთს, როცა  
ერთი თუ — ფეხებს და მეორე მზერას გვიკეტავს?!





შეცდომა გახლავთ მსხვრევაც,  
რადგან, ასე მგონია,  
მიწისმზომელი თუ სარგებლობს ამგვარ დაყოფით... —  
დაქუცმაცება, მსხვრევა მხოლოდ ფორმებს ამრავლებს!

ასე გასინჯეთ, შეცდომაა იმათი ცდაც კი,  
ვინც შეცდომების გასწორებას გულწრფელად ცდილობს,  
რამეთუ ამ დროს უნებლიეთ თვითონვე სცდება  
და ასერიგად შეცდომები ერთვის შეცდომებს!..

თავი და თავი შეცდომა კი, უეჭველია,  
კაცის სხეულს სჭირს:  
ერთი თავით აბა რას იზამს,  
როცა ცხოვრება უშეცდომოდ ასე ძნელია?!

მაშ რა გამოდის:  
სიყვარულიც,  
წვაც,  
სიძულვილიც  
შეცდომა არის?! შეცდომაა?! (გადაირევი!);

დიახ, შეცდომა გახლავთ ასე განსჯის სურვილიც  
და ეს ლექსიც ხომ... შეცდომაა, დასტურ, პირველი!


### გზისპირა ბალახი

ბედი მქონია —  
არასოდეს  
მე კალენდარში  
ჩემი მრისხანე საუკუნე არ ამრევია!  
და ვერც ვერასდროს ვერ შევიძელ (ვერ შევიძელი...),  
ვქცეულიყავი იმ წარმავლის ხელში რუპორად,  
რომელიც იყო წარმატების ტოლფასოვანი!..

ბედმა მარგუნა —  
ვყოფილიყავ ყველასთან ერთად;  
მაგრამ — არასდროს მათთან,  
ყველას, ყველას სახელით  
ვინც ყვიროდა და ღრიალებდა და ვისაც მუდამ  
მოწმედ მოჰყავდა ყველა ერთად!  
თუმცა ეს „ყველა“  
მხოლოდ სახელი იყო, თორემ ჩირად არ ღირდა!..

ბედმა მარგუნა —  
ხშირად მხოლოდ ტარს ვწოვდი კალმის,



და თუმცა ხშირად მხოლოდ ასე ვივსებდი... მუცელს,  
კალამი მაინც არასოდეს გამიყიდი...  


ბედი მქონია —  
ისე როგორც აი იმ... ბალახს,  
გზის ნაპირას რომ ამოსულა:  
მუდმივ ბეკნაში  
მე ღეროს ნაცვლად, იძულებით ღრმად ფესვს ვიდგამდი..

### ც ა ლ თ ვ ა ლ ა

ქვეყანას ცალი თვალით ვუყურებ  
(მეორე თვალი შუშის მაქვს), მაგრამ  
ცალი თვალითაც ბევრ რამეს ვხედავ,  
ხოლო მეორით —  
უფრო მეტს,  
რადგან

მე საღი თვალით მხოლოდ ვხედავ... და,  
ხოლო დავსილით... ვოცნებობ მუდამ...

### უ ხ ე ბ ა დ ო ბ ა ...

როს საღამოას მიდრეკილი მზე ოქროს სავარცხლად ერჭობა ღრუბლებს  
და სუსტი ქარი როცა ლეკვივით ჩერდება ყოველ ადამიანთან,  
ყოველ გორმასთან, ბურქთან თუ ხესთან, შემოურბენს და დაყნოს-დასუნავს,  
და ახალგაზრდა... სუსხი როდესაც თავის ჭეშმარიტ ძალას გვიჩვენებს,  
უკმაყოფილოდ აგვაბუზღუნებს და გვაკვრევინებს ხალათის ღილებს,  
როს ხავერდით ბინდი ჩამოდის და მიყურდება ყეფა დღიური,  
ხოლო სინათლე აქა-იქ თითქოს ძველთაძველ ნაყშის ფორმას ღებულობს,

კვლავ მიაშიტად ვიქცევი ხოლმე,  
მჯერა სიმართლის და მეჩვენება,  
და მეჩვენება, რომ ბუნებრივი (ჩემი...) სიკვდილით უნდა გავთავდე...

### მ ი მ ლ ო ხ რ ი ს ჟ ა მ ი

დღემ გაიხადა მორთულობა  
ზანგი ქალივით,  
მიიღო თვისი ჭეშმარიტი ფერი, — გაშავდა!..





მაღლა ვარსკვლავნი  
ლეკვებივით  
ჩაცუცქდნენ ისევ.  
აცივდა.  
მერე აინთება სინათლეები.

ცოდვია ამ დროს  
სხვა რაიმე საქმით გართობა,  
მოფერება და სიყვარულიც კი ცოდვა გახლავთ.

დაე მოძალდეს მდუმარება ზამბარის მსგავსი  
და იწყოს სუნთქვა ისე მძლავრად,  
რომ თავისთავად... სამზარეულოს ჭურჭელმაც კი იწყოს ზრიალი,  
რომ ჩვენთა ყურთა მღვიმეებში ღამურებივით  
ძილად მიიქცნენ ხმები, ხმები და ჩვენს სულებში  
გამოიღვიძონ ღმერთებმა, რომ თავად ღმერთებმა  
ბნელს და სიცივეს, სუსხს და მრუმეს ჩვენც შეგვარიგონ...

რა კარგი არის,  
სიყვარულის გარეუბნებში  
რომ არ იცხოვრე, მხოლოდ ცენტრი რომ იცი მისი.

რა კარგი არის,  
შენი თმების ახლებურ ტალღას  
ძველი სიკეთის სუნი... რომ სძევს —  
ფერი სპეტაკი!..

რა კარგი არის, რომ მიზიხარ გვერდით უჩუმრად —  
სინდიოფალას მსგავსად...  
და შენს სოველ თვალებში  
პატარ-პატარა ხოხბები რომ სხდებიან ახლა...  
თუმიცა... ვჭ... ალბათ... სინათლეებს ანთებენ უკვე...

**სიხარბის ფასი**

საჭირთა კი, მუდამ გვერდით რომ მყავდე?! —  
რატომ?!  
...და მე ვეწევი,  
ეს სიხარბე, სისხლისგამშრობი,  
მწარე კვამლივით რომ როგორმე განვდევნო ჩემგან;  
და ვცდილობ, რაც მაქვს, კმაყოფილი ვიყო იმითაც,  
და რაც მაქვს, განა ცოტა არის?!  
უფალო ღმერთო,  
ხომ ჭეშმარიტად, ჭეშმარიტად ცოტა არ არის?



მაგრამ ცხოვრების მტვირიან ჩარხზე, როგორც ჩანგალზე,  
ჰკიდია ხარბი სურვილები  
და ჩვენ გვიხმობენ.

მაგრამ ცხოვრების მტვირიან ჩარხზე, ვით ბასრ ჩანგალზე,  
ჰკიდია ჩვენი დაფლეთილი სული და სულის  
პატარ-პატარა ნაფლეთები კონწიალობენ...

მე არ მსურს, მექცეს ილუზია ნაფლეთ სუდარად  
და მერე ქვეყნის მტვირიან ჩარხზე იკონწიალოს!  
მე შენ მიყვარხარ,

შენთან ერთად... — შეუძლებელიც —

კმაყოფილებად წოდებული, რომელსაც ჩვენი  
ყოფიერება ვერც იტანს და ვერც ეგუება.

მაშ რა ვქნათ?!

როგორ შევიყვართ ჩვენ ერთმანეთი  
ისე...

...რომ მეტი არაფერი აღარ გვინდოდეს?!

ვით მოლაღატე, საკუთარი სურვილი უნდა  
მაგრად დავლურსმით ოთხი ლურსმნით და შემდგომ ამის  
საკუთარ ტკივილს ოთხი ტაფა თაფლი წავუსვათ  
და ვყლაპოთ, როგორც სასარგებლო წამლის აბები —  
განმკურნებელი, თუმცა მწარე და უამური!  
ჩვენი ფიქრები ერთ კვადრატად უნდა გამოვჭრათ,  
საკუთარ სისხლით დავაწეროთ —  
„მეტია, რაც მაქვს“ —  
ხელისგულებზე დავიჭედოთ და ყოველ წამში  
ჩავხედოთ ჩუმად, ვით მოსწავლემ უცოდინარმა...

### უკანრო ზარქვეუ

გაგიყვებულნი რომელიღაც  
ზამთრის ფრინველი  
სალამო ხანის მოახლებას ლოცვას აღუვლენს  
და არც კი იცის,  
მოახლებულ ყოველ სალამოს  
რომ მოაქვს ჩემთვის მათრობელა შენი სურნელი  
და ყველა ჩიტის მოძახილში შენი სახელის  
მსგავსი მარცვლების აღმოჩენას რომ ვცდილობ მხოლოდ!...

მთელი დღე თოვდა  
და ეს თოვა (თითქოს საქვეყნო)  
შორით შორს  
თოვლის ერთ ბადეში გვხვევდა ორთავეს.  
და მიდუმარება ახლა უკვე ისე სველია,



ისეა მძიმე, როგორც ჩემი ფეხსაცმელები  
ან — შენი პალტო.

ეჭა, მძიმე ეს მდუმარება!  
თითქოსდა ახლა მოდგა ვიღაც ცნობისმოყვარე,  
მოდგა და ჩუმად ვებერთელა ეს მდუმარება  
ვით უჭაერო, ჩაყანგული ვეება ზარი  
ცხოვრებასა და მთელ ქვეყანას  
თავზე დაამხო,  
ცდიდესო თითქოს —  
ჩვენი გული ასეთ ყოფაში  
თუ კიდევ რამდენ ხანს გაუძლებს, როდის გასკდება!..

სიბნელე ახლა ლაკმუსივით იწოვს სინათლეს.  
ზამთრის ტყეს თითქოს ტეტანუსი შეჰყრია სნებად.  
მისანდობს რასმე,  
იმედით რომ ხელი ჩავჭიდო,  
ჩემს იქით ვეძებ.  
ვერაფერი ვერ მიპოვია.  
შენ არ ხარ...

და... მე უნებლიეთ ვბურტყუნებ ახლა,  
ყრუდ ვბუზღუნებ და კარგად მესმის, თუ ფრინველები.  
ამგვარად რისთვის ქვითქვითებენ; ისინი ახლა  
იფხრიწებიან ან სკდებიან შემხუთველ ზარქვეშ,  
ჩემი ბუზღუნიც ისეთივე სკდომაა სწორედ,  
მთლად უჭაერო იმავე ზარქვეშ დატანებული...

თითქოს დასრულდა ცდა და ახლა  
ამ დასასრულის  
ყოვლად სარწმუნო სიგნალები მაცნე ქარს მოაქვს;  
ტეტანუსიან ამ ტყეს იგი დაჰმართებს ბნელას,  
ააცახცახებს ფანჯარაზე,  
კარქვეშ ან თოვლზე,  
თავადაც თითქოს ბნედიანი იყოს მავანი!...

სიბნელეს უკვე კუბში აჰყავს თავისი თავი,  
მძიმე სიმრუმეს ურევს თოვლის სისპეტაკეში,  
ღებულობს რაღაც გაურკვეველ უფერულობას  
და ცხოვრებას თუ ადამიანს,  
ასე გასინჯეთ,  
ადამიანის სუნთქვასაც კი ამ ფერს გადასდებს;  
და უღიმღამო როს ეს ფერი სუნთქვასაც ხვდება,  
ადამიანებს ძილი იპყრობთ,  
რათა... ცხოვრების  
უფერულობა ფერად-ფერად სიზმრებით ღებონ.



მაგრამ მე ძილი სულაც არ მსურს.  
 მბრუნავ და მბრუნავ  
 დედამიწაზე, ვით ვეება სალესავ ქვაზე,  
 ჩემს ღამეს ვლესავ, ვაფხიანებ ჩემეულ ღამეს,  
 რამეთუ მუდამ ალესილი დამირჩეს გრძნობა  
 და ჭრას ის გარსი, სიყვარულს რომ ისევ უბრუნებს  
 ბრუნვად თვისებას, რათა ისიც იყოს ბრუნვადი...

**ვიდრე ჯერ კიდევ სიყვარული ჩემი შორს არის**


ჩემი ახალი სიყვარული ვიდრე ჯერ კიდევ  
 შორს არის ჩემგან, სმენით ვუსმენ,  
 მაგრამ ვერ ვხედავ,  
 ვითარცა ტყეებს შეფარებულ მგალობელ ფრინველს...

**ჩვენს შორის ერთი**

ჩვენს შორის ერთი აქ არ არის, უეჭველია...  
 ჩვენს შორის ერთი —  
 ან მე, ან შენ;  
 შენ თუ აქ არ ხარ,  
 მაშ როგორ ხდება,  
 რომ შენ მუდამ  
 ჩემთან ხარ მაინც,  
 ჩემთან — ოთახში,  
 ჩემს თითებქვეშ  
 და ჩემს ბაგეზე.  
 მე თუ აქ არ ვარ,  
 როგორ ხდება,  
 რომ შენთან არ ვარ,  
 შენთან — ოთახში,  
 შენს თითებქვეშ  
 და შენს ბაგეზე;  
 მართალი, ალბათ,  
 ის თუ არის,  
 რომ ორთავენი — არც შენ და არც მე — აქ არა ვართ,  
 მე იქ ვარ, სადაც  
 შენა ხარ, ხოლო  
 შენ იქა ხარ, სადაც რომ მე ვარ.  
 ასე მიველტვით ერთმანეთს და შენ ჩემკენ მოხვალ,  
 ხოლო მე — შენკენ



და... ვერა და ვერ შევხვედრივართ  
ერთმანეთს... აი, ეს რამდენი წელიწადია.



### მოგინატრება თოკი

შეუცნობლობა  
როცა გულში ჯაღჯაღებს ისე,  
ვითარცა სათლი —  
ამომშრალი ჭის სიღრმეებში,  
ერთ მაგარ თოკს თუ მოვინატრებ, რათა (ღმერთმანი,  
ყულფის შეკვრა და ჩამოხრჩობა არ მიფიქრია!)  
ამომიყვანოს, — ავსებული თუ აღუვსები, —  
ეს სულერთია, ოღონდ მაღლა ამომიყვანოს.  
ნამდვილად რომ გძულს,  
ხომ არსებობს ისეთი სიღრმეც?!

### ბედნიერების ლაურეატი

მყობადი უფრო მალე მოდის, აწმყო კი, აწმყო,  
განშორება რომ ეძნელება, გვშორდება ვიდრე.  
ასე მოსულხარ... შენც და,  
ახლა  
მე, დაბნეული,  
შეშფოთებული ვიღიმები და ვიღიმები,  
გადავქცეულვარ მთლად ღიმილად —  
ვითარცა ბუდა...

და მიკვირს,  
გული მომდის კიდევ,  
ბედნიერების  
რომ არ არსებობს მთელი ქვეყნის არც ერთ კუთხეში  
კონკურსი, თორემ ასეთი რამ რომ ყოფილიყო,  
ლაურეატის გვირგვინს ნაღდად მე დამადგამდნენ.  
და მერე, ალბათ,  
ყველა ჩემსკენ თითს მოიშვერდა,  
კეთილი შურით დამიწყებდა ყველა ყურებას  
და კეთილ შურით მოიჩლექდა ენას:  
„შე!.. ხე!.. დეთ!..  
ყვე!.. ლა!.. ზე!.. უფ!.. ღო!.. ბედ!.. ნი!.. ე!.. ლი!..

აი ეს არის“.



...ქვეყნად ყველაზე ბედნიერი კაცი ლაპარაკს  
 როდესაც იწყებს, სტიქიაც კი ყურს უგდებს... ხოლმე,  
 ტყუილ-უბრალოდ ნუ იფიქრებ, თითქოსდა გარეთ  
 ჩვეულებრივი იყოს თოვა...  
 ასე არ არის,  
 ახლა, უბრალოდ, მე „სიყვარულს“ ვაბრუნებ ფიქრში

და ჟღერს ეს ბრუნვა — ვით ბრძანება —  
 რათა იბრუნოს  
 ამ მსხვილფანტელა თოვლმაც ნათლად და დიდებულად,  
 და ჩემ ფეხთა ქვეშ მშრალი თოვლის ჭრიალი მახნევს,  
 მუდამ ერთ რამეს რომ მახსენებს,  
 რაიც ადვილად  
 არ მოგდის აზრად და ხანგრძლივი ფიქრის წყალობით  
 თუ მიიღწევა: უცაბედად გაივლებ აზრად,  
 რომ სიხარულით გულიც ზუსტად ასე ჭრიალებს...

ტყუილ-უბრალოდ ნუ იფიქრებ, — თითქოსდა ნისლი  
 დაბლიდან მაღლა მოუყვება ხეობას ისე,  
 თითქოს ქვემოდან წამოსული იყოს ჩანჩქერი.  
 ასე არ არის,  
 ეს მე ვდგავარ ხეობის თავზე  
 და ვსუნთქავ ისევ და... სინაზის სიტყვებს ვაბრუნებ.

ტყუილ-უბრალოდ ნუ იფიქრებ, რომ გაზაფხულის  
 სუნი აიღე უკვე და ჰა, კვლავ მოწეულა  
 ჟამი დნობისა და საცაა ისევ და ისევ  
 შეუმჩნევლად ხეზე უნდა დასკდნენ კვირტები.  
 ასე არ არის, —  
 ეს მე ვნათლავ ისევ სიყვარულს —  
 კვლავ მოახლებულს — ჩემი თბილი სუნთქვის ემბაზში  
 და სწორედ ამის გამო არის, რომ ამ წარმართმა  
 ზამთარმა უკვე აიკიდა გუდა-ნაბადი  
 და გამდნარ თოვლის ნიაღვრებს რომ მისდევს ძუნძულით.  
 და სწორედ ამის გამო არის — ხეთა შტოებსაც  
 ჩვილი ბავშვივით ღრძილები რომ დაუსკდათ უკვე  
 და კვირტები რომ კბილებივით გამოაჩინეს.

და გაზაფხული უფრო ადრე, ადრე შემოდის,  
 ვიდრე ზამთარი მიდის, წასვლა რომ ეძნელება...  
 შენც, სიყვარულო, სწორედ ასე, ასე მოსულხარ,  
 მოსულხარ ჩემი სურვილით თუ ჩემი ბრძანებით,  
 რაც სხვა არარა არის, ვიდრე ზმნა „სიყვარულის“  
 უღლება, ვიდრე უღლებაა ზმნა „სიყვარულის“...



კოცონი ყინულზე




ნება მომეცით,  
ვაზიარო ყველა თქვენგანი  
მარად თანმდევი სასოების იმ სიტკბოებას,  
რომლის ჭაშნიკი არასოდეს არ გაგისინჯავთ!  
იგემეთ იგი,  
ამოველეთ თხემით ტერფამდი  
შიგ — ღვთისმოსავის ყმაწვილური გულუბრყვილობით,  
რადგან — სიმდიდრე ჩვენი — მხოლოდ დარდი არ არის!..  
და არც ტანჯვაა — დაფარული ჩვენი მარაგია!..  
რადგან — არ ნიშნავს სხვას არაფერს საგონებელი,  
თუ არ ძიებას გამოსავლის!  
რადგან ცხოვრება — რაც უნდა იყოს — არ იშურებს ჩვენთვის სივრცეებს,  
ვითარცა მთების მწვერვალები — იმ თვალსაწიერს,  
იმავე მთების ფერხთა ქვეშ რომ ჩერდება თითქოს!  
რადგან ჯერ ყველა თქვენთაგანი მიყვარს და მერმე —  
ყოველთა შემდგომ —  
საკუთარი თავიც... აგრეთვე!

მაშ ასე,  
ველი თქვენს თანხმობას,  
რომ გაზიაროთ  
დიდი ხნის ნაცნობ სასოების იმ სიტკბოებას,  
ჩვენს გუშინდელ და  
ჩვენს დღევანდელ უძღურებას რომ  
მიმართავს — „შესდექ!“ — მოზიდული ყველა სადავით!..  
...და ჩვენი ტანის უფესვო ხის ამოუხსნელი  
და იდუმალი ცდა გარკვეულ ნაყოფს იძლევა:  
სიცილს  
და ღიმილს,  
ღიმილსა და  
კმაყოფილებას  
და „ღმერთო ჩემო დიდებულოს“  
ძახილის ძალას...

და ღმერთს დიდება,  
რომ თვალები, ჩვენი თვალები  
ყვავთა და ბუთა საბუდარი არ არის მხოლოდ,  
არამედ სკაა, სკაც — სხივსავსე!  
ხოლო ყურები —  
წყვილი ფულურო ადამის ძის ფორმის ხის ტანზე, —  
გულისტკივილის აკლდამები როდია მხოლოდ,  
ღრმა ბუდეც არის,



ათასგვარი, ათასნაირი  
საამო ჰანგით ავსებული.




ეროვნული  
ბიბლიოთეკა

და ღმერთს დიდება,  
რომ ჩვენც ისევე, ჩვენც ისევე — ვით ოკეანეს —  
ხელგვეწიფების თვითგანწმენდა!

და ღმერთს დიდება,  
რომ ხმათა, ხმათა მომძლავრება ღამეს კი არა,  
დღეს ადგამს გვირგვინს, დღეს შობს, დიას!

და ღმერთს დიდება,  
თუკი ჩვენს სულში ფოთოლცვენის თვე იქუფრება,  
არის აგრეთვე ვარსკვლავთცვენის დღეთა სუფევაც... —  
ვარსკვლავთცვენისა...

შირიადი დიდება შენდა!..







### მოთხრობა

ინგლისურიდან თარგმნა ზურაბიან გეგაზაშვილმა

ნევილ შიუტი (1899—1960) ცნობილი ინგლისელი მწერალია. მეორე მსოფლიო ომის დროს მსახურობდა საზღვაო ავიაციაში. ლიტერატურული მოღვაწეობა ნ. შიუტმა დაიწყო სათავედასავლო რომანების სერიით — „მარაზანი“ (1926 წ.), „საიდუმლო მფრინავი“ (1928 წ.) და სხვა. მრავალფეროვანია ნ. შიუტის შემოქმედება. რომანში „სახმელეველი“ (1930 წ.) აღწერილია 30-იანი წლების დიდი ბრიტანეთის ეკონომიური კრიზისი. ომის წინააღმდეგაა მიმართული რომანი „გამოცდა“ (1939 წ.), სადაც მწერალმა გაბედულად იწინასწარმეტყველა გერმანელ ფაშისტთა თავდასხმა ინგლისზე. ნ. შიუტის კალამს ეკუთვნის დეტექტიური ნაწარმოებებიც „მიახლოება ნაპირთან“ (1940 წ.). ამ მოთხრობის გმირი ინგლისელი მფრინავი ლამანშუე იბრძვის. რომანში — „გამელენელი მეთავე“ ფაშისტების მიერ ოკუპირებული საფრანგეთის ცხოვრებაა აღწერილი. განსაკუთრებით საინტერესოა რომანი „ჭადრაკის დაფა“ (1947 წ.), სადაც აღწერილია ზანგი ჯარისკაცის ტრაგიკული ბედი, მისი დისკრიმინაცია თეთრკანიანთა არმიის მიმართ.

ნ. შიუტის მრავალი ნაწარმოები ეკრანიზებულია, — ფართოდაა ცნობილი მისი ფანტასტიკური რომანი „ნაპირზე“ (1957 წ.), რომლის მიხედვითაც გამოჩენილმა რეჟისორმა ს. კრეიბერმა შექმნა შესანიშნავი ფილმი „უკანასკნელ ნაპირზე“. ამ ნაწარმოებში ნ. შიუტი მკაცრად ილაშქრებს ატომური ომის წინააღმდეგ, მთელი სიცხადით აჩვენებს მკითხველს ატომური ომის კატასტროფულ შედეგს. ავსტრალიაში შემთხვევით შემორჩენილი რამდენიმე ადამიანი, რომელნიც უკვე დაავადებულნი არიან რადიაციით, გამირულად, ამსყად, ღირსეულად ეწირებიან იმ გამანადგურებელ ომს, რომელსაც ატომური ომი ჰქვია.

ნევილ შიუტი ღრმა ფსიქოლოგიური გააზრებით, დიდი სიფაქიზით ხატავს, ერთი შეხედვით, უბრალო, ჩვეულებრივ ადამიანთა ურთიერთობას. მოთხრობა „პასტორალი“ ამის შესანიშნავი მაგალითია.

ქვერველამ ველოსიპედი კედელს მიაყუდა და სადარბაზო შესასვლელთან ზარი დარეკა. მუხის კარი ხნიერმა ქალმა გააღო, რომელიც წინა საუკუნის მოახლესავით გამოწყობილიყო — მაქმანიანი წინსაფარი ეკეთა და არშიანი თავსაფარი ეხურა.

— დილა მშვიდობისა, — მიესალმა ქვერველა. — მისის კარტერ-ჰეისის ნახვა თუ შეიძლება?

— სამწუხაროდ, მისის კარტერ-ჰეისი შინ არ გახლავთ, მადამ, — თავაზიანად უპასუხა მოახლემ.



ქალიშვილი შეწუხდა.

— თავს არ მოგაბეზრებდით, მაგრამ შორიდან ჩამოვედი, მისის კარტერ-ჰეისი მართლა არ ბრძანდება შინ?

მოახლემ ამჯერად უფრო მკვახედ მოუჭრა:

— ქალბატონი დღეს არავისთვის არ გახლავთ შინ, მადამ!

— ძალიან გთხოვთ, იქნებ ერთი წუთით მაინც მიმიღოს, — შეევედრა ჟერვეზა. — მთელი ათი კილომეტრი გამოვიარე ჰარტლეი მაგნადან, მისის კარტერ-ჰეისი რომ მენახა. თუ დღეს ვერ ვნახე, მაშინ ხელმეორედ უნდა ჩამოვიდე. ეს კი ორ გზობაზე ოცი კილომეტრია.

— დიახ, მადამ, მართლაც შორი მანძილია, — თავაზიანად შენიშნა ხნიერმა მოახლემ.

— ჰო, ძალზე შორია, — ჩაფიქრებით წაილაპარაკა ჟერვეზამ. — იქნებ სთხოვოთ, რომ მხოლოდ ერთი... სულ ერთი წუთით მიმიღოს.

— მისის კარტერ-ჰეისი შეუძლოდაა, მაგრამ მაინც ვთხოვ, რაკი ასე შორიდან ჩამოსულხართ. მიბოძეთ თქვენი სადარბაზო ბარათი.

— სამწუხაროდ, თან არა მაქვს, — უპასუხა ჟერვეზამ, — ასე გადაეცით, მისს რობერტსონს უნდა-თქო თქვენი ნახვა. მე დიდხანს თავს არ შევაწყენ.

— გიციობთ?

— არა...

— შემობრძანდით, მადამ.

ჟერვეზა სადარბაზოში შევიდა, ხნიერმა მოახლემ კარი გულდაგულ ჩაკეტა.

— ქარი ისევ ქრის, — თქვა დარბაისელმა მოახლემ და ახლა უკვე დედობრივი სინაზით გაუღიმა ჟერვეზას. — თქვენ აქ მომიცადეთ ცოტა ხანს, მე ახლავე გავიგებ, მიგიღებთ თუ არა მისის კარტერ-ჰეისი.

მან სწრაფი ნაბიჯით გაიარა სადარბაზო.

ჟერვეზამ მიმოიხედა. სადარბაზოში ქაფურის, იატაკის საღებავისა და ძველი ტყავის სუნი იდგა, როგორც ლორდთა ყველა ჟამგადასულ პალატებში, სადაც ყველაფერი ძველ ყაიდაზეა შემორჩენილი. მაგიდაზე ვერცხლის ლანგარი იდო, შიგ სადარბაზო ბარათები ელაგა. მის გვერდით გაპრიალეებული შანდალი და ასანთი მოჩანდა. კედელზე დიდი ბირმული გონგი ბრწყინავდა. ბუხარში ცეცხლი გიზგიზებდა. კედლებზე რამდენიმე გახუნებული, დრომოჭმული გრავიურა ეკიდა. ძველ, ხის ჩარჩოში ჩასმულ მომცრო შუშის ყუთში გლუვლულიანი ზარბაზნის ჭურვი იდო. ჟერვეზა კარგად იცნობდა ასეთ სახლებს.

ხანშიშესული მოახლე დაბრუნდა.

— წამობრძანდით, მადამ, — უთხრა მან.

ჟერვეზა უსიტყვოდ გაჰყვა. ოთახის ყველაზე შორ კუთხეში ფართე ვენეციური სარკმელი შეამჩნია, საიდანაც ტყის პირი და პატარა ტბა მოჩანდა. ერთხელ იმ ტყეში პიტერთან ერთად ისეირნა. ამ ტყის დანახვამ გამბედაობა შეჰმატა.

ჟერვეზამ თვალით მოძებნა სახლის პატრონი. წელგამართული, მაღალი, ხნიერი მანდილოსანი ბუხართან იჯდა სავარძელში და მისკენ იცქირებოდა.



სადა, თეთრსაყელოიანი შავი კაბა ეცვა. ჭალარა თმა გულდაგულ ჰქონდა გადავარცხნილი და უკან უბრალოდ დამაგრებული.

კარი წყნარად მიიხურა. ჟერვეზამ გაუბედავად იკითხა:

— მისის კარტერ-ჰეისი თქვენ ბრძანდებით? ჩემი გგონია რომ ბრძანდებით.

დიდი სიკეთეა თქვენი მხრივ, რომ მიმიღეთ.

მოხუცმა ქალბატონმა ერთობ თავაზიანად უპასუხა:

— შემოდით, ჩემო გოგონა, ნუ დგახართ კარებში. რა გქვიათ?

— ჟერვეზა... ჟერვეზ-ლორა.

იგი ბუხარს მიუახლოვდა.

— ეტყობა, დედათქვენი მაშინ ტენისონს კითხულობდა. ღმერთო ჩემო, რა ტანისამოსი გაცვიათ?! ეგ ფორმაა?

— დიახ, ეს სამეფო სამხედრო-საჰაერო ძალების ფორმაა. მე ლეიტენანტი ვარ, — თქვა და მაშინვე ენას კბილი დააჭირა, სიტყვამრავლობა არ გამომივიდესო.

— კეთილი. აბა, შემობრუნდით, ერთი გვერდიდანაც შემოგხედოთ, — თქვა მისის კარტერ-ჰეისმა და ტერფით თხემამდე შეათვალიერა ქალიშვილი.

ჟერვეზა ნელ-ნელა შებრუნდა. იგრძნო, რომ კალმასზე თევზაობის ნებართვას ამის წყალობით უფრო მალე ჩაიგდებდა ხელში. ეტყობა, მოხუცმა ლედიმ კარგ თვალზე შეხედა.

— მე მიმაჩნია, რომ საშინელი ჩასაცმელია, მით უმეტეს ქალისთვის, — მტკიცედ წარმოთქვა მოხუცმა მანდილოსანმა. — თუმცა ეგეც კი გიხდებათ, კარგ კაბაში ხომ პირდაპირ მომხიბლავი იქნებით. ალბათ ძალზე ახალგაზრდა ხართ.

— ოცდაერთისა ვარ, მისის კარტერ-ჰეის.

— თვითონ აპრილებით მაგ დილებს?

— არა, მორიგე. თუმცა მეც ვაპრილებდი, ვინემ ოფიცერი გავხდებოდი.

— მერე თქვენ ხომ ლედი ხართ? განა მოსამსახურე პერსონალთან ერთად ცხოვრობდით?

— არც ისე ურიგოა, ყველამ ასე დაიწყოს, — იწყინა ჟერვეზამ.

— მე კი მგონია, რომ თქვენნაირ ქალიშვილს ეს სრულიად არ შეჰფერის. ვინ იცის, რას არ გასწავლიდნენ. ახლა კი თქვენ მეთაურობთ იმ ხალხს და ცდილობთ ისე არ მოხდეს, რომელიმეს ბავშვი ეყოლოს, არა?

— ეგ მე არ მევალება. მე ხომ რადიოტექნიკის ოფიცერი გახლავართ, იმ გოგონების მეთაური, რომლებიც რადიოსადგურებსა და სატელეფონო ხაზებზე მუშაობენ. საყოფაცხოვრებო საქმეებს სხვები განაგებენ. მაგრამ ხანდისხან ჩვენც უნდა წავახმაროთ ხელი.

— დეილმა გადმომცა, თუმცა ჰარტლეი მაგნადან ჩამოხვედით. ეგ თქვენი თვითმფრინავებია, ღამით თავზე რომ გადაგვიფრენენ ხოლმე?

— შეიძლება ჩერვიკის აეროდრომიდანაც იყოს. ისინი დაფრინავენ რურის ტრასაზე.

— თქვენც დაფრინავთ?

— არა, მე მიწაზე ვრჩები და რადიოთი ვუკავშირდები მათ.

— რისთვის გნებავდათ ჩემი ხილვა?

— მე მინდა ჩვენს ერთ-ერთ ეკიპაჟზე მოგელაპარაკოთ. ისინი ბომბდამშენებით დაფრინავენ გერმანიაზე. ყველას გაგიჟებით უყვარს თევზაობა. თევ-



ზის ჭერის დრო კი გავიდა და ამიტომაც საშინლად მოიწყინეს, ნერვიულობენ, აღარ იციან, რა ქნან. იქნებ ნება დართოთ უქმე დღეებში თქვენს ტბაში კალმახზე ითევზაონ.

კარი წყნარად გაიღო.

— დეილ, გეთაყვა, ჩვენს სტუმარს ჩაი მოართვი, — უთხრა ხანდაზმულმა ლედიმ.

კარი ისევ უხმოდ მიიხურა. მოხუცი ქალბატონი ჟერვეზას მიუბრუნდა:

— ორი წლის წინ, სანამ ჩემი ვაჟიშვილი ფრონტზე წავიდოდა, კალმახის ლიფსიტები გაუშვა ტბაში, ჩემს ჩამოსვლამდე უკვე წამოიზრდებიან და მათზე თევზაობა კარგი იქნებაო, — რატომღაც მკვახედ თქვა მან. — ამიტომ მე არავის ვრთავდი ნებას ჩვენს ტბაში ეთევზავა.

ჟერვეზას იხტიბარი წაუხდა. ელისონმაც სწორედ ასევე აუხსნა, ამიტომაც აქ აღარ უნდა მოსულიყო. თავის მხრივ ეს მოხუცი ქალი სრულიად მართალი ბრძანდებოდა. ჟერვეზამ იგრძნო, მთელი ღამე ენად რომ გაკრეფილიყო, მაინც ვერაფერს მიაღწევდა, უბრალოდ წყლის ნაყვა იქნებოდა.

— მაპატიეთ, — თქვა მან. — ეგ არ ვიცოდი. ჩვენს ბიჭებს ძალიან უნდოდათ... და მეც ვიფიქრე...

— ჩემო კარგო, — თქვა მოხუცმა ქალბატონმა. — თქვენ ამბობთ, ვილაც ბიჭებიო. მე არც კი ვიცი, ვისზე მელაპარაკებით.

— ეს თვითმფრინავის ეკიპაჟია, — წყნარად უპასუხა ჟერვეზამ. — ბიჭები, რომლებიც ბომბდამშენებს მართავენ. ყოველ თვითმფრინავში ხუთი კაცია.

— ხუთი კაცია?

— დიახ.

— ეგენი ბომბავენ რურს? ძალზე მამაცი ბიჭები ყოფილან, რაკი უკუნეთ ღამეში იმ სიშორეზე დაფრინავენ.

ეს აზრი ჟერვეზას ეოცა, ახლებურად ეჩვენა. ისე იყო ამას მიჩვეული, რომ არც არაფრად აგდებდა.

— დიახ, ისინი ძალზე მამაცები არიან, — წყნარად თქვა მან. — ძალზე გულადები.

— ჰოდა, ისინი ნერვიულობენ? მგონი, ასე თქვით, არა?

— ღამე ფრენა საშინლად მოქმედებს ნერვებზე, — უპასუხა ჟერვეზამ.

კარი ისევ უხმოდ გაიღო და ხნიერი მოახლე შემოვიდა. იგი გორგოლაჭებიან მაგიდას მოაგორებდა. მაგიდაზე ვერცხლის ჩაიდანის, სიფრიფანა ფაიფურის სერვიზი, ნამცხვარი, პური და კარაქი ელაგა. მან ქალბატონს და სტუმარს სულ ახლოს მიუდგა მაგიდა, ისე რომ საუბრისათვის ხელი არ შეუშლია.

— ღამე არ გავა, რომელიმე ეკიპაჟი არ დაიღუპოს, მაგრამ ვინც რჩება, ისევ მიფრინავს. ეს რამდენიმე თვეა ასე გრძელდება. ეკიპაჟის წევრები კარგი მეგობრები არიან, შესანიშნავად იციან ერთმანეთის ხასიათი, იმიტომ რომ ერთი მთლიანი სხეულივით მუშაობენ.

მოხუცმა ლედიმ თავი დაუქნია.

— ჩემი ვაჟიშვილი ყოველთვის ამბობს, პოლოს კარგი გუნდი მეგობრებისაგან უნდა შედგესო, — ჩაილაპარაკა მან. — თქვენ ამისი თქმა გსურთ?

ჟერვეზას თითქოს ცივი წყალი გადაასხეს. მას წარმოდგენა არ ჰქონდა პოლოზე, მაგრამ სხვათა შორის მაინც თქვა:

— სრული სიმართლეა.



— კარგია... მაგრამ თევზაობა აქ რა შუაშია? დაშაქრულ ჩაის მიირთმევთ?

— გმადლობთ. როგორც კი დროს იხელთებდნენ, ყოველთვის სათევზაოდ დადიოდნენ, სანამ თევზის ჭერა შეიძლებოდა: თავს იქცევდნენ, სეზონის დამთავრების შემდეგ კი აღარაფერი შემორჩათ გულის გადასაყოლებლად. ერთმანეთს დაუწყეს კინკლაობა: გადაიღალნენ ბიჭები... საშინლად გაღიზიანებულნი არიან, — ჟერვეზა გაჩუმდა. შემდეგ ისევ განაგრძო, — ამას შეცდომებიც მოყვა... წინა აფრენაზე კინალამ დაიღუპა მანქანა.

მოხუცი ლედი გაოცებული მიაჩერდა.

— მაშასადამე, თქვენ გგონიათ, თუ ჩემს ტბაში ითევზავებენ, ის ძველი მეგობრობა აღდგება?

ჟერვეზა ოდნავ შეცბა. იგი არაფრით არ ელოდა, რომ ასე ჩქარა მიუხვდებოდნენ გულისნადებს.

— სწორედ მაგას ვფიქრობდი.

— ვინ არის ეგ ხალხი? ეკიპაჟს მეთაური ჰყავს?

— ჰყავს, — თავი დაუქნია ქალიშვილმა. — კაპიტანი პიტერ მარშალი. დანარჩენი სერჟანტები არიან, რადიოტექნიკოსის გარდა. იგი კაპრალია.

— მაშასადამე, ყველანი ერთად დადიან სათევზაოდ? ოფიცერი, სერჟანტები და კაპრალი?

— დიახ.

— უცნაური ამბავია, — წაილაპარაკა მოხუცმა ლედიმ.

სანამ იგი აკანკალებული ხელით ჩაის დაასხამდა და ქალიშვილს კარაქიან პურს შესთავაზებდა, სიჩუმე ჩამოვარდა. ჟერვეზამ შეამჩნია, რომ დიასახლისმა თავისთვის ბაცი ჩაი დაისხა, არც შექარი ჩაიყარა და არც რძე დაუმატა.

— თქვენი შეყვარებული რომელია?

ჟერვეზას კინალამ ფინჯანი გაუვარდა ხელიდან.

— არც ერთი! — ფიცხად შესძახა მან.

— კარგი. მაშ რომელს უყვარხარ?

ქალიშვილი ერთხანს დუმდა. არ უნდოდა ტყუილი ეთქვა ამ მოუხრებელი მოხუცი ლედისათვის. გარდა ამისა, არც იმაში იყო დარწმუნებული, რომ იმ მიზანს მიაღწევდა, რისთვისაც აქ ჩამოვიდა.

— პიტერ მარშალს, — უგუნებო ღიმილით მიუგო მან.

— ოფიცერია? მეთაური?

— დიახ.

— ცოლად გაყვებით?

— არ ვიცი...

ეს ნამდვილი წამება იყო. ჟერვეზა სირცხვილის ოფლში გაიწურა.

— სასწრაფოდ გადაწყვიტეთ ეგ საკითხი. დიდხანს არ ალოდინოთ, ჩვენს დროში თქვენ არა გაქვთ დიდი ფიქრისა და ყოყმანის უფლება.

ამის გასაგებად ნამდვილად ღირდა ოცი კილომეტრის გამოვლა, — გაიფიქრა ჟერვეზამ, მაგრამ უცებ აზრს თავი ვეღარ მოაბა, სათქმელი ყელში გაეჩხირა და არჩია კარაქიანი პურის დიდი ლუკმა მოეკბინა, რათა დუმილით მიეჩქმალა უხერხულობა. ჟერვეზამ იგრძნო, როგორ შეეფაკლა დაწვები.

მოხუცი ლედი ხელჯოხს მისწვდა, წელი ძლივს აიტანა და რის ვაივაგლახით წამოდგა ფეხზე.



— ჩემი ვაჟიშვილი დიდად აფასებს ავიაციას, — თქვა მან. — მე მის ბოლო წერილს გიჩვენებთ, რომელიც გასულ კვირას მივიღე.

ღიასახლისმა ოთახი გაიარა და საწერ მაგიდას მიუახლოვდა. ჯიბიდან გასაღებების ასხმულა ამოიღო, ერთ-ერთი შეარჩია და მაგიდის უჯრა გამოაღო. იმავე ჯიბიდან სათვალე ამოიღო და გაიკეთა. წერილების დასტიდან ერთი ფურცელი ამოაძრო და ჩუმად დაიწყო კითხვა.

— დიახ, ეს არის, — წყნარად თქვა მან. — სულ ავიაციაზე წერს, მფრინავ ხალიჩებზე. სასაცილო შედარებაა — ომი და მფრინავი ხალიჩები.

იგი თავის ადგილას დაბრუნდა და ბუხართან სავარძელში ჩაესვენა. დიდი გულისყურით გადაათვალიერა წერილის სამი გვერდი, შემდეგ ისევ მეორე გვერდს დაუბრუნდა და ჟერვეზას გაუწოდა.

— აი, მგონი, ეს ადგილია, წაიკითხეთ, ჩემო კარგო.

ჟერვეზამ წერილის ფურცელი გამოართვა. ოკრობოკრო ხელნაწერის გარჩევა გაუჭირდა. მისი ავტორი თითქოს მთლად გადაჩვეულიყო წერას, ან მაგიდად საბარგო მანქანის ძარა თუ ბენზინის ცარიელი კანისტრა გამოეყენებინა.

„ავიაციამ ბრწყინვალედ ისახელა თავი, მის დაუხმარებლად წინ ვერასოდეს წავიწევდით. მთელი დღე შეუსვენებლივ დაფრინავდნენ მოწინავე ზაზზე, ბომბავდნენ და ანადგურებდნენ ყველაფერს, რაც წინ გველობებოდა. ეს პირდაპირ სასწაულია, ჯადოსნური ხალიჩის სასწაული, როგორც ტენდერი ეძახის. მაგრამ ძალიან ძვირად კი დაუჯდათ. გერმანელებს უამრავი მსუბუქი საზენიტო არტილერია აქვთ. ამ ბოლო დღეებში თითქმის ყოველ ნაბიჯზე გვხვდებოდა დამტვრეული „ჰარიკენები“ და „კიტოპოუკები“, მთელი გზა მოფენილი იყო მათი ნამსხვრევებით... კაბინებში ჯერ ისევ მოჩანდა მფრინავთა გვამები... გერმანელები სასტიკ წინააღმდეგობას გვიწვენ. თუ ტუნისისაკენ გავარდვიეთ ფრონტი, ეს მხოლოდ ავიაციის წყალობა იქნება... ისინი საკუთარი სიცოცხლის ფასად გვიკათავენ გზას“.

ჟერვეზამ ფურცელი დაუბრუნა.

— გმადლობთ, რომ ეს წერილი წამაკითხეთ, — თქვა მან.

მოხუცმა ლედიმ ფურცელი წერილთან ერთად კონვერტში ჩაღო და ფრთხილად დადო მაგიდაზე.

— ჩემი ვაჟიშვილი რომ აქ ყოფილიყო, დარწმუნებული ვარ, დაგეხმარებოდათ, — თქვა მან. — თუ თქვენს ეკიპაჟს ტბაზე თევზაობა ნამდვილად უშველის, არა მგონია, ჩემს ვაჟიშვილს უარი ეთქვა. ბოლოს და ბოლოს, ტბაში სხვა ლიფსიტებს გავუშვებთ.

— ძალიან დიდ სიკეთეს იზამთ, მისის კარტერ-ჰეის. ყველა ხარჯს ჩვენ ვიკისრებთ.


— ნუ გგონიათ, მთელ ავიაციას შემოვუშვებ და პარკსა და ყვავილნარს გადავათელინებ. ჩამომიწერეთ მაგ ეკიპაჟის წევრთა გვარები და მე მოწვევას გამოგიგზავნით.

მან ჟერვეზას უბის წიგნაკი და ფანქარი გაუწოდა.

ქალიშვილმა ჩამოწერა გვარები და მისამართებიც. მოხუცმა ლედიმ უბის წიგნაკი ჩამოართვა და სიას თვალი გადაავლო.

— პილოტი სერჟანტი ფრენკი, — წაიკითხა მან. — ძალიან უცნაური სახელია. ინგლისელია?





— დანიელია, — თქვა ჟერვეზამ, — სულ ახალგაზრდა. ომამდე სამედიცინო ინსტიტუტში სწავლობდა. უფროსი შტურმანია და ამავე დროს კაპიტან მარშალის მოადგილე.

— საკვირველი ამბავია.

მცირე ხანს სიჩუმე ჩამოვარდა. ჟერვეზა უკვე წასასვლელად მოემზადა. მოხუცმა ლედიმ შეაჩერა.

— ამ კაპრალებსა და სერჟანტებს ანკესები აქვთ?

— არა, მაგრამ თქვენ მაგაზე ნუ შეწუხდებით, — მიუგო ჟერვეზამ. — თვითონვე იშოვიან ყველაფერს. ფული საკმაოდ აქვთ.

— მგონი, ვიღაცამ მითხრა, ახლა შეუძლებელია ანკესების შოვნაო. თქვენც მათთან ერთად ითევზავებთ?

ჟერვეზას გაეღიმა:

— მე ერთი-ორჯერ ვცადე... ძუა წარამარა მებურღებოდა. ახლაც არ ვიტყვოდი უარს, რომ შეიძლებოდა.

მოხუცი ლედი ისევ მისწვდა თავის ხელჯოხს და ნელ-ნელა წამოდგა.

— წამობრძანდით საჭურვლის ოთახში, — თქვა მან. — იქ ანკესებიც უნდა იყოს.

დიასახლისმა ნელა გადაჭრა ოთახი და ჰოლში გავიდა. ჟერვეზა მიჰყვა. მოხუცი ლედი დაბალ კართან შეჩერდა და გააღო. ისინი პატარა ოთახში შევიდნენ.

აქ ყველაფერს მტვერი დასდებოდა. ხის თაროზე რამდენიმე თოფი იყო ჩარიგებული, კედლებზე შალითებში ჩაწყობილი რვა თუ ათი ანკესის ჯოხი ეკიდა.

მოხუცი ლედი კედელს მიუახლოვდა.

— ეს კალმახისთვისაა, — წყნარად თქვა, — ესენიც. ეს სპინინგი აქ არ გამოდგება, არც ის ორი, — ზუთხის საჭერია, აი, კიდევ კალმახებისთვის.

გადარჩეული ანკესები მან მაგიდაზე დააღაგა.

— ძუა ალბათ აქ არის... ჰო, აქაა.

— დიდი სიკეთეა თქვენის მხრივ, მისის კარტერ-ჰეის, — თქვა ჟერვეზამ, — მგონი, ძალიან შეგაწუხებთ...

— თქვენი მეგობრები თუ ვერ იშოვიან სათევზაო იარაღს, მაშინ რაცა გვაქვს, ამით გადით იოლას. მხოლოდ ერთი პირობით, თან არ გაიყოლოთ.

— მაგას რა თქმა უნდა, — წამოიძახა ჟერვეზამ. — დარწმუნებული ხართ, ქალბატონო, თქვენი ვაჟიშვილი ნებას დაგვრთავდა?

— დიახ, ამ ანკესებით ჩვენი მეგობრები თევზაობდნენ ხოლმე, როცა გვესტუმრებოდნენ. — იგი გაჭირვებით დაიხარა, კარადა გააღო, ტყავის ჩემოდანი გამოიღო, მაგიდაზე დადო და სახურავი ახადა. წითელი მაუდის სარჩულიან ბუდეში მომცრო ანკესი იდო მთელი თავისი მოწყობილობით.

— ეს ჩემი ვაჟიშვილის ანკესია. თქვენ თუ ჩამოხვალთ, შეგიძლიათ ამით ითევზაოთ. ძალიან მსუბუქია. ოღონდ არ მინდა, თქვენს გარდა ვინმემ მოჰკიდოს ხელი... ოდესღაც, თქვენხელა რომ ვიყავი, მეც ასეთი ანკესებით ვთევზაობდი... ეს ძალიან დიდი ხნის წინ იყო...

— თქვენი ვაჟიშვილი არ გაწყრება, მის ნივთებს რომ ვიხმართ?

— პირიქით, კმაყოფილი დარჩებოდა... ისე რომ შეგიძლიათ ყველაფერი მოიხმართ, რაც აქ არის, — თქვა მოხუცმა ლედიმ. მან თანამიმდევრობით



გახსნა ყველა შალითა. — დეილს მე გავაფრთხილებ. იგი შემოიყვანს აქ თქვენს მეგობრებს. ჩამოდით, როცა მოახერხებთ.

ღიასახლისი ისევ ჰოლში დაბრუნდა.

— ახლა კი დავემშვიდობოთ ერთმანეთს, ჩემს ასაკში აღამიანო ჩქარა იღლება. გმადლობთ, რომ მესტუმრეთ, ჩემო ძვირფასო.

— თქვენ ძალიან კეთილი ბრძანდებით, მისის-კარტერ-ჰეის, გმადლობთ, — თქვა ჟერვეზამ.

— არ ღირს მადლობად, იმ ყმაწვილკაცს კი თუ ნამდვილად გაჰყვებით ცოლად, მოიყვანეთ და მაჩვენეთ.

ჟერვეზამ უხერხულად ჩაიცინა, გამოეთხოვა და ფრთებშესხმულივით დაბრუნდა ჰარტლეიში.

შტაბში, თავის მაგიდაზე პატარა ბარათი დახვდა, მისტერ ელისონს დაურეკეთო.

ჟერვეზა ტელეფონთან ჩამოჯდა და ნომერი აკრიფა.

— ყური მიგდეთ, მისს რობერტსონ, — ჩაესმა ყურმილში. ელისონის ხმა — ერთი-ორი სიტყვა მინდა გითხრათ იმ ხალხზე, ვისაც ის პარკი და ტბა ეკუთვნის. მე რომ თქვენ ადგილას ვყოფილიყავი, იქ ახლა ფეხს არ მივადგამდი.

— რატომ?

— მომისმინეთ ბოლომდე. გახსოვთ, რომ გითხარით, სახლის პატრონს ვაჟიშვილი ჰყავს-მეთქი ჯარში, ბრიგადის გენერალი, ღიას... ჰოდა, იგი ტუნისში დაიღუპა... მოხუცმა ლედიმ ეგ ამბავი მხოლოდ გუშინ შეიტყო.

□





### მოთხრობა

რუსულიდან თარგმნა ნინო სოფერიამ

ახალგაზრდა პროზაიკოსმა **ოლეგ ოსადჩიმ** 1973 წელს დაამთავრა მოსკოვის ა. მ. გორკის სახელობის ლიტერატურის ინსტიტუტთან არსებული მწერალთა ორწლიანი უმაღლესი კურსები და ამჟამად ცხოვრობს და მოღვაწეობს ქ. კუიბინეცში. იგი ათამდე პროზაული კრებულის ავტორია. 1976 წელს „სოვეტსკი პისატელმა“ გამოსცა მწერლის მოთხრობების მოზრდილი კრებული — „ნაძვის, თხმელისა და ვერხვის შრიალი...“

გთავაზობთ ერთ მოთხრობას ამ კრებულიდან.

მთარგმნელი

**ღ**აცხავებული კატარლა ნაპირს მძიმედ მიაღვა. შებოლილი თევზივით გამურული კატარლა სამი კვირა მიათრევდა სათავიდან უშველებელ ტივს, ახლა კი მაშვრალი კაცივით მინდობოდა ნაპირს და სულს ითქვამდა.

ტივზე ისლით გადახურული ქოხი იდგა, იქ მეტივეები ცხოვრობდნენ. შესასვლელთან ქალის საცვლები ეკიდა. იქვე პატარა ქერა ბიჭს ფეხები წყალში ჩაეყო და თევზაობდა.

— ნახვამდის, ძია! — მიაძახა ბიჭმა ხანშიშესულ, ოდნავ მოკუზულ კაცს, მხარზე ზურგჩანთა რომ მოეგდო და ნაპირისაკენ მიალაჯებდა. კაცმა უკან მიიხედა, თავი დაუკრა და გზა განაგრძო. ბიჭუნამ ზურგჩანთას გააყოლა თვალი. „მთელი სამი კვირა ჩვენთან ცხოვრობდა, ნეტა ახლა საითლა მიდის?“

კაცმა სოფლისაკენ კი არ აიღო გეზი, ნაპირს დაუყვა, მერე ტყისკენ მიმავალ გზაზე გადაუხვია. ნაბიჯი მძიმე ჰქონდა, თითქოს უშველებელ ტვირთს მიათრევსო. მიწა ამომშრალი ჭაობივით უტორტმანებდა ფეხქვეშ.

ტყეში ბინდი წამოეწია. ამ დროს უკვე ბილიკს მიჰყვებოდა. მერე ბილიკიც დაეკარგა და შამბნარში გზა ჯიქურ გააგრძელა. სადღაც ახლომახლო ნადირმა გაიშლიგინა. შემკრთალმა მიაყურადა — „დათვია თუ ცხენ-ირემი?“

ისევ მიაგნო ბილიკს და შვებით ამოისუნთქა. შეჩერდა. სიგარეტი ამოიღო და მოუკიდა, ასანთის ალმა თვალი მოსჭრა. როცა ისევ შეეჩვია სიბნელეს, მაშინლა შენიშნა მუხნარის სიღრმეში მკრთალი, მოყვითალო შუქი. „რო-



გორც იქნა... მეტყევის ჯიხური!“ გაიფიქრა სინარულით და სინათლეს მიაშურა.

კარები ღია დახვდა, სახელდახელოდ გამოჩორკნილ ჯორკოზე ბიბლიური ასაკის მოხუცი იჯდა, წეკოს აპლაკუნებდა და თავისთვის ჩხირკედელაობდა.

— ვინ არის? — მოტრიალდა მოხუცი.

— ვერ მიცანი? — გაეპასუხა შემოსული, — მე ვარ, მამაჩემო, მე!

მოხუცმა ლამპა კარს მიანათა.

— ნიკიტა!

— ჰო, მე ვარ.

— ესე იგი ცოცხალი ხარ. — ლამპის შუქი მოფარფატე ჩრდილებით ავსებდა ოთახს. — საიდან?

— ჩრდილოეთიდან, ბოროცსკი თუ გაგიგია, თევზს ვიჭერდი იქ.

— აქამომდე სადლა იყავი?

— კოლონიის მერე? ბევრი ადგილი გამოვიცვალე, — ნიკიტამ ზურგჩანთა მოიხსნა და ჯორკოზე მძიმედ დაეშვა, — კამჩატკაზე გახლდი, იქაც თევზს ვიჭერდი.

— რატომ ჩამოხვედი?

— ისე, მაინტერესებდა, როგორ ცხოვრობდით, მომენატრეთ კიდევ. შენ კი ალბათ ამომშალე ცოცხალთა სიიდან და დამივიწყე, არა?

— აბა როგორ, შენს სასახელო საქმეს რა დამავიწყებდა?

— მას მერე რამდენმა წყალმა ჩაიარა, ეჰე-ჰე? ვილას ახსოვს? — ნიკიტამ ზურგჩანთის თასმები შეათამაშა. — დედილო მოკვდა?

— დიდი ხანია. თხუთმეტი წლის წინათ. შუალამეზე მიაბარა უფალს სული. დილით ტყის შემოვლიდან რომ დავბრუნდი, ვხედავ, მაგიდის ფეხებთან წევს იატაკზე, საწოლიდან ჩამოცურებულა, გვერდით დაუმთავრებელი წინდა ეგდო, ქსოვდა ალბათ. სოფელში აღარ წამიყვანია, ეზოს ბოლოს სამი არყის ხე რომ დგას, იქ დავმარხე. ამ ეზოში გაატარა წუთისოფელი და აქვე იწვესმეთქი. მეც აქ უნდა დავიმარხო.

— დაბერებულხარ.

— სიბერეში რა ხეირია.

— სანადიროდ თუ დადიხარ?

— ეხ, რალა დროს ჩემი ნადირობაა!..

— ამდენ საქმეს როგორღა უძღვები?

— ვახერხებ. პენსიასაც მაძლევენ. იოლად გავდივარ.

შუალამეა. დამქანცველი მგზავრობის შემდეგ ნიკიტას თვალები ეხუჭება.

— ვასკა კრივოი სად არის?

მოხუცმა გაოცებისაგან პირი დაადო, წამწამები დაათახულა:

— ანიუტკაზე ანდა ეგორიჩზე აღარაფერს იტყვი?

— ვასკაზე მაშინ ხმა არ ამომიღია, განა არ იცი, მეგობრები ვიყავით, ენა როგორ მომიბრუნდებოდა.

— სტყუი! კომენდატურაში ვასკას რომ აწამებდნენ, მაშინ სად იყავი? გეტყვი, თუ გინდა, სადაც იყავი! უკანა კარიდან გაიპარე, თვალებში რომ არ შეგეხედა. ვასკამ სიკვდილის წინ ბარათი გამომიგზავნა. წავიკითხე — თვალებს არ ვუჭერებდი...



— რა მექნა ... ისე გამოვიდა ... კომენდანტი მემუქრებოდა... პირველსავე ჭიშკარზე ჩამოგვიდებ, მეკავშირეს თუ არ დაასახელებო. ფულს და ძროხას მპირდებოდა. სიკვდილი ვის უხარია? აი, შენ როგორ დაბერდი, საუკუნეს უკაკუნებ, მაგრამ რომ გკითხონ, სიკვდილი თუ გინდაო, უპასუხებ, ცოტა ხანს კიდევ მაცალეთო. მე კი მაშინ რამდენის ვიყავი? ცხრამეტი წლის, გესმის, ცხრამეტის...

— პატიოსნად სიკვდილი ჯობია...

— ისევ წარსულს მახსენებ? რით ვერ დაივიწყე? ოცდაათი წელია ტყე-ღრე ვხეტიალობ. სასჯელი მოვიხადე — გამათავისუფლეს... მეგონა, გაგიხარდებოდა ჩემი მოსვლა... სეინერზე ცოტაოდენი ფული დავაგროვე, რვა ათას მანეთამდე... ვიფიქრე, ახალ ცხოვრებას დავიწყებდით, შენ კი...

მოხუცი ჩუმად იჯდა თავისთვის ბნელ კუთხეში, სახე არც კი უჩანდა. ნიკიტამ ერთბაშად დაღლილობა იგრძნო, ქუთუთოები დაუმძიმდა, თავი უნებურად საწოლისკენ გადაუვარდა და მაშინვე ჩაეძინა. მოხუცი დიდხანს ათვალე-ერებდა შვილს, ყურადღებით უსმენდა მის ხამუშ-ხამუშ სუნთქვას.

გათენდა. სიბნელე თითქოს ოთახის კუთხეებმა შეიწოვეს.

— ნიკიტა, ადექი!

ნიკიტა შეიშმუშნა, თვალები ხელისგულებით მოიფშვნიტა და მოხუცს მიაჩერდა.

— ადექი, წასვლის დროა.

— სად?

მოხუცი კარისაკენ მიტრიალდა...

— დედაჩემის საფლავი მაინც მანახე.

მოხუცმა თავი ჩაქინდრა. მერე კარი გამოაღო, მოაჯირს დაეყრდნო და შვილს გამოსძახა:

— წამოდი!

ნიკიტა მამას მიჰყვა. ბილიკმა არყის ხეებისკენ გაუხვია.

— აი, აქაა! — მიუთითა მოხუცმა მუხის ჯვრებზე. ბალახით დაფარულ საფლავებზე ორი ჯვარი იდგა, მაღალი, საგულდაგულოდ შეკრული...

— აი, მაშასადამე, აქ წევს, — მოხუცმა ხვნეშით ამოაძრო საფლავის ბორცვიდან რძიანა.

— ეს ვინლაა? — ნიკიტა მეორე საფლავს მიაშტერდა.

— ზედ აწერია... კითხვა ხომ არ დაგავიწყდა? აქ შენი საფლავია, აი, ამ ჯვრის ქვეშ. როგორც კი გავიგე შენი უკეთურობის ამბავი, მაშინვე დავდგი. ზედავ, როგორ გაშავდა? ისე მაგარი კია, კიდევ ას წელს გაძლებს. დედაშენიც გვერდზე მოგიწვინე. მახსოვს, მოვდიოდით ორივე შენს საფლავზე და ვიდექით, ჩუმად ვიდექით ხოლმე. ის ხანდახან წამოიტირებდა...

— კი, მაგრამ, მე ხომ ცოცხალი ვარ?

— არა, სულიკო, არა! იმ ქვეყნიდან არავინ ბრუნდება. — მოხუცი ისევ დაიხარა რძიანას ამოსაგლეჯად. როცა გაიმართა, ნიკიტა აღარ ჩანდა, იგი ტყეს შერეოდა, სადაც განთიადის თეთრი ფთილები ბოლავდა.